

運

廣

目錄

- | | |
|------|------|
| 第一齣 | 家門始末 |
| 第二齣 | 剪髮延賓 |
| 第三齣 | 瑯琊就鎮 |
| 第四齣 | 辭親赴任 |
| 第五齣 | 陳敏造逆 |
| 第六齣 | 緘報平安 |
| 第七齣 | 帥閩賓賢 |
| 第八齣 | 嗔鮓封還 |
| 第九齣 | 棄官就辟 |
| 第十齣 | 姑病求醫 |
| 第十一齣 | 剪逆聞喪 |

第十二齣 諸賢渡江

第十三齣 牛眠指穴

第十四齣 卜居求安

第十五齣 藩府賀正

第十六齣 權門燈宴

第十七齣 問卜決疑

第十八齣 杜弢定計

第十九齣 新亭灑泣

第二十齣 平蠻奏凱

第二十一齣 廣州運甓

第二十二齣 太真絕裾

第二十三齣 折翼著夢

第二十四齣 手板擊鳳

第二十五齣 紉衣被賊

第二十六齣 移鎮石頭

第二十七齣 聞叛勤王

第二十八齣 夢日環營

第二十九齣 斬鳳贖罪

第三十齣 缺望招兵

第三十一齣 惜陰投具

第三十二齣 蘇峻倡亂

第三十三齣 揮塵驅車

第三十四齣 發兵助溫

第三十五齣 父子死節

運甃記 目錄

四一開明書店

第三十六齣 太真借饅

第三十七齣 彭李鬪峻

第三十八齣 蔣山致奠

第三十九齣 廬江會合

第四十齣 官誥榮封

運甓記

明無名氏箸

第一齣 家門始末

〔齊天樂〕〔副末開場〕畫堂今日歌金縷。座集貂蟬簪組。酒進霞觴。屏開雲母。次第裝今演古。徧觀樂府。盡麗曲妖詞。宣淫導頰。過眼生憎。細追尋風化終無補。暫且移宮換羽。勸君休覷做等閒儔伍。宛轉鶯喉。輕敲象板。訴出忠良肺腑。循腔按譜。漸引入陶陶醉鄉深處。潦倒金尊。暢飲娛賓主。〔問答照常〕

〔沁園春〕陶母辛勤。太尉忠義。未遇時翦髮命結賢豪。蚶鮓嗔封。牛眠指葬。范逵特薦顯東朝。羣英會。新亭灑泣。鏖戰樹奇標。心忉。錢鳳讒撓。廣南移鎮受波濤。晨昏運甓。夢飛折翼。惜陰投具。肅振參寮。太真絕裾。同心戮力。逆峻旋擒。青史昭。功成後。官封太尉。八鎮擁旌旄。

湛夫人翦髮延賓。

范孝廉薦賢爲國。

溫都督義激絕裾。

陶太尉忠成運甓。

第二齣 剪髮延賓

〔瑞鶴仙〕〔生儒服扮陶侃上〕弧矢懷樽俎。嘆銅駝荆棘。干戈旁午。英雄困塵土。奈生計蕭疎。功名艱阻。忠謀未吐。甚日邁雲龍風虎。把頰綱重振。圖形臺閣。勒銘鐘簾。〔鷓鴣天〕落落西江一布衣。未能仗劍對公車。內承孟母三遷教。腹飽陳平六出奇。悲往事。嘆

居諸。腰金衣紫待何時。男兒未遂封侯願。空負堂堂七尺軀。小生姓陶。名侃。表字士行。本貫豫章鄱陽人也。家徒四壁。學足三冬。少失椿庭。悲旣深於陟屺。長隨護室。慚莫慰其倚閭。所喜荆妻龔氏。井臼躬操。可寄蘋蘩之託。孩兒陶洪。詩書勤習。堪承弓冶之傳。朝來寒氣侵人。雪花飛墜。雖無長物。以盡冬溫。權且承顏而趨晨省。不免往母親處問寢一番。多少是好。呀。道猶未了。母親早到。

〔夜行船〕〔老旦扮陶母上〕茹蘗餐冰今已老。嗟一子尙困蓬蒿。績紉躬親。詩書勤教。終日繫縈懷抱。

〔前腔〕〔旦上〕盥漱雞鳴爲婦道。〔小旦扮陶洪上〕儘追隨重慶斑袍。〔末扮陶旺〕三

白沾衣。六花飛絮。〔合〕且把曉炊怡老。〔見介老旦〕三十餘年喪。藁砧。茅簷草舍景蕭然。終宵紡績供家食。盡日絲麻待客筵。老身湛氏。丈夫陶丹。壯歲無兒。取備小星之列。暮齡得子。欣瞻老蚌之珠。自從他棄世以來。家業中微。田園漸廢。朝餐苜蓿。寧甘藿食之貧。夜燭青藜。敢愧熊丸之教。近日聞得晉室顛危。中原板蕩。此正豪傑奮勇之秋。英雄用武之日。孩兒。你須結納賢豪。廣延聲譽。倘得鵲起。庶可螻伸。也不枉了做娘的一番教育。〔生〕謹遵母親嚴命。

〔黃鶯兒〕〔老旦〕孩兒。你韜略蘊孫吳。吐長虹。氣瓦舒。須乘時早獻甘泉賦。文參廟謨。武堪枕戈。鷹揚四海。把聲名播。〔合〕縮銅符。韓彭寇鄧。談笑樹鴻圖。

〔前腔〕〔生〕母親我壯志貫天弧。挽烏號。膽氣麤。膚功擬奏悲無路。〔旦〕婆婆。他才珍抱瑜。〔小旦〕爹爹。你藏器待沽。〔生日小旦合〕終須有日登樞府。〔合前〕

〔金瓏璫〕〔小生扮范達上〕德星光燦戶。今朝喜遂登龍。〔丑扮銀鹿隨上〕蒙瑞雪。溼驕驄。〔小生〕小生范達是也。久慕士行高名。今朝特來相訪。迤邐行來。此間已是他門首了。銀鹿。快些投刺通報。〔丑傳末報介生〕呀。母親。豫章范公路冒雪相訪。見在門外。〔老旦〕孩兒。佳客到門。況

又雪天。他既不惜訪戴之車。你豈可不下懸徐之榻。〔生〕母親。只是囊空羞澀。爲之奈何。〔老旦〕你且出去接得。我自有理會便了。〔生小生見介小生〕陶兄。久懷慕蘭。未遂斗瞻。今幸識荆。頓開茅塞。〔生〕范兄。聞風景仰。望切紫芝。冒雪先施。光生白屋。〔拜介〕

〔黃鶯兒〕〔小生〕你衝斗蔚丰姿。貫春雷名久知。如鷗鵬未展凌霄翅。荆山片瓊。滄海寸珠。輝煌定作王家器。〔生嘆介小生〕免嗟吁。扶搖直上。端的是男兒。

〔前腔〕〔生〕范兄。你彩翮奮天池。論鯁生一布衣。無端月日蒙推譽。薰蕕臭殊。雄雌路岐。須臾感訂金蘭契。我豈敢嗟吁。因風欲奮。端的是男兒。〔小生〕領教已久。小

生就此告別。〔生〕呀。范兄說那裏話。承兄遠顧。況又雪色蒙茸。小弟聊備杯酒。爲兄解寒。只是荒齋簡褻。萬勿督過便了。陶旺。快取酒殺出來。〔末〕就船買得魚偏美。隔岸沽來酒倍佳。酒殺在此。

〔梁州序〕〔小生〕冰花呈瑞。飛灰衝素。見四野同雲密布。竹籬茅舍。霎時變作瓊鋪。不覺光搖銀海。凍合玉樓。此際寒威播。翔空鸞鶴也。綴庭柯。古往今來題詠多。〔合〕欣下榻。攄情慄。勝笙歌鼎沸喧朱戶。當此景。卽蓬壺。

〔前腔〕〔生〕山谿雲暗。柴扉冰堞。彷彿瓊螭鹽虎。祥徵六出。八荒胥慶。時和分。明是蝶遺粉翼。鶴墜霜毛。管取來春富。豐年宜瑞。也不宜多。爭奈長安貧者何。

〔合〕蒙枉顧。攄情慄。愧笙歌繚繞環朱戶。當此景怯冰壺。

〔前腔〕〔小生〕歎洛陽傾圮。榛蕪痛聖駕。蒙塵驕虜。恨金甌莫固。寶鼎誰扶。遙想那微臣遭詬。庶女含冤。上感皇天怒。今日也想必如此。餐毡北海也表臣模。今日忠良還有麼。〔合〕欣下榻。攄情慄。勝笙歌鼎沸喧朱戶。當此景卽蓬壺。

〔前腔〕〔生〕既王家骨肉殘。誅憾寮。案沐猴狂舞。誰搜羅巖穴。甄拔熊羆。暗想那闔門高臥。披氅閒行。多少英雄苦。太阿顛倒也。竟如何。忠義如今半隱釣屠。

〔合〕蒙枉顧。攄情慄。愧笙歌繚繞環朱戶。當此景怯冰壺。〔小生起介〕銀鹿。你把

馬喂好了麼。〔丑譚介〕這樣雪中。那里有料。方纔一條褥子。喫得乾乾淨淨。〔小生〕怎麼說。〔丑〕方

纔承陶老安人把牀上一條新薦。到來喂了。〔小生〕有這樣事。世間有此賢母。難得難得。〔丑〕哎。相公。還有一件。不好說得。〔小生〕怎麼。〔丑〕你道是洒殺那裏來的。那老安人見相公在此。無可措置。

剪自己頭髮。把陶旺換來的。〔小生驚介〕阿呀。非是母不生是子。〔轉身介〕陶兄。

〔節節高〕〔小生〕高情海內無。聽奚奴。方纔小价說。你北堂截髮供榛脯。世上有此賢德之母。小弟既忝與仁兄傾蓋交歡。敢請令堂一見。〔生〕陶旺。你可扶老安人出來。說范相公要見。〔老旦出見介〕小生〕真賢母。棄髮膚。供吾哺。今宵幸把芳儀覩。共姜孟母真堪附。〔老旦〕小兒荷蒙寵臨。老妾不勝感戴。區區髮縷。何足道哉。〔生〕母親先請進去罷。〔小生合〕明朝早入豫章城。游揚緩頰傳當路。

〔前腔〕〔生〕清宵愧簡疎。聽銅壺。麗譙漏下將三鼓。情偏夥。雪滿壚。燈花墮。願君暫息蒲團臥。晨興再把衷情吐。〔合前〕

〔尾〕光陰瞬息如駒過。〔生〕盼前程音信杳無。〔小生〕竚看徵書下九衢。

〔小生〕邂逅班荆結故知。〔生〕荒齋岑寂意何如。

〔小生〕正是與君一夕話。果然勝讀十年書。

第三齣 瑯琊就鎮

〔夜游朝〕〔小生扮瑯琊王上〕玉葉金枝瓜瓞永封青社海岱稱雄。皇路多艱。闕牆頻搆。愧擁節旄南控。昨土東藩列翰屏。慚無雅譽動公卿。今朝復濫專征節。葛藟還思庇本根。自家瑯琊王睿是也。裔本華宗。名高瑞牒。翦桐蒙戲。分服邊陲。訓梓承華。馳情殿闕。爭奈國步艱危。乘輿遷播。河間東海。長沙成都。喋血禁庭。推刃同氣。孤方扈蹕。慮介覆車。以故微服潛歸。退守舊服。所謂知己不辱。從權遠禍。幸蒙聖上不加督過。反封我爲安東大將軍都督揚州諸軍事。持節鎮守建康。寵遇可謂厚矣。只是德縣才薄。無以酬答主眷。爲之奈何。且待王青州與王司馬兄弟到來。商議起程便了。

〔前腔〕〔淨扮王敦上〕腹飽韜鈴承上寵。專征討遠護黃龍。赳赳熊威。桓桓虎略。絕世兵權稱重。

〔前腔〕〔外扮軍司馬王導上〕識闇才庸羞賈董。參帷幄兼贊王躬。契合堂簾。歡同魚水。何必誦詩規諷。〔見介淨〕少小豪雄扈六飛。今朝仗節鎮名畿。〔外〕國門鹵簿森戈戟。專望龍孫駕鳳輿。〔淨〕下官王敦是也。〔外〕下官王導是也。蒙瑯琊王收我二人。置之幕府。今日吾王

奉詔南遷。須索扈蹕。此間已是轅門了。不免逕入。大王。王敦王導參見。〔小生〕二位大夫少禮。二位大夫。孤家欽承朝命。渡淮開闢。顯候到來。商議起程。但是任大責重。如何是好。〔外〕呀。殿下。芬超棣。尊德美珪璋。詞麗小山。不數淮南好學。胸羅武庫。堪齊子建才華。總帥攸承。匡扶寶賴。何乃自謙。今日黃道吉辰。就請殿下升駕。〔衆將官見介小生〕今日既是吉辰。就此起程前去。

〔普天樂〕虎符懸。龍旌捧。紫泥鮮。瑤圖鞏。輕帆送。輕帆送。青雀黃龍。鎮雄圖。石壘金墉。〔合〕呀。聽鉦聲喧闐。旌旗映日紅。似憑虛御風。千里千里直抵江東。

〔北朝天子〕歷彭城。呂梁。過鍾吾。古塘。聽濤聲。洶洶如雷壯。牙檣錦纜。挽龍舟。兩廂駕清波。乘輕浪。馬軍兒幾行。步軍兒幾行。濟濟鏘。濟鏘濟鏘。一隊隊。刀鎗明晃。刀鎗明晃。蔽津涯如屏障。蔽津涯如屏障。

〔普天樂〕棖花榮。君恩寵。荳萁燃。干戈動。蕭牆內。蕭牆內。骨肉交攻。挾皇輿。披棘蒙茸。〔合前小生〕前面是那裏地方了。〔衆〕前面是寶應地方了。〔小生〕分付衆軍校。將戰船把

大船幫定。方好過湖。〔衆應介〕

〔北朝天子〕涉汝淮淼茫。際巽湖射陽。想漢沈白馬在波心放。艤艫巨艦。護餘皇直上。沸笙歌。聲嘹唳。文鴛兒幾雙。白鷺兒三兩。隱隱颺。隱颺隱隱颺。一對對

往汀洲相傍。汀洲相傍。玩景物神情暢。玩景物神情暢。〔衆稟〕稟大王爺。前面是

揚州督府了。〔小生〕叫衆將官傳令。城中一應官員。俱赴建康相見。大舟不必停泊了。〔衆應介〕

〔普天樂〕樹牙旗。維揚重建麾旄。軍容動。揚舫下。揚舫下。頃刻江淙。見金鰲獨湧華峯。〔合前〕

〔北朝天子〕望天連水光。見山橫波蕩。正江心後浪催前浪。石頭雄踞。聚貔貅。虎狼喜今朝。歸橐鞬。看瑯琊渺茫。想洛陽悒悒。慨慨慷。慨慨慷。慨慨慷。振皇靈把中原反掌。凱旋歌齊聲唱。凱旋歌齊聲唱。〔衆稟介〕稟大王爺。已到建康了。請大王爺升

駕。〔小生外作登岸介〕

〔普天樂〕鳳凰臺。浮雲拱。燕子磯。烟巒湧。忙開漇。忙開漇。虎帳團營。坐王家十乘元戎。〔合前〕

〔小生〕建牙開纛鎮東吳。

〔外〕佐策堂堂禰廟謨。

〔衆〕親扶日轂還天闕。

方表璇源烈丈夫。

第四齣 辭親赴任

〔薄倖〕〔生上〕兔走咸池。鳥飛暘谷。恨命逢陽九。運遭百六。誰知唾手功名。畢竟空成蕉鹿。怎能設策身廊廟。頓使甘霖隨化轂。暑往寒來春復秋。朝經暮史蘊紆籌。

英雄未奮凌霄翮。空望南冠泣楚囚。小生席珍待聘。藏器須時。爭奈塵埋。未逢鑑識。譬之劍沈豐獄。驥伏鹽車。前日偶遇一相者。說我左手中指有豎理。當爲三公。貴不可言。那時節我以針刺之。見血灑壁上。果然成一公字。人皆詫以爲奇。我想起來。今日這般寒苦。怎能個到那田地。咳。正所謂臣老而帝好少。命奈之何。賣漿而天值寒。時不我與。好生傷感人也。〔丑扮老人持帖上〕日日奉公差。兩脚都奔壞。圖裏有申頭。便是好買賣。迤邐行來。此間已是陶家門首。待我咳嗽一聲。〔嗽介〕門上有人麼。〔末〕那個。〔丑〕我乃本縣坊長。縣主老爺特地差來宅上報喜。〔末〕本縣差坊長下帖報喜。〔生〕這妮子見我憂悶。故意調謊。〔末〕果然在外。男女怎麼敢謊。〔生〕旣如此。快請進來。〔見介〕大

人賀喜。〔生〕有何喜事。〔丑〕大人還不知道。方今寇盜憑陵。朝廷下詔徵賢。本縣將大人名字。申報上司。見除武岡縣令。早間報到。縣主老爺特差小子到宅傳達喜信。不日有了文憑。就送冠帶來了。多多拜上。還要面賀。〔生〕原來如此。請坐告茶。〔丑〕不敢。小子就此告別。〔生〕這等有勞了。陶旺取回帖與他。〔末〕一子受皇恩。全家食天祿。帖在此。〔生〕坊長。多多拜上大爺。我還要自來親謝。〔丑〕噫。謹傳公相命。回覆俺恩官。〔下生〕陶旺請老安人出來。〔老旦旦小旦同上〕

〔出隊子〕〔老旦〕皇恩鳥奕。聞報令人心意懌。儒冠今喜進賢易。韋布一朝承黼黻。台鼎勳名。錐囊脫蹟。孩兒聞得你上司薦辟。除授官職。這也是祖宗有靈。家門有幸。可喜可喜。〔生〕全賴母親教育之恩。

〔女冠子〕〔生〕諄諄慈命課昕夕。繼晷焚膏。斷機丸墨。筐笈饒經籍。鞵橐餘韜戟。今日裏步毛生捧君檄。喜孜孜北堂中把愁顏頓釋。

〔滴滴金〕〔旦〕文鸞綵鳳諧琴瑟。燕子飛鸚比翼。而今幸沐君王澤。相公怕忘了糟糠室。心中暗憶。頃刻間把釵分鏡拆。奈蔗景親年。提起柔腸寸織。

〔畫眉序〕〔小旦〕嚴親受祿食。北闕絲綸耀蓬華。喜屠垣游刃。得批款郤烹鮮。奏卓魯勤勞。買犢比朝歌劇劇。〔合〕竚看保障綏懷遠。謾道鳳鸞棲棘。〔衆扮賚文憑冠服上老旦旦小旦下〕

〔啄木兒〕〔衆〕抱文憑傳袍笏。向寒門塵埃物色呀。此間是陶家門首了。不免逕入。〔生更服謝闕介〕草莽微臣蒙寵溢。難報效聖明德。盜息潢池責方塞。政溥甘棠

民甫戢。三載瓜期覲京國。願鞏固皇圖垂拱極。陶旺。分付安排茶飯。管待來人。就請太奶奶出來。〔末領衆下老旦旦小旦復上生〕母親請上。待孩兒拜謝。

〔二段子〕恩深撫恤。謝萱闈動手澤。夫人。下官也有一拜。情深愛密。謝鴛幃襄朝夕。〔小旦〕爹爹請上。孩兒也有一拜。〔生〕孩兒。你把芸編蠹帙。細鑽研莫辭辛力。陶旺。你把行囊疾忙收拾。早晚雙鳧飛楚邑。

〔鬪雙雞〕〔雜扮接官人上〕長沙路。長沙路。關山遙歷。鄱陽縣。鄱陽縣。今朝始及。畫鷁遙飛江磧。翹首看深林故宅。頃刻間傳達上迎新文檄。〔衆見介磕頭介〕太爺

分付。本處缺官。盜賊猖獗。稟老爺。速請上任。〔生〕知道了。陶旺。你帶領各役。點檢行李下船。待我拜別了太夫人。就此起程。〔末衆下老旦旦小旦復上〕

〔憶多嬌〕〔生拜別介〕母親。我膺瑣秩。心耿悒。符分百里。輕去膝。你景逼桑榆。教我情怎釋。〔合〕路岐南北。岐路南北。千里迢迢。遠適。

〔前腔〕〔老旦〕孩兒。你蒙主職。須努力。臣忠子孝。難兩得。莫爲我年高生悲戚。〔合前〕

〔鬪黑麻〕夫人。我暫卸卻斑衣。去鈐楚邑。定省晨昏。何由侍側。你循婦道。還與我兼子職。寒勸加衣。飢頻進食。〔合〕征勦已集。拜辭偷淚滴。只爲雞肋功名。雞肋功名。把北堂香隔。

〔前腔〕〔旦〕相公。我做媳婦。承姑會。須竭力。你做丈夫。居官豈容曠職。〔小旦〕爹爹離別去。叫我魂繞膝。權假花封。矢忠報國。〔合前〕

〔生〕孤身遠別赴昭陽。
〔老旦〕莫把閒心戀故鄉。

〔旦小旦〕今朝兩下輕離合。

〔合〕一種愁牽萬里長。

母親請進罷。〔老旦旦先下小旦〕孩兒還送爹爹一程。〔生〕我兒也不消送了。〔生弔場末衆上生〕叫左右。人夫都齊備了麼。〔衆〕都齊備了。專候老爺開船。

〔朝元歌〕江城楚城路遠長流互。山程水程風急征帆迅。你看鴻蹲洲渚鷺宿沙汀。浪裏浮沈鷗影搖拽心驚。翩翩此舟一羽輕。浩蕩浸雲根。烟嵐沒遠村。

〔合〕浪恬波靜。指日到武岡之任。武岡之任。

〔前腔〕回首家鄉隱隱。山巒列翠屏。碧水練如澄。見石壁巉巖蒼林掩映。浴日吞天勝景。野渡舟橫。兩兩漁翁晒網晴。江漢憶神京。瀟湘戀白雲。〔扮駙丞上〕長

沙駙丞接老爺。〔末〕起去。〔吏〕禮房吏請到任日期。〔生〕分付他明日月忌。後日上任了。〔合〕

浪恬波靜。早已到武岡之任。武岡之任。〔唱下〕

第五齣 陳敏造逆

〔賀聖朝〕〔淨扮陳敏上〕天假輿圖傾覆。英雄得肆奇謀。手持三尺定神州。大業

唾歸吾手。三十年前學六韜。英名常得譽時髦。機乘國難披金甲。亂集亡徒弄寶刀。臂硬尙嫌弓力軟。眼明猶識陣雲高。何時得遂龍飛願。不負西江一世豪。自家陳敏是也。出身餘汗。起家孝廉。鐵馬金戈。素志欲踏平社稷。龍韜豹略。幾番思攪亂乾坤。雖蒙薦舉。職授金吾。只是大受未膺。豈甘小就。吾想將起來。識時務者方爲俊傑。侯王將相。寧有種乎。目今晉室。強宗屠戮。胡馬奔騰。主勢孤危。自顧不暇。縱爾問鼎稱雄。誰敢興師鞠旅。況且奮臂一呼。豪傑四起。不若趁此機會。幹圖大事。據有一方。不受節制。正所謂江東雖小。亦足以王。怎奈司馬睿受命遠來。鎮守建業。我那時只索閉門堅拒。不放入城。一時淺見。放他進來。真是六州鐵鑄不成。這個錯字。雖其人孱弱。不足爲憂。然一穴豈容兩虎。一方豈建二旄。吾意欲遣孩兒陳恢。遠徇許昌。以爲遷都之計。且待他出來。商議便了。

〔前腔〕〔丑上〕頭上朱纓貫斗。腰間紫電橫秋。圖王定霸御龍樓。肯落他人之後。天助龍興產異材。森森劍戟擁門楣。深謀淵邃藏江海。逸氣縱橫掣電雷。父王孩兒陳恢見。〔淨〕孩兒少禮。孩兒吾劍飛清海。望鍾嶺以龍蟠。弓掛天山。挾石城而虎踞。自謂雄圖已就。大業可成。長江以南。盡歸掌握。前日司馬睿孤軍遠來。只宜峻拒。一時見錯。許他入城。雖其人柔懦。不足爲憂。然臥

榻之側。豈容鼾睡。倘有舉動。必成掣肘。吾意欲撥兵一枝與你。攻陷許昌。上之則竊窺荆河。可以圖成。次之藉以頓甲休兵。自保營窟。你的意下何如。〔丑〕父王所見甚妙。〔淨〕孩兒。你聽我道來。

〔宜春令〕我年華邁。髮鬢秋。論人生誰長黑頭。袞衣黃纛。生平自許探懷袖。蜂屯聚虎將熊兵。龍窟據天長地久。〔合〕且長驅直擣荆湘。一統金甌。

〔前腔〕〔丑〕我謀猷勇。膽氣優。幸遭逢生居孟侯。月弓星劍。千回不弱蛟龍鬪。指顧間霧罩雲籠。呼吸處風飛電走。〔合前淨〕大丈夫不能流芳百世。亦當遺臭萬年。吾兒。

今日黃道吉日。就此起兵前去罷。〔丑〕謹領父王嚴命。叫大小三軍聽我號令。鎧仗要鮮明。戈劍要犀利。弓矢要長勁。火器要齊備。凡遇行舟。順風揚帆。逆風列寨。前後瞻顧。左右翼蔽。如有參差不齊者。斬。兩軍相敵。須火器在前。弓弩居後。有進一尺。無退一寸。臨陣退後者。斬。夜晚安營。須尋寬港岸。有平陽隨地。柵守四噪。巡邏謹防。游卒違令失機者。斬。今日黃道。即便起程。務要先下許昌。次平漢。沔。事成之日。論功爵賞。休得違令。〔衆〕得令。〔丑別淨行介〕

〔豹子令〕百萬貔貅咸猛吼。咸猛吼。鱉鼉戰舸鎖江流。鎖江流。王氣東南天數

偶須知馬鼎屬吾收。屬吾收。管教一舉。一舉定荊州。定荊州〔下〕

第六齣 緘報平安

〔末上〕桃李無言花滿城。印文生蘚訟庭清。雨餘綠野人耕樂。月照花陰犬臥寧。自家乃陶老爺衙內陶旺是也。俺老爺彩筆生花。清標貫玉。民安事集。錦裁百里春風。政暇心閒。琴弄一簾晝日。真個是試牛刀於雞割。令名不數桐鄉。旋驥足於蟻封。政績誰誇單父。只是因老夫人在家。日夕掛念。前日欲差我回去問安。連日又因鄰縣文書到來。說有峒賊攪擾。因此修築城池。戒嚴鈴柝。是以稽遲。昨日聞已平靜。早晚回衙。想就修書差我回去也。正是壺觴調笑平民訟。梧捲懷憂念母劬。道猶未了。老爺回衙了。

〔高陽臺序〕〔生上〕紫苑羈身。都梁滯迹。晨昏甘旨多缺。夢遶親闈。悵望白雲愁結。桑榆蔗景應難久。徒歎息望門心切。何時得彩衣重舞。寸心方愜。

〔前腔〕功名休論工拙。謾倩憑雙鯉。暫把孝心傳達。水遠山遙。豐稔災祲良別。全記取揮毫片楮。博慈顏一時歡悅。淚盈盈萬千情緒。畫描難竭。花縣啣泥一載。

餘。晨昏徒自憶。泉魚悲瞻客路三千遠。痛念人生七十稀。腰下望懸蘇季印。箠中空冷老萊衣。歸期未卜添惆悵。題起高堂淚溼裾。下官洼任以來。又經一載。官常碌碌。惟知殉國身輕。親舍迢迢。空憶報劉日短。君親本是一道。筋仕者豈可不顧其家。忠孝固難兩全。居官者寧容遽忘其母。前日欲差陶旺回去探候母親消息。因有賊警。是以稍遲。今日且喜閒暇。不免修書一封。打發他去便了。陶旺取紙筆過來。〔末〕洗硯魚吞墨。烹茶鶴避烟。文房四寶在此。

〔高陽臺〕〔生〕蠶繭纔舒。狼毫輕揭。睽違兩字先列。寸剡柔腸。滿紙淚珠流血。心熱。蝸角蠅頭羈絆也。辭親舍宦途勞涉。細思量辭劉徐庶。孝心堪悅。

〔前腔〕〔末〕聽說。老爹。你化洽江濱。民歌召杜。休把宦情灰滅。年老萱闈。料賢母自能承值。非別。你蘭臺畫省方發軔。行看取五花封秩。況親奉明廷檄旨。豈你自相輕撇。

〔前腔〕〔生〕差迭。慈壽彌高。風前燭影。忍使愛疎情擘。中饋雖供。爭奈我夢魂飛越。你親達道。孤身去膝經年久。一日裏腸迴九折。望伊家殷勤細語。不妨饒

舌。陶旺。你對老夫人說。我在此一清如水。無物可寄。止有蚶鮓一瓶。聊供一餐甘旨。衙裏無人。你就請大相公同上來。須早去早回。〔末〕理會得。

〔前腔〕拜別。謾離官衙。暫辭主側。遙望故鄉。遮絕宿水餐風。敢畏征途蹀躞。〔生〕諄切。你魚書急遞高堂也。把征驂即時轉撥。休勞我心旌無定。感懷增盡。

〔尾聲〕〔合〕臨風含淚添悲咽。翹望你佳音早掇。但願親安心始悅。

〔生〕北堂一別又經春。

〔末〕千里長途杳信音。

〔合〕欲見無由空引睇。

緘書如淚寄江鱗。

第七齣 帥闖賓賢

〔鳳凰閣〕〔外上戎服扮劉弘〕官居楚帥。七澤三湘襟帶懷。時寤寐棟梁材。無奈鴻冥增慨。後車徒載。甚日得買駿金臺。〔滿江紅〕雄控荊州。占江北江南第一。須信道蛟

龍雲雨。英雄窟宅。羽書鳴鏑警常聞。揚鞭靜折愁無策。嘆從來草澤只聞名。難相識。置兔隱。谷駒逸。

遜革堅。漸儀式。奈愁腸寸剜。倩誰分力。漢家衛霍已難尋。戰國孫吳猶未得。謾從今一點在心頭。空成憶。自家荊州刺史劉弘是也。三尺青萍。素負斬邪之志。一腔赤膽。每懷報國之忠。只是將傾大廈。非一木能支。胥溺神州。豈隻手可援。如之奈何。徧觀部下從事。皆碌碌庸流。瑣瑣凡輩。一遇分行郡縣。便思騷擾地方。故吾每逢興發。只以書付守相。以故上下相安。人心感悅。所謂一紙書賢於十部從事。這也不在話下。目今海內多故。缺少將才。前日行文各處徵聘。爲何還不見到來。倘一旦有急。如何是好。正是拊髀思頗牧。那得終軍爲請纓。

〔玉井蓮〕〔小生扮范逵淨扮賈儒上〕纁帛招徠。咫尺轅門冠蓋。〔小生〕小生豫章范逵

是也。〔淨〕小生襄陽賈儒是也。吾輩俱蒙劉公辟召。且喜已到帥府門首。不免着他通報。咄。門上長官。我們是你老爺辟召來的。煩你通報。〔報介外〕道有請。〔見介小生〕大人請上。待逵等參拜。〔外〕路上辛苦。不消拜罷。叫左右看坐。〔告坐介外〕二位以隋珠卞璧之珍。擅繡虎雕龍之技。武能戡亂。文足經邦。辱不鄙夷。光生蓮幕。此老夫之幸也。〔小生淨〕呀。老大人蘊濟世安民之具。控雲夢荆河之雄。緩帶輕裘。綽能制勝。投壺雅詠。不廢奉公。自足紆緯於褰裳。何必取材於襪線。幸承寵召。實玷

枚求〔外〕叫左右快備便飯。與二位尊相洗塵。

〔駐馬聽〕〔外把盞介〕二位。你壁豎風裁。蓋世真儒臥草萊。分明是珠沈滄海。玉韞荆山。劍穢黃埃。奇韜遠略運靈臺。長狐封豕誰無賴。魚水和諧。喜今朝稅駕。使我不勝欣戴。

〔前腔〕〔小生淨〕樛櫟庸材。深荷玄纁類卜枚。真個是砒砒眩玉。魚目疑珠。駑驥相猜。處囊露穎冀今來。紓籌補袞終何待。倒屣開懷。喜今朝瞻範。使我不勝顛戴。〔小生〕老大人。小生還有一言拜稟。大人今日此舉。正是九九見收。以達爲招士之隗。但范達溝中朽斷。鄧野攀株。無能棟梁清廟。待斲工師。惟有薦賢一念。可以少報萬一。達之鄉里。有鄱陽陶侃。他胸藏萬斛珠璣。筆灑九天雨露。志適簞瓢。勁節超塵獨邁。忠彌宇宙。英姿絕世無雙。用之將帥。必能扶弱鼎于安瀾。委以一方。定可起疲民于衽席。眞命世之奇材。匡時之偉彥。願祈物色。以助朝廷。

〔前腔〕〔外〕聽說顏開。今日欣聞命世才。忙把安車遠聘。筐篚將誠。玉帛爲媒。只怕他隱鱗卜築友伊萊。藏珍屠保甘恬退。盼望縈懷。倘得他從聘。使我不

勝欽戴。〔扮探子上〕

〔賺〕報報報。賊勢轟雷。舟楫橫江蔽兩涯。〔外〕他那里打什麼旗號呢。〔探〕道陳恢。〔外〕

他那里有多少人馬呢。〔探〕他雄兵十萬塞川來。〔外〕敢不是賊兵。〔探〕謾疑猜。沿途擄

掠爲民害。已過潯陽近廣梅。聲驚駭。望老爺。疾忙遣將牢防備。莫教耽待。莫教

耽待。〔外〕曉得了。賞他一罍酒。一控羊。免他三個月差去。〔探下外〕范先生。原來陳敏這斷無知造

逆。適承見教陶公。他既係文武全才。必能驅馳國難。目今江夏缺守。老夫一面保奏。就舉他爲江夏

太守。煩足下爲老夫賈書一函。持節一道。白金十斤。彩幣四對。連夜促他就道。千萬千萬。〔小生〕謹

領台旨。〔淨〕賈儒有言拜稟。儒聞陶侃與陳敏同郡。又係同舉。倘彼重維桑之誼。懷共事之情。則江

夏必非吾有。是荊州無東門矣。大人迺謬信一人之言。而輕棄數百里之郡。竊謂大人不取也。〔小

生〕賈斯文。吾聞申胥絕交。抱泣秦庭。吳起殺妻。求爲齊將。爲天下者家且不顧。足下以區區粉榆

之迹。而疑高賢大良。不亦鄙乎。〔外〕不必多言。老夫自有定見。〔小生〕近聞陶兄現任武岡縣令。用

違其才。此去長沙。路又不遠。范達常奉領徵聘禮儀。竟到他任所便了。

〔前腔〕〔小生〕五馬蒙推。他報國攄忠已有階。分明是蛟龍得水。鷓鴣乘風。桃李逢栽。他封鯨掃獬綽安排。分猷保障身名泰。塗炭爲災。若得他經濟。使我不勝歡戴。

〔小生〕南山玄豹久藏名。

〔外〕一遇曹□□化騰。

〔淨〕正是應時還得見。

〔合〕果然勝似岳陽金。

第八齣 嗔鮓封還

〔謁金門〕〔老旦上老旦〕庭院靜。簷外落花鋪徑。游子黔中初製錦。頓教勞夢寢。

〔旦〕淡掃蛾眉無暈。堪嘆鏡鸞分影。〔小旦〕思念嚴親悲路迴。愧溫衾扇枕。

〔卜算子〕〔老旦〕百里宰花城。別去經年永。獨倚門閭盡日看。信沒些影兒。〔旦〕翹首盼行雲。暗把

金錢問。〔小旦〕日日簷前鵲噪聲。試過俱無準。〔老旦〕媳婦自從你丈夫去後。不覺已是一年。怎麼

再沒有一個信回。不知近來官況如何。使我不勝懷想。〔旦〕婆婆不必愁煩。昨夜銀缸結蕊。今朝蛛

喜當門。想必早晚有個信到也。

〔桂枝香〕〔老旦〕莫不是簿書叢駭。莫不是在苒苒多警。空瞻雁過衡陽。並沒魚投鄉井。這情事未明。這情事未明。鵲聲休聽。燈花難准。細沈吟。心隨江水流千里。眼望家書抵萬金。

〔前腔〕〔旦小旦〕我想他望雲遙省。臨風懷耿。多只爲案牘勞形。因此上稽遲芳訊。這情懷可矜。這情懷可矜。他孝同曾閔。怎肯把心如蚱蜢。婆婆。你免沈吟。他晨昏都被儒冠誤。我朝夕須操井臼勤。

〔不是路〕〔末懷書持鮮上〕一別岡城。跋涉程途已兩旬。我身勞頓。今朝喜得到門庭。〔小旦〕是何人。〔末〕小人回來了。〔小旦〕原來是陶旺。〔末〕問關千里傳家信。春燕還將舊壘尋。〔小旦〕快進去。老夫人在堂上。正在那里煩惱。〔末〕將衣整。急投堂上休遲等。〔小旦〕婆婆。母親。陶旺回來了。〔合〕不勝歡慶。不勝歡慶。〔末〕老夫人。夫人。陶旺磕頭。〔老旦〕陶旺。老爺一向好麼。〔末〕老夫人聽稟。

〔前腔〕老爹呵。政簡刑清。盡日公堂撫宓琴。臺如鏡。月明無犬吠。花村。他爲功

名。白雲親舍常思忖。匏繫無能慰倚門。教傳稟。一瓶蚶鮓聊供進。〔老旦怒介〕呀。

這東西從那裏來的。〔末〕這是武岡土儀。〔老旦〕哇。怕不曉得是土儀。一羽一鱗。皆上天生命。一絲一粟。亦下民膏脂。豈不聞裴寬瘞鹿。羊續懸魚的故事乎。哎。轉令心悶。轉令心悶。

〔掉角兒〕想兒曹未諳官箴。輕冒入苞苴行逕。全不思秋月冰壺。枉費我朝提暮訓。指望他畏四知。來二異。飲投錢。騎留犢。徹底澄清。〔合〕完瑜蒙磷。白璧點蠅。傳與他急須謹守。莫污廉名。

〔前腔〕〔旦〕陶旺。你對老爹說。論居官須忠慎清勤。論立政須仁慈詳敏。論禔躬須持謙戒盈。論撫衆須哀矜憐憫。若得他賦兩岐。歌五袴。誦神君。稱召父。方顯賢能。

〔合前末〕老夫人請息怒。小人還有一言上稟。老爹臨行時分付小人說。衙裏無人。就請大相公一同上來。〔小旦〕呀。婆婆在上。孫兒一來年幼。難涉路途。二來婆婆在堂。無人侍養。雖則母親在側。足奉寒暄。但日逐薪水之類。俱取辦在外。恐孫兒一去。早晚不便。因此不好去得。〔老旦〕咳。說那裏話來。你庭趨久缺。詩禮之教罔聞。就養既虛。左右之方安在。休辭路迥。當聽父言。況家中無事。婦姑儘

可相依。一應薪水。所費不多。鄰居王媽媽頗是賢慧。我時常勞他一買便了。不必掛懷。〔小旦〕哎。父
召既不可違。祖命又不敢逆。只是放母親不下。如何是好。〔作悲介老旦〕我兒不要啼哭。媳婦。你快
同孫兒進去收拾行李。就把些見成茶飯與陶旺喫。待我寫書打發他去便了。

〔解三醒〕嘆衰齡把兒嚴訓。教兒圖遠大功名。比似今初出仕時。就把清操涵。
又安望報最循良。姓字馨兒。你只道臨羹不食。思歸遺反。教我見鮓生。嗔淚暗零。
〔合〕還思省。那些三個懸魚羊續。不愧廉平。

〔前腔〕你何不學貪泉。忍渴宣尼聖。何不學合浦還珠。漢孟生。何不學拔葵守介公。
儀相。何不學拾李還鄰。宋就卿。兒。你難道肥甘適口。非關節。又誰知腊毒招尤。反損
名。〔合前旦小旦末同上老旦〕行李都收拾了麼。〔末〕收拾完備了。〔老旦〕既如此。你收了這書與鮓。
送還老爹。說下次再不可以官物污我。〔末〕嘎。〔旦〕陶旺。大相公從來不會出門。你路上須要小心
照管哩。〔末〕理會得。〔旦〕我兒過來。別了婆婆去罷。

〔尾犯序〕〔小旦別介〕聞召赴椿庭。欲盡子情。敢違親命。黃口微軀。怎禁勞攘風。

塵悲哽。最苦是祖闈年老。最苦是萱堂受辛。生離別。肝腸刺斷。血染淚珠傾。

〔前腔〕〔老旦〕泣別嘆伶仃。縫線難堪更含飴。怎忍我姑婦相依。況值高年邁齡。傷情指望你蘭蓀繞護。到如今橋梓飄零。思量起。龍鍾淚眼。猶自溼沾襟。

〔前腔〕〔旦〕夫去鏡鸞分。弱冠嬌兒又將遠途勞頓。浪跡萍蹤。何年音信相聞。思省他那裏膝前有子。我這裏舉目無親。空惆悵。相思兩處。一樣淚盈盈。

〔前腔〕〔末〕大相公。畫鷁泊長亭。你急別慈闈早乘潮汛。辭家就父。何必惜別丁。寧天幸。但願得程途安穩。但願得衙舍速登。情到處。不堪回首。分付與東君。大

相公。稍子等候多時了。快請行罷。

〔鷓鴣天〕〔合〕骨肉團圓一旦分。萬千心事向誰論。當初只嘆兒離母。今日重添祖憶孫。〔小旦末先下〕空望斷。楚江雲。征途冉冉夢魂驚。正是臨歧不敢高聲哭。只恐哀猿不忍聞。〔老旦旦下〕

第九齣 棄官就辟

〔一翦梅〕〔小生〕細柳啣書聘故人。辭別荆城。漸近岡城。〔丑〕捧行李上。弓旌玉帛。遠相迎。歷盡風塵。始見芳塵。〔憶秦娥〕〔小生〕雲漠漠。斜陽古道西風惡。西風惡。胭脂滿地。丹楓零落。征車渺渺穿林薄。路迷迷路增離索。增離索。楚溪山水。碧湘樓閣。下官奉新城公命。來聘陶士行。跋涉辛勤。不辭勞勩。且喜已到長沙地方。相去寶慶不遠。小校快些趲行。〔丑〕范老爹。那陶老爹不過一個縣官。我們爺怎麼這樣敬他哩。〔小生〕你不曉得。昔者侯嬴國士。涸迹夷門。衛青大將。廁身奴隸。故信陵不憚虛左之迎。漢武終有專征之命。那陶老爹若遇當時。早已封侯拜將去了。豈但區區宰此一縣。天色將昏。快些行走罷。〔下〕

〔菊花新〕〔生上〕一官寥落誤儒紳。柄鑿方圓。迥世情。直道不容人。寧棄朝簪歸隱。親舍遙瞻。宦況輕。一腔心事向誰論。傲骨自憐。違俗好。剛腸誰與世浮沈。寧同直道甘三黜。肯學依阿笑獨醒。莫爲南冠能繫我。琵琶別抱過知音。下官自從前日打發陶旺回家。懸望隴音。比日爲歲。近日詣府。謁見呂公。耐耐他一味糊塗。惟愛趨奉。直道不容。如水投石。吾想將起來。枳棘非鸞鳳所棲。百里豈大賢自命。與其媵媵媚。強顏事人。孰若遠舉高飛。投簪解綬。且待陶旺到來。收拾

回去。再作道理。

〔前腔〕〔小旦末上〕遠承親命詣花城。回首家山魂夢驚。〔末〕跋涉已經旬。喜到公庭展覲。大相公。這是私衙門首了。就請進去罷。〔見介小旦〕爹爹久違嚴範。日夕縈懷。今喜鯉趨。不勝雀躍。〔生〕孩兒。婆婆好麼。〔小旦〕婆婆且喜平安。一向因爹爹家信遼絕。倚門凝望。近日爹爹差陶旺回來。婆婆見之甚喜。後來看書見鮮。輒復大怒。今已修書令陶旺齋回在此。〔生〕咳。母親。吾豈不知一介不取。古人高義。前日因魚梁監稅。偶然覓得鮮蚶。聊以製鮮相遺。不謂反遭艱怒。是吾之過也。且收拾過罷。孩兒。你且把家中事情。試說一番。

〔畫眉籠錦堂〕〔小旦〕椿駕自南征。骨肉分離懸畫省。喜婆婆康勝。日倚柴門。九江鯉幾費垂綸。三秋雁空勞延頸。〔合〕蒙緘信。忽覩鮮生。嗔遣兒增悶。

〔錦堂觀畫眉〕〔生〕咳。追省。宦逕崎嶇。親闈冷落。終朝屈膝公門。狐媚蠅營。一點恥心難泯。我投絨冕。且樂槃阿。守坊表別圖結勒。〔合〕陶旺。你今朝謾把歸裝整。免我泥塗塵溷。

〔一翦梅〕〔小生丑上〕渡水登山已及旬。稅駕長亭。投刺郵亭。剩雲殘月滿江津。咫尺龍門。蒲伏侯門。且喜已到縣門首了。小校快通報。〔報見介生〕殊方又喜故人來。〔小生〕重鎮還須濟世才。〔丑〕莫使偏裨終日待。〔末〕須教旌節即時回。〔小旦〕行辭巴邑啼鶯合。〔小生〕遠下荆門去鷓催。〔合〕管取功成封寵帥。一生懷抱頓教開。〔生〕范兄。小弟謫才。迺蒙劉帥遠貺。仁丈枉臨。寵渥極矣。何以堪之。〔小生〕陶兄濟世閔才。何必多遜。〔生〕陶旺。快取酒與范老爹烹風。〔小生〕

〔黃鶯穿皂袍〕陶兄。小弟呵。自那日冒雪候高門。構丰標禮意勤。歡情款洽榮方寸。那劉公呵。招徠孔殷。小弟呵。迂疎濫承。那時節小弟思想。惟有薦賢。可以爲報。因此上遂將陳孺相推引。蒙那劉公呵。不以小弟之言爲謬。把旌書遠錫。金帛游登。正遣小弟來聘兄。適報陳敏叛兵遠來。他說江夏守缺。就檄兄爲江夏郡守。征勦此賊。一面已保奏朝廷去了。旄頭傾注。五馬驟膺。還有一件。那時有一襄陽賈儒。與小弟同辟召的。他說吾兄與陳敏同鄉同舉。倘然一有異志。則荆州無東門矣。幸蒙劉公不納。決意令小弟促兄即日登途。他讒言不入。真堪

敬。

〔皂袍罩黃鶯〕〔生〕咳。范兄。謾道公寮能譖。想窮通出處。默宰玄冥。我辭親薄祿。到岡城。只爲郡侯拗執。把歸鞭整。今日適承兄命。天湊其便。但劉公雖蒙傾蓋神交。然恐投杼三至。小弟到彼。只索遣洪兒入侍。內釋主帥之疑。外謝旁人之譖。卻不兩全。〔小生〕如此恰好。〔合〕急登程。許昌戎馬。翹首望君臨。〔生〕既然如此。連夜起程去罷。

〔新水令〕一鉤新月照征輪。盼程途轉添愁悶。慮攀轅借寇多。怕臥轍追何緊。丙夜潛行。丙夜潛行。顧不得霜裘冷。

〔步步嬌〕〔衆扮百姓上〕聽說君侯中宵遁。教我無投奔。兼程速趲行。斷紉牽衣。遮道求旋軫。小的們衆百姓哀懇拜留爺爺。〔生〕我在地方也沒有什麼好處。這樣時勢。也顧不

得你衆百姓了。〔衆〕一定要求爺爺轉去。〔生〕罷了。我有軍情重務。星夜赴任。不能強留。你們回去罷。〔衆〕軒車不暫停。須學那送劉父老將錢贈。老爺既不肯留。求老爺脫靴。以貽去後之思。〔生〕這也罷了。〔衆〕武岡縣百姓送爺爺。〔生〕去罷。〔衆應下〕

〔折桂令〕〔生〕謝人民城郭遠騰。車馬粼粼。江水澄澄。經幾座短逕長亭。閱幾處野店疎林。躍金鞭。驄馬蹄輕。跨玉勒。絲韁鞚緊。日暖風晴。看那飛鳥依人。急忙投江夏軍營。

〔江兒水〕〔小生〕陶兄。你今日辭民社聽柝鈴。行看三箭天山定。你須馳營單騎。昭恩信。揚威免胄跨精勁。赫赫先聲制勝。談笑功成。唾手干戈平靜。

〔雁兒落〕〔生〕我想那潑陳恢如井底蛙。量着那莽陳敏今該盡。看這些衆狂徒如狐兔羣。覷着的漫江楫似塗中漚。赤緊地焰騰騰。我把那精忠奮。不由他不骨碌碌拜車塵。若是他抗顏行。羞投順。管教取棄兜鍪。就綁擒。行也麼軍。保荆湘如城穩。若得個澄也麼清。奏饒鉦軍聲振。

〔僥僥令〕〔小旦〕骨肉東西意慘零。甚日得數歸程。莫道寒江深千丈。想我意中愁兀自深。

〔收江南〕〔生〕呀。我今日際兵戈搶攘呵。那顧得遠家庭。不記得太公置俎漢高

嗔。不記得拘囚伏劍。囑王陵說甚麼倚門淚零。端的是臣忠子孝怎雙成。

〔園林好〕〔末丑〕只願伊把妖氛掃平。那愁他長門怨深。看方隅寧靜。須早把信傳頻。須早把信傳頻。

〔沽美酒〕〔生〕我吐閔襟。吸長鯨。揮短劍。斬癡癘。氣挽天河洗甲兵。戰鎧上錦花明。燧燧息。將星熒。楚方城。轅門爭勝。六軍中人人稱慶。我呵方圖得功成。譽成。揚親顯親。呀。那時節。顯你個舉薦的蕭何勳等。

〔清江引〕〔衆〕行行漸欣臨帥闈。且把征車頓。忙參上將營。速赴藩侯鎮。指日裏靖狼烟。歌得勝。〔小生〕且喜已到帥府門首了。陶兄少待。俟小弟進去稟復。然後請見。

〔點絳脣〕〔外〕羽檄遙徵。驃姚遠聘。軍聲警。引領弓旌。何日旄頭炯。昨夜江南吼賊風。帳中驚起紫髯翁。平明不待全師出。連把金鞭打鐵驄。〔衆〕衆將官叩頭。〔外〕快去。〔小生見

介外〕呀。范參軍回來。那陶公可來麼。〔小生〕已在轅門。因無將令。不敢擅入。〔外〕快道有請。〔見介生〕陶侃一介愚蒙。荷承翦拂。三生深慶。九死何辭。〔外〕足下九秋雕鷲。千里神駒。借控湖藩。福

延蒼赤。看坐的。

〔馬蹄花〕〔外〕士行。英儁如君。器量才華四海聞。今日一見呵。公路足見你品題不謬。推轂無差。果然掄擢惟精。分明是莘耕傅築久藏形。灌壇老令需文聘。諒平生尙友元勳。喜于今丰采親承。

〔前腔〕〔生〕深愧鯁生。外望真如甃底蠅。才慚管葛。文謝機雲。武遜韓彭。多蒙
老大人呵。一朝嘯植樹熊旌。只怕才疎覆餗羞公命。〔小生〕說那裏話。陶兄。管擒孽

兔妖狐。庶安瀾塗炭生靈。〔生〕陶侃還有一言奉稟。陶侃起自草萊。素無根蒂。雖蒙程本傾蓋之知。恐墮樂羊盈箴之謗。侃有弱子。願待左右。倘得假舐犢之情。卻撓虎之忌。實出萬幸。見在戟門。伏惟麾入。〔外〕呀。士行差矣。吾聞匹夫之交。尙不負心。豈有堂堂丈夫而甘爲賊黨者乎。老夫決無他疑。士行萬勿過慮。但令公子旣承遠來。快請進來相見。

〔前腔〕〔小旦見介〕白面書生。願備侯門宿衛兵。朝陳刁斗。晝擁戈矛。夜宿團營。古來遺質慮寒盟。今朝入侍消陰譖。待家君拜節平妖。那時見報國忠貞。〔外〕

好一位令郎。真個是將門之子。就拜爲麾下參軍。併力報效便了。叫左右取冠帶過來。〔小旦更衣
同生拜謝介外〕

〔前腔〕士行。你是名將忠臣。肯負皇家與叛盟。令公子呵。龍駒汗血。鱗角鳳毛。跨
竈文孫。令參帷幄。佐奇勳。何必屈留閫帳。如周鄭。竚移時武偃文修。管取你梓
茂橋榮。聞陳恢已偏許昌。地方有事。不好留得。就請蒞任罷。

〔生〕出硯新鋒破陸梁。

〔小生〕今朝方喜得忠良。

〔外〕功成擬聽鞭金鐙。

〔小旦〕奏凱聲歌上玉堂。

第十齣 姑病求醫

〔旦上〕〔玉樓春〕鞦韆庭院重簾暮。寂寞春閒。局繡戶。牆頭紅杏雨餘花。門外綠楊風後絮。朝雲信
斷。知何處。應作巫山春夢去。紫騮認得舊游蹤。嘶過畫橋東畔路。奴家李氏。少嫁陶郎。奉姑湛氏。餅
壘常罄。甘伉儷。以如飴。羨炊親調。事尊姑。而匪懈。邇來丈夫幸叨民社。遠離慈闈。孩兒隨侍椿庭。頓
違母腹。只因婆婆年老。不堪跋涉崎嶇。以此留我在家。侍養晨昏。蔬水向來仰靠天地。蔗景且是平

安。近日陡遇風寒。一疾甚爲狼狽。呻吟牀褥。眩暈昏迷。湯水不沾。飲食不進。倘或有些差池。教我隻身女流。如何佈擺。夜來央鄰居王媽媽。去請太醫張先生診脈。討個吉凶消息。怎麼這早晚還不見來。

〔一江風〕盼仙郎久把雙熊樹。悄沒個音書寄。奈衰姑病染膏肓。湯藥憑誰取。囊無半點餘。囊無半點餘。晨昏苦怎支。我那丈夫。你如今不能盡三釜之養。後日呵。縱三牲五鼎成何濟。奴家方纔煎得一口粥湯在此。不免扶婆婆出來。勸他喫些。再作道理。〔下扶老旦上介〕

〔前腔〕〔老旦〕對寒檠獨抱沈痾。睡展轉添憔悴。病垂危便。扁鵲盧醫。怕也難調治。鱗鴻信久稀。鱗鴻信久稀。教娘怎倚闌。恐殘軀不久歸泉世。〔旦〕婆婆不要煩惱。方纔奴家煮得些粥在這裏。請闌圍呷一口兒。昨晚奴家央王媽媽去請太醫。想必就來也。〔老旦〕哎。媳婦。我多應不濟事了。胸膈飽悶。教我怎喫得下。

〔字字雙〕〔淨〕先生本事十分奇。〔丑〕道地。〔淨〕家傳積祖是良醫。〔丑〕不濟。〔淨〕

藥箱冤鬼哭啼啼。〔丑〕討替。〔淨〕誰家該死又來催。〔丑〕放屁。張先生。你來得恰好。我
間壁陶老夫人有病。他家應門無五尺之童。那夫人特央我來叫你一看。〔淨〕哇。請字不直得下一
個。說叫。可惡。不去。〔丑〕又來作怪。你不去。我另請。〔淨扯介〕哎。這個王媽媽又來。適纔取笑。我隨你
去便了。〔丑〕轉灣抹角。此間就是。張先生。你且站住在此。待我先進去說一聲着。〔見介〕呀。老夫人
夫人萬福。老夫人。你朝來病勢如何。〔老旦〕王媽媽。十分沈重。多應不濟事了。只是生受了你。〔旦〕
王媽媽。那張先生可曾請得麼。〔丑〕已在門外了。〔旦〕這等忙請他進來。趁婆婆闌闌在此。〔丑喚
進介淨〕老夫人拜揖。〔丑〕阿呀。有病的人回不得禮。〔淨〕夫人拜揖。〔作背立診脈介丑〕張先生。
這是什麼模樣。〔淨〕你不曉得。左心小腸肝膽腎。右肺大腸脾胃命。女人反是背看之。這是難經脈
訣裏的。難道我到錯了。〔丑〕不要胡說。〔淨作轉診介〕

〔鎖南枝〕論脈理真罕希。偏墜小腸疝氣追。陽脫與陰虛。白濁加疝疰。謹房事。
怕夢遺。那夫人請迴避。〔丑〕啐。老強盜昏了。一個老夫人。到說了男子病。〔淨〕哎。是我錯了。方
纔一個人家去。看過了脈。想着他的藥。一時間就信口說了出來。待我再看看。〔又診介〕今番是了。

〔前腔〕這症候實可疑。胎前產後惡露迷。月水久壅淤。行經忒宣利。沙淋敗。白帶遺。若再牽延恐難愈。〔丑〕啐。一個老人家。又說了後生家的病。〔淨〕咳。又是我不是了。方纔

手便診老夫人的脈。眼卻看小夫人的臉。故此說錯了。今番待我細看。噯。老夫人的貴恙。原是七情上起的。暮年血枯。又時常憂鬱。感成這個症候。如今只是開鬱導氣。補中調理。自然漸漸輕減。懷抱一開。飲食自進。待學生回到舍下。就送藥過來。〔丑〕張先生不要又差了。〔淨〕自然不差。王媽媽。小子就此告別了。〔旦〕王媽媽。煩你說聲。多多簡慢。少停取藥。望仔細點檢。若醫好了。寫書到任所去。還要重重來謝。〔丑傳介〕多謝。〔下丑〕老夫人。你令郎老爹又不在宅。凡事自當保重。有福之人。自然天祐。不要愁苦。老身暫別。早晚再來看你。〔旦〕呀。王媽媽且住。方纔說張先生處討藥。爭奈沒些錢鈔。我頭上止剩得這根簪兒。煩你拿來一當。將幾錢去取藥。剩來就煩你與我買些蔬菜。以供婆婆饘粥。多番動勞你。另日一總相酬罷。〔丑〕阿呀。自古道千錢買鄰。八百買舍。老身忝在里中。自然當得代勞。說那里話。我去就來。正是貧無達士將金贈。病有閒人說藥方。〔下老旦〕媳婦。我坐了這回。身子疲倦。你扶我進去罷。

苦遇亂離衰世。

更逢災病相侵。

正是福無雙至。

果然禍不單行。

第十一齣 剪逆聞喪

〔天下樂〕〔生上〕玉節遙承鎮武昌。妖魘遠遁過潯陽。〔小旦〕夜來刁斗鳴聲寂。祇聽銅壺清漏長。爹爹拜揖。〔生〕孩兒初賜魚書墨未乾。邇人歡洽遠人安。朝驅旌旆行新令。夜見星辰憶舊官。梅萼橫階鈴閣煖。雪峯當戶戟枝寒。喜逢江上鯨波息。好把封章達御前。孩兒陳恢那廝習於水戰。明欺許昌無備。故此遠涉。我想用官船擊官賊。有何不可。連日被我將江上運船。一齊收拾。與他相持。揚帆縱火。建瓴而下。那廝屢戰屢北。拔壘宵遁。且喜刁斗不鳴。民皆安堵。我已一面申報劉節使那邊去了。只是一件。前日因時勢亂離。恐防兵燹。故下馬之日。即便打發陶旺回家。不知婆婆并汝母向來舉止何如。好生掛懷。

〔金絡索〕〔生〕鱗符蒞遠方。烏哺違慈養。遙想家庭姑婦相偎傍。知他饑與荒。意彷徨。三釜安能到北堂。不能勾身生兩翅飛鄉邑。只落得淚暈雙眸泣。旻蒼我

停雲望別離滋味少曾嘗。甚日得退食羔羊。稱祝霞觴。繞膝成歡暢。

〔前腔〕〔小旦〕爹爹。別來歲月長。兩下相惆悵。記得臨行執手難廝放。高堂鬢已霜。痛悲傷。慈孝兒孫淚滿裳。只圖個數行露布酬君貺。反阻卻幾點星稀省母傍。空凝望。幾番魂夢擾昏黃。到不如田舍兒郎。溫飽時常。骨肉都無恙。

〔哭相思〕〔末〕堂北護花霜殞喪。嘆總幕成虛幌。奈游子他鄉空悵快。今日裏怎說向。迤邐行來。此間已是江夏府門首了。且住。我方纔路上聞得老爺得勝回衙。十分歡喜。我如今進去。怎麼就好把這凶信去驚他。且慢慢支吾。待他閒暇之時。將機就計。等他自家省着便了。

〔做進見介生〕呀。陶旺。怎麼你又來了。老夫人好麼。〔末作遲疑介〕好。〔生〕家裏沒有什麼事麼。〔末〕沒有。〔生〕既沒事。你爲什麼又來。〔末不應生〕看他意思。謊張。語言遲慢。必有緣故。噯。我曉得了。

〔紅衲襖〕莫不是亂兵戈騷故鄉。〔末〕不是。〔生〕莫不是爲荒歉無餘餉。〔末〕不是。〔生〕莫不是老夫人呵。怕我輕師玩寇把天家蕩。〔末〕不是。〔生〕莫不是夫人呵。慮參軍身

辱膽小履不得戎行。〔末〕也不是。〔生〕莫不是道咱兩個廨宇淒涼。或被那敗殘兵把訛言流誑。一發不是了。〔生〕這等我今番猜着了。多管是伊家得罪高堂也。唧唧噥噥來訴短長。

〔前腔〕〔末〕也不是弄潢池跳陸梁。也不是歌雲漢傾家藏。老爺呵。是穰苴孫武無多讓。參軍呵。是弱冠終軍誰敢當。你兩個橋梓傳芳。也沒甚讒言廝謗。〔生〕這等爲什麼。〔末〕端只爲梧桐冷落庭幃也。不憚星馳遠寄將。〔生驚介〕我我老老老夫人死了。我那娘嘍。〔倒地介小旦〕爹爹甦醒。〔末〕老爺甦醒。〔生哭醒介〕

〔前腔〕我那母親嘍。我只指望守三刀姓字香。只指望捧五花把親心鬯。思量你勤緝績將饗殮相。思量你翦螺雲佐客觴。你怒供鮓把我官箴創。我捧魚書不能勾進含糧。我那娘嘍。教我啣悲痛殺臯魚也。風木空瞻淚萬行。

〔前腔〕〔小旦〕爹爹。你須是解朝簪卸繡裳。你須是棄麟符辭虎帳。你須是戴殘星急把歸帆颺。你須是還舊里忙將苦由嘗。痛蓼莪馮靈櫬相傷。歌薤露把泉

臺卜葬。那時節茹荼罔極方酬也。不枉詩書代義方。〔生〕陶旺。老夫人死幾時了。〔末〕小人到家。老夫人已去世了。一應衣衾棺槨。都虧夫人勉強支持。特差小人星夜來報訃。〔生〕你快同小老爹進去收拾行囊。連夜奔喪回去。〔末小旦下〕

〔小桃紅〕〔生〕半生鳩哺。一旦烏傷。難見我的慈親面也。及早離官舍。灑泣辦歸航。真個禍從天降。一心要建功名佐朝廷安宗社也。又誰知那日相違到做了千載恨。今日裏泣血終天空教哭斷腸。

〔下山虎〕〔小旦末上同行介〕雲山縹緲。烟水滄茫。滿眼淒涼景。教人怎不痛傷。可憐我祖幃長夜。可憐我母子參商。心急偏嫌去路長。聽棹歌聲唱。把慘意愁容倍慨慷。兩下添惆悵。此恨怎償。除非是夢裏相逢。又覺魂渺茫。

〔蠻牌令〕〔生〕我母親呵。我恨不得追泉壤。我恨不得殉棺幃。一點哀衷難撇漾。縱金槨豈能償。須刻木晨昏奉養。更倚廬攀柏恓惶。〔小旦〕對秋風滿眼淒涼。憶當年坐膝扶牀。

〔尾聲〕〔合〕人生夢泡都虛謊。魚軒何日再相將。只落得羽翼空驚送北邙。

〔生〕柏舟高節動芳名。

〔小旦〕絳帳清風重縉紳。

〔末〕若論慈親人共有。

古來賢母不多聞。

第十二齣 諸賢渡江

〔滿庭芳〕〔小生扮溫嶠上〕豺虎鬪牙。鷓鴣鍛翮。胸懷技癢難禁。洛陽江左。望處

總關情。徒有一腔忠義。恨無由濟弱扶傾。〔外扮甘卓上〕君門遠。馮歌卞泣。泪向

暗中零。〔末扮卞壺上〕朝綱何日靖。願封鮑京觀。不負平生。〔丑扮蘇峻上〕黃金橫帶。

鐵胄影纓。〔合〕同期取旂常竹帛。翊佐聖明君。〔見介丑〕動問尊兄高姓。〔小生〕小生姓

溫。名嶠。〔丑〕原來是太真。久聞此位老兄高姓。〔末〕小生姓卞。名壺。〔丑〕望之兄。久仰。好盛名之下

無虛士。這位。〔外〕小生姓甘。名卓。〔丑〕這樣大甘蔗。到得一分一根。〔小生〕休得取笑。請問老兄尊

姓。〔丑〕在下就是蘇峻。請問列位尊兄。今日何往。〔小生〕蘇兄。目今朝政阽危。羣兇乘釁。鵠鷓刺刃。

中原蛇豕。薦窺上國。劉淵僭號幽州。成雄稱帝西蜀。以故祖王雅擊楫中流。劉越石枕戈待旦。小生

輩雖無遠略。願執鞭引。況今瑯琊王尊禮賢豪。王茂弘吐哺下士。愚意欲遠渡江東。求參幕府。倘得試鉛刀於一割。或能扶九鼎於寸絲。也未見得。〔丑笑介〕有這等事。天下智謀之士。所見略同。原來如此。挈帶一挈帶何如。〔小生〕就請同行。〔行介〕此間已是彭城地方了。還從水路去便些。〔淨扮船戶唱吳歌上〕我勸世人沒要學撐船。撐子船來弗得閒。繹板麻繩是我個夥計。簑衣箬帽是我個本錢。早晨頭擦辣辣個濃霜。說弗得個冷。夜頭來溼搭搭個舢艦。拿來當蓆眠。撞着子個虎傷樣個埠頭。扣除得我介盡情了絕意。攬着子個老江湖個主顧。算計得我介刻骨樣尖酸。殘盤汁水也無得落放。來遲去慢有多夥埋冤。我仔細思量着甚來由。淘個樣兀勃氣來走個樣還魂路了。一生一世衣身本分也到底弗連牽。咦。着見扯二。黃金白在岸上。兩日棺材以介阿彌利。倘若馬哈喇儂四撮俏就興。哎。列位相公往那裏去的。〔衆〕我們往建康去的。〔譚講價介〕既如此。就請下船來。

〔甘州歌〕〔小生〕牙檣畫艇。正彭城南下。直指金陵。雲山遮映。看風帆來往。續紛。城留雲夢。英雄往。墓表留侯遺蹟存。桃花浪。竹箭傾。流經積石下。龍門。圖名利。甘遠征。今宵且宿呂梁津。

〔前腔〕〔末〕山陽堞雉新。憶枚臯舊宅。壯志嶙峋。干將摩厲。把王家社稷澄清。釣魚臺下千金重。漂母祠前一飯輕。湖光灩。山色明。中流浪穩。榜聲停。臨風臥。帶月行。前村燈火識安平。

〔前腔〕〔丑〕長亭傍水濱。見碧霞祠裏。笑語輕盈。游人如蟻。對春光偏惱離魂。迷樓百尺空凝眼。烈廟三楹惜露筋。思鄉遠。愁路貧。隔花啼鳥喚聲頻。紅輪墜。皓月明。艤舟拚醉廣陵城。

〔前腔〕〔外〕雄藩鐵甕名。論江南形勝。此地崢嶸。洪流瀉影。想英雄破浪飛騰。金山寺下灑泉古。浮玉峯邊鷗鷺蹲。漁舟宿。商舶停。妙高臺上笑聲聞。懷忠膽。抱赤心。夢魂勞繞五雲深。

〔尾聲〕〔合〕盼神京行將近。石頭高踞大江濱。管取明朝達帥庭。

〔小生〕見說賢王好用才。

〔末〕遠從青蘄渡淮來。

〔淨〕長江自古名天塹。

〔外〕莫謂東南王氣衰。

第十三齣 牛眠指穴

〔小丑扮牧童山歌上〕山外青山樓外樓。牧童莊外去看牛。我也弗圖個爲官作相。我也弗圖個拜將封侯。我也弗圖個田園千頃。羈奴使婢。我也弗圖個腰纏十萬。跨鶴揚州。我也弗學得個斯文相公。搖搖擺擺。動輒便鋪排個前朝後代風月烟花故事。我也弗抵得個過江子弟。哩哩囉囉。提起便扯條個今時板凳插科打諢情由。我也弗曾到街頭市面。看見歇個提倅扮戲。聽介幾句曲尾。鎮日在田頭地畔。跟隨歇個擔秧斫稻。學得兩隻歌頭。朝晨頭黃霜霜個樣老米飯便罄介幾碗。夜頭來辣蹉蹉個樣淡白酒便都介一甌。悶來時捉了管短笛。招來黃牛背上響介一響。興來時騙子個鬻。鬻困倒青草地上抽介一抽。若論我個本事。搭子三兄四弟。以會顛三槩兩。釘釘捉七。以會鬪牌買快。虎跳筋兜。以會摸盲盲。鑽濶子。以會楊六使。打蒲毬。若論我個受用。逢子一年四季。以有茅針烏堵。雀梅蠶豆。以有毛桃鮮笋。野菱芋頭。以有炒田螺。開齣蟹。以有燒黃鱔。煮泥鰍。若論我個人品。再陪子個摸魚公樵柴漢耕田老派我來着末。若論我個景致。憑渠個戴文進謝樗仙沈石田也畫我儂打頭。〔唱〕並無妻孥牽掛。並無兒女擔憂。並無官糧激括。並無私債來講。這般清福難消受。〔歌〕

仔細思量。憑渠爲官做客多驚嚇。爭似我騎牛得自由。今日出來。果然還早。個星胡獠還弗見到。且
那個牛來縛在樹上。困一忽再做計較。〔睡介〕

〔玉井蓮〕〔外扮伽藍上〕賢母堪欽。指點佳城金井。善哉善哉。人間私語。天聞若雷。暗室虧
心。神目如電。小聖乃彭澤縣石壁寺伽藍土地是也。今有鄱陽陶丹妾湛氏。一貧徹骨。二黼常空。仗
針黹以謀生。待績麻而舉火。剪髮劉薦。遂成孺子高名。還鮮遺書。慮玷居官清節。其子陶侃。赤膽擎
天。丹衷捧日。後來擒賊平蠻。剪兇除叛。屢立奇功。游膺封券。八州移鎮。二世顯榮。今因慈喪在殯。遍
覓福地。上帝鑒侃忠誠。兼欲厚庇其母。特令小聖化村老以指迷塗。借牛眠而彰吉兆。且喜他家牛
正在此。叫小鬼快牽他到前岡去。〔小鬼舞下外〕正是大抵乾坤都一照。免教人在暗中行。〔外下〕
更衣復上丑尋牛扯外討介

〔前腔〕〔生上〕慈官在殯。耐耐墳塋未定。這小廝爲何在此喧嚷。〔丑〕老爺。這個老兒偷了
我家的牛。拿他到縣裏去。〔生〕哇。胡說。〔外〕大人。老漢住在前村。偶然信步到此。適因尊价嚷鬧。有
失迴避。望乞恕罪。不敢斗膽請問大人。你眉頭不展。面帶憂容。意必有屬。卻是爲何。〔生〕咳。老丈。一

言難盡。下官嚴君背棄。庭訓無聞。老母提攜。甄陶實賴。下官今日榮叨簪紱。得遂宦游。喜竊斗升。可伸祿養。不意栝樅飲痛。風木含悲。悔未李密陳情。徒恨仲由負米。久停淺土。未入夜臺。思歌薤露之章。未探青烏之吉。故此憂悶。〔外〕原來如此。大人。老漢雖係村農。頗諳地理。此間前岡有塊好地。來龍去脈。靠嶺朝山。種種合格。乃大富貴之地。前日有一個郭璞先生。打從此處經過。說此地葬者。位極人臣。世出二千石。今老漢就陪大人前往一看何如。〔生〕如此多感。

〔一封書〕〔外〕峯巒翠藹然。地局天星相配全。金甌塢裏懸。欲卜佳城在此間。背案朝山欣對拱。白虎青龍兩不偏。呀。奇怪。那佳穴裏邊。卻好有一牛眠在此。不知可是府上的。〔丑看介〕快活正是。〔外〕記牛眠。定吉阡。葬後君家福蔭綿。〔外暗下生〕呀。好古怪。這老兒我見他儀容蒼雅。言語清奇。心裏道他不是凡人。今果忽然不見。想是天憐我尋求勞苦。特托他來點化。也未見得。且到前邊認定穴向。然後擇日造葬便了。

〔前腔〕山形果秀圓。屈曲周迴水更灣。黃牛嶼底眠。筆鼓旗鎗堂局完。八卦五行均合格。運案龍砂不爽纖。謝神天。指吉阡。從此吾家福蔭綿。謝天地。謝天地。

〔生〕爲尋窀穸葬慈闈。

神指牛眠報吉墟。

正是踏破鐵鞋無覓處。

得來全不費工夫。

牧童快牽牛回去罷。〔生下丑弔場笑介〕我眼裏從弗曾見世上有個樣奇事。個個老老會隱身法。個好好裏一隻牛。弄子我個多夥路來。方纔指點一番。忽然又不見了。雖然是介說。正是爲善自有天報。舉頭三尺神明。陰地得從心地。功名起自孝名。天色已晚。不免原唱一個吳歌回去罷。〔唱介〕月出東方日落西。勸君沒要作非爲。弗信但看牛眠地。皇天報應弗差移。〔下〕

第十四齣 卜居求安

〔似娘兒〕〔生上〕終日卜菟裘。幸伏牛天錫神坵。〔旦〕豐碑謾把靈輶覆。〔小旦〕親闈服闋。君恩浩蕩。更兼國難綢繆。〔生〕剪髮賓筵盛。還書母訓嚴。〔旦〕謂宜膺白首。忽去

作青山。〔小旦〕大夢歸蝴蝶。啼魂泣杜鵑。〔合〕哀歌行欲絕。丹旛兩班班。〔生〕我那母親。素甘澹泊。安習勤勞。我指望三事登朝。五花被寵。不想朝露先零。頓使暮雲增慨。蓋棺已久。總幕空懸。屬纊卒聞。泉臺杳隔。倚廬三載。驚鶴弔以飛來。覓地經年。賴牛眠而定葬。罔極已酬于萬一。致身猶缺于在

三。下官意欲趨仕東朝。爭奈故園搶攘。若挈家遠赴。仍恐衽戈席甲。反添跋涉爲勞。如單騎獨行。又怕井廢廬荒。內顧拋離不忍。夫人孩兒。吾已差陶旺到廬江地方僦房遷住。下官就近渡江。不但鄉土幽僻。可以樂業安居。即使早晚思歸。亦能旦發夕至。我昨日分付收拾行李。可曾完備了麼。〔旦小旦〕完備多時了。〔生〕今日天色晴和。孩兒門外看有好船。願隻就起程。只是母親墳墓。放不下些。

〔排歌〕〔生〕蠶澤遷居。龍舒遠投。一朝辭別瑕丘。只怕鹿眠荒圃。草夷猶。鴉噪殘陽敗葉留。波紋皺。水箭流。身世如同不繫舟。家鄉遠。客路悠。時平方望大刀頭。〔前腔〕〔旦〕故國輕離。從夫遠游。何年復覩松楸。且是好月。蟾宮移下水晶樓。雲物淒涼拂曙流。檣風緊。纜錦迢。吳艚想已過傍州。歌欵乃。刺浪漚。莫教人抱屢屢愁。

〔前腔〕〔小旦〕苦由方辭。緜裝飾油。行看爲國分憂。逐龍今赴合肥游。爹爹你翔鳳還驅到石頭。攄長策。運祕謀。潭潭相府待薪標。膚功奏。夙志酬。長安市上唱

鳴騶。

〔前腔〕〔末上介〕傲寓濡須。凝眸遠舟呀。老爺夫人到了。已尋鵲壘居鳩。村籬卜築。景偏幽。絕類桃源可避仇。山當戶。樹遶溝。清江一曲抱村流。籬堪竹。畦可耨。隔林雞犬雜居稠。

〔尾聲〕今朝且把浮蹤逗。明日乘傳上帝舟。管取明廷壯遠猷。

〔生〕濤翻鷺羽連天白。

〔旦〕山疊屏巒帶樹青。

〔小旦〕身寄客鄉渾似夢。

〔末〕萬重波裏一浮萍。

第十五齣 藩府賀正

〔點絳脣〕〔小丑扮堂候官上〕鳳曆頒春。龍躔啓正。銀河耿。濟濟官寮。抃祝昇平慶。

煌煌星斗映樓臺。漠漠祥烟雉尾開。爆竹一聲催臘去。屠蘇幾盞送春來。山呼殿陛雲霞動。風轉旗章鳥獸回。但願聖朝無敕政。轅門袍鼓寂啣枚。自家乃大丞相揚州都督瑯琊府中一個堂候官是也。往來朱邸。奔走彤墀。典藩府之禮儀。傳相門之號令。今日乃元會正旦。歲當更始。節屆履端。歲當

更始。層層佳氣護銀潢。節屆履端。朵朵卿雲籠畫戟。香浮五木。兔苑頌椒花。不數那獻賦的鄒枚。句
句聲齊廣樂。藥薦七松。辛盤盛柏酒。不比那設醴的楚國。人人色醉仙桃。如今天色將明。殿下將次
升殿拜闕。文武官寮。相率來朝賀節。只索在此祇候。呀。道猶未了。王司徒已到。

〔混江龍〕〔外〕寮參鶴禁。謾道是分猷贊化冠臣鄰。今日價祥開農正。斗指東寅。
仙官嵩祝呼千歲。禁苑筵開薦五辛。但願得薄海內慶豐亨。營門外息戈爭。稱
磐石。表宗臣。開邸閣。友嘉賓。門迎朱履三千客。戶納貔貅百萬兵。九重返旆。萬
國咸寧。自家王導是也。官拜司徒。職參機務。且喜殿下言聽計從。好賢納諫。敦河間之禮樂。富子建
之文章。羅四海之英賢。參朮盡歸藥籠。收一時之豪杰。桃李悉植門牆。如劉隗刁協紀瞻。陳頤顧榮
賀循。庾亮陶侃。卞壺周訪輩。率皆延之館舍。誰嗟彈鋏無魚。用當其才。咸願處囊脫穎。椽稱百六。名
震寰區。今日百官賀歲。下官身居輔導。誼先羣僚。只索先來伺候。呀。你看衆文武也相繼來了。

〔寶鼎兒〕〔淨〕海邦虛節鎮。隨從征討。身如萍梗。下官原任青州刺史王敦是也。〔外〕哥
哥拜揖。〔淨〕兄弟已先在此了。〔生〕追舊日分符江夏。〔末〕欣一日叨承記闥。〔生〕小

生原任江夏太守陶侃是也。〔末〕小生幕府從事卞壺是也。〔丑小旦〕幸喜諸賢齊彙進。稍展同升忠蓋。〔丑〕小生內史蘇峻是也。〔小旦〕小生參軍庾亮是也。〔衆合〕列位大人請了。願再造乾坤。世躋鼎域。人登台鼎。〔衆〕司徒大人拜揖。〔外〕列位先生皆人文冠冕。僚案領袖。幸逢萃聚。喜值泰初。豈但王室增輝。抑且宗枝藉色。望祈戮力。共振國威。〔衆〕皆賴司徒大人主持。生等願效犬馬。呀。主公升殿了。

〔賀聖朝〕〔小生〕南藩三載羈臣。今朝又遇王春。周公相洛愧非倫。羞稱赳赳干城。在苜江南已數春。年華如駛愧無成。乘輿遠播何時復。宗廟丘墟甚日新。但喜糧薪能得士。待看驅策佐明廷。整服且將西闕拜。遙祈新政永康寧。快排香案。

〔錦堂月〕玉燭調元。金花簪勝。朝來運逢熙盛。遙祝皇躬。願千祥百福駢臻。淑氣轉五位重登。條風啓八方豐稔。〔合〕齊祝慶。看取寶籙綿綿。玉牒森森。〔外淨〕

臣王敦王導參見。願大王千歲千歲。〔衆〕臣陶侃卞壺蘇峻庾亮參見。願大王千歲千歲。

〔前腔〕〔合〕欣逢橘幹敷榮。瑤山聳秀。堪稱國棟維城。臣等呵。怕空負鑪錘。不堪

待罪馳騁。惟願取海晏河清。常快邁臣良君聖。〔合前小生〕今日且喜英賢畢集。聊取

椒觴。願同歡賞。〔衆把盞介〕

〔前腔〕滿飲。柏葉頻斟。椒花疊獻。堆盤紅縷茵蕪。百戲蓮盆。彷彿三春花景。綠楊枝綵燕新裁。白獸樽屠蘇香醞。〔合前〕

〔前腔〕歡罄。放雀懷仁。獻鳩施惠。翠管銀鈎輝映。經史爭譚。偏怪侍中席盛。迎年餽粉荔絲雞。聽響卜梨花炮信。〔合前〕

〔醉翁子〕〔小生〕長恨。這國恥總筆書難罄。誓薪膽焦勞。莫貪歡慶。〔外〕勉。願勩力王家。把宗社人民返故京。〔合〕相慶處。願武偃文修。秣馬休兵。

〔前腔〕〔淨〕忠懇。要奮迅名揚邊郡。把胡塵汎掃。二君仇靖。〔衆〕非佞。定仗劍長驅。伊洛荆揚盡處寧。〔合前末〕早間各鎮賀箋。禮當裁答。恐稽來使。盡請先辭。到記室去。紫宸

拜賜鳴雙笏。皂蓋頒春佩左符。〔先下〕

〔僥僥令〕招搖東指震。太簇律重新。看取萬國衣冠承正朔。見百福呈祥祝受

成。

〔前腔〕顏牽紅玉醉。袖惹御香芬。但願歲歲年年常侍宴。共沐浴皇仁億萬春。
〔尾聲〕賢王四海聲名振。願永遠把南都守鎮。常覩雍熙賀太平。

〔小生〕但願邊庭無警戰。

閒集梁園作小詩。

〔合〕共助至尊歌喜事。

年年春日試春衣。

第十六齣 權門燈宴

〔末扮院子上〕天碧銀河欲下來。月華如水浸樓臺。誰將萬口金蓮子。撒向皇都五夜開。自家乃王都督府中一個院子是也。今日乃元宵佳節。你看燈迷鶴市。綵結鰲山。雞上青蓮。蘭麝香中花萬簇。龍御玉樹。綺羅叢裏焰千株。高的高。下的下。燦燦熒熒。十里燈毬明似晝。來的來。去的去。挨挨擠擠。六街車馬湧如潮。這壁廂吹的吹。搯的搯。厭厭夜飲。集珠履三千。那壁廂歌的歌。舞的舞。處處宵燈。照金釵十二。金吾放夜。一更交至二更。三更交至四更。暗塵隨馬去。妓皆禮李騁餘裝。玉漏停催。東街跑到西街。南街跑到北街。明月逐人來。歌盡落梅仍別調。正是誰家見月能閒坐。何處聞燈不看。

來。休提那街市上的繁華。且說俺畫堂中的富貴。重簷下掛的是玻璃燈。玳瑁燈。琥珀燈。真珠燈。約有百千來盞。恍疑魚枕春裁。兩邊傍列的是雲母屏。料絲屏。夾紗屏。羊皮屏。何止二三十架。卻訝蓬壺夜坐。喫的是猩脣鳳脂。鶴脯鸞羞。誰數上方饌品。斟的是瓊漿玉液。葡萄桑落。休誇中禁醍醐。庭墀內擺列着伶官樂部。齊齊整整。咿咿啞啞。響協鈞天。珠簾內準備着美女歌兒。顫顫巍巍。嫋嫋婷婷。神游洞府。果然天上神仙宅。不比人間宰相家。今日俺老爺不請外客。顯待司徒爺家宴。一應閒人不許放入。呀。遠遠望見錢鳳那廝。又來闖酒喫了。不免躲在此間。聽他說些甚麼。

〔仙燈近〕〔丑〕步入侯門。喜遇盛開燈宴。自家乃錢鳳是也。小子生來伶俐。慣會說謊搗趣。出外狐假虎威。進門掇臀捧屁。論才學那曉得者也之乎。問行藏不顧那廉恥禮義。順我的便。褒獎他上了三十三天。忤我的便。排陷他落在十八層地。刀山劍樹。死後不怕閻羅。咋舌搬脣。生前且撞太歲。今日王府中大開燈宴。不知爲什麼不來請我。不免搵個相知。方纔門上被我一哄。撞了進來。這椿買賣。想是到手了。〔末上介〕呀。錢老爹那裏來。〔丑〕阿呀。老夫聞得你家設宴。特來奉陪。〔末〕咳。錢老爹。今日爺是請司徒爺家宴。分付一應外人不許通報。你還遠些時務。不要連累我們。請回。

改日來罷。〔丑跪介〕老太沒奈何。作承一作承。我在老爺門下。又比別的不同。萬乞笑留。老爺一定不惱。〔末〕老爺出來了。

〔賀聖朝〕〔淨〕三五良宵光燦。今朝特建燈筵。弟酬兄勸兩盤桓。看火樹銀花開遍。春風來海上。明月在江頭。燈火家家市。笙歌處處樓。吾荆揚都督大將軍王處仲是也。隼旗虎帳。擁百萬貔貅。鐵鎧金戈。轄三千熊虎。權傾海內。勢壓江東。昔與兄弟茂弘同隨丞相渡淮。弟裁機務。吾掌兵權。所喜言聽計從。信任勿貳。特封我爲荆揚都督大將軍。吾想昔稱三窟。今見二難矣。第明日欲往荊州。今日聊具杯酒。與兄弟話別。一則叙吾手足之情。二來藉他表裏之勢。叫當直的司徒爺到來。疾忙通報。〔末〕嘍。曉得稟爺。錢鳳在外邊。不知可要放他進來。〔淨〕別的不許他進來。錢鳳是我的心腹。放他進來罷。〔末〕嘍。錢老爹。請你進來。〔丑〕大都督。錢鳳見。〔淨〕世儀。你今日爲何曉得我開宴呢。〔丑〕錢鳳方纔在外邊看燈。偶見府門大開。聞知擺宴。恐有驅使。特來效勞。〔淨〕我對你說。我今出鎮荊州。遠離藩幕。司徒爺密居左右。凡事仗他周旋。倘或有貝錦之讒。俱賴他回天之力。況兼他做人古執。不肯通變。若有差錯。內舉不避。我今日開宴叙別。一來爲手足之情。二來叮

寧他大事。仔細想他官拜司徒。年過四十。尙還無子。我有兩個歌姬。一個喚做文鸞。一個喚做彩鳳。姿容蓋世。歌舞絕倫。吾意欲飾此二姝。少間酒後。便送與他。不惟可衍其後嗣。且得此二人從旁慫恿。亦可以得其內應。你的意下如何。〔丑〕大人所見甚妙。只是聞得司徒夫人家法甚嚴。恐怕不容。〔淨笑介〕吾已籌之熟矣。前曾差人於司徒宅旁。築下別室。撥兩房下小隨去伏侍。不容他知道便了。〔丑〕一發絕妙。

〔前腔〕〔外〕侍罷傳柑佳宴。驅車且向街塵。相輝棣萼景怡然。拚酪酊月斜方散。十萬人家火燭光。門門開處見紅妝。歌鐘喧夜銅壺暗。羅綺盈階塵土香。今日吾兄大都督請我賞燈。不免撥忙。少赴片時。〔衆〕稟爺已到都督府門首了。〔外〕快通報。〔末報介〕稟爺。司徒爺到了。〔淨丑迎介外〕哥哥。荷蒙寵招。理宜早趨筵末。奈大丞相修傳柑故事。侍飲半晌。故此來遲。望勿見罪。〔淨〕兄弟。今日不爲別事。我明日欲往荊州。一別又得幾載相會。故此聊借燈下。以敘離悰耳。叫左右起樂。〔送酒介〕兄弟。吾雖是兄。你還是客。今日還該你坐。〔外〕呀。哥哥差矣。人有五倫。缺一不可。長幼之節。如之何其廢之。還是哥哥坐。〔淨〕世儀。還該是那個坐。〔丑〕還該都督坐。〔淨〕賢弟。這

等屈坐了。〔外〕不敢。〔丑〕錢鳳告坐了。〔淨〕住了樂。

〔山花子〕〔外〕哥哥。你旌旄擁鎮荆揚遠。東南半壁擎天。掌兵權威揚巨藩。指日奠靖中原。〔合〕喜燈輝明月皎然。星橋火樹光燭天。銀箏象管繞玳筵。趁此良宵劇飲開顏。

〔前腔〕〔淨〕兄弟。你陰陽燮理台垣顯。定教旦爽齊肩。喜隆平玉燭調元。八荒預慶豐年。〔合前〕

〔前腔〕〔丑〕二位大人。望先開府威名擅。司徒位列仙班。賀塤箎同調齊賢。何勝忭舞華筵。〔合前〕

〔前腔〕〔淨外〕幾年分轡昭陽殿。今宵話別燈前。嘆飛鴻頃刻殊轅。何時再續重歡。〔合前衆隨意鑼鼓唱上淨〕你是承應的麼。我這裏不請外客。簾下自有家樂。不消伺候。去罷。

〔唱下淨〕傳話後堂。喚女樂們出來。〔旦小旦〕文鸞彩鳳磕頭。〔外〕起來。〔衆〕女樂門磕頭。〔外〕起去。〔淨〕文鸞彩鳳。你揀新上的曲兒唱一曲。敬司徒爺酒。〔旦進酒介〕

〔北〕一犯江兒水。六街燈火正喧。填六街燈火星橋迴鐵鎖。且及時行樂。選伎徵歌。繞梁音行雲度。婉孌映綾波。嬌姿壓寶螺。聲纏錦荔。響徹銀河。莫蹉跎。把良宵來虛過。填唱箎和。討得個填唱箎和。王家良佐。好一對王家良佐。急釘鑿漏聲中滴下銅壺。〔淨〕再喚文鸞舞一回。彩鳳敬司徒爺酒。〔旦舞介〕

〔前腔〕〔小旦〕光生瑤圃。好輝煌光生瑤圃。再添香當夜午。且更衣炫彩。飄舞香羅。奏霓裳偕仙侶。嘹唳管絃和。翩翩襟袂多。機上繚紉。錦裏穿梭。這妖嬈卻賽過優施伍。醕酏屠蘇。拚沈醉醕酏屠蘇。瓊樓畫鼓。慢相傳瓊樓畫鼓。嘆光陰把人生忙裏奔波。〔外〕哥哥。舞羞飛燕。歌賽雪兒。愧無紅錦纏頭。權奉白金便面。叫左右快取銀

十兩。送二姬買脂粉。〔淨〕你二人過來謝了司徒爺賞。〔磕頭介〕再取大觥奉酒。〔送酒介外微醉

淨〕茂弘。這兩個美人頗生得聰俊。且從幼是我撫養。原非風塵下賤。古人云。不孝有三。無後爲大。今吾弟壯年無嗣。吾意欲將此二人奉充下陳。俾薦枕席。尊意若何。〔外〕哥哥。子嗣有無。自有定數。況君子不奪人之好。奈何敢攘兄之有乎。〔淨〕哎。說那裏話。一言既出。寧有悔理。本該今夜就贈同

歸。只是送到家中。怕不穩便。吾已差人料理別業。在於宅左。來朝撥兩房下小。竟送到新築居住便了。兄弟之間。萬勿見外。〔外〕如此。多謝哥哥。〔淨〕叫左右。再旋熱酒來。兄弟同往燈下。一步何如。你二姬隨來送酒。

〔滴溜子〕〔衆〕鰲山上。鰲山上。花燈萬盞。綺筵內。綺筵內。歌舞鬧喧。天遣嫦娥隨伴。管取種藍田。雙嶼並獻。佳氣充閭。門庭歡忭。

〔雙聲子〕今宵宴。今宵宴。論富貴真堪羨。天公念。天公念。論兄弟情還戀。〔旦小旦〕蒙恩眷。蒙恩眷。歸別院。歸別院。願傾尊北海。壽比南山。

〔紅繡鞋〕〔合〕雙娥年少。蹁躑。蹁躑。司徒車馬迴旋。迴旋。綺席散。樂聲闐。翻翠仗。耀金韉。歌舜日。樂堯天。歌舜日。樂堯天。

〔尾聲〕魯陽戈何須返。歲歲年年此夜歡。但願四海昇平玉曆綿。

歡娛休閒夜如何。

燈夕良宵能幾何。

遇飲酒時須飲酒。

得高歌處且高歌。

〔丑〕都督爺。錢鳳告別了。〔淨〕多慢。〔丑〕不敢。〔下淨〕文鸞彩鳳。你二人今日是我家的人。明日是司徒爺的尊寵了。司徒爺他爲人正直。比我不同。凡百須要小心在意。還有一件。我重重托你。我在外邊。一時無人來往。倘或有人在司徒爺面前背我。你二人須要善言解勸。也不枉我數載養育之恩。今日相贈之意。〔旦小旦〕曉得。〔淨〕正是千金買妓教歌舞。送與他人樂少年。〔下〕

第十七齣 問卜決疑

〔菊花新〕〔外扮郭璞上〕博通詞賦足餘生。久溷塵氛眼未青。偶爾受奇經。且守垂簾市隱。易闡陰陽道果微。靜中探索自能知。交重生尅須兼察。悔吝亨屯總不虛。八卦暗藏天地奧。六爻蒐盡鬼神機。若能誠信來占驗。管爾前途定不迷。老夫姓郭。名璞。字景純。平陽聞喜人也。幼通經術。已能窺豹之斑。長好辭章。復冒彫蟲之譽。爭奈運途多蹇。且知時事日非。遂借卜筮以藏身。假易書而顯技。決疑辨惑。肯多讓季主君平。指吉譚凶。不數那京房管輅。夜來卜卦直日。見三傳貴人臨應。怕有佳客到來。叫鶴童點茶掃門伺候。〔丑扮雙髻道童應同下〕

〔前腔〕〔生小生末丑同上〕同叨升斗列朝紳。奈皇路崎嶇盡棘榛。底事總無憑。試

向支機扣問。〔見介〕列位大人請了。夜來相約往郭景純肆中問卜。請卽同去何如。〔行介〕前程暗如漆。非卜不能測。轉過帝王家。來到神仙宅。〔丑上〕譚報外出相見介衆。久懷芝宇。式遂荆瞻。〔外〕幸邁龍光。曷勝雀躍。請問列位大人尊姓。〔生〕小生陶侃是也。〔小生〕小生溫嶠是也。〔末〕小生卞壺是也。〔丑〕小生蘇峻是也。〔外〕呀。列位大人皆青雲貴客。黃閣鉅卿。老夫耄矣。無能爲也。連鑣左投。有何見諭。〔衆〕老先生。生輩並立江東。均參幕府。但權臣柄國。姦佞當朝。胡騎猖狂。中原無主。一腔熱血。無以自效。特來請教一番。以決休咎耳。〔外〕噫。原來如此。列位大人請坐。

〔駐馬飛〕〔外〕易學閎深。義畫文爻。義果精。詞象先天定。占變隨時應。嗟禍福。豈無憑。吉凶有准。若問終身呵。一卦可管三十年。休咎內卦管十年。外卦管十年。支卦又管十年。休咎終身。一卦能包盡。還有六親六神乘旺休衝。俱可推驗。變動還須論五行。那一位大人先卜。請禱告來。〔衆遜介生禱外卜介〕拆交拆單拆拆。陶大人好好。這是大富貴之卦。〔生〕怎見得。〔外〕方纔大人卜的是雷地豫卦。彖云。豫利建侯行師。況兼卦書有云。殺值空亡。漢主脫平城之難。貴逢生旺。蘇秦受六國之封。如今貴人祿馬俱逢生旺。異日必以戰績封侯。賀喜賀喜。〔生〕怕不

能勾到此。〔外〕還有一件。第二爻朱雀文書發動。目下就有除授。你聽我道來。

〔前腔〕坤震相承。豫卦成名吉兆生。師旅須肩任。侯建終當應。嗟。祿馬又同臨。貴人有慶。蘇季當年六國皆歸印。胙土分茅帶礪盟。〔外〕如今那一位大人來卜。〔遜介小生禱外卜介〕拆重拆交拆交呀。溫大人。此卦與陶大人相同也。主大富貴之象。〔小生〕那有此理。〔外〕呀。溫大人。此卦爲地水師卦。彖辭云。師貞丈人吉。且卦書亦云。官星佩印居玉堂。乃食祿之人。貴刃加刑控寶馬。必提兵之將。請問大人貴庚。〔小生〕丁巳。〔外〕大人貴庚丁巳。今日又是甲午。今師卦二四上三爻發動。丁以亥爲貴。人未爲羊刃。又且甲與巳合。午與未合。貴人羊刃將星三刑同見。定主將帥之職。你聽我道。

〔前腔〕地水師形。畜衆容民義頗明。三錫師中命。開國承家慶。嗟。羊刃又加刑。貴人相並。閫外提兵歷戰須教勝。百萬貔貅統六軍。卜大人請。〔末禱外卜介〕單交重交拆交。卜大人。休怪老夫說。此卦雖主富貴。後有險阻。〔末〕呀。老先生差矣。君子問災不問福。大丈夫不能垂芳竹帛。覲顏立于天地之間。祇虛生耳。爲臣死忠。爲子死孝。分之當然。何必顧忌。〔外〕這

等老夫敢斗膽直講。此卦乃地火明夷。四爻亂動。彖云。明夷利艱貞。其初爻云。明夷于飛。垂其翼。君子于行。三日不食。有攸往。主人有言。五爻云。箕子之明夷。利貞。又卦書有云。世逢鬼合。文王在羑里之時。身與世同。箕子去朝鮮之日。況兼命逢死絕。最嫌殺忌當頭。鬼入墓鄉。尤怕身爻濺血。水土內人見卯爲死氣。水見丑爲殺忌。日辰又與動爻傷尅身命。主有死亡之禍。你聽我道。

〔前腔〕用晦而明。箕子文王艱利貞。殺忌臨身命。瀕險須教慎。嗟。官祿總榮膺。後屯蒙愠。羑里羈囚海外封夷郡。只怕你兵刃臨身家不寧。大人得罪了。如今蘇大人

請。〔丑禱外卜介〕拆拆拆拆拆重呀。蘇大人。此卦一發不利。〔丑怒打下衆勸介外〕列位大人。人之賢愚。可爲霄壤。方纔卜大人卜卦不吉。老夫直言莽撞。說了許多利害。不曾發惱。那蘇大人。老夫方纔開口。就打將起來。我看他鴟目梟吻。面有反相。卦又不吉。後來必主叛逆受戮。列位大人宜謹避之。〔生〕請問他方纔卜的何卦。〔外〕方纔卜的是剝卦。彖云。不利有攸往。況兼卦書又有云。破才破貴。李廣到老不侯。合殺合刑。韓信晚年受戮。如今年月日三傳盡合刑殺。必戮無疑。列位大人。你聽我道。

〔前腔〕坤艮交成。剝卦從來不利人。牀剝膚遭病。用罔還生。釁。刑殺又皆興。二三傳合應。韓信當年戮市難逃遁。且面帶兇形。主叛徵。〔生〕多承指教。吾等無以爲敬。聊奉白金一兩。少資薪水。〔外〕多謝列位大人。〔衆〕就此告別。

〔生〕邂逅垂簾一指迷。

〔小生〕吉凶悔吝孰差池。

〔末〕從今識破義文祕。

〔外〕一卦能明半世機。

第十八齣 杜弼定計

〔一枝花〕〔淨扮杜弼〕腥羶羈弱主。海內英雄起。我與兵魚腹也據全楚。〔丑扮王

貢率衆上〕睥睨神州。一統歸疆寓。更溪峒兵堪倚。〔合〕誓定中原。圖成大業。

方顯男兒志。〔淨〕蓋世英雄膽氣粗。氣吞雲夢控荆湖。虎踞隱林窺大寶。蜂屯三澨覬鴻圖。〔丑〕主

帥。我雄兵肆掠騷城郭。猛將齊驅襲國都。〔合〕須教晉鹿歸吾檻。方顯人間大丈夫。〔淨〕自家杜弼

是也。家居七澤。隱漁獵以爲生。勇恃千斤。集梟狐而作伴。樓船百艘。盡從湖裏覓生涯。頭目千人。俱

向林中求活計。不必掘山煮海。自然利盡魚鹽。何須宿水餐風。天賜富饒商賈。以故不階尺土。粟儘

可支十年。無藉寸兵。威卻單行一省。副帥。吾想罾魚一唱。秦民袒臂歸陳。斬蛇再呼。楚卒傾心屬漢。目今晉家天子。青衣行酒。真僕隸之不如。執蓋虜庭。謂體統今安在。諸鎮帥徒懷忠盡。未聞加匈奴一矢。瑯琊王雖是賢明。不敢窺左江半步。終不然這個花錦世界。就是那劉淵的了。吾聞昔人有云。鷓蚌相持。漁人得利。吾意欲即日起兵。你的意下如何。〔丑〕主帥。嘗聞行兵之道。貴在萬全。方今劉太尉虎視中朝。陶荊州鷹揚內地。祖刺史雄鎮豫章。智謀之士。鱗集江東。倘彼五合六聚。鞠旅陳師。則一隊孤軍。豈堪腹背受敵。依貢之意。且按兵漢沔。勾引溪蠻。令彼先行侵掠。然後裏應外合。譬夏日之潰春冰。疾風之捲秋籜。事成則我專其利。有變則彼分其辜。豈不美哉。〔淨〕好計好計。只是五溪深邃。蠻酋性黠。必得能言舌辯之士。多賚金帛。欣以厚利。誘之與兵方好。爭奈没人去得。〔丑〕主帥。貢聞溪峒之內。奇珍異寶。地產頗多。前日劫到商船。多是文犀琥珀。玳瑁沈檀。皆其地土所饒。不爲稀罕。還覓三吳綾錦。燕趙鬪絳。玩好稀奇。珍羞異品。以悅其心。庶得其力。如無辯士。貢願自行。主帥以爲何如。〔淨〕如此卻好。分付寨內收拾珍玩。即便點選頭目。明日絕早起程。

〔瑣窗郎〕〔淨〕笑晉家鍾簾將移。統強兵疾掃除。召兵蠻峒。并力長驅。管教脇

從爲吾指臂〔合〕試看取中原一統大事濟傳帝禪受神器。

〔前腔〕〔丑〕捧琛縉入峒歡輸。仗蠻威拒六師。誘他擄掠。逼衆流離。吾軍深入。庶幾無慮。〔合前〕

〔前腔〕〔衆〕喜主帥威賽熊羆。況將軍賈馬餘。溪蠻助勢。如標鬻攻岐。縱晉多驍勇。也須迴避。〔合前〕

〔淨〕獵獵旌旂拂漢江。

〔丑〕纍纍珍賚動蠻方。

〔衆〕全憑舌戰求多助。

竚看當陽建大邦。

第十九齣 新亭灑泣

〔念奴嬌〕〔外上〕重陽美景。憶龍沙千騎。鼓笳聲競。〔生〕無奈潢池多寇警。廟算何由制勝。〔小生〕戲馬臺高。〔末〕伏龍山峻。〔合〕帽落都無興。且新亭縱步。聊續前賢風韻。〔木蘭花謾〕〔外〕西風凜烈。登高本爲酬佳節。〔生〕國步多艱。老去悲秋強自寬。〔小

生〕擎杯酌酒。追思往事空搔首。〔末〕舉目神州。便是黃花也帶愁。〔外〕下官王導是也。〔生〕下官

陶侃是也。〔小生〕下官周顛是也。〔末〕下官卞盡是也。今日重陽佳節。雖無菊飲萸囊。相攜問節。權共登高遠眺。免笑山靈。列位大人。同往新亭。一步何如。〔行介〕

〔本序〕〔外〕蒼茫萬里。想干戈聚處。幾年宗社遭驚。刁斗遙傳。蔽野見壁壘。旌旗相映。那更執蓋前驅。青衣行酒。華夷倒置。豈堪聞。〔合〕須辦取謀王斷國。正氣重伸。

〔前腔〕〔生〕遙省陸海波澄。見東南淼渺。炊桂餐珠難忍。萬壑千村。何處有竈突行人蹤影。還憫哀雁蜚鴻。牂羊羶首。齒骸滿路。痛傷情。〔合前〕

〔前腔〕〔末〕孤憤古廟狐鳴。中林猿逸。嘯呼庚癸。逼神京。萑內都是。帶甲拋鋤。爲逞料應。荒葛冒塗。澤葵依井。窮民無告。聚成羣。〔合前〕

〔前腔〕〔小生〕悲哽妖蜮含沙。祥麟化鶴。爪牙者舊。惜凋零。凝望處。四郊風景猶存。堪病春燕巢林。秋宮落葉。江河舉目。泣沾襟。〔合前周泣衆亦泣介〕

〔古輪臺〕苦酸辛。糖猊鎧甲蟻還生。屠龍事業愁難稱。政衰民困。看滿把茱萸。

翻做一天愁悶。弔古論今。何時能盡。對秋光空染得淚盈盈。胸填鬱憤。急煎煎。髮豎背橫。剖肝析膽。捐軀糜骨。共矢孤貞。臣節豈難能。精忠奮。裹屍馬革。樹威靈。

〔前腔〕閒評賦蛇政虎縱橫。君側有社鼠城狐。叢神交競。屈抑忠賢。袖手樊籠。徒恨也有枕戈待日。戎帷怕寢。也有中流擊楫志澄清。遭時不幸。聞雞起舞興堪乘。〔外〕列位大人。遭此時艱。須當共扶王室。克復神州纔是。乃作楚囚對泣。是何道理。相看揮涕。何如戮力。把山河復靖。胡馬避長城。銘鐘鼎。腥羶穢掃一時平。〔探子上〕報報

報。沔賊杜弼。勢甚猖獗。今又勾引武陵溪蠻。殺過來了。各位老爺聽稟。

〔五供養〕那杜弼呵。他湖湘據梗。收集亡徒。擄掠商民。今水兵過十萬。賊勢太憑陵。況把蠻酋勾引。擾軍州。人民竄奔。烽烟迷四野。不久薄神京。願速整王師。用意收擒。〔外〕曉得了。出去伺候領賞。〔探〕速整王師。用意收擒。〔下外〕士行。聞得當時擒

勦陳敏。如摧枯拉朽。明日啓過大丞相。勅足下以原官移鎮沔口。掃除此賊。庶不負方纔灑泣之意。

〔生〕只恐強弩之末。衝風之篋。不能有濟耳。〔衆〕陶兄說那裏話。吾輩洗耳聽捷。顛望凱還。再圖歡聚耳。

〔餘文〕邊烽急節鉞膺。料此去皇靈丕振。指日班師喜氣生。

〔外〕斜陽雁影弄餘暉。〔小生〕此日登臨共慘悽。

〔生〕全祈漢沔行歌凱。〔末〕牛山何必泪沾衣。

第二十齣 平蠻奏凱

〔水底魚兒〕〔丑扮溪蠻上〕密箐深谿。天生窟穴奇。一聲長嘯。霹靂振天低。霹靂振天低。玉匣銷龍鱗甲冷。金鈴繫鷓羽毛寒。皂雕擁出花當背。白馬騎來尸在鞍。嗒家五陵溪蠻主的便是。餐風臥月。佩劍帶刀。見花開爲歲月。那知冬夏春秋。倚膂力爲雄雌。誰識君臣上下。山中歌唱。搭對者便效鸞凰。野裏鬪爭。怯弱者降爲奴婢。夜郎南詔。是我比鄰。石碣西陽。作吾藩蔽。出的是麩金琥珀。石綠丹沙。件件皆遐方異寶。用的是籀醬異馬。班布氊蠻。種種盡土產殊珍。馬伏波曾深驅入峒。怎能損我秋毫。諸葛亮冒暑渡瀘。何嘗奪我寸土。近日聞得漢家天下。歸於魏晉。劉石姚李。

各帝一方。嗜家想西夷北狄。並立爲王。偏我南邦。不能進取晉家尺寸。方懷覬覦之心。近有杜弼。起兵沔陽。欲圖大業。前日差手下副將王貢。到嗜這裏進獻。要嗜並驅入掠。乘此機會。出去騷擾一番。擄些金帛子女回來。灑樂一灑樂。卻不是好。不免叫小番們進來分付一番。一齊殺將過去。小番那裏。〔衆上打手介〕小番。昨日中朝王貢。約嗜打草。嗜這裏趁此溫和天氣。一齊殺入境去。

〔前腔〕〔合〕搥鼓搖旗。弓刀要整齊。長驅深入。莫教退後遲。莫教退後遲。〔下丑扮王貢領衆上〕

〔前腔〕晉鹿奔馳。爭雄定霸時。〔合〕揚威荆沔。管教社稷移。管教社稷移。自家王貢是也。奉俺主帥之命。出約峒蠻。同寇荆湘。裏應外合。殺向江東。南面稱孤。繼晉大統。爭奈陶侃這廝足智多謀。十分驍勇。連戰失利。如何是好。暫且頓軍。俟蠻兵到來。夾攻便了。〔合前下〕

〔降黃龍〕〔生〕玉節金貂膺重任。移檠戟蒞荆門。赫赫龍驤。眈眈虎視。不負持麾出鎮。昨夜旄頭耀斗魁。今朝上將詰戎師。臂挽彫弓。神落雁。腰橫寶劍。勇誅螭。三千熊虎如雲擁。百隊旌旗掣電隨。試看纍囚爭獻馘。遐方讐服賀唐虞。可怪杜弼這廝荒林鬼燐。野藪孽狐。逞螳臂。

以常車。不知自量。奮蛙足而跳樹。輕賈狂兇。犯順抗旌。不軌犯法。雖然勾引蠻兵。大舉入寇。吾想此輩鼠竊狗偷。豈有深謀遠計。連日被我戰敗。力屈計窮。堅壁不出。今日先統大兵。擊退蠻賊。杜弼那斷不戰自擒矣。叫大小三軍。快拔營前去。

〔玉芙蓉〕〔生〕雙熊節斧陳。五馬輜軒盛。看舒猿服虎。勇冠三軍。堂堂正變高。八陣。惛惛蠻俘效七擒。〔合〕威風凜。神驚鬼驚。看頃刻間。邊平妖寇繫長纓。

〔前腔〕〔衆〕前軍鉦鼓鳴。後隊弓刀整。喜風驅席卷。萬竈雲屯。翩翩映日揚。六纛。烈烈轟雷壯五兵。〔合前遇蠻兵殺三陣退介〕

〔前腔〕〔生衆〕揮戈瘴雨晴。仗劍蠻烟淨。看檠瓠匿跡。魍魎潛形。銘鐫銅柱功。追漢。溪逐桃花憶避秦。〔合前又遇杜弼王貢混殺綁住介〕

〔前腔〕〔生衆〕天兵壓境臨。小醜空巢窞。幸身膏齊斧。俘獻王庭。深悔那揚鬢。鼓鬣遊紅釜。斬木褰旗聚綠林。〔合前〕

〔生〕遠提一旅振皇靈。

江漢羣氛屈指清。

狐鼠盡從林落竄。

人民帖席慶安寧。

第二十一齣 廣州運甃

〔破齊陣引〕〔生上〕百越風清魚袋。五羊日暖流蘇。玉篆苔封。金湯燧息。且喜黎民安堵。讒逢巷伯同飄梗。景換羲和類擲梭。頭顱暗裏皤。〔古風〕久知老將至。不謂便見侵。今年宜未衰。稍已來相尋。齒疎髮就種。奔走力不任。嗟此可奈何。能無傷我心。年光如弄丸。荏苒扶桑沈。所以古賢聖。皇皇習勸勤。文王歌日昃。大禹惜寸陰。雞鳴起爲善。虞舜有餘馨。哲人俱已往。芳名留至今。人生非孔顏。片晷當若金。逸豫滅厥德。晏安墮荒淫。紆朱食君祿。何當曠官箴。鞍馬日以遠。髀肉消還生。願言苦筋骨。千載俟知音。下官自平杜弼。殺退溪蠻。荷蒙聖恩。除授江陵都督。官封東鄉郡侯。爭奈功高見忌。勳大蒙讒。錢鳳興百計之誣。王敦加三褫之辱。親往陳辯。竟被拘留。左遷我爲廣州刺史。下車之日。王機猖獗。張昌猙獰。且喜邇來俱就撲滅。海氛由是不揚。部民因而帖席。只是國難未平。關河迢遞。家鄉在念。擗棄堪嗟。怎能勾得還朝的日子。吾聞古之賢將。超距軍中。今世鉅卿。起舞夜半。是皆以怠惰荒寧爲懼。勤勵不息自強。下官方欲戮力中原。削平僭亂。

倘此一軀屏骨。過于優逸。耽娛日久。倉卒奚堪。今喜衙齋隅有空閒百甃。儘可勞形。不免把他日則運之於中庭。夜則運之於內室。率以爲常。亦足自惕。〔運甃介〕

〔風雲會四朝元〕我軍威宣播。風雲叱咤呼。嘆捷書飛奏。貝錦讒賈。功績成間阻。謾交南遠竄。謾交南遠竄。教我綠鬢顏暎。黃耳音疎。日斷君門。心懸國步。空把年華負。嗟我展轉自躊躇。思患防危。肯把形骸惰。我把那甃呵。朝搬卮外鋪。夜運歸堂戶。勤渠歷碌。朝朝暮暮。肯教虛度。肯教虛度。

〔前腔〕鬚眉非故。容顏不似初。奈崦嵫漸近。桑景將徂。對鏡添愁苦。把韶光暗數。把韶光暗數。便逐電追星。棄杖揮戈。披鎧攀鞍。彎弧負弩。時短成何補。嗟日望賜環符。引領長安。不見君心悟。朝端豺虎多。邊圉梟鷂夥。把我身羈瀚海。淒淒楚楚。空籌帷幙。空籌帷幙。

〔前腔〕輕舒猿臂。階前運甃甌。怕甌甌隄壞。甕瓮防頗。衰頽怎與扶。念王事靡盬。念王事靡盬。便做道并日勤勞。怎能勾頃刻支吾。雖說是選事非臣。卻不道職歸

分土。因此上我把刀頭數。何日得載膺符。北討南征。取次把英聲賈。揚威殺賊奴。奮勇擒驕虜。其間就裏。轟轟烈烈。光昭竹素。光昭竹素。

〔前腔〕豺狼當路。含沙沫吐烏。爲功高見妬。勳重罹侮。播棄炎荒土。恨奸雄跋扈。恨奸雄跋扈。莫不是要擁鎮要君。向闕稱戈。賊害忠良。恣行狂蠱。故把我相摧挫。嗟。造罪怎遮糊。便做道天網能逃。怎免得神訶怒。貽羞萬載餘。惡名九州布。我熱心冷眼。昏昏悶悶。把伊瞧破。把伊瞧破。

白日每不歸。

青陽時暮矣。

皇皇我何求。

運甓衙齋裏。

第二十二齣 太真絕裾

〔十一時〕〔小生上〕生死見交情。總是個人。生義分。賢主遭兇。忠魂幽憤。肺腑憂縈。欲叩天扃。快愜九京齎恨。英雄無故遭殘滅。一腔冤抑和誰說。須將疏奏達天庭。要把忠良

讎恨雪。下官溫嶠是也。前在三河。致身劉帥。廁居幕下。猥蒙特達之知。奉使江南。復辱延譽之雅。以

故下官得拜官散騎。列爵東朝。提攜之德既殷。感激之心倍切。近聞他世子劉羣。爲段末杯所得。末杯欲襲匹磾劫世子。請太尉內應。蠟書遠達。邏騎緝擒。遂使胡將激怒。太尉冤死。吾想劉公受任朔方。乃心帝室。勝吉甫之薄伐。類李牧之備邊。那段匹磾雖懷匡濟之心。不過羌胡之種。縱使中原戮力。何當督將擅誅。下官與劉公誼忝幕僚。分屬臣主。忍聞異變。坐視不言。使公飲恨重泉。有負知己。存亡易心。焉用彼相。曾聞智伯以索地見誅。豫讓尙且不忘國士之報。彭越以謀逆被醢。欒布猶有哭泣收葬之忠。況我越石死於忠義。自古道。一死一生。乃見交情。不免向燈下草就表章。前赴建康。奏達天聽便了。〔燈下草表介〕

〔錦纏道〕憶當年荷深知幸。攀轅致身。使褐士步青雲。聞訃傷情。他姦謀賺害。貞臣。那些個蒙灰漆。毀形容。見識友朋。早難道獻督亢效武荆卿。封疏達王庭。辨白那故人的孤忠耿耿。怒髮裂眦睛。搦寸管敷陳難盡。聽牀頭蕭竦響青萍。〔前腔〕我想那劉越石呵。他本待要奮雄威把胡塵掃清。數載鎮長城。到如今使朔河桴鼓稀鳴。甫能勾承侯建。列台階。竹帛嶙峋。又誰知潑無徒將元胤留肩骨。

困苦飄零。那段末杯呵。勒他把書兒請興兵內應。機泄事無成。那段匹碑呵。頓教他心中發忿。霎時間把牢籠計定恣狂狴。

〔前腔〕痛忠魂遇強梁無辜雉經。血化碧入幽冥。那黃鬚奴呵。便戮力王朝。怎許把督帥囂凌。如今去排丹闕。伏青蒲。控明紫宸。拚一個仗吳鉤。刺刃仇膺。激得我性如焚。則這熱腔兒要把賢侯報稱。相逢倍眼睜。肯顧那事機利鈍。卻不道飛揚俠骨烈名馨。

〔前腔〕聽殘更漏聲。沈星稀斗橫。喔喔曉雞鳴。忙治綬裝。抱封章早達王京。休得要驚慈寢。漏風聲。致他倚門。若得那冤哀雪。早辦歸程。褒卹賁貞珉。將他一靈兒把恩綸遙贈。芳名萬載芬。方顯得舊僚忠盡。怎做得括囊無咎。負知音。天色漸明。草表已完。不免收拾行李。往建康去罷。

〔十一時〕〔老旦〕晨起扣書局。問何事終宵不寢。你官守雖膺。言責未任。且藏器需時。閉口安身。休得曉曉招釁。〔生〕母親孩兒拜揖。〔老旦〕咳。國亂須韜晦。時危要識幾。容

容多後福。諤諤慮生非。曠俎應遭詆。侵庖必受譏。問兒因甚事。終夜獨歎歎。老身崔氏。我的孩兒。自你父親死後。我苦守到今。聞以善養。不聞祿養。如今雖蒙劉公薦剡。薄沾寸祿。無甚煩難。職守。母子儘足相依。你夜來通宵不寐。喃喃自語。不知卻爲何來。必定有個緣故。〔小生〕告覆母親知道。那劉太尉識孩兒于稠人之中。拔之寮案之上。咨以箋表。延譽江南。今日之官。皆其所賜。昨日聞報。說他世子劉羣。爲段末杯所得。那末杯意圖反噬。強世子出書。請太尉內應。卻被邏卒所獲。獻之匹礮。太尉不知。被他賺去。逼令自縊。這一腔熱血。半世忠懷。竟死於鮮卑之手。身亡家破。骨肉乖離。孩兒以此憤憤不平。夜來草就表章。欲詣建康。先行扣闕。爲劉公雪不白之冤。然後往磔賊奴。爲天下大復仇之義。誠恐母親縈掛。故此不敢奉聞。今蒙垂問。卻也瞞不得了。〔老旦〕呀。孩兒差矣。自古道閉口深藏舌。安身處處牢。你官非諫諍。職謝台司。往日雖爲幕賓。今日已居朝列。倘若上表鳴冤。輕犯賊鋒。竊恐飛蛾投火。無復完理。還是不去的是。〔小生〕呀。母親。古人有云。士爲知己者死。女爲悅己者容。若首鼠模稜。負恩不報。汗顏人世者。非夫矣。孩兒一定要去。母親聽稟。

〔榴花泣〕人生涉世。恩怨要分明。甘斷脰。願刳心。我那劉公呵。誰知倏忽沒羌軍。

旄頭夜殞。白日黯成昏。我啣恩抱恨。便齋骸粉骨。眸甘瞑。痛枕戈待旦。心勤舞雞鳴。底事勞魂。孩兒就此拜別母親。〔老旦〕孩兒只是不去的是。

〔前腔〕忠良已死。負屈有誰伸。你懷國士。誓輕生。竟不念孤單老母鬢星星。存心太忍。急主便遺親。捐身投奔。總無憑。須把衷腸審。怕答主恩未學程。嬰棄母慈先類王陵。〔小生〕母親。

〔漁家燈〕思量起故主恩情。不由人不怒髮冲纓。段未極。你便做道一點忠丹。怎壞我萬里長城。我真心要把葵忱罄。怎顧得萱闈衰冷。〔合〕慈親不必泪零。能報德方成孝名。

〔前腔〕今日裏拜別登程。須有日仗劍歸庭。〔老旦〕我兒不要去好。〔小生〕母親。又何須聒噪丁寧。這忠腸轉石難更。兒今已定趨朝興。便刎下頭來也斷然不允。
〔合前老旦扯衣截裾介小生〕

〔尾聲〕臣忠子孝難兼盡。從今號肺石排闥。願不得絕裾人嘲溫太真。

玄象中台折。

皇家上將薨。

一封陳玉闕。

三寸對金城。

第二十二齣 折翼著夢

〔卜算子〕〔生上〕一枕熟黃梁。插翅排天闕。飛過八門遭盾辭。左脇嗟狝折。〔如夢令〕長夜黑甜安枕。夢入華胥神境。覺後不勝情。恍惚吉凶難定。畢竟畢竟。尙卜方知真信。下官因連日羽書絡繹。宵旦無眠。昨偶小閒。暫成熟寐。夢生八翼飛而上天。見天門九重。而登其八。惟一門不得入。闢者以杖擊吾墜下。折吾左翼。覺來臨下。猶覺微疼。未審主何凶吉。吾想覺有八徵。夢有六候。一曰正夢。二曰噩夢。三曰思夢。四曰寤夢。五曰喜夢。六曰懼夢。故恭嘿武丁。旁求版築。開周西伯。后載屠傭。孔子夢見姬公。只爲志存變魯。莊周夢成蝴蝶。皆因性樂逍遙。叫當直的。〔末〕有。〔生〕外邊有詳夢的。喚一個進來。〔末〕噯。〔生〕正是夢裏常言夢。如今覺后知。不知今是夢。更有覺來時。〔並下〕

〔水底魚兒〕〔丑上〕卜卦排星。觀梅并演禽。書符解夢。啓口妙如神。自家乃柳神

仙是也。家居鬧市。伎習雜流。三寸舌練就脫空。一張嘴打成騙局。排八字那曉得運度星辰。顛課錢誰知這休囚旺廢。書符呪也不慣禹步神罡。說禳解便派他豬羊退祟。遇富貴就奉承個恭喜恭喜。見寒酸便抹揉他不濟不濟。昨日街上有人盤我。我就信口誑他幾句。說起卦伏羲文王是我家師。問禳夢黃帝周公是我前輩。鬼谷子這是我學卜的同窗。張道陵是我作法的徒弟。真本事並無半分。靠天地哄過一世。今日早間坐到這個時候。並無一個主顧。與我發市。正是閻羅王做生意。鬼也沒得上門哩。〔末〕方辭亞父營。來到君平宅。柳先生在家麼。〔丑〕那個。〔末〕是我。〔相見〕譚介。我是太爺那裏喚你圓夢。〔丑〕又譚介。長官。不知爺有何夢。先請教一聲。〔末〕我那裏知道。你到那裏自有分曉。〔丑〕不是。大凡事體。問個明白。方好對答。答應官府。可是當要的。〔末〕夢寐之事。甚是渺茫。你到那裏。只奉承他幾句便了。〔丑〕豈有此理。大抵人之夢寐通乎天地。達乎物類。憑乎喜怒。應乎節氣。故饑則夢取。飽則夢與。虛則夢飛。實則夢溺。陰盛夢水。陽盛夢火。枕帶而寢則夢蛇。飛鳥銜髮則夢舉。將陰夢火。將疾夢食。夢棺得官。夢糞得才。夢飲酒者且而有憂。夢歌舞者且而哭泣。齊桓公夢見二豎。我就說他病入膏肓。孔夫子夢奠兩楹。我就斷他身登鬼錄。丁固夢松生腹上。我許他十

八歲爲公。王濬夢多益一刀。我斷他必益州刺史。是以黃帝著占夢之經。周公有解夢之集。熟明此理。禍福無差。〔末〕柳先生。你方纔說這許多。我且問你。許多高壽。得見這些古人。〔丑〕呀。長官。這是他夢裏來央我圓。我就夢裏與他圓去的。正是夢裏行人事。覺來思夢前。夢情參不透。故把夢來圓。〔末〕不要閒講。快同去罷。〔下生上〕

〔卜算子〕宵夢恐非宜。展轉懷縈慮。宣召史人來解疑。禍福無猶豫。〔末〕稟爺。詳夢人喚到了。〔生〕着他進來。〔丑〕詳夢人磕爺頭。〔生〕起去。我且問你。本州夜來夢身生八翼。飛而上天。見天門有九。飛過其八。惟一門不得入。被關人以杖擊吾墜下。折吾左翼。覺來脇下猶疼。未審主何凶吉。你可仔細推來。〔丑走思介〕老爺賀喜。〔生〕怎麼。〔丑〕老爺聽稟。

〔啄木兒〕良宵靜。夢寐生。幻狀還從天巧定。報恩臺貴兆奇徵。豈同他怪異勞形。老爺。你向雲端鼓翼把天門近。世間有幾個州和郡。管取金印纍纍跨八城。〔生〕還是怎麼樣解呢。〔丑〕噯。老爺。天有九門。地有九郡。身生八翼。這是際會風雲之兆。飛過八門。定主歷鎮八州。一門未入。只這一州未歸掌握。杖擊折翼。這是美中不足。明明報老爺止可作折臂

三公。若過此一門。則貴不可言矣。〔生〕怕到不得此地。〔丑〕這個小人怎敢謬解。他日應來自分曉。〔生〕叫左右。分付庫上把五錢銀子賞他。〔丑〕謝老爺。〔下生〕

〔前腔〕豺狼橫。狐鼠紛。奈食寡兵微。慮欹傾。倘果得折翼三公也。圖他青史標名。我從今須識人由命。輸忠竭力把臣箴謹。只怕傾廈難將一木撐。

〔生〕世傳夢凶偏得吉。

神物戲人良有旨。

〔末〕既寤茫然失所遭。

人境晦明秋色裏。

第二十四齣 手板擊鳳

〔西地錦〕〔小生上〕耐耐奸雄跋扈。僞將心事拋他。謬爲恭敬權趨附。待時入室操戈。流落荆揚數載餘。滿懷忠讜向誰舒。謾隨從事穿鈴閣。幾向奸雄效密機。匿怨足恭非本意。投

明棄暗直後時。今朝幸脫條籠去。會看雲陽樹隼旗。下官溫嶠是也。前蒙劉越石延譽江南。今承王處仲收歸湘漢。效陳平之祕計。進亞夫之忠謀。以我僞心。取彼真悅。只是他權傾南國。勢壓中朝。因朝廷處之外藩。蓄邪謀陰圖不軌。況兼錢鳳那厮。妖狐九尾。毒虺兩頭。託心腹以容奸。時下井中之

石。鼓齒牙而害善。常操室內之戈。慮含沐猴之砂。強營狡兔之窟。遂假意與他結納。謬加贊揚。說他精神滿腹。鳳聞深喜。以此他兩個俱落我之彀中。近日因丹陽尹闕。下官謂京尹咽喉之地。公宜自選。那錢鳳就極口相薦。我故假意推辭。敦復不允。只是一件。此身在近。可以日夕偵探。惑亂其心。倘今遠去。能保處仲之眷顧不衰。世儀之讚言不發。今日之與我者。不因而奪我乎。蒙他治酒相餞。少間席上。不免再做個繾綣之情。使彼終不我疑。以保萬全。卻不是好。正是情知不是伴。事急且相隨。

〔下末上〕昨夜銀河轉斗杓。今朝東閣賸相邀。陽關三疊歌驪曲。別淚千行滴雀橈。鴻雁那堪愁裏去。雲山況是望中遙。此行後會知何日。顛待春光寄柳條。自家王都督府中院子是也。今日俺老爺與溫爺餞行。你看筵陳兔首。簾捲蝦鬚。金獅口內噴烟。闔室祥光紛繚繞。寶鴨頭中飄篆。滿堂瑞藹散氤氳。水晶盤盛的是魚鳳烹龍。畫几殺馨蘭麝。鸚鵡杯傾的是鵝黃鴨綠。玉壺酒滴珍珠。幾般雜劇戲傴僂。一派笙歌聲嘹唳。高談霏玉屑。喃喃執手話臨岐。上座集金貂。濟濟開襟嗟去馬。正是樂莫樂兮心相知。悲莫悲兮遠別離。道猶未了。老爺早到。

〔疎影〕〔淨〕馬蹄篤速。備離筵供張。少展心曲。〔丑〕數載交歡。一朝遠別。愁懷耿耿。

耿堪掬。都督大人。錢鳳見。〔淨〕世儀少禮。太真可曾到麼。〔丑〕想即刻就到了。〔小生〕樗材幸沐
推京兆。悵來會幾時重卜。〔報介見介合〕記取今日華堂。痛把銀尊相逐。〔淨〕太真。
握手出都門。駕言適京邑。〔小生〕豈不懷故知。惆悵關河隔。〔丑〕麗日坐高樓。清觴讌華室。〔淨〕流
光倏忽過。後會杳難卽。〔小生〕念結路方遙。歲陰野無色。〔丑〕單車君就道。隻影我還泣。〔合〕把酒
一相酬。淚落滿衣溼。〔淨〕太真。幾載相知。有同膠漆。一朝輕別。頓類參商。徒以丹陽近輔。藉公保障。
故不容不割肺腑厚誼。以副心膂重託。幸堅北固之防。毋使我有東顧之慮。萬萬。〔小生〕溫嶠一介
草茅。遠投麾下。重蒙明公俯加翦拂。譬之曲木見採於班門。溲渤備收於藥籠。誠不世之奇遭。三生
之罕邁。今日復蒙不次。委以重任。溫嶠敢不務竭襍線之才。第恐有辜鎖鑰之寄。只是一件。遠離幕
屬。杳隔音徽。不無睽別之哀。有觸拊心之痛耳。所喜世儀英英偉識。落落襟懷。遇事多機。不怕盤根
錯節。臨謀足智。可稱閱覽博聞。信幕府之元僚。台臺之羽翼。臭味相投。差足少慰耳。〔丑〕呀太真兄。
以棟梁之材。抱干城之略。今日此舉。不過鼓屠刀於小試。定當奏鴻業於方來。許久倚參戎。昔時承
提誨。今日分袂。忽忽若有所失。足下反加浮譽。使鳳益增愧赧。〔淨〕叫左右。快將酒來。〔淨敬酒介〕

〔畫眉序〕春光展新綠。玳瑁筵開對晴旭。唱陽關三疊。酒傾金谷。味相投。臭並芝蘭。心毋遐。音慳金玉。〔合〕這回執手相分去。何日舊歡重續。

〔前腔〕〔丑〕小弟借花獻佛。也敬溫兄一杯。擎杯獻醴醪。看楊柳依依拂華屋。悵別離無限。情隨艫舳。蕩心旌轉類飛蓬。啼淚血汪同流燭。〔合前〕

〔前腔〕〔小生〕都督。我頻年受膏沐。今日分辭往丹瀆。懼才疎力薄。有孤覆育。歷征塵身去江南。念恩波心懸漢北。〔合前〕

〔前腔〕世儀。寅恭義深篤。倚玉蒹葭散香馥。感曹丘延譽。情深骨肉。從今去泣別離亭。須有日恩酬推轂。〔合前淨〕太真。可憐今夜別。動是隔年期。須開懷暢飲。以罄生平之

歡。或猜謎行令。伐鼓投壺。忘分誰呼。以永今夕。〔小生〕都督。我等斯文相聚。何必效俗角勝。當如金谷故事。刻燭賦詩。違者依律奉罰。何如。〔淨〕這個到好。〔丑〕溫兄。何謂金谷故事。〔小生〕三十六巨觥。七十二小杯。這爲金谷故事。〔丑〕阿呀呀。喫這許多。〔淨〕這等以何爲題。〔小生〕但憑大人。〔淨〕

今日雖是春明。適來卻有寒意。就把分別爲題。寒字爲韻。各占一絕。何如。〔小生丑〕謹遵台命。〔淨〕

太真先起。〔小生〕不敢。還是大人。〔淨〕這等占了。〔吟介〕莫道湘江離別難。舟船明日望長安。金尊漫飲留君醉。春夜風來體覺寒。〔丑〕妙妙妙。奉敬一杯。如今該太真了。〔小生〕適纔都督之詩。清新俊逸。可方庾鮑。溫嶠何敢續貂。〔淨〕七步之才。說那裏話。〔小生〕弄斧班門。望勿嘲笑。〔吟介〕幕中留飲任情歡。銀燭金爐夜不寒。爲問別餘何日會。青山明月夢中看。〔淨〕好好。〔丑〕青山明月夢中看。把會期說遠了。罰罰罰。罰一大觥。〔敬介小生〕如今輪到足下了。〔丑〕有。〔作吟介小生〕燭痕將盡。遲則奉罰了也。〔丑又吟介小生〕燭期已過。快取大觥過來。〔丑〕不要有了。〔小生〕喫了再吟。〔丑〕哎。吟了受罰。〔淨〕且待他吟看。〔丑〕渭城朝雨浥輕塵。〔小生〕呀。走了韻了。〔丑〕偏有你吟的。是爲何我吟的便說走了韻。〔又吟介〕客舍青青柳色新。勸君更盡一杯酒。西出陽關無故人。〔淨〕不惟不是韻。又是舊詩。斟酒送錢老爹。這酒還要太真盃完。〔丑做喫幾大杯不能飲介〕太真。小弟其實喫不得了。〔小生打板丑怒介小生〕錢鳳。汝是何人。溫太真行酒。而敢不飲乎。〔丑怒〕溫嶠。你纔得進步。輒敢無禮。我在都督門下。出入數年。不過呼我老錢。稱我世儀。你與我不過班行寮案。奈何直呼以名。可惡可惡。我斷然不喫這酒。〔小生〕你敢不喫。〔丑〕我不喫便怎麼。〔小生佯怒以手

板擊鳳幘落地。丑怒欲毆介。淨。今日之飲。本圖歡會。使酒罵坐。豈欲作當今之灌夫耶。世儀。敢是酒多了。叫左右。先送錢老爹回去罷。正是酒逢知己千鍾少。話不投機半句多。〔丑先下。小生謝罪介〕

〔滴溜子〕謾說道。官京尹寵鄰。甸服細追思。此去非吾意。欲怕讒口將人污。惡可惜。當筵笑語喧。翻做臨歧哭。願洞鑒微忱。休教被螫毒。夜深酒殢。就此告辭。今夜燈前醉濁醪。明朝江上舞輕橈。〔淨〕願祈努力收三輔。莫待秋霜染鬢毛。〔別介。淨〕叫左右。收了筵席罷。〔小生復入。淨〕太真有何見教。復轉來了。〔小生〕大人溫嶠此行。未審何時復覲台光。眷戀徘徊。足不能前。故復排闥一晤耳。〔哭介〕

〔鮑老催〕我淚珠亂撲。侯門一出難再復。乘風彩鷁相迸促。別龍光。離熊幃。辭鸞屋。何如返詔還初服。周旋院宇相徵逐。不負了。恩情郁。〔淨〕太真。昔漢高委蕭何。以關中。光武託寇恂。以河內。我因丹陽重地。故以相煩。非故遠君也。萬勿效兒女子悲啼。凡事好生留意。〔小生〕義不能辭。小生只得隱忍告別了。〔下。淨笑介〕吾日夜欲圖大舉。慮丹陽阻寒咽喉。緩

急不便。每每懷憂。今觀溫嶠依依復入。不忍言別。自是多情。寧肯負我。從今可高枕無虞。吾好快活。好快活。〔小生又上淨〕呀。太真。爲何又來。〔小生〕嶠思都督左右。密謀忠告。無一可人。況踽踽獨行。嶠身榮辱未卜。奈何以眼前一命之榮。而負知己數載之遇。願祈改命。泥轍都門。實嶠萬幸。〔淨〕哎。太真。還是去的是。你的忠心。吾已倍感。倘慮遠達。不久我。再作處分。大丈夫意氣相期。豈肯以遠近爲念。縱足下去。我斷不以離我而生疎逃之嫌。萬勿見訝。〔淨亦泪介〕

〔雙聲子〕行還復。行還復。足見你懷忠告。眉頻蹙。眉頻蹙。好教我添躑躅。兩意篤。兩意篤。人如玉。人如玉。你趑趄進退。攪人腸腹。

〔尾聲〕〔合〕徘徊馬首辭軒燾。盼蹤跡天南地北。望把音書勤寄囑。

長江路永何極。

明日孤舟解維。

鳥向平蕪遠近。

人隨流水東西。

第二十五齣 緞衣被賊

〔清江引〕〔丑上〕今朝賭錢多蹭蹬。輸盡無投奔。妻子苦埋冤。肚餓身寒冷。算

將來去摸丟兒再翻本。自家張游花是也。說酒宕眼笑眉花。逢賭場歡天喜地。贏來時呼么喝六。鬧裏奪尊。輸來時跌脚槌胸。呀聲歎氣。大碗酒。大塊肉。遇見便倒。不顧老婆典了布棍。或擲色。或扯牌。撞着就鑽。那管身上脫了破絮。賭十場九遭說贏。到頭來一文不聚。今朝場脚連盆。足足擲了十七八個猪窩。不住把我輸斷脊筋。還去尋那下場頭的活計。自家有個結義兄弟李偷兒。住在前村。連日因賭興太高。不得工夫看他。今日輸得極了。不免到他處商個計策。尋些活路。再作道理。

〔行介〕兄弟在家麼。

〔前腔〕〔小丑〕算來做賊真末等。貧困須含忍。若還做出來。官法難逃遁。我如今入空門改前非。求個身安穩。我乃李偷兒的便是。從小身子輕鬆。更且乖巧伶俐。日裏尋探根蹤。夜間就便行事。一根鐵尺是條護身龍。一把鐵撬是個搖錢樹。憑他銅牆鐵壁。掘開如潤破紙窗。任渠大屋高樓。跑上如飛履平地。撇白翦綰。當做頑皮。走脊飛簷。視同兒戲。縱然他巧匿深藏。進門去取之若寄。如今及早回頭。儘可過那半世。若然不識機關。犯出來定要刺臂。南無阿彌陀佛。南無阿彌陀佛。〔又叫介小丑〕是那個。〔丑〕兄弟是我。〔小丑〕阿呀。阿哥從那裏來。〔丑〕特來看你。

〔小丑〕阿哥。多時不見。一向起居如何。〔丑〕兄弟。不要說起。特來求救於孫將軍。〔小丑〕爲何。〔丑〕兄弟。俗諺說個。錢會說話。米會擺鐸。若無兩樣。便做一套。今日非別。只爲賭錢輸極了。特來投你。要尋些買賣翻本。〔小丑〕阿呀。阿彌陀佛。我一向看經念佛。這樁道路。久不做了。〔丑〕兄弟。人來求主。鳥來投林。平昔結交弟兄。只爲要急難相救。怎麼就見外我。〔小丑〕阿哥。非我作難。自古道瓦罐不離井上破。如今天幸不做出來。粗移挪蓋。過得日子便罷休。這遭一定不成了。〔丑〕兄弟。沒奈何搭救一搭救。〔作跪殺雞介小丑〕你既一向不到舍下。況今又苦苦相求。怎麼是好。罷罷罷。南無觀世音菩薩。我李儉兒好歹只做這一次兒。下次若再做。天誅地滅。手上生個大疔瘡。〔丑〕兄弟。是便是這等說。我和你還到那裏去。〔小丑〕阿哥。我前日各村抄化齋糧。我見那陶刺史家住得十分幽僻。那老爺不在家裏。只有一個家人。又隨了公子出去。那奶奶一個在家。況兼前後無鄰。門戶淺薄。我一向有他的心。不曾動手。同你一去如何。〔丑〕好個念佛的人哩。只是他家窮。不好。〔小丑〕啐。這樣不在行的。常言道官久自富。窮做窮。得的東西還勾我和你受用。倘若尋了一個硬掙主顧。弄出來怎麼好。〔丑〕如此我和你就去。〔下旦〕

〔憶秦娥〕夫遭逐。教人晝夜縈心曲。縈心曲。夜長無寐。且縫寒服。〔古詩〕秋夜長。殊未央。月白露冷澄清光。層城綺閣遙相望。川無梁。北風受節南雁翔。崇蘭委質時菊芳。鳴環曳履出長廊。爲君秋夜擣衣裳。織羅對鳳凰。丹綺雙鴛鴦。調砧亂杵思自傷。征夫萬里在他鄉。鶴關音信斷。龍門道路長。君自天一方。寒衣徒自香。奴家李氏。自從丈夫一去。鸞孤鳳隻。雁杳魚沈。聞得他兩平。廣賊累立戰功。奈王都督每懷妬忌之心。不無暗傷之計。我朝夕在念。意欲差陶旺到任所。一探消息。怎奈關河迢遞。兵燹斷途。好生納悶。前日着孩兒同陶旺往建康打探。不知怎麼還不見回。正是和針吞卻線。繫人腸肚刺人心。如此夜靜無眠。不免把冬衣整頓一番。少待路通。着人寄去則個。

〔二郎神〕郎別後。嘆分飛把雙蛾頻皺。看彈指韶光如箭驟。天涯游子。何年得覩。鳴騶。爲甚麼音書徒落後。好教我淚沾紅袖。〔合〕空僝僽。總夢裏相逢。覺後添愁。

〔前腔〕清秋。蛩吟壁竇鴻鳴宵候。孤寂孱骸多病疚。縫衣寒夜。憑誰寄與他收。相公。你指望成名列五侯。翻冷落求凰篋奏。〔合前〕

〔轉林鶯〕征衣午夜親翦就。幾番慢閣井州。怕身裁難定。肥和瘦。把針兒和線。頻抽我沈吟良久。何日裏方同聚首。〔合〕思悠悠。情牽兩地。離恨倩誰收。

〔前腔〕停針試把香爇獸。更挑殘一點燈篝。你幾年拋閃情偏逗。看天河遙隔。牽牛遙傳鐘漏。將錢卜歸期近否。〔合前〕寒衣已完。夜復過半。不免收拾進去睡罷。正是秋

霜欲下手先知。燈底裁縫剪刀冷。〔下丑小丑同上偷介旦上驚介〕阿呀。怎麼好。怎麼好。門都大開。昨夜做的衣服。放在桌上。與一應家伙。通被賊偷去了。天那。〔哭介〕

〔琥珀貓兒墜〕才郎去後。家計已如鳩。怎奈穿窬復肆偷。空勞縫製禦寒裘。

〔合〕啾啾。真個是雨遭屋漏。風打船頭。

〔前腔〕孩兒南去。望斷倚閨眸。絕塞音書尙未收。先落得甌破瓶空無一留。

〔合前〕

〔尾聲〕淒其肱篋空搔首。這情懷和誰分割。那些個偕老齊眉叶好逑。

幾年游子隔天涯。

況復穿窬罄室家。

正是紅顏婦人多薄命。

莫怨東風空自嗟。

第二十六齣 移鎮石頭

〔鎖柳烟〕〔淨上〕細柳移營。石頭遷鎮。丹闕紫宸相近。早晚密窺機變。暗裏藏鬪。要把山河重整。獨跨荆湘擁重權。十年不調興蕭然。黃旗直指憑周闕。青雀東飛出漢川。鱗甲未成君莫笑。頭顱漸變我心寒。會看身薄雲霄上。四海謳歌玉帛傳。自家王敦。因想舊日家世齊。任且狃於三窟。鎮居荆楚。權復擁於一方。攬朝廷威福之樞。專各鎮征討之柄。當時頗頗自謂據着要津。以故見者人人股慄。爭奈疎因地遠。寵以間移。北望長沙。譙丞有犬牙之制。南瞻吳會。劉刀爲心腹之憂。進退棘心。舉動掣肘。耐耐耐。屢屢欲相機乘釁。礙祖士雅在豫章。所以不敢輕動。如今他已物故。以下不足爲憂。只是一件。朝廷近日把戴淵都督荊豫。劉隗都督青徐。雖以討賊爲名。實則與我犄角。況河南一帶。吾取之荊棘之中。彼厝之衽席之上。情理委實難容。我如今上疏建康。罪狀刁協。張臯六師。廓清城社。若朝廷順我。我原退守藩封。若道半句不從。我便危及宗社。只是一件。陶士行因我褻其侯爵。劣轉廣州。未免有忿恚之心。必將興釋憾之舉。前已差魏乂領着一彪人

馬危困長沙。使司馬丞倉皇不能自顧。陶士行沮絕未得遠來。此亦制越一奇也。叫那左右傳下號令。分付大小三軍。一齊班師到建康去。〔衆〕得令。

〔惜奴嬌〕威控蠻荆。拔營東去。遠指石頭城。旌旗颺江上。晚峯相映。看微風吹送征艫。雙雙如畫。途中美景。波心看銜尾舳艫形。好似雁字列雲成陣。

〔鬪寶蟾〕遲明。畫鷁縱橫。便投鞭江底。儘成溝塍。更蛟龍潛跡。浪滾無影。得意虎賁皆勇猛。熊旅盡英明。細沈吟。管取六師齊渡。功多得勝。

〔錦衣香〕彩纛翻銀。戈炳鐵冑明。彫弓勁。遠離江陵。湘流將盡。艤艫齊薄武昌城。又見那磯頭采石。觸目堪驚。望鍾山將近。挖掙掙一腔怒迸。顧不得羸藩角有虧德盛。順流鼓櫂。齊驅迭進。

〔漿水令〕忒楞楞牙檣畫艇。撲咚咚羯鼓兵鉦。今宵已到秣陵城。看朝廷九廟震驚。休顧惜臣寮分。還須要把朝綱整。忠和佞。忠和佞。別陳天聽。除君側。除君側。不枉東征。

〔尾聲〕剪刀劉心歡慶。旁攬太阿國柄。從此威權遠近欽。

〔滴溜子〕〔外率百官上〕辭丹闕。辭丹闕。纔離鳳城。投帥闕。投帥闕。急傳龍悃。則

說道程途勞頓。特頒上相麻將忠懷贈。復勅羣臣稽首虔哀請。此間已是石頭城了。

列位大人請。〔衆〕還是司徒先請。〔進見介門報〕朝命下。〔淨跪介〕聖旨已到。跪聽宣讀。詔曰。朕以

寡昧。幸列藩屏。遭家不靖。繆膺大統。爾都督王敦。周旋行陣。扈從龍飛。著有勤勞。受符出鎮。頃念朝

端弗靖。城社憑依。復矢精忠。統兵入衛。使禁地肅清。朕心嘉悅。是用進爾爲大丞相。都督中外諸軍

錄尙書事。仍命爾司徒導及百官以下。遠迎郊次。慰勞三軍。昭朕至意。謝恩。〔淨〕萬歲萬歲萬萬歲。

將聖旨請在一邊。〔衆見介〕列位皆公卿領袖。文武班頭。看坐。〔衆〕丞相在上。不敢坐。〔淨〕說那

裏話。還是坐了好講。兄弟。我因刁劉竊柄。濁亂朝廷。提兵遠來。未免驚駕。不識此舉中外以爲何如。

〔外不應戴應〕丞相此舉。見形者謂之造逆。體諒者謂之公忠。〔淨笑介〕好個體諒者謂之公忠。卿

可謂能言舌戰。兄弟。我明日合該面謁聖上。陛辭而去纔是。但吾擁兵在此。恐起猜疑。且吾自爲計。

亦防他費。我明日不得入朝了。你與我好生轉達。但戴周二公並負重名。暫留轅門。還有話講。其餘

都請回罷。〔衆〕噫。小官等就此告別。〔淨〕兄弟。你還坐一坐去。〔外〕復命要緊。也就別了。〔淨〕請了。

〔衆〕虔奉綸音叩帥庭。

〔淨〕寵膺相命冠朝紳。

〔外〕今朝手足纔相會。

伯勞飛燕又離分。

第二十七齣 聞叛勤王

〔行香子〕〔生上〕遠塞粗安。邸報喧傳。駭狂狙舞槩長安。丹陽籌戰。淝水圖先。

我擁精兵。須會合。靖烽烟。帝城萬里杳征人。夢憶王居。泪滿襟。嶺海城頭空有月。交南峩裏

別般春。羽書罕接。忘興廢。邸報稀聞似太平。見說逆敦。倡桀驚。急提孤旅赴神京。下官自平。杜弢。被

錢鳳妬譖。王敦忌功。將我左遷廣州。天各一方。地懸萬里。經文緯武。雖無鼠雀狐豕之虞。孽子孤臣。

卻有廊廟江湖之感。昨接邸報。見王敦罪狀。劉刁勤兵討賊。又聞溫太真極陳逆釁。郗道徽還軍請

討。吾想他兩個。一則久侍幕僚。屬以咽喉之任。一則垂情桑梓。薦居台輔之司。然且心憂軍國。義絕

友朋。況我前遭沮謫。已開並立之仇。茲遇無將。應有勤王之責。不免喚集僚佐。誓戒軍旅。往建康走

遭則個。叫左右傳下號令。分付各營將官聽點。〔衆上〕衆將官叩頭。〔生〕起去。〔衆〕噫。〔生〕衆將官。

吾聞君父之仇。不共戴天。亂賊之黨。力能則討。故田常謀弑。孔子尙有沐浴之朝。董卓廢立。諸侯並興。合從之旅。孔子異國大夫。列侯漢末郡守。既無討賊之權。又乏兵車之衛。猶然汲汲皇皇。席不暇暖。今王敦以本朝逆臣。下官又叨軍旅重寄。豈可坐視一方。按兵不舉。快齊集三軍。兼程應援。以盡臣子之情。衆將官俱要聽我號令。〔點介〕水軍頭領彭世。〔外〕有。〔生〕聽我分付。

〔好事近〕你戰艦樹旌帆。萬艘舳艫須選。水犀十萬。人人出沒深淵。游泳幾年。今朝要把勳名建。搖蘭槳。鼉隱波宮。舞桂檝。龍潛海殿。〔外〕得令。〔生〕馬軍頭領李千。〔末〕有。〔生〕聽我分付。

〔前腔〕廐馬久調閑。千騎龍媒須選。滾塵逐電。人人躍水踰山。控馭幾年。今朝要把勳名建。披玉勒。雲錦成羣。飾金鞵。月光匹練。〔末〕得令。〔生〕步軍頭領襲登。〔小丑〕有。〔生〕聽我分付。

〔前腔〕組練倍精嚴。奮擊蒼頭須選。攻城掠陣。人人買勇爭先。你操練幾年。今朝要把勳名建。衽金革。虎豹同威。仗刀兵。貔貅齊健。〔小丑〕得令。〔生〕軍糧督護殷羨。

〔小旦〕有〔生〕聽我分付。

〔前腔〕軍以食爲天。萬斛芻糧須輓。木牛流馬。先年故事堪傳。你度支幾年。今朝要把勳名建。士宿飽倍激死綏。馬堅肥轉加捷戰。〔小旦〕得令。〔生〕號令已齊。明日

到大教場中排列。祭告軍牙六纛之神。即便行師。如有違令者。軍法從事。決不爾貸。〔衆〕得令。

〔尾聲〕〔合〕五羊誓戒軍容顯。明日裏急駕征帆。協力鋤姦奏凱旋。

東粵符膺數載餘。

遠提虎旅赴京畿。

誓擒姦宄昭王法。

不枉修途繕義師。

第二十八齣 夢日環營

〔翠地錦襠〕〔淨上〕重揚虎旅薄京營。怎奈時乖病見侵。青囊祕術總無靈。且

堅壁臺城候體平。花正芳時遭雨打。日當晝處被雲侵。不如意事常八九。病龍應自沮飛騰。自家

官居上相。榮承袞冕之華。統攝軍州。勢壓鼇圖之貴。陽名入覲。陰索禪文。借武仲據防求後之餘謀。

祖操莽廢君篡位之故智。奈何精神耗于計術。心力竭于圖維。遂致身遭病坎。祟入膏肓。媵理之疾。

難調。軒岐之業未奏。秦越人空投藥劑。薛夜來枉費神鍼。然恐軍中偵探。或生懈弛之心。闌外諜聞。致起反戈之變。以此偽云痊可。勉強扶病視師。朝來調度過勞。頓覺身子疲倦。不免少睡片時。多少是好。〔作睡介〕小生扮晉主微服率衆上。

〔玉胞肚〕潛身出幸。繞敦巢周圍候巡。覷奸雄堅閉軍營。想應他束手成擒。我入朝指日詰戎兵。把逆賊屍膏衅鼓鉦。

〔前腔〕〔衆〕鸞輿蹕警。御六飛親巡叛營。仗皇靈一怒民安。藉臣鄰肆伐威凌。這廝不知分量。逆龍鱗。警似投火飛蛾。命必傾。〔下淨驚起四顧介〕咦。

〔窄地錦襠〕呻吟病體夢還醒。忽見紅日曛曛照滿營。莫不是將登日轂兆先徵。且住。只怕大駕親來覘壁屯。叫左右快請錢老爹來。〔丑上〕

〔前腔〕多年帷幄列簪紳。顯候主帥龍飛我望國勳。他連朝病勢漸加增。想是福極災來悔暫侵。大丞相錢鳳參見。〔淨〕起來。〔丑〕丞相朝來病體如何。〔淨〕世儀病勢有增無減。爭奈沒個好醫。昨日分付尋那郭璞問卜。可曾尋得麼。〔丑〕已着人去喚了。〔淨〕世儀還有一件。我

方纔身子困頓。假寐片時。夢見赤日環繞軍營。莫不是黃鬚鮮卑兒到此。你快與我統領一彪人馬攢上。倘或果然是他。要入營中。逼他禪位。這上門買賣。卻不好做。〔丑〕領台命。〔下介〕郭璞喚到了。〔淨〕着他進來。〔外〕大丞相。郭璞參見。〔淨〕景純少禮。〔外〕丞相。我郭璞困守衡茅。遺榮軒冕。垂簾賣卜。效漢世之君平。拂筮解疑。學楚江之詹尹。身雖溷居塵市。心實遠游山林。理亂付之不聞。榮辱等於度外。固不能枕流漱石。友麋鹿而侶魚鰕。然亦抱甕灌園。揖清風而邀明月。明公文高三事。武冠六州。雌伏雄飛。勢既杏隔。江湖廊廟。趣復不同。況郭璞識陋管窺。素未閑于軍旅。才疎蠡測。更不熟于禎符。率爾宣召山民。第恐有污政府。〔淨〕我非爲別事。自從姑熟發兵。身子頓覺微恙。聞景純善筮。煩布一卦。以決休咎。〔外卜介〕呀。此卦大是不利。易云。師出以律。否臧凶。師出無名。事固不成。若依此卦。明公當及早收兵。倘背時起事。禍必不久。〔淨〕哇。你狂口胡言。謗我大事。你既云善筮。可曾曉得自家的命數麼。〔外〕老夫久知命盡今日了。〔淨〕我若不殺你。不准你的數。叫左右。快綁出去斫了。〔綁介外〕咳。處仲處仲。

〔北油葫蘆〕想當初你兄弟相依侍帝庭。專征伐侵國柄。旌旂烈烈。氣稜稜。把君

王威福憑伊逞。官僚進退憑伊命。那裏管忠良的屈不伸。奸佞的夤緣進。這時節太阿倒執。無人問。盡道是王馬共乾坤。〔淨〕老賊。我那時節南征北討。也有許多功業。況兼一門朱紫。並稱三窟。那曾見虧負朝廷來。〔外〕

〔天下樂〕那些個二窟當年擁盛名。伶也麼。兀。異國飄零。他兩個排牆壓死捐軀命。你竈煬烟蔽日明。狐憑城恣火薰。每日價煽君權將朝綱紊。〔淨〕老賊。我何曾紊亂朝綱。只是朝廷也不該疎我疑我。〔外〕咳。那聖天子呵。何曾要疎你疑你。

〔那吒令〕只爲你跋扈的難擺開。把威權暫分。桀驁的難動搖。把兵符棄鎮。貪婪的難剪除。把荆揚遠狗眼前釘。頃刻消。身底坐須臾穩。方保得安寧。

〔鵲踏枝〕誰道你嗔疎。弄刀兵。離紫塞。犯神京。可憐那王氣金陵。霎時間禍起兵爭。無辜的把忠良陷阱。痛戴淵和周顛。他兩個一時傾。〔淨〕這兩個自作孽。不可活。你管他怎麼。〔外〕

〔寄生草〕你兵權重爵位尊。到如今將兵南指來輕作孽。全不顧臭名萬載難。

羞忍全不顧英雄四射難逃遁。你只圖載高居重享鴻名。我道你臨頭禍到無頭奔。〔淨〕叫左右快推出斬了。〔外〕

〔么篇〕我身遭蹇命合迤。分明是京房善易蒙顛困。分明是蔡邕飽學戕身命。分明公明神卜罹鋒刃。我如今呵一靈含笑入丹丘。眼見你三魂被楚歸塵坌。

〔衆推外下丑〕天下有這樣奇事。果然是宮車遠來。親率數騎。繞營環視而去。錢鳳極力追趕。奈少遲半刻。被他入城去了。〔淨〕想必他的氣數還未該絕。故夢見紅日繞營。世儀郭璞那老賊。方纔着他布衍一卦。被他數黑論黃。肆無忌憚。說了許多不吉之語。我一時不憤。將他殺了。〔丑〕殺得他好。殺得他好。丞相。這老賊隱居卜筮。誰知原以卜筮殺身。

〔北賺煞尾〕正是凶吉本無憑。禍福皆由命。念郭璞埋名卜隱。他哆口今朝還血刃。丞相。你奮英雄把社稷危傾。我勤忠盡敢憚勞辛。做你個擎天駕海臣。圖一個功勳。那怕人譏哂。丞相。但願你退災星。早備黃袍去坐錦墩。

〔丑〕幾年賣卜立佳名。

〔淨〕今日胡言犯極刑。

〔合〕世上萬般皆是命。

果然半點不由人。

第二十九齣 斬鳳贖罪

〔丑上〕天有不測風雲。人有旦夕禍福。自家追隨王處仲這幾年。專一承顏順旨。阿諛逢迎。終日勸他行事。指望他做個皇帝。我就是開國元勳。誰想人有千算。天只一算。弄得事體七八停當。竟嗚呼了。如今走了獠獠。叫我將甚麼弄。他又沒有兒子。將從子王應。矯詔拜爲武衛將軍。爭奈這個東西。人不壓衆。貌不驚人。又是個抱不上樹的獠獠。我前日曾與沈充面約。便宜行事。相倚爲亂。不料沈充昨夜又被吳濬殺了。單單剩得老錢。孤身無助。獨力難成。況兼平日口嘴尖酸。人多怪我。倘或帳下也有不肖之徒。要把我做個齊頸公起來。這個東道怎麼做得。好生暈悶。不免假寐片時。再作理會。〔末扮力士持劍上〕

〔縷縷金〕乘黑夜入轅門。搜尋蹤跡處。躍青萍。此是他臥所。急忙趨進。管教妖
蜮化爲塵。隄防莫容遁。哎。你看這賊不知死活。還睡在這裏。待我叫他一聲。老錢。老錢。錢世儀。
〔丑驚介〕呀。周光。你爲何到此。〔末〕特來與你借件東西。〔丑〕有的只管奉承。〔末〕怎麼沒有。〔丑

作看介」什麼弓箭或衣甲。「末」都不是。要借你喫飯家伙。「丑慌跪介」阿呀。周爺爺。周老爹。前日你的不用也是都督主意。與我錢鳳無干。望乞饒我狗命。「末」錢鳳。你平昔英雄那裏去了。「丑」呀。周老爹。前日都督在的日子。我是大王。你是小鬼。如今你拏了這件東西。我是小鬼。你是鍾馗。望乞別尋頭主。免勞下顧。「末扯介丑」四鄰地方殺人介。救命也。「丑奔向臺下退縮躲介」我如今做個請公入甕。「末向卓下取首級介」閻王註定三更死。定不留人到四更。

〔前腔〕讎賊首已成擒。機乘天未曉。出營門。前往陶溫寨。將他貢進。借功贖罪。懇容情。今朝禍根淨。今朝禍根淨。「下」

第二十齣 缺望招兵

〔臨江仙〕「丑上」衛國功名成畫餅。思量暗裏生嗔。妬功罔上太無情。籲天雲路遠。空自惜惺惺。入援功勳仗列侯。歷陽淪落未蒙收。數奇李廣情偏苦。功大淮陰志未酬。腰下青萍空澤畔。鬢邊白髮已盈頭。何時請劍除奸佞。始雪胸懷。翫髒羞。下官自從王敦再叛。與陶士行。溫太真等戮力勤王。翼戴晉室。將謂功埒力均。報同賞一。如何彼皆地居重鎮。官加都督。獨我老蘇。

位不過內史。郡不過歷陽。把我偌大功勞。撇在腦後了。自古道殺人可恕。情理難容。興言及斯。不覺髮豎皆裂。這場大恨。何日可解。兀的不悶殺我也。

〔五更轉〕憶逆敦顛兵柄。弄君權。歷數春。一朝解去。解去生慚憤。他鄙薄荆揚。棲遲州郡。負君恩。倡逆變胎生。讎王殉難。周戴遭鋒刃。國祚衰微。幾遭顛困。〔前腔〕幸各鎮懷忠。盡共興師討不臣。他移屯姑孰。姑孰圖僥倖。朝廷呵。反把他拜相封侯。露牙張吻。念區區受厚祿。願捐軀命。戮力勤王也。圖個揚名姓。又誰知賊亮當朝。把我績歸灰燼。嘗聞鐘不撞不鳴。士不激不奮。當此天下洶洶。人情思亂。豈無鷹揚將佐。藏形草澤之中。虜闕英雄。伏跡戍囚之列。可與共圖大業。互相肇造洪基。如古武臣張耳之流。英絳韓彭之傑。特患無以招聚之耳。我如今幸喜兵糧有餘。只是人材不足。不免收養死士。招納亡命。潛謀大舉。有何不可。且待兄弟出來。與他商議召募便了。

〔臨江仙〕〔淨上〕七尺長軀雄蓋世。胸藏膽智多能。怡怡兄弟控三軍。陣雲迷四野。將宿朗干營。〔西江月〕臂挽千斤調弩。腰懸三尺干將。一聲霹靂震天荒。那管長江吼浪。叱

咤山川改色。暗鳴劍戟生霜。威風凜凜陣堂堂。氣蓋凌雲無上。自家蘇逸是也。聞哥哥上堂。不免入見則個。〔見介丑〕兄弟。我因主少國疑。權奸竊柄。人心解散。亂在旦夕。況今兵精糧足。意欲收養死士。招納亡命。以圖大舉。你的意下如何。〔逸〕哥哥。弟聞嬴秦失鹿。劉項爭逐。王莽竊據。豪傑四起。今庾亮既擅王莽之權。吾兄就行沛公之事。正所謂順天者昌。識時者勝。幸速圖之。毋失機會。〔丑〕兄弟。我一應召募事體。都托在你身上。〔淨〕是。叫小校。快豎招兵旗出去。〔末〕自家名喚管商。一生本事高強。身諳一十八般武藝。手弄三十六路花鎗。探丸弄劍。賽過越客。穿楊百步。由基無雙。向在蘆葦行劫。今朝偶過歷陽。見扯招兵旗號。特來投謁戎行。且莫說軍前報效。先誑他一分衣糧。此間正是轅門首。不免再等幾人。一同進去。〔小丑〕小子叫做任護。一生性格懶惰。使鎗便覺眼花。射箭那會到塲。臨陣好似倒窟拔蛇。收軍渾如沿山走兔。分賞賜要估頭功。領錢糧不時冒破。若然問我的手段何如。直良姜像個泥塑。今朝帥府投軍。騙個頭目做做。後來這些狗娘養的我的兒。任你踢鎗弄桿。武藝無雙。先進寺門。還是我大。寫單掛號。銀子三錢五錢。拜見收伍。青蚨千個百個。若然壞法查明。這椿買賣由他擺佈。正是生殺雖是人爲。吉凶自有天數。呀。夜眠清早起。又有早行人。方纔

扯得招軍旗起來。又有一個漢子在這裏了。不免上前相見。同他進去。（見介諱介門上報介淨）你兩個是投軍的麼。（應）投軍的。（淨）叫什麼名字。（末）小人管商。（小丑）小人任護。（淨）有什麼本事。（末）小人鎗使梨花鐵桿。刀掄偃月鋼叉。射鵰落雁箭驚鴻。誰比參停縱送。步類翱翔飛兔。騎如天矯游龍。若還上陣顯威風。那怕貔貅萬衆。（淨）起來使家火。（使介）這漢子果然有些本事。發軍政司上了面貌。軍前聽用。任護過來。你曉得什麼本事。（小丑）老爺。若論本事。說不盡這許多。武足齊驅衛霍。文能並轡孫吳。膽包天地賽荆軻。劍徹舌難及我。晨起飽餐饕餮。夜來滿飲醍醐。從來嘴硬骨頭酥。出陣汪汪汨墮。（淨）胡說。起來使家火。（使介）一發不濟。趕出去。（小丑）老爺。小的來時有路。去卻無門。望老爺方便。（淨）也罷。方纔扯起旗號。若不用你。阻塞了來路。你可會寫字麼。（小丑）蘇黃米蔡虞褚鍾王。那一家不會。（淨）哇。又來誇口。既會寫字。也與他上了名字。發去抄寫冊籍。

〔剗鋏兒〕〔丑〕英雄獨占湖中地。畜藏招納盡熊羆。軍聲一時沸。歡騰塞陣。（合）名期鼎彝。功鐫帶礪。陰養負隅。需時敵愾。

〔前腔〕〔淨〕識時俊傑能逢幾。弓藏鳥盡禍常罹。馬失急收轡。駘銜免危。〔合前〕
〔前腔〕〔末〕九丘八索羅胸肺。長弓勁弩插腰圍。從教戰功厲。天空鳥飛。〔合前〕
〔前腔〕〔小丑〕蘇黃米蔡隨君意。篆真隸草任教書。毛錐謾鋪敘。威權怎如。〔合前〕
〔淨丑〕叫左右。下了招軍旗罷。〔衆應介〕

〔丑〕燕雀安知鴻鵠志。

〔淨〕侯王將相在人爲。

〔末〕陰求壯士屯麾下。

定擬鴻勳四海知。

〔小丑弔場〕好快活。好快活。我因會寫這幾個歪字。反估這許多便宜。正是塞翁失馬。是禍是福。比下有餘。將上不足。明日等這些不識字的狗娘養的來尋我上號。詐斷他的脊筋便了。〔下〕

第三十一齣 惜陰投具

〔臨江一翦梅〕〔外扮彭世末扮李千小丑扮襲登小旦扮殷羨同儒服上〕四境烽烟今暫
妥。偷閒且出郊郭。戎衣盡卸跨鳴駒。步入亭阿。須罄歡娛。〔浣溪紗〕江上游人逐畫

船。潑堤春水望垂天。綠楊樓外動征帆。處世難逢開口笑。六么催拍蓋頻傳。人生莫放酒盃乾。〔見

〔介外〕吾輩寅集轅門。共居壁壘。誼敦倚玉。情切同舟。一向南征北討。鞍馬勤勞。苦無片晷。以圖眺覽。今喜王敦已平。主帥移鎮荊州。刁斗之聲已息。桑土之謀暫寬。趁此天氣晴和。不免同上濯纓亭。游玩片時。卻不是好。正是白日莫閒過。青春不再來。乘時須玩賞。莫待老來催。〔行介〕

〔剔銀燈〕喜吾儕連鑣江左。更幸值聲稀枹鼓。攜尊謾向亭皋坐。切莫負丸飛鳥兔。江沱。還堪賞麼。尋樂處方爲丈夫。〔飲介〕

〔前腔〕把金甌頻斟白墮。捧雕盤羞陳果脯。甕乾謾向青帘貨。樂陶陶開懷傾吐。醍醐。還須有麼。拚酪酊方爲丈夫。〔外〕李兄。小弟一生喫不得悶酒。還尋件戲具消遣便好。叫牢子。左近有什麼下酒的家火。尋兩副來。〔卒下取棋上〕靜算山川千里近。閒消日月兩輪空。棋在此。〔外〕既有圍棋。請教一局。只管一子一杯便了。〔下棋介〕

〔前腔〕對楸枰把飛鳶敲布。費心機將重圍點破。休誇動靜方員賦。便國手安能無負。圍棋。經傳爛柯。識先着方爲丈夫。〔外〕是我輸了。取酒來我喫。〔末〕嬰兒來請教一局。〔小丑〕小弟不曉得下棋。打雙陸罷。〔末〕也好。〔卒〕戰罷兩廩收黑白。一秤何處有虧盈。〔取

棋下換雙陸介

〔前腔〕擲梟盧把門梁牢固。識形勢屋骸成塚。單行失隊遭折挫。縱五白難逃。輸數樛蒲。呼雉轉盧。擲百萬方爲丈夫。〔末〕是小弟輸了。取酒來我飲一大觥。〔外〕李兄

你不濟。還待我來。正是憑陵大叫呼五木。祖跣不肯成梟盧。〔作擺介生暗上〕

〔臨江一翦梅〕未雨綢繆。坏牖戶。苞桑患至無虞。怡堂燕雀樂何如。倘竊發疆

隅。誰任銅魚。〔衆慌接介〕呀。方今君父蒙塵。疆圉日蹙。爲臣子者。須當臥薪嘗膽。帶甲枕戈。爲國

家出一死力。排難解紛。故李牧備邊。部下皆投石超距。去病驃騎。軍中盡蹋鞠鬪雞。蓋居恆習筋骨之勞。斯臨難勵死綬之節。今諸君不能彎弧驟馬。講武勵兵。卻乃跣足蓬頭。嬉游無益。吾聞圍棋乃

唐堯所作。以愚丹朱。樛蒲乃老子入胡所置。牧豬奴戲耳。幸速棄之。毋敗公事。〔生取擲江介〕

〔撲燈蛾〕諸君呵。朝堂乏駿圖。君父遭囚虜。何故不知幾。猶事流連媮戲也。怕

晏安鳩毒。一朝臨難。怎支吾。沒來由光陰彈指成虛度。且把孽媒撇向大江波。

〔衆跪介〕

〔前腔〕狂愚識見疎。主帥須寬怒。努力奮雄威。忙把鞞鈴修備也。看攻圍擊刺。任他狡橫盡誅鋤。如今呵。閒心敢把光陰誤。戎兵克詰定山河。

〔生〕瀕危軍國似朝曦。

何事男兒謔浪嬉。

〔衆〕從此須將筋力勁。

莫教警至悔時遲。

第二十二齣 蘇峻倡亂

〔滿江紅〕〔丑上〕北地英雄。期掀揭致身南國。持節鉞。彈壓淮西。宣威江北。護國奇功。蒙蔽盡。司農內召。藏機密。〔淨〕我待提兵踏破覆舟山。心方釋。哥哥。蘇逸參

見。〔丑〕兄弟到來。兄弟。我十年仗劍仕東吳。靜鎮湖中衛上都。祇恨豐功遭擯斥。要將權首血錕鏑。自家官居內史。地任歷陽。拊循訓練。魚腸之劍三千。納叛招降。燕頷之雄五百。甲精器利。貫朽粟紅。兵誦吉申。民歌召杜。桑麻鋤影。溶溶月照軍營。桃柳抽芽。蕩蕩風吹畫戟。前日王敦謀亂。協戴有功。指望露布夕陳魏闕。徵書朝賁轅門。耐耐庾亮這廝。白面書生。少不經事。任裁喜怒。弄幼主於股掌之間。變亂恩仇。擅威福於朝廷之上。頃來因我懷忿。屢屢召還。見我不從。假意內遷。我大司農。實欲

解我兵柄。然後漸加謀害。吾想起來。我蘇峻犯了何罪。把這性命送在你這狗的子手裏。如今見不受詔。他必以逆命爲辭。前來拘執。我能山頭望廷尉。不能廷尉望山頭。算將起來。兄弟。我想先下手爲強。不如統領精兵。以誅逆亮爲名。殺向建康。有何不可。〔淨〕哥哥兵精糧足。上前有功。就此起兵前去罷。

〔四邊靜〕〔丑〕今朝快把兵戈集。長驅入京國。要斬賊臣頭。奮勇靖君側。〔合〕嗚咤叱。青旌畫鷁。烽火蔽天紅。功成勝赤壁。

〔前腔〕〔淨〕二軍雄猛把鯨波吸。長弓射天窟。收拾晉江山。頃刻歸肘腋。〔合前〕恨小非君子。無毒不丈夫。

全憑三尺劍。驚起萬民呼。

第三十三齣 揮塵驅車

〔臨江仙〕〔外上〕桀驁強宗圖異變。鴟梟橫集鷓鴣原。森森林木慮亡猿。轅門聞化鶴。族屬始生全。

〔前腔〕〔淨扮夫人上〕偕老齊眉欣遂願。一鞍一馬怡然。懷中蘭玉夢無緣。螽斯
今已矣。暮景倩誰憐。相公萬福。〔外〕夫人拜揖。夫人國弱宗強事可憂。〔淨〕相公。婦隨夫唱兩
綢繆。〔外〕今朝幸喜強徒剪。〔淨〕他日還哀宗祀休。〔外〕畫虎未成幾赤族。〔淨〕飛熊無夢抱深愁。
〔外〕哎。有無嗣續皆由命。何必曉曉掛齒煩。〔淨〕相公。你一向擔煩受惱。今日爲何這等喜地歡
天。〔外〕夫人。我一向因處仲之變。慮恐波及。日夕擔憂。今幸太平。暫爾請告休沐。故此得閒暇在家。
〔淨〕呀。相公差矣。吾聞盜跖取人肝爲晝舖。柳下惠不以弟故害聖。桓魋謀不軌而禍宋。司馬牛不
以兄故貶賢。都督雖是不臣。然各立門戶。與相公何干。只是不孝有三。無後爲大。獨此一件。妾身好
生擔憂耳。〔外〕呀。夫人。亂臣賊子。何代無之。不幸近出吾族。所以納悶。若乃伯道無兒。亦自天數。吾
方幸家難旣除。國亂少息。與你安坐。不料你復絮絮叨叨。我想起來。向者你旣不能容留媵妾。今日
就欲求繼宗祧。這也遲了。嗟怨怎的。你聽我道。

〔山坡羊〕苦伶仃難擺劃的國計。亂蒙茸難補葺的時勢。軟迷離沒發達的君
王。力孤單沒輔助的朝綱紀。我如今乘着一國的安危。怎措支。幸得在亡家變方

寧薙。夫人。我爲國擔憂。無兒曷慮。思之心緒皇皇。鬢已絲。淒其成敗茫茫。事怎期。

〔前腔〕〔淨〕相公。我恨忙忙急遞去的年歲。苦哀哀難排遣的情緒。杳沈沈無孕育的夫妻。虛飄飄沒嗣續的孤身己。命數奇。從前事已非。你便做到三槐九棘。究竟成何濟。那些個。茁茁蘭芽。森森丹桂。嗟吁。魂夢中宵淚滿頤。徘徊船到江心。補漏遲。相公。我和你久矣不到園亭。今日幸喜少暇。同到寶翰樓上一玩何如。〔外〕這到使得。〔淨〕

你看荒亭寂寞無人到。滿地荆榛亂抓衣。〔做登樓望牆外介〕

〔皂羅袍〕〔淨〕相公。閣外春明景麗。看王孫公子駿馬驅馳。那壁廂呵。鞦韆宅宇笑聲低。這壁廂呵。笙簫院落歌聲細。呀。你看那壁廂又有一陣小孩兒來了。這是誰家子弟儀容整齊。隨行逐隊。悠悠笑嬉。教人搵不住腮邊淚。相公。你看這幾個孩子。儀容俊雅。舉

止安閑。必是宦家子弟。從不聞有那一位官僚住在近邊。這不知是那裏來的。打從牆下經過。〔外〕夫人。你敢喜他哩。想着他哩。〔淨〕相公。我家若得這樣一個。也足慰我餘生。焉敢望着這許多。〔外〕

夫人。這也不難。你就要他一個。也使得。〔淨〕呀。相公。你又說癡話了。別人家生的兒女。他愛如掌珠。怎麼好要他的。〔外〕夫人。這也不難。待我明日螟蛉他一個與你便了。〔淨〕相公。只怕他們不肯。〔外〕夫人。你還是真心要他是假。〔淨〕這個怎麼是假。〔外〕夫人。我一向要對你說。怕你着惱。今日看你這般歡喜。想也不見怪了。〔淨驚介〕怎麼。〔外〕這幾個孩子。你道是誰家的。〔淨撥坐近問介〕呀。是誰家的。好好對我說來。〔外〕夫人。你不着惱。我方好說。〔淨〕你說。我不惱你。〔外〕夫人。自那年處仲請我賞燈。令歌妓文鸞彩鳳出來奉酒。見我無子。他收拾那邊一所空房。將此二姬飾以遺我。方纔這幾個孩子。正是他生的。我看你這等歡喜。我明日率他來見你便了。〔淨怒介〕哇。老奴。我與你一世夫妻。將謂心孚意契。和鳴偕老。誰想你聽信老賊。昧己瞞心。陰蓄妖淫。追歡別院。生男育女。背地成家。使我獨自擔憂。終朝悽慘。老奴。夫妻之間。如此相待。你幹得好事。〔作扭介外〕這都是處仲誤我。非干我事。〔淨〕這老賊死得他好。死得他遲了。你也不該瞞我。兀的不氣殺我也。〔作悲介外跪介〕夫人請息怒。這是下官不是了。

〔前腔〕我道你憐枝惜樹。又誰知反激怒招非。夫人。望你霽威作喜莫嗔疑。管明

朝齊道乘鸞去。我與你雙雙交頸重諧伉儷。欣欣一榻臥起並依。再不敢春心別戀閒花地。〔淨奔下搶食刀上〕老奴。你好好領我到那邊去。我便饒你。不然。我就與你結果了罷。正是幾年瞞背情偏毒。除非殺卻恨方休。〔扭下旦小旦上〕

〔綿搭絮〕〔旦〕豔陽天氣。亂撲柳花飛。倦繡停鍼。贏得恹恹睡起遲。髻兒斜閒倚庭除。聽那鶯啼燕語喚起閨思。鎮日裏深鎖重門。到做了桃李春風牆外枝。桃李春風牆外枝。

〔前腔〕〔小旦〕珠簾高揭。散步過窗西。笑撚花枝。驚得雙雙粉蝶飛。定何如攪起參差。似我長門寂寞別院棲遲。甚日得箕箒歸家。不枉了銅雀春深鎖二姬。銅雀春深鎖二姬。〔合〕露溼桃花春殿香。月明歌吹在昭陽。似將海水添更漏。共滴長門一夜長。

〔旦〕彩鳳姐。我與你二人。自從都督送來。不覺已是十餘年了。小星在序。空抱衣裯。算箒未操。買魚徒列。天幸夢協熊羆。未嘗專寵當夕。老爺呵。或三日或五日過此一番。只是夫人利害。再不會久停信宿。我和你怎得個出頭的日子。如此困人天氣。好生傷感人也。〔小旦〕文鸞姐。當初都督送來之

意。只爲他自家後邊大事。恐怕老爺沮撓。要我和你在她面前贊揚。爭奈事業未成。先歸冥路。我和你不會出得些小力氣。也孤了他撫養教育之恩。〔外慌上〕不好了。不好了。快收拾行走。〔旦小旦〕呀。老爺爲何如此慌張。〔外〕你二人不曉得。適纔夫人同我到寶翰樓上賞春。因見孩兒們在牆外戲耍。十分歡喜。我就說螟蛉一個。這也不難。因見他眷眷不已。我不覺把真情露了。誰想他發惱起來。跑進廚房。搶了一把食刀。扭我同來要害你母子性命。如今我已着當直的將轎擡他。故意緩行。打前街兜轉。我慌忙打後門出來報你兩個。急忙到親戚人家躲去。〔二旦〕天那。老爺你不要說便好。如今怎麼樣處。我兩個又不認得路頭。況且孩兒輩又在書館。一時怎報得他來。〔外〕不要煩惱。孩兒我已差人去領了。你們二人顧得一輛小車在此。快攬行罷。行李也收拾不及了。

〔香柳娘〕〔外〕把巾車謾推。把巾車謾推。疾忙藏置。纍纍雙顆璠璣器。帶龍孫鳳雛。帶龍孫鳳雛。前去覓安居。安居在何處。想今朝智疎。言出駟難追。空勞遠奔避。

〔前腔〕〔旦〕想夫人見迷。想夫人見迷。怒生嫉讎。森森諸子皆庭柱。枉持刀要

害伊。枉持刀要害伊。閉隔數年餘。妾身有何罪。〔外〕且將車快昇。且將車快昇。顧不得路崎嶇。權且往求庇。

〔前腔〕〔小旦〕歎連年受羈。歎連年受羈。方圖脫離。今朝禍復蕭牆起。痛兒曹何處。痛兒曹何處。火急覓相攜。莫教受狼狽。〔外〕恨犢車故遲。恨犢車故遲。且把拂塵驅。免遭那虐恚。〔下淨上〕

〔前腔〕你如今在那裏。你如今在那裏。不好了。不好了。惟餘空居。那老奴呵。被他脫卻金蟬去。我這怒懷怎舒。這怒懷怎舒。搥碎此家私。難出我心頭氣。快提刀急歸。快提刀急歸。欲待撇妖奴。情理怎生恕。〔下外上〕

〔前腔〕已安排另居。已安排另居。前來採取。想踏枝不着空歸去。我如今回去呵。且從容勸伊。且從容勸伊。宛轉自躊躇。莫教後來悔。〔淨〕看老奴已回。看老奴已回。是必見根株。方纔怒懷已。

〔前腔〕〔外求介〕願夫人降慈。願夫人降慈。往非休記。暮齡無子休輕棄。〔淨〕向來

我原苦你無子。如今既有這幾個孩兒。卻也是你家祖宗之福。只是你不該瞞我。你好好跪着招個不是。我便饒你。〔外跪介〕敢瞞心背伊。敢瞞心背伊。皇天必鑒知。陰殛遭殘斃。〔淨〕你既能自知。你既能自知。勉強且饒伊。子留母須去。〔外〕一任夫人主張。再不敢違命。〔淨〕既然如此。且饒你這老奴。

〔淨〕五十無兒事可憐。

終朝淚落夜無眠。

〔外〕忍過今日獅兒吼。

管教骨肉永團圓。

第三十四齣 發兵助溫

〔小蓬萊〕〔生上〕細雨夢回雞塞。微風和滿熊城。而今戰鬪。廟堂制勝。何必籌論。衆將官叩頭。〔生〕起去。化洽郊圻頌太平。軍中刁斗靜無喧。朝廷縱有姦雄擾。迢遞疆場入衛難。下官自平王敦。除授荊州都督。士民懷舊。歡騰竹馬之迎。法令更新。慶息鳴狐之警。耐耐宮車晏駕。不得叨陪顧命之班。髯鼎升遐。未克追隨托孤之任。朝廷既以我爲外臣。我安能復代君爲內慮。所謂君之視臣如手足。則臣視君如腹心。君之視臣如犬馬。則臣視君如路人。理勢自然。何足爲怪。近日

聞得蘇峻因有功不報。缺望圖變。吾想功固當議。君不可讎。所謂亂臣賊子。人人得誅。第朝廷既無調遣之符。帥闕慮干擅動之律。只索靜以待動。逸以制勞。且待聲警。再作區處。正是投筆懷班業。臨戎想顧勳。還應雪漢恥。持此報明君。

〔前腔〕〔末〕逆寇稱兵起衅。緘書遠叩轅門。乞師同援。願祈戮力。齊赴京城。自家王愆期是也。奉元帥之命。遠詣荊州。邀陶都督同赴國難。此間已是轅門首了。門上有人麼。〔卒〕那裏來的。〔末〕江州溫都督差官要見。〔稟介進見介〕江州都護王愆期見爺。〔生〕起來。〔末〕都督爺差小官啓上爺。今蘇峻倔強不道。桀驁無君。欲興問罪之師。願切同舟之義。特遣一介。奉約三軍。望元帥星夜班師。長驅會合。救生靈於塗炭。免宗社於丘墟。冒死上陳。伏惟鑒察。〔生〕吾聞君父之仇。不共戴天。你都督既有赴難之心。我豈無入援之念。奈荆襄西濱臨桂。南控黔滇。倘一撤鎮。則羌胡雲擾。我難親自勤王。只索遣一員驍將。統一枝勁兵。隨你都督爺入援便了。傳令叫衆將官過來。今日欲撥一彪人馬。與王督護前往江州。同溫都督爺往建康。該那個值差。〔衆〕督護襲登。〔生〕喚襲登。〔小丑見介〕襲登。你速領部下。選鋒三千。隨溫爺討逆去。〔登〕得令。〔生〕

〔三學士〕萬乘鑿輿蒙逆旨。諸藩義旅齊盟。襲登你湘江倡率貔貅勇。建業還將豺虎擒。〔合〕指日功成。歌得勝。樹奇勳。歸故營。

〔前腔〕〔襲〕仗劍轅門陪戟楯。何當缺鉞顛征戎衣。一着飲寒冰。看捷布三飛。煦暖春。〔合前末〕

〔前腔〕奉命函書求並紉。喜先遣將宵征。你班師義激齊雲艘。我露布馳歸細柳營。〔合前先下生〕且住。今日之事。責不在我方。纔被他道了幾句。就撥一枝人馬。遠赴三千里外。倘或師老財匱。辱命喪師。反損軍威。不如遣一末將。速往追回。庶免憂疑。李千過來。你速齎令旗。追回襲登。毋得遲誤。〔末〕得令。

〔前腔〕一旅旌旗方列陣。如何復督回營。他那裏驅馳轉鬪三千里。只怕追躡空勞兩月程。〔合前〕

〔生〕分軍靖難出三湘。

急遣追回免禍殃。

〔千〕各人自掃門前雪。

莫管他家瓦上霜。

第三十五齣 父子死節

〔意難忘〕〔末上〕怒髮衝冠。奈癰疽未愈。裏痛攀鞍。城池今已破。柵守怎能全。
〔眈〕持寸鐵護家嚴。〔盱〕成敗總休談。〔合〕苦好一似螳螂奮臂。逞怒車前。堪與
有正氣。聚則生英傑。爲臣忠貴全。爲子孝當竭。〔眈〕嗟哉。晉綱頽亂。賊相踵接。〔盱〕國破家與俱。兵
疲將隨折。〔合〕四顧不能支。相看淚成血。〔末〕自家中書令成陽公。卞壺是也。官居一品。官歷三朝。
法斃綱淪。每蓄素餐之愧。天傾地裂。常懷殉難之忱。逆賊蘇峻。狼子野心。反顏仇國。前者幸退之于
西陵渡頭。今日復侵薄于覆舟山下。待欲全鋒遠避。則清溪若破。宮闕蒙塵。將欲背城借一。則背瘡
未平。轉鬪不便。進退維谷。生死兩歧。如何是好。〔眈盱〕爹爹爲臣死忠。爲子死孝。孩兒兄弟二人。情
願同爹爹出陣。倘爹爹氣力不加。兒輩當誓死搦戰。萬一不遑。父子相殉。何必多慮。〔內鳴鑼介末〕
孩兒。你聽鈺鼓之聲漸漸近了。怎麼好。

〔勝如花〕我只爲綱常重。節操堅。況久乘軒服冕。只圖個臣死君忠。誰道教兒懼親
難。頓教人珠淚偷按。〔合〕料團圓今生已難。要重逢除非九泉。拜告蒼天。拜告

蒼天。願我陰靈休散。憑浩氣與他鬼門廝戰。痛哀哀骨肉含冤。痛哀哀骨肉含冤。

〔前腔〕〔眈〕君恩厚。父命遭。顧不得慈闈冷暖。休指望膝下承歡。今日裏軍前別面。不由人不相看。心顫。〔合前〕爹爹。你看軍馬殺過清溪柵來了。

〔前腔〕我年方壯。髻尙鬢。聞四下軍聲驚汗。爹爹道不得子孝親寬。哥哥。那三個兄酬弟勸。何日報雙親恩眷。〔合前〕峻領衆對陣介末〕蘇賊。我與你同事先皇。官居內史。朝廷有甚虧負你。今日造此逆天大罪。〔丑〕卞大人。我與你昔日彭城相會。同渡淮南。並轡東朝。清夷皇路。指望分茅胙土。拜將封侯。奈讒臣庾亮。自恃肺腑之親。欲加屠戮之慘。我今日此舉。非關問鼎。豈是謀王。只欲掃除君側之姦。明正宮闈之亂。前日西陵一戰。被你挫辱吾師。今日打從覆舟山而來。爲何又阻絕我去路。當年共事之情。也顧不得了。〔末〕休得閒說。快帶馬來。

〔泣顏回〕蘇賊。你作惡罪彌天。弄兵戈直犯金鑾。猙獰反噬。誓將伊血肉噉。〔丑〕你要殺我還早哩。〔末〕我心頭火燃。料孤身父子難相扞。拚得個血污秦川。

又誰望奏凱回旋〔戰被殺介〕

〔前腔〕〔眈〕堪憐。老父遘凶殘。我讎不共戴。敢望生還。兄弟。我與你投矛血戰。須當努力加鞭。〔盱〕哥哥。我家亡國顛。念君親。須做個英雄漢。秦淮渡。父子同歸。秣陵關。忠孝偕傳。〔雙戰被擒介〕逆賊。你害我父親。又擒我兄弟。恨不得斬汝萬段。以謝先人。只求速死。與先君一處。〔丑〕哇。黃口孤兒。輒犯敢我。叫左右推去斬了。〔眈盱〕

〔尾聲〕丹心報國。污讎劍。覆舟山。三忠並顯。管取青史標名。教人作話傳。

父子精忠鐵石堅。

今朝駢首赴黃泉。

願將深恨閻浮訴。

早磔奸雄恨始安。

第二十六齣 太真借饗

〔小生上〕三尺龍泉腰下懸。兩行玉筋灑征鞭。英雄空有勤王志。食盡兵疲討賊難。自家率衆七千。遠離江州。相持已久。糗糲俱完。聞陶士行舟師遠來。頗有餘米。早間差王愆期往彼貸借。怎麼這時候。還不見來回話。正是軍士雖無脫巾之呼。下官竊有庚癸之慮。好生納悶也。

〔縷縷金〕〔末上〕求饟米到陶軍。船中雖儘有不通情。顛激他心惱。旋師西奔。空函反報故人緘。調饑怎生忍。調饑怎生忍。〔小生〕王愆期回來了。〔末〕小官回來了。

〔小生〕陶爺怎麼說。〔末〕陶爺說多多拜上老爺。糧米雖有。只設自家軍用。難以貸借。小官再四傳老爺恩命。求濟緩急。陶爺發怒起來。就欲班師西去。因此小官就回。特來稟覆老爺。〔小生笑介〕有這樣事。快打執事。我自家到陶爺營中去。

〔前腔〕勤國難濟時屯軍。中須應援要同心。借米因挑怒。必遭譏哂。忙將利害豁迷襟。同舟莫開釁。同舟莫開釁。〔下生上〕

〔鳳凰閣〕舳艫遠進。鉅萬雄兵列陣。探來諸鎮盡逡巡。且把歸帆西整。我丹衷已盡。便戮力勤王有幾人。衆將官叩頭。〔生〕起去。獵獵旌旗映石城。森森舟楫列江瀕。人人盡道勤王室。江上何曾見一人。自家前日因太真道徽相約會兵同進。與逆峻相持。許久不決。聞得他們將老兵疲。使我獨當一面。胸中已自懷疑。適聞太真復來請糧。吾想有卒無糧。雖有忠勇之兵。焉能枵腹而戰。我若分糧與之。倘或曠日持久。我兵食盡。向誰求賑。度此事勢。一旅孤軍。料難有濟。不

若旋師返旆。以保萬全。衆將官意下如何。〔末小旦〕毛寶般羨啓事。寶聞輔車相倚。唇亡齒寒。同舟遇風。胡越互救。溫將軍既與主帥同赴國難。則溫將軍之士卒。卽主帥之士卒。主帥之糴米。卽溫將軍之糴米也。既云戮力。豈可異心。處已有餘。視人不足。願主帥籌之。〔小生〕忙將利害豁迷襟。同舟莫開釁。同舟莫開釁。〔衆〕此間已是陶爺營前了。〔小生〕快通報。〔報見介小生〕陶兄。足下以蓋世之雄。擁荆湘之重。兵食甲于寰中。忠義聞于海內。小弟與道微力弱兵微。以吾兄素有爲國之忠。故不憚千里之遙。緘書勸進。陳兵江上。同會石頭。以圖必克。承吾兄前遣襲登應援。尋復召還。茲因弟處貸糧。又欲還鎮。勤王之命既弛。忠義之心安在。嶠聞師克在和。古之妙用。嶠等與兄同受國恩。事若有濟。則臣主同祚。萬一不捷。亦當奉身以謝先帝。況今事勢實難旋踵。譬如騎虎。安可袖手。公若獨返。沮衆敗事。嶠等雖懦。義旗將迴指於公矣。莫謂溫嶠今日不言也。〔生〕溫兄。小弟以先帝臨終。不預顧命。將謂疆場外臣。不敢越俎。前因吾兄反復索兵。故先遣督護襲登策應。小弟卽戎服登舟。晝夜兼程而來。今與逆賊相持日久。見各營食盡力疲。事難犄角。將謂來此一番。亦足以報先皇於地下。故不若西歸。無損聲名耳。吾兄請自三思。〔小生〕呀。陶兄差矣。

〔獅子序〕我頻年見國勢傾。念王臣蹇蹇當同心狎盟。那曾見坐視不報君恩。
〔生〕小弟屢立戰功。報君之心。已克盡矣。若論那盡臣的忠耿。須當慮社稷。保河山。
誓捐糜死而無恨。〔生〕溫兄。當此之時。還是身名兩全的好。〔小生〕呀。陶兄。那些個見危授命。
取義成仁。

〔太平歌〕〔生〕溫兄。我當初膺秩峻。只望立榮名。誰想道連年遭禍變。〔小生〕朝廷
畀兄以督撫。封兄以徹侯。報功可謂不薄了。〔生〕我幾年間衽甲安邊境。不能勾禁闕承
遺命。〔小生〕這個也非有他意。只因兄邊疆事重。不敢輕召。〔生〕既道是職守繫邊庭。今日裏
只索暫回營。〔小生〕陶兄。這一發不是了。

〔賞宮花〕你言詞繆昏。教人不忍聞。那朝廷呵。總把你勳名負。終要盡丹心。況朝廷
又不曾負你。你如今只管要回去。只怕一旦義旗齊向指。可不枉了你半生名節幾年
勤。〔生〕溫兄。小弟一時迷誤。賴兄明訓。頓感我心。

〔降黃龍〕分明我墮久迷津。掇醒今朝願隨鞭撻。我贏糧齎餉。管與你齊心共

滅長鯨。〔小生〕果然如此。仁兄名並天壤。勳高日月。豈不善始善終。保全功名。〔生〕沈吟。便捐軀相殉。也與卞望之父子同游於地下了。比着他叛國的枯骸朽骨還馨。〔小生〕陶兄。方今之勢。以順討逆。如以石投卵。寧有不濟事者。〔生〕仁兄。那時節。麟閣敍名。合鑣同炳。〔小生〕小弟就此告別了。〔生〕少停就送糧米過來。正是今日得君提撥醒。免教人在暗中行。〔小生〕別下生。般參軍。查軍中還有多少糧米。〔小旦〕還有八百餘石。〔生〕既如此。快將三百斛送溫爺營中去。

〔大聖樂〕〔小旦〕兵家事勝負難分。要利衷竭力攻進。若方圓柄鑿相紛競。急難裏怎支撐。今日主帥把這米送與溫爺。正是扶危濟難。恩相顧。他感德啣恩。意自傾。〔生〕你去多多拜上溫爺。我明日水師直抵石頭。溫爺與各位爺可領步兵從石壘南上。并力夾攻。便了。〔小旦〕理會得。六師夾陣。管教他齎身粉骨。藁首王城。

今朝推哺送溫營。

管取三軍喜氣生。

惟有感恩并積恨。

萬年千載不成塵。

第三十七齣 彭李鬪峻

〔醜奴兒令〕〔丑上〕圖王定伯稱英杰。謀動干戈。攪亂山河。管取威靈握帝符。
〔淨〕江南自古繁華地。造就雄圖。唾手歸吾。不枉功成萬骨枯。哥哥。甲冑在身。不能施禮。〔丑〕兄弟。我自從起兵以來。攻城掠地。所向無前。斬將褰旗。遇戰必克。卞壺戰死於清溪。桓彝捐生於寧國。建康一入。天子劫遷。官寢震驚。羣僚拱手。眼見晉室山河。歸吾掌握。爭奈各州興狐兔之悲。使我孤軍蒙腹背之敵。汝可率任護前拒白石。我自率韓晃到石頭。與陶侃相持便了。叫衆將官就此拔營。分兵前去。〔淨領衆上〕

〔對玉環〕篩鼓鳴鑼。長驅迎黠奴。跨馬揮戈。魚然心膽粗。腰下掛銀鍔。旌旂翻似火。臂挽彫弧。橐盛烏角。焮箭簇飛狐。箭盛金僕鐸。

〔清江引〕英雄古來誰似我。快把江山坐。春風舞鷓鴣。夜月歌鸚鵡。那時節。樓抱着玉人兒。方厭足。〔下小生領衆上〕

〔大迓鼓〕兵屯白石窩。焚舟沈釜。誓勦狂奴。安排伏弩沿山塢。休教遁走復歸。

湖及早攻圍。休得錯過。〔下丑領衆上〕

〔對玉環〕轉過山坡。軍聲笳響多。漸近城隅。鑼聲驚的慮。〔作卞父子陰靈上丑拜介〕

阿呀。不好了。你看怨氣薄金烏。陰兵怎逃躲。這雲頭裏邊明明是卞家父子三人。率領陰

兵擊我。待我拜他幾拜。卞大夫。願你表表忠魂。今朝入紫都。赦我渺渺游魂。他年當結芻。

〔清江引〕當初指望登九五。錯把兵威播。今朝力漸疲。馬倦難相顧。只怕今日裏這場功沒結果。韓晃。你看陰兵罩定。陶軍聲勢又緊。如何是好。只得帶領三軍。趨行前去。再作計較。〔生領衆上〕

〔大遶鼓〕我樓檣薄水渦。陳兵轉鬪。直指城郭。長江天塹。今飛渡。試看一怒績。魏峨。及早攻圍。休得錯過。〔生衆下小生領衆遇淨上戰介淨走下小生衆〕及早攻圍。休得錯過。〔下生部將彭李與峻三戰峻馬躡被戮介生小生外末會師生〕溫大人。下官率領水軍。溯

流而上。直薄石頭。與逆賊連戰。陡遇馬躡。被小弟部將彭世李千射殺。巒屍焚骨。如今傳首入城。但

渠魁已得。不知大人可曾得他餘黨。〔小生〕下官遇了蘇逸。戰不上三四合。被他走了。梟賊已擒。餘黨何慮。譬之癰疽既愈。疥癬不足爲疾。明日吾輩還須入城面君。仍備牲禮致奠。望之父子。然後收軍回鎮便了。

戮力勤王靖逆氛。

今朝鬱磔慰重冥。

潔牲祭告陳哀悃。

不枉當年交與情。

第二十八齣 蔣山致奠

〔金瓏璫〕〔生上〕么磨膏釜鼎。救寧殊快忠魂。噉楚些。弔幽冥。〔小生〕一門均死節。誰似爾名馨。焚一陌。訴衷情。〔生〕一著戎衣破逆腥。謾陳肴醴弔亡靈。君臣義重敦三節。

父子恩深殉九京。〔小生〕纍纍白骨埋山足。隱隱封丘繞水濱。〔合〕人生自古誰無死。留取丹心照汗青。〔生〕溫兄。小弟自避難過江。委身先帝。那時羣英濟濟。並處藩僚。周伯仁憤激匡時。共灑新亭之泪。卞望之忠懷捧日。已符郭璞之占。那時峻逆未彰。相隨在坐。不料時移物換。佞著忠分。伯仁冤戮于權敦。望之戰斃于逆峻。嘆光陰之如駛。悲世故之頓殊。回首追思。可勝悲悼。〔小生〕陶兄。小弟

冀北驚駘。燕南鈍石。少游青海。得識二兄。偕濟彭城。復逢蘇峻。四人同渡一體希榮。彼皆共仕于東朝。弟獨北歸于越石。後因劉公遭難。登進無階。覲顏立權。敦之門。假意爲心腹之契。幸逢傾蓋。與仁兄刎頸交權。得並分符。控江湘犄角相顧。懷往時之共事。朋友情深。嗟今日之相離。存亡感切。第望之東魯鴻儒。晉朝梁棟。爲先王之從事。居今上之台司。將謂名高八座。可享鈞軸尊嚴。不謂變發一朝。竟膏奸邪礎斧。父子死于非命。忠孝萃于一門。歌楚些以泣湘靈。徒悵汨羅之自溺。唱蒿里而悲義士。空嗟海島之輕生。致使杳杳幽魂。一陌紙錢何有。纍纍孤塚。四時薦享無聞。昨承相約往蔣山弔奠。彼此已遣人備辦牲禮去已。就此同往何如。

〔六犯清音〕金陵城陷。長干途冷。悵望人烟寂靜。六街三市。教人觸目悲驚。
〔梁州序〕桃葉空魚渡。青樓罕鳳音。〔桂枝香〕拋珠泪溼袖襟。蔣山遙指望中蹲。〔排歌〕他那裏泉臺永隔徽音杳。好教我廟貌空瞻惜友朋。〔傍妝臺〕驅車將近山陬。迤臨陰風慘淡。留餘恨。〔皂羅袍〕痛傷情。一坏黃土高塚臥麒麟。〔黃鶯兒〕〔衆接

介〕祭禮可曾完備了。〔衆〕完備多時了。〔生小生〕快把酒來。

〔前腔〕杯傾醞醖。盤盛魚脰。醑滴重泉幽境。寵靈遼邈。幸原黍稷惟馨。一束芻
追古。三尊禮備。今望之。你忠和孝死勝生。芳名應並此山存。我兩人呵。披衷告語
情還咽。那逆賊呵。磔首鬻焚。你怨已伸。鶴歸華表。雲散楚岑。願祈肝鬢通神。漉
丹誠。兩行玉筋。血染杜鵑深。

〔前腔〕卞兄。你東齊翥鳳。熙朝雄駿。遠渡淮淝。翔仞十年蓮幕。幸隨潛邸飛騰。
八座沾恩命。三台躡要津。懷君國恥苟營。捐軀死國一身輕。望之。你臣因主辱
身甘殞。你那令郎呵。子爲親亡日不瞑。雙雙圖報。兩兩就擒。蓬蒿滿眼三丘並。事
須明。一封丹詔。有日賁墳塋。

〔前腔〕林鴉歸噪。山禽翔影。落日蒼茫鷺嶺。徘徊泣別。幾番舉足還停。〔生〕我
楚水舟輕蕩。〔小生〕江州馬亂鳴。相辭去各轉程。何年重弔此佳城。〔生〕卞兄。我怎
能勾新亭再得同游衍。〔小生〕怎能勾淮甸同舟返故城。浮生如寄。悲死涕零。哀
猿腸斷難經聽。急須焚青蚨一陌。聊爾罄平生。

〔尾聲〕松楸展拜回軍省。明日雙開舴艋。江上風帆帶雨清。〔生〕小弟久不回舍。況荆室小兒又僑寓廬江。如今便道挈領。展拜先塋。即便赴任。經從貴治。再圖相敘。

一杯此日奠忠靈。

追憶當年共事情。

荒坵灑泣添惆悵。

千里關山空月明。

第二十九齣 廬山會合

〔哭岐婆〕〔旦上〕新篁風細。么荷香遞。臨門凝睇。望郎車騎。深林啼鳥喚幽思。西飛白日繩難繫。

〔前腔〕〔小旦〕椿庭遙離。萱闈怎棄。兩情縈繫。田園荒廢。何年飛捷返鄉閭。夫妻母子重相聚。孩兒自從你父親去後。荏苒光陰。倏忽數載。前日王敦庾亮錢鳳被戮。你父親忌功遠謫。這一椿冤抑到也出得氣了。只是蘇峻謀叛。騷擾地方。稱兵向闕。人民逃竄。雞犬不寧。你父親又不在家。兵燹之困。如何是了。〔小旦〕母親。聞得各鎮都督。戮力勤王。料必爹爹也在裏面。孩兒已着陶旺打探去了。就便道回來。也不見得。〔旦〕

〔十樣錦〕〔繡帶兒〕才郎去。雲鬟倦理。幾年竟杳歸期。縱不能五馬榮旋。爲甚無一紙音書。〔宜春令〕〔小旦〕旖旎。望懸懸。鎮日攢眉。頓教人寢忘餐。廢禁不得。沒情沒緒。遠懷難憩。〔降黃龍〕〔旦〕記當時執手臨岐。送別丁寧。教他把屢屢休棄。如今呵相拋如許。想合受淒涼。是我運蹇時低。〔醉太平〕〔小旦〕淒其幾回玉筯暗偷垂。怎知他近來康履。總然是身安體豫。其如我定省清溫無地。〔浣溪紗〕〔旦〕天際雁。水底魚。誰阻絕羽杳鱗稀。常時飛夢到天涯。荒村犬吠驚覺起。〔啄木兒〕〔小旦〕觸物增悲。見林杪反哺烏栖。羔羊跪乳鄰家地。如將我悶懷提語。覷斑衣冷落庭除。望白雲神馳天際。〔鮑老催〕〔旦〕念茲在茲。叢林懶扳連理枝。花箋怕寫離恨詩。空嗟怨枉太息。難歡聚。便有織錦迴文欲寄憑誰。〔上小樓〕〔小旦〕咱母子形孤心碎。他雄材任展舒。勤王敢後各藩師。肯念家人戀繫。把赤膽少渾躊躇。〔雙聲子〕〔旦〕情難盡。心長逝。何日裏思方替。〔鶯啼序〕〔小旦〕金錢問卜全無些靈意。又怎憑燈鵲龜蛛。諸般可疑。望凱歌聲奏。未審何時。

〔尾聲〕荒齋對憶勞魂慮。嗟我遙瞻雲樹。專望長鬚報喜回。〔末上〕

〔霜天曉角〕軍功懋著。旌節還鄉里。十載勤勞王事。今朝鹵簿充閫。夫人大爺。陶

旺叩頭。〔旦小旦〕老爺的信息怎麼樣了。〔末〕夫人大爺聽稟。小人自那日出門。隔江打探消息。正

遇着一夥軍士。問他蘇峻下落。說蘇峻被陶都督部將彭世李千亂箭射死。磔屍分功。各位都督往

京見駕。奏凱班師。老爺也即日到家了。小人先來報喜。還要到江上迎候老爺。〔旦小旦〕謝天謝地。

〔旦〕孩兒。我在裏邊收拾。你可着陶旺打掃前邊。就去迎接父親。〔小旦末〕曉得。〔同下生〕

〔前腔〕故鄉何處。久別迷歸路。幸忝元功欣首豎。今朝榮返吾廬。虎帳牙旗擁上

游。安危須共主君憂。寶融表已來關右。王濬軍宜次石頭。釜底鯨鯢封兩觀。檻中鷹隼泣三秋。將軍

此日承恩眷。且向江潯問故丘。下官自從那日離家。誓圖尺寸。不想今日功成名遂。得列王侯。便道

歸家。挈領家小。同詣荊州。且喜已到廬江地方了。叫衆軍校。此處地方煩苦。且係桑梓近地。不許騷

擾生事。違者網打一百。〔衆應介生〕打過職事。〔應下旦小旦見介〕

〔金菊對芙蓉〕〔生〕夫人。我虎帳圖功。鴛幃久遶。囊閒綠綺塵披。〔旦〕相公。頻勞夢

想今日裏再覩威儀。〔小旦〕相逢喜劇。渾如夢寐。勝獲璠璣。〔旦〕相公。你把一向在外的功績風景。說與奴家知道。

〔玉山頽〕〔生〕夫人。我一從分袂。到東朝叨膺佩琚。仗斧鉞平戢蠻夷。恨權敦妨功生忌。交南遠蒞。總有音書難遞。〔合〕幸逆謀旋著。我急興師。削芟餘黨報彤墀。

〔前腔〕奸雄既剽。跨荆湘榮專一隅。正狼烟靜息無虞。忽蘇峻狂謀重熾。稱兵內指。各鎮勤王踵至。〔合前〕夫人一向拋撇在家。並無一人來往。你且與孩兒把家庭事體試說一番。〔旦〕相公。你聽我道。

〔玉交枝〕遭時不遇。痛連年艱危怎支。我絲麻手續充糝炊。與兒曹形影相依。相公。臨風泪灑枉交頤。尋常屈指何時置。算如今離愁盡除。方免得終朝怨啼。

〔前腔〕〔小旦〕爹爹。青燈愁緒。伴萱堂把殘編卷舒。牛衣對泣嗟無計。幾番淚漬

衣襦。爹爹。我道服勞視膳孝猶虛。朝經暮史成何濟。喜如今骨肉俱齊。但願得歡同百歲。

〔尾聲〕〔合〕悲離歡合人常事。問勳業從來有幾。始信牛眠蔭果奇。夫人一向不曾到母親墳上一看。明日還歸故里。展拜先塋。兼訪范公路。以表故人交情。

幾年流落在天涯。

今日功成返故家。

試看墓木今何似。

翠柏蒼松長物華。

第四十齣 官誥榮封

〔夜行船〕〔末上〕北討南征功業遂。恩榮指日賁臨闈。紫服飛魚。貂冠玉珮。不枉英雄蓋世。數載別鄉閭。今朝返故居。城郭猶如昨。人民半已非。苔封荒逕合。塵網書樑低。一番新整頓。光彩燦朝暉。自家陶旺是也。我老爺功成名遂。衣錦還鄉。先着我回來修理打掃伺候。聞得下縣準備人夫各役沿江迎接。想卽到家也。

〔前腔〕汗馬盟書藏玉匱。而今初服得遂翔迴。〔旦小旦〕松菊猶存。枌榆未改。喜

快生平志氣。〔千秋歲〕〔生〕故園衰草。今日重還到。尊俎上。英雄表。金湯生氣象。冠蓋榮封誥。人世裏。幾回興廢都難料。〔旦小旦〕莫說韶光老。謾把金尊倒。今非昔。功名好。從容談笑裏。整頓乾坤了。願世世恩光盡沐中書考。〔生〕夫人。今日還鄉。比前日出門的風景。大是不同了。皆賴天地祖宗之佑。我與你拜謝一番。

〔園林好〕〔生〕感天地神明護培。感父母泉臺默持。念陶侃功成身退。今日裏得回歸。今日裏得回歸。

〔前腔〕〔旦〕我生長在草舍茅茨。今被服龍章鳳帔。不枉了流離顛沛。喜今日得回歸。喜今日得回歸。

〔江兒水〕〔小旦〕臣節須當靖。君恩不料虧。揚名四海時艱濟。鞠躬盡瘁王臣志。時危方顯忠和義。自古安邦頻厲。〔合〕今日裏畫錦榮歸。管取名垂百禩。

〔前腔〕〔末〕門煥黃金闕。身披紫繡衣。看車填馬隘郊原蔽。元功已奏承明地。鸞書指日來雲裏。誰說五侯專貴。〔合前〕

〔五供養〕〔丑〕我貧窮老嫗托在鄰居。往日爲依。歡聞歸故里。欲敘舊相知。阿呀。夫人。夫人。〔旦〕呀。王媽媽。許久不見。這等老了。〔丑〕夫人。數載睽違。幸致遇家鄉。兵荒迭至。早是老身別時呵。棲身無定所。白骨半成堆。〔合〕幸遘光儀。不勝歡會。

〔前腔〕〔旦〕王媽媽。自那日老爺呵。辭家遠離。我姑婦相依。全憑護持。倉忙分手去。未得效纖微。相公前日婆婆病時。多虧王媽媽早晚奔波。此恩不可不報。〔生〕呀。下官不知。有失

奉酬。叫陶旺取白金二十兩。送與媽媽。深愧投桃報李。少資伊晨昏薪水。〔旦〕王媽媽。你受我一拜。〔丑〕阿呀。夫人說那裏話。折死了老身。夫人。蒙老爺這等厚惠。只是受之不當。〔旦〕莫不是嫌薄。請收了。〔丑〕這等多謝。老爺夫人。褻蹠捐重惠。犬馬怎償伊。〔合前〕夫人。老身告別。〔旦〕多慢你。〔丑下旦小旦下〕

〔玉交枝〕〔小生〕故人還旆。喜陳平不負無知。他鴻功已把旂常樹。聊申燕喜庭除。〔丑〕老爺。那陶老爺呵。當年猶憶雪花飛。今日門盈駟馬車。〔合〕方纔見天生大儒。方纔見皇家俊者。〔報介接見介〕

〔前腔〕〔生〕范兄。我同心知契。感吹噓得效馳驅。荷蒼天不負封侯志。得盡心定難持危。〔小生〕你今朝仗鉞凱歌回。看刻期頒詔皇恩至。〔合前小生〕陶兄。你把別後事情見教一番。〔生〕范兄。

〔川撥棹〕我自離家去。仕東朝居掾史。會蠻兵入寇邊陲。會蠻兵入寇邊陲。幸功成顛遭萋菲。〔合〕恨王敦嫉妬寄謫南交魂夢迷。

〔前腔〕膚功賁。調荆湘叨鎮蒞。那蘇峻呵。倚奸雄缺望興師。倚奸雄缺望興師。喜從容歸吾削夷。〔合〕羨臬雄部下威。答朝廷還故居。

〔尾聲〕〔小生〕別離幾載今歡聚。竚看淩烟標著。看橋梓恩榮盡錦衣。〔丑扮朝使上〕

〔出隊子〕躬承朝議。跋涉程途江水西。金章鐵券報功施。胙土分茅世世俱。試問當今豪傑有誰。〔報介〕聖旨已到。跪聽宣讀。制曰。朕聞烹巨鼈者鼎大於滄海。斬長鯨者劍倚於青天。既立異勳。勉膺殊寵。爾荊州都督陶侃。五山鎮地。一柱擎天。氣壓乾坤。量含宇宙。入居環衛。

出擁旌幢。歲寒知松柏之心。國難見忠貞之節。敷揚清政。水鏡無光。吐瀝赤誠。朝霞失色。先擒陳敏。後勦杜弼。萬國安心。百蠻繞指。無愧文成之略。不讓武侯之勳。朕以眇躬。謬膺大寶。方居櫛祿。遽遘閔凶。羣小窺朝。元兇干紀。既罪人之未得。斯會旅以徂征。迎敵鼓行。靡待前茅之偵。擒囚歸報。遂成獨抑之誅。華夷由是以知威。天地爲之而卷葢。凱歌一奏。盟府交書。是用授爾官爲太尉。仍封長沙郡王。都督八州諸軍事。食邑五千戶。立班少保。升爵元侯。增食邑於爰田。衍并腴於眞賦。併爲異數。用表宏勳。父陶丹。祚國生賢。邦基永賴。母湛氏。傳家訓子。植幹實崇。并推錫類之仁。以隆不匱之孝。贈丹長沙郡公。湛氏長沙郡夫人。妻李氏。內政允襄。無媿雞鳴之警。子陶洪。父書能讀。堪稱鶴和之賢。李氏封正一品夫人。陶洪授丹陽縣尹。彭世李千渠。魁殲殪。宜申斬將之褒。范達。豪杰薦揚。當受進賢之賞。應授世武衛將軍。千昭。勇將軍。范達。豫章內史。於戲。見無禮於君。爾既殫乎忠藎。歸飲至於廟。我何愛於寵褒。惟功名垂世之始終。斯爵祿爲邦之勸勵。尙圖後績。益炳前麻。爾往欽哉。毋替朕命。謝恩。〔衆〕萬歲萬歲萬萬歲。〔見朝使介丑〕大人功德巍巍。聲名赫赫。正所謂非常之人。始有非常之報。可謂前無古人。後無加寵矣。賀喜賀喜。下官還要往溫大人處開讀皇命。不得久羈。就此

告別。正是黃河泰岱恩波永。紫誥丹書聖澤長。〔下〕

〔催拍〕〔生〕慶銅龍遙罩紫泥。闔門受褒章寵書。喜氣藹門楣。誥贈焚黃。泉壤增輝。世祿綿延。奕葉光詒。〔合〕今日裏共沐恩私。膺紱綬拜丹墀。
〔前腔〕〔小生〕誰不願捷奏勛垂。終沮隔權輕職微。喜際會成奇。喜際會成奇。羨你父子功名。存歿沾禧。愧我剡薦微勞。亦被波餘。〔合前小生〕小生就此告別。另日再圖叩謁。正是功成蕭相殞青社。寵貴千秋賜赤符。〔下旦小旦上生〕

〔海仙歌〕喜我風雲遭際。寵恩綸振古稱奇。山盟海誓。台鼎煥鍾彝。如大鵬得展垂天翅。鶴鳴子和。好爵自縻。琴調瑟奏。家室允宜。〔合〕皇恩萃。福慶齊。蒼天端不負男兒。

〔前腔〕緬想北堂恩義。苦緝麻翦髮勤劬。柏舟偃蹇。畢世受淒其。今朝博得兒榮貴。名翺鸞誥。彤管已垂。裳焚翟莩。窀穸已輝。〔合前〕

〔前腔〕〔旦〕那日萱庭萎逝。我孤身寂守蓬居。辛勤歷盡。今日佩簪裾。屢屢重

效鴛鴦戲。歡諧伉儷。唱隨永娛。齊眉舉案。偕老永隨。〔合前〕

〔前腔〕〔小旦〕喜沐爹行蔭庇。晨昏間彩服庭趨。門闌佳氣。福祿與山齊。當門

綽楔垂千禩。一門尊顯。孫子寵貽。錦衣歸晝。鄉邦寵地。〔合前〕

〔越恁好〕〔合〕瑞凝戟棨。瑞凝戟棨。喜團圓疑夢裏。千秋萬載芳聲沸。勳名難

儷。桓圭永鎮長沙地。官封太尉。八州控轄應無比。臣忠君聖揚餘緒。

〔尾聲〕名題運甓彰勞瘁。願知音勿加嘲戲。聊助梨園一種奇。

數年汗馬著功勳。今日鳴珂到里門。

松菊猶存三徑在。及時當自惜分陰。

運甓記終

鸞

鏡

目錄

第一齣 提宗

第二齣 論心

第三齣 閨詠

第四齣 覓贈

第五齣 仗俠

第六齣 諧姻

第七齣 秉操

第八齣 入道

第九齣 催試

第十齣 挫權

第十一齣 合諧

第十二齣 摧落

第十三齣 詩激

第十四齣 勵志

第十五齣 品詩

第十六齣 覓鸞

第十七齣 鑾訂

第十八齣 喜諧

第十九齣 勸仕

第二十齣 春賞

第二十一齣 途逅

第二十二齣 廷獻

第二十三齣 捷賀

第二十四齣 京晤

第二十五齣 探婚

第二十六齣 合鏡

第二十七齣 圓成

鸞鏡記目錄

四一開明書店

鸞鏡記

明 葉憲祖 著

第一齣 提宗

〔漢宮春〕〔末上〕杜子奇窮。歎生來軼軻。骨肉西東。聘得文姝趙女。兩擅才容。豪門相逼。仗魚娘女俠併幪。成婚後。春闈同赴。誰知觸怒奸雄。失意慚歸故里。賴佳人激勉。奮志登庸。更寄新詞稱慶。京邸相逢。溫郎情致。爲投詩竟遂牽紅。看一對鸞鏡分合。總關多少情蹤。

第二齣 論心

〔戀芳春〕〔生上〕藻思雲淵。風流嵇阮。一身落魄堪憐。自有漫漫浩氣。直貫重玄。不肯隨人長短。也不肯媚人自薦。同消遣。詩酒朋儕。儘堪盡日盤桓。〔鷓鴣天〕
載酒無人過子雲。掩關晝臥客書裙。花枝不共秋欹帽。筆陣空來夜斫營。惟日飲。以詩鳴。天教閒客管青春。窮途正是不龜手。與世羞爲西子顰。小生杜羔。表字伯裘。襄陽人也。秀揚北斗。價媿南金。嬌

節霞褰。峭爾心胸山嶽。文思泉湧。鏗然咳唾珠璣。平生不解逢迎。貧士驕人猶勝詔。遜世無求名譽。庸人愛我不如憎。只有一件。父母在日。曾將碧玉鸞鏡一對。聘趙氏之女爲妻。頗聞他年已及笄。才容雙美。因我孤身落魄。遂將好事蹉跎。孤孤寂寂。憂憂悶悶。過了二十年華。賴有賈浪仙溫飛卿流寓在此。日逐往還。幸不寂寞。今日相約過我。不免在此伺候。〔小生外上〕

〔罕地錦襠〕〔小生〕連朝朋舊和高篇。攜手滄洲白日閒。〔外〕春風常在故人前。美酒清謳解客顏。〔小生〕小生溫庭筠。〔外〕小生賈島。流寓襄陽。同來訪問杜伯裘。此間已是不免逕入。〔進見介生〕春到庭除任綠莎。〔外〕馮唐未老已蹉跎。〔小生〕儘教朋舊形骸放。〔合〕卻道衣冠禮法疎。〔外小生〕伯裘。你今日容顏慘然不樂。卻是爲何。〔生〕二兄聽稟。

〔玉芙蓉〕我昂藏正少年。流落誰青眼。幾時得策名飛步。獨冠羣賢。聊存筆札尋常應。直取絲桐獨自彈。〔合〕心難按。每牢騷問天。問何緣倒顛豪傑。致難堪。〔外〕伯裘。你說那裏話。似兄這般才藻。取功名如拾芥。何必抑鬱。〔生〕浪仙。若是有才的。便取功名。如飛卿兄與浪仙兄。今日蚤已致身青紫。不似這般流落了。〔小生〕伯裘。我輩志氣。不可少挫。任它終身

不偶。那睥睨之態。放曠之懷。定然要用着它的。你何苦如此慘然不樂。小弟呵。

〔前腔〕千秋信自堅。半世從人賤。直浮雲富貴。浩氣瀾漫。任情放誕。曾無忌。揮手雲霄不受憐。〔合〕心難按。每牢騷問天。問何緣倒顛。豪傑致難堪。〔外〕飛卿兄言之有理。我輩未遇呵。

〔前腔〕飯牛惜夜寒。捫蝨於時蹇。便所期已矣。獨坐悠然。如今登樓有我非王粲。卻酒從教逐阮宣。〔合〕心難按。每牢騷問天。問何緣倒顛。豪傑致難堪。〔外〕我們暫且告別。明日有興。再來相訪。正是

他鄉攜手易相親。

半過春光半廢身。

歌憶前人寧寡和。

遇當斯世可常貧。

第三齣 閨詠

〔一剪梅〕〔旦上〕落盡棠梨野絮飄。蜂也無聊。蝶也無聊。疎窗紅日坐來高。脂也慵調。粉也慵調。〔浣溪沙〕輕打銀箏墜燕泥。斷絲高罨畫樓西。花冠閒上午牆啼。粉籜半開新

竹徑紅苞落盡舊桃蹊。不堪終日閉深閨。奴家趙氏。小字文姝。自小聰明。愛觀書史。鎮日幽靜。好就詩詞。除了班家女師。那左貴嬪鮑令暉也則尋常。只有東鄰魚家惠蘭義妹。清才掇露。藻思霞蒸。每有所作。不在奴家之下。目今春盡日長。閨中頗困。怎麼得他到來閒話。消遣也好。〔小旦上〕

〔前腔〕一夜春歸不可招。紅也難饒。紫也難饒。閒心若個帶眉梢。醒也難消。睡也難消。奴家魚氏。小字惠蘭。常與西鄰趙文姝姐姐往來作伴。情勝同胞。今日特去看他。行不數步。

已是趙家門首。不免徑入。〔見介〕奴家正在此想你。妹妹來得恰好。〔小旦〕妹子見春光已盡。鶯老花殘。想道姐姐情思無聊。特來奉候。〔旦〕這幾日天氣果覺困人些。妹妹。你適纔說鶯老花殘。我。和你就把鶯花二字。各做送春詩一首何如。〔小旦〕如此甚好。姐姐請先。〔旦〕僭了。〔吟介〕風風雨雨過前楹。牢落春光似送行。爲問阿誰多着意。殷勤臨別更啼鶯。〔小旦〕妙妙。待妹子也念來請教。

〔念介〕盡道春風未有涯。誰知草草欲還家。亂紅狼藉渾無賴。檢點爭憐葉底花。〔旦〕妹子。我二人如此詩才。若去應舉。那女狀元怕輪不到錦江拾翠的黃姑。〔小旦〕正是。若使天下詞壇。姐姐主盟。小妹佐之。那些做歪詩的措大。怕不剝了面皮。〔旦笑介〕語笑良久。頗覺散心。還和你到檻外閒步。

一回〔行介〕

〔懶畫眉〕〔旦〕一番花雨過亭皋。滿地殘紅溼未飄。釵將新綠上芭蕉。應知斷送人多少。消得春歸能幾遭。

〔前腔〕〔小旦〕梁間語燕似爭巢。百轉鶯簧欲罷調。日長深院靜蕭蕭。幾多困倦誰將到。覺比前春更寂寥。〔旦〕妹子。我看看你

〔前腔〕雙蛾簇簇護春嬌。斷臉微紅睡半銷。芳情想已逗纖腰。閒行莫向城南道。怕有行春吉士挑。〔小旦笑介〕姐姐。這到不在妹子心上。只是姐姐有了主兒的。反覺盼不到些。

〔前腔〕新來略覺損容標。剩把閒情付彩毫。吟詩生怕及天桃。幾番盼殺張京兆。翠黛留將懶自描。〔旦笑介〕妹妹。做姐姐的到被你取笑了。〔小旦〕妹子告回。明日再來陪你。〔旦〕有慢了。待我送你出門去。〔行介〕

偶爾春愁鬱未開。

東鄰少女喜相陪。

〔小旦先下旦弔場目送介〕

無情最是門前水。

流盡年光去不回。

〔丑扮媒婆冲上〕做媒爲活計。說合是生涯。〔見旦介〕避下丑。老身做了半世媒。不曾見這般好女子。且住。這是趙寡婦家。記在心裏。作成了一個好主兒。踏破鐵鞋無覓處。得來全不廢工夫。

第四齣 覓贈

〔菊花新〕〔淨衆同上〕一朝名姓動星台。列戟高門晝日開。補袞愧非才。只感荷聖恩如海。龍樓鳳閣九重城。新築沙堤宰相行。我貴我榮君莫羨。十年前是一書生。下官覆姓令狐。名綯。幸遇今上特達相知。不次擢用。由學士遷同平章事。任用最專。恩寵無比。舉子溫庭筠。幼有才名。今上喜菩薩蠻詞。實非下官所長。叫他代作。進呈甚見嘉賞。明歲大比之年。吾子令狐湉在此應試。那些考官。雖則都囑付了。只是場中文字。若使人看不得。恐怕難違公論。吾想除非假手溫生方好。須先差的當家人去與他面說。還有一件。我故人李憶補闕。年老無子。前日勸他納妾。他說夫人利害。只怕難容。除非老相公娶了相送。或者能壓服得他。〔笑介〕若能使婦人不妬。宰相真可謂有

權矣。堂候官。一面擊梆。叫我一箇院子出來。一面到街上。叫一個官媒婆進來。各有使令。〔副淨扮家人上〕堂上聞呼喚。階前聽使令。稟老爺。有何指揮。〔淨〕我差你去見溫庭筠秀才。說道。明歲大比之年。俺家大爺場中文字。相煩代作。必有重謝。不好寫書。只是面說。〔副淨〕溫秀才不知如今在那裏。〔淨〕聞他游學在襄陽地方。逕到那裏尋他。〔副淨〕小人曉得了。〔淨〕還有分付。

〔駐雲飛〕文運天開。明歲南宮選俊才。俺大爺呵。要把魁名賽。文字須遮蓋。嗟。溫李舊同儕。文章出色。假手他行。必定添光彩。你此去呵。禮重言甘莫弄乖。〔副淨〕

老爺呵。

〔前腔〕位列台階。一日成名震九垓。槐柳分行擺。桃李迎門待。嗟。饒有出羣才。也須托賴。若肯相招。料得忙趨拜。念小人呵。此去傳言事必諧。〔淨〕如此。收拾便行。

〔副淨應下丑媒婆雜引上見介〕稟老爺。官媒婆到了。〔淨〕那官媒婆。我要娶一個女子。送與補闕李爺爲妾。你聽我分付。

〔駐馬聽〕故友情誥。念彼年華已漸衰。尙自祥麟絕種。雛鳳空巢。玉燕難懷。明

珠不惜買裙釵。贈他也非爲閒情債。〔合〕爲覓妝臺。卽忙前去。休教遲捱。〔丑〕稟上丞相爺。小婦人原是襄陽郡人。初至京城。這京中女子。不曾遍識。〔淨〕李爺雖宦京邸。原籍楚中。你那襄陽若有好女子。更覺相宜了。〔丑〕這般說。襄陽有一趙寡婦之女。真個一貌無雙。

〔前腔〕村舍茅齋。幻出嬌娘真豔色。他有芙蓉妝臉。楊柳欹腰。恰似豆蔻含胎。領將嚴命去安排。定知好事圓成快。〔合〕爲覓妝臺。卽忙前去。休教遲捱。〔淨〕

卽差官舍二人。與你同送聘禮到他家去。送聘之後。卽便接取來京。休得遲誤。〔丑〕小婦人還有事稟上。趙家女子委實難得。還是丞相爺自家受用了罷。不要作成別人。〔淨〕哇。胡說。

宜春苑內揀花枝。

囑付蜂媒莫待遲。

若是得它心肯日。

果然是我運通時。

〔淨〕先下〔丑〕末弔場。〔丑〕方纔丞相爺說。差官舍與我同去。不知是那一位官長。〔末〕就該是我聽差。〔丑〕就是你老人家。天那。這等一個臊鬍子。路上不好打發你哩。〔末〕休得閒說。我也不曾有子。央你做媒。再娶一房媳婦。〔丑〕有有。我那間壁王大嫂。生下一個女兒。十分標致。有西江月詞爲證。

〔末〕怎見得。你且說來。〔丑〕堪愛王家大姐。天生分外嬌姿。〔末〕好。〔丑〕蓬鬆兩鬢。賽金絲。大眼粗眉歪嘴。〔末〕阿呀。〔丑〕面頰渾如鍋底。鼻頭好像搯搯。金蓮尺二走東西。臭惡三年不洗。〔末〕這婆子原來一口胡柴。明日打點禮物。早些去罷。〔丑〕曉得。〔同下〕

第五齣 仗俠

〔唐多令〕〔淨趙母上〕苦守未亡年。貧居祇自憐。幸然有女正芳妍。〔旦上〕喜得萱親身健在。相依傍。免憂煎。〔淨〕老身趙氏之母。孀居無子。止生這一個女兒。喜得長成。才容雙美。已曾許配杜羔秀才爲妻。一向好事蹉跎。老身常時縈挂。〔旦〕母親老景安康。兒心願足。這些小事。何必挂懷。〔淨〕咳。人家生下女兒。直待嫁了人。纔放下做娘的擔子。〔旦〕請自消遣則個。

〔桂枝香〕〔淨〕孀居孤蹇。年時衰倦。膝前無繼美佳兒。眼底有能文嬌媛。苦愆期少緣。〔旦〕你休苦愆期少緣。但得你老來康健。大家懽懽。〔淨〕我意懸懸。但教連理兒成樹。始得忘憂母似萱。〔外末扮差官二人丑扮媒婆引衆持聘禮上〕一路問來。此間

正是趙家了。元來閉門在此。不免扣門則個。開門開門。〔衆〕

〔不是路〕小戶低塵。急叩雙環莫滯延。〔淨驚介〕爲甚的聲喧亂。女兒你且進去了。我把柴扉試啓問何緣。〔旦下淨開門見介丑〕趙媽媽。我們奉當朝令狐丞相老爺所差。特來聘你令愛。與補闕李爺做二夫人的。〔淨〕阿呀。你們莫胡言。我女兒呵。荆釵已結朱陳眷。縱金屋難教擁翠鈿。〔末〕你這老婦人好不知世事。我老爺便強娶了民間一個女子。打甚麼緊。你也須通變。我老爺呵。熏天炙手難輕撼。料應不免。料應不免。〔淨〕列位。我女兒委實的許聘與杜羔秀才爲妻了。〔丑〕管甚麼杜高杜底。〔背唆衆介〕難道來了一場罷了不成。只將聘禮丟在他家。下午搶他上轎去便了。〔衆〕說得是。怕他到甚麼官司去告了我老爺不成。若再遲延。先鎖了這老婦人去問罪。〔淨推介衆打淨倒地丟聘禮下旦急上〕堂前爲甚麼喧嚷。阿呀。母親怎麼跌倒在此。〔扶淨起介〕女兒不好了。當朝令狐丞相差人。要娶你與甚麼李家爲妾。我說你已會許配杜家。他們那裏肯聽。強將聘禮留下。說下午就要搶你上轎去。再若遲延。先鎖我去問罪。我因推阻。被他們打。〔旦哭介〕如此怎麼好。天那。

〔長拍〕寂寂孤身。寂寂孤身。寥寥庭院。並沒個外人廝見。誰行指引。向朱門漏

洩嬋娟。忽地禍從天。我寸衷匪石。肯容輕轉。忍使喬郎懷碧玉。揮毫重賦綠珠篇。奴既不肯失身。亦不貽累母親。若他強逼成姻眷。拚一個珠沈玉碎。蚤赴黃泉。〔淨哭介〕咳好苦天那。

〔短拍〕黯黯愁魂。黯黯愁魂。寔寔莫景。止留將一女身邊。送與惡姻緣。少不得活離死怨。女兒你且慢死。待做娘的先死了。或者得他憐念。有個捨放你的日子。拚把殘年斷送。生博取你夫婦永團圓。〔旦〕母親快不要這般說。孩兒死的是。〔淨〕還是娘死的是。〔抱哭介小旦上〕

〔霜天曉角〕芳鄰姊妹。朝夕多歡契。爲甚喧聲鼎沸。忙來取問因依。〔見介〕妹子聽得姐姐家裏喧嚷。特來探望。爲何這般痛哭。〔淨〕魚家姐姐。我家禍事從天而降。如何是好。〔小旦〕媽媽有甚禍事。〔淨〕令狐丞相要爲甚麼李補闕娶妾。倚恃權勢。平白地差人來。要強娶我女孩兒。〔小旦〕媽媽。你回他說。許聘人的便了。〔旦〕便是。那些人如狼似虎。不容母親分辨。〔淨〕老身說得兩句。他們便把我來推倒。強留聘禮在此。說下午就要來搶去。怎麼區處。〔旦哭介〕母親。如今

再沒甚麼區處。待孩兒一死。就了事了。〔淨哭介〕我的兒。你若死了。教我倚靠那一個。我左右將死的年紀了。不如待我死罷。〔旦〕母親。那有個爲了孩兒叫母親死的道理。況且你死了。也濟不得孩兒的事。不如待孩兒死的好。〔淨旦抱哭介〕

〔憶多嬌〕痛數奇。事不虞。禍構當權怎設施。炙手熏天力怎支。要强娶嬌姿。强娶嬌姿。怎把牢籠脫離。〔小旦背介〕你看他母子痛傷。不覺使人酸鼻。我左右不會許人。拚捨

此生。救他兩命。有何不可。〔轉介〕媽媽和姐姐且省愁煩。妹子情願與你們解圍。〔淨旦〕姐姐怎麼樣解得我們的圍。〔小旦〕姐姐已受杜郎之聘。義難更改。妹子幸未字人。不如待我替姐姐去了。救你母子兩命。有何不可。〔旦〕這是奴家苦命所招。怎麼到累及妹妹。〔小旦〕做妹子的平日與你怎麼樣相處。若優游無事。日逐往來。一旦有事。便掉臂不顧。豈是人之所爲。況且你有媽媽在堂。不忍分離。我孑然一身。有何挂礙。何不替姐姐去走一遭。我與你

〔前腔〕朝夕俱。情意孚。拚得孤身救你兩命危。比似夜出滎陽解楚圍。〔淨〕我兒。魚家姐姐既有這等高誼。我們拜謝。〔同拜介〕謝得提攜。謝得提攜。使我牢籠脫離。

〔鬪黑麻〕〔小旦〕我一縷微軀原賤同侍兒。你兩口無虞我心甘貫魚。媽媽自古爲朋友者死。我今日此舉。何勞你們相拜謝。感恩私。只有一件。還須厚賂居間。免使臨期露機。〔合〕蒼天鑒知。前途望護持。從此牽腸。從此牽腸。試問重逢甚時。〔旦〕昔衛壽竊旄以代兄。紀信忍烹而誑楚。妹妹的意氣。何忝于兩人。

〔前腔〕我母子顛連似寒灰可欺。你慷慨周旋似陽和再吹。矜義俠敢捐軀。古有黃屋將軍。今屬青閨黛眉。〔合〕蒼天鑒知。前途望護持。從此牽腸。從此牽腸。試問重逢甚時。〔旦出釵介〕奴家感激妹妹厚恩。無物表意。這對碧玉鸞鏡。原是奴家聘物。今送與妹妹。以爲攏頭之用。〔小旦〕旣承厚情。妹子不敢推卻。但是姐姐聘物。妹子怎敢獨取。不如與姐姐各執一枝。它日見此鸞鏡。就如對面了。〔旦〕說得有理。〔分釵介〕

〔鷓鴣天〕尋生替死德無倫。剖玉分釵各愴神。惟有感恩并積恨。萬年千載不成塵。〔旦先下衆上搶小旦下淨弔場〕且住。魚家姐姐雖則去了。還怕中途有變。明日黃道吉日。不免迎杜郎過門。贅親。絕了後患。多少是好。正是早諧男女願。永斷是非門。〔下〕

第六齣 諧姻

〔西地錦〕〔生上〕自恨生來多疾。佳期一向稽留。誰知好事來相鞿。翻因意外
戈矛。小生只爲骨肉支離。身名假塞。婚姻之事。一向蹉跎。誰想令狐丞相要強娶我妻子。幾乎做出
一場大事來。千虧萬虧。虧了魚惠蘭。捨身相救。這也是女中俠客了。岳母還怕事出不虞。招我今日
過門贅親。將憂變喜。總是天緣。且住。聞得我娘子大有詩才。今晚亦須檢點。若被他考倒。可不辱抹
了杜拾遺的家風。〔內作鼓樂介生〕你聽鼓樂喧闐。一定是趙家接親的到了。〔衆扮擯相鼓樂上
生隨行介〕

〔賞宮花〕笙歌沸稠。看華燈晃彩球。迎取風流婿。好去結綢繆。此夜鵲橋牢駕
定。管教織女會牽牛。

〔西地錦〕〔淨上〕喜得蒼天相佑。今宵幸配鸞儔。〔雜請介旦上〕堂前幾遍催妝就。
對人無奈嬌羞。〔雜照常喝介生旦送酒介〕

〔畫眉上海棠〕〔畫眉序〕金鼎麝烟浮。搖漾華堂燭光溜。喜十年婚媾。始遂綢繆。

躲離了劈手鷹鷂。打合上齊眉鴛偶。〔月上海棠〕〔合〕真輻輳。看取骨肉團圓。百年相守。

〔前腔〕〔淨〕有女在秦樓。幸遇蕭郎締佳偶。喜結褵今夕。省母殷憂。虧他巧騰那繡閣衾裯。因此生脫就寒門箕箒。〔合〕真輻輳。看取骨肉團圓。百年相守。〔淨〕

送新人入洞房。〔衆行介〕

〔滴溜子〕才郎的才郎的彩毫在手。嬌娘的嬌娘的蕊珠在口。□□鳳交鸞友。相攜入洞房。歡濃似酒。願祝夫妻天長地久。

〔餘文〕溫香軟玉親消受。枯魚活水正相投。好把新詩幾唱酬。

雙栖雙宿比鴛鴦。

女貌郎才兩頡頏。

不是一番寒徹骨。

爭得梅花撲鼻香。

第七齣 秉操

〔副淨上〕占住房幃老更親。周詩空自說來頻。堂前已失猶龍客。閣內難留比鳳人。老身李補闕之

妻是也。心偏嫉妬。性頗猜疑。因此我老相公晚年無子。不敢提起娶妾兩字。沒來由那令狐丞相娶了一個女子。遠遠送來。與我老相公爲妾。不想半月之前。相公偶得暴疾而亡。那女子前晚才到。雖然一貌出羣。喜得兩無罣礙。落得做了好人。只把客禮相待。我有個兄弟新來斷絃。不如把來嫁與我兄弟。豈不兩得其便。只是丞相送來的。不好強迫他。待他到來。我自自有道理。〔小旦道扮上〕困守蓬茆十數年。此來原不爲情緣。好將金谷樓中女。改作玄都觀裏仙。我魚惠蘭。只爲姊妹情深。捨身相代。到此補闕已亡。落得一身自在。昨日李夫人教人來說。要我改嫁他兄弟。我本玉府仙姝。豈偶凡夫俗子。不如出家入道。到得討個清幽也。

〔北端正好〕蕊珠圓。瓊花潤。香馥郁。蕊珠圓。光的溜。瓊花潤。俺本是天謫降玉府仙真。劣塵凡誰相親。入玄門則盼西池近。〔見介副淨〕小娘子。你怎麼是這般妝束。

〔小旦〕薄命女子。不願嫁人。情願出家入道。〔副淨〕快不要說這樣話。還依老身嫁了我兄弟罷。

〔滾繡毬〕〔小旦〕想我命孤單。難諧仕女姻。骨寒微羞登閥閱門。〔副淨〕小娘子。我兄弟不少你穿的戴的。〔小旦〕休誇稱燒手樣。寶釵籠鬢。不希罕稱身材繡襖羅。

裙。〔副淨〕是了。這穿戴的雖是等閒。我兄弟卻又好個俊俏的人品。〔小旦〕俏潘安不足稱。粉何郎枉自倫。俺可不□潑巫山夢中着緊。誰待想莽桃花洞裏尋春。〔副淨〕你這般青春年少。怎麼落莫得過。〔小旦〕縱教春隨流水休凝思。直待老逐飛花肯斷魂。做個物外閒人。〔副淨〕你要出家入道。有何好處。

〔倘秀才〕〔小旦〕俺待向花前誦真經幾巡。啓金爐把名香自焚。住居的清隱。山書小篆文。一會價鼓琴邀夜月。一會價看鶴舞閒雲。不與那烟霞廝渾。〔副淨〕

既如此說。近邊有個咸宜觀。那觀主我曾有恩于他。待我着院子送你到那裏出家罷。〔小旦〕多謝夫人。〔副淨〕院子那裏。〔末上〕夫人有何分付。〔副淨〕這位娘子情願出家。你可送他到咸宜觀裏去。〔末應介〕

〔煞尾〕〔小旦〕謝得恁開籠放鶴多情分。兀自個指點桃源好避秦。討得逍遙自在身。過卻清幽幾度春。仙女雙成可等倫。玉闕丹臺煞親近。直待朝元駕彩雲。方信道慾海無邊虧咱去得緊。〔小旦同末下副淨〕你看他霞冠鶴氅。風度翩翩。若是我

老相公見了。如何了得。還好還好。試看佳人纔入道。還虧老子早昇天。〔下〕

第八齣 入道

〔誦子令〕〔淨扮道姑上〕塵途擾擾厭逢迎。少小離家覓上清。撇得愛河求淨品。行看羽化上蓬瀛。老身咸宜觀道姑是也。連日到施主人家修齋。不會上殿參禮。今日閒居無事。怕有施主到來。不免叫了綠翹出來。同到殿上焚掃則個。〔貼上〕仙李盤根大。猗蘭奕葉光。〔淨〕綠翹。你把殿門開了。打掃一打掃。〔貼應介〕

〔引〕〔小旦同末上〕蕊珠宮外香雲合。世網從今蹬脫。〔末〕此間已是咸宜觀了。請進去。〔進見介淨〕你是李管家。爲着甚事。同這位煉師到此。〔末〕這位師父。是令狐丞相送來。與我老爺做一夫人的。他因老爺死了。誓不改嫁。情願出家。因此老夫人差我送到寶觀來焚修。〔淨〕妙妙。我觀裏又添了這般一位仙姑。那怕不興旺。小師兄先請拜了三清。〔小旦拜介〕

〔誦子令〕〔淨〕仙娥貌比許飛瓊。嬈娜真堪掌上擎。〔小旦〕師父請轉待小道拜見。〔對拜介小旦〕幸有真仙爲伴侶。願求法力指迷程。〔淨〕師兄在此出家。須用改個法

名。先師留下是玄字行中。賤名玄淡。師兄就是玄機何如。〔小旦〕多謝賜名了。〔末〕小人告回。〔淨〕管家有慢。你回去與我多多拜上老夫人。〔末〕來送雲中仙子。歸參闕內將軍。〔下淨〕請問師兄高姓。〔小旦〕小道寄養趙門。本姓魚氏。〔淨〕我看你冰雪丰姿。烟霞法相。令人企羨不勝。

〔雁來紅〕你是璘珣的玉樹柯。倏移根向大羅。我相逢亦是前因果。〔小旦〕質媿生來濁。入門敢自耽慵惰。〔合〕相隨和雲窗霧閣。朝共晚修清課。〔淨〕綠翹。你就隨侍魚師兄罷。〔貼應介〕

水邊楊柳赤欄橋。

洞裏神仙碧玉簫。

近得麻姑書信杳。

潯陽江上不通潮。

第九齣 催試

〔粉蝶兒〕〔生旦上〕上國觀光。一曲陽關迭唱。〔旦〕相公。今當大比之年。士子們紛紛上京應舉。你正該努力前程。爲甚逡巡不果。是何主意。〔生〕小生功名之念雖切。兒女之情更長。因此躊躇未決。進退兩難。〔旦〕你說那裏話。自古道。學成文武藝。貨與帝王家。似你這般才學。不去應舉。更

待何時。

〔園林好〕看今朝春日載陽。想皇都瓊林正芳。紛紛的計偕爭上。你及早治行裝。你及早整游韁。

〔江兒水〕〔生〕我幸遇文明書。也思觀上國光。只怕你春雲載筆無情況。因此公車不忍匆匆上。慢勞你勸駕情詞暢。〔旦〕你何事爲奴惆悵。雌伏柔情怎誤雄飛千丈。〔生〕旣如此。娘子收拾了行李。待小生從容起身。〔旦〕行李收拾多時了。今日是黃道吉日。相公。你急便起程。切莫遲疑。〔生〕這等請岳母出來拜別。〔旦〕母親有請。〔淨上〕

〔五供養〕堂前鬧嚷。敢是司馬題橋。游子嚴裝。〔見介生〕小生今日起身應試。特請岳母出來拜別。〔淨〕好好。你看花游帝里。挾策射明光。莫爲我孩兒悒悒。度晨昏自有區區相傍。你着鞭須及早。行邁好徜徉。但願一舉成名慰人凝望。〔生〕岳母請上。容小生拜別。〔拜介〕

〔玉交枝〕東牀虛謊。賴周全依依洞房。一朝分袂多悽愴。怕擔閣南國明璫。

〔向旦介〕爲博那影中金馬與玉堂。先拋閃目前鳳枕和鴛帳。〔合〕願此去觀花
曲江。願此去錦還故鄉。〔旦〕相公。這碧玉鸞鏡。原是君家聘物。一枝贈與魚家妹妹去了。這一
枯仍舊送還相公。帶去時時轉念。

〔川撥棹〕驪歌唱。送征衫別話長。把鸞鏡身伴收藏。把鸞鏡身伴收藏。似雙雙
留連不忘。〔合〕待臨歧心自傷。猛回頭泣數行。

〔尾聲〕〔淨〕送君此去乘桃浪。穩取龍門直上。〔生背介〕只怕點額應羞返故鄉。
〔哭相思〕〔淨〕出門不必苦遲疑。〔生〕得失從來未可期。〔旦〕一舉首登龍虎榜。
十年身到鳳皇池。

第十齣 挫權

〔番卜算〕〔小生上〕少小負才名。志氣凌終賈。幾年落魄走江湖。肯折千金價。宣
曲長楊瑞氣凝。上林狐兔待秋鷹。誰將詞賦陪雕輦。寂寞相如臥茂陵。小生溫庭筠。字飛卿。并州人
氏。生成敏悟。擅美詞章。與李義山齊名。時稱溫李。只爲游多豪俠。行頗不羈。年少多情。好爲淫豔之

曲才高得志。浪加輕薄之名。兩赴科場。被人摧抑。這也不在我心上。向寓京師。令狐丞相亦屬知交。未蒙薦擢。因此遠游襄漢。任意飄零。幸有杜伯裘賈浪仙邂逅相投。結爲知己。今春大比。二兄相約同行。我束裝已久。怎麼還不見他們到來。〔副淨上〕欽承恩相命。特地叩儒門。我一路問來。此間聞說是溫秀才寓所。不免逕入。〔見介副淨作放肆介小生請副淨上坐介小生〕客官何來。〔副淨〕學生奉丞相令狐爺之命。來見足下。〔小生〕你是他家甚麼人。〔副淨〕府中第一位管家。〔小生〕既是管家。那有這般稱謂。也沒有你坐處。〔副淨〕隨他一應官長衙門。都有我坐處。〔小生〕偏我溫官人跟前。不許小人放肆。〔推副淨起介副淨背云〕好個大秀才也罷。有事託他。只得權且忍耐。〔轉介〕丞相爺有事。叫我來分付你。〔小生〕可惡。怎麼說分付你。〔副淨〕丞相爺分付說。今年大比。我公子定然要高中的。只是場中文字。我公子懶得費心。要你代筆。自當重謝。〔小生〕你們有事求人。不宜如此倨傲。〔副淨〕便是有事相煩。丞相爺差學生來分付。可謂極其恭敬了。怎麼倒說倨傲。

〔八聲甘州〕〔小生〕哇。沖冠怒髮。怪覷人輕賤。直恁矜誇。縱是當朝元宰。也須要謙謙下士爲嘉。況且向人乞憐。應禮下。何事驕人一謎奢。我溫官人文字。一向也肯捨。

與人的。只是你們這樣的人。我偏不肯輕易一個字兒。休嗟。謾思量代筆生花。

〔前腔〕〔副淨〕我丞相爺呵。南衙威權獨把。看熏天炙手。孰敢爭差。把如天之福。沒來由選擇伊家。〔小生〕選擇着我。便有甚福。〔副淨〕闈中試文勞暫假。料不負多才。溫八叉。酬酢有千金厚禮相加。〔小生笑介〕一發說得好笑。焉有君子而可以貨取乎。快去。不要在此聒噪。〔副淨〕你只怕禍事到來。悔之無及。〔小生〕有甚禍事。不過囑付了試官。不中我便了。〔副淨〕不中也儘勾了。〔小生〕哇。休得胡說。你若再在此放肆。我就要打了。〔副淨笑介〕酒逢知己千鍾少。話不投機半句多。〔下生同外上介〕

〔番卜算〕〔生〕花送遠行人。柳拂新羈馬。〔外〕停鞭且白約朋儕。共策南征駕。

〔生〕小生杜羔。〔外〕小生賈島。特來相約溫飛卿。一同上京應試。〔生〕此間已是溫兄寓所。不免逕入。〔進見介小生〕小弟等候二兄許久了。〔生〕二弟。遲遲吾行。有罪有罪。〔外〕飛卿。你有甚事。覺有不豫之色。〔小生〕說起就好惱了。令狐丞相遣一使者到此。說道伊子應試場中文字。欲假手于弟。那使者甚是放肆。詞語又且矜誇。因此呵叱了他一場。不從其請而去。〔外〕不從其請。方顯我輩的

氣節〔生〕既已呵叱去了。飛卿不必介懷。就請同行。〔行介〕〔少年游〕〔生〕疎梅尙自帶殘英。芳草漸青青。〔小生〕山徑人稀。翠微深處。啼鳥兩三聲。〔外〕曉風重逼輕裘冷。心共馬蹄輕。〔丑扮胡談上〕路遙嫌日短。心急怪行遲。前面朋友等一等。〔衆遇介丑〕小弟昨因送行醉酒。今日起遲。恐怕趕不上夥伴。老兄們。望乞相挈同行。〔衆〕大家朋友。同行就是。〔丑〕多謝多謝。〔同行介〕

〔羅袍歌〕謾策雕鞍驕馬。把春泥踏碎。半雜飛花。芳郊取次布韶華。柳絲搓得鵝兒乍。偷回盼。天一涯。山村迢遞。漸籠沙。春行日。風物佳。人生何必苦思家。

〔前腔〕傍路游鑣初罷。有村歌相應。社鼓輕撾。行人趲路漫嗟呀。奔馳盡爲浮名挂。行偏倦。途更遐。枝頭點點集昏鴉。脣初渴。力漸乏。爲詢沽酒向誰家。〔衆〕

前面有酒家。我們借宿了罷。〔丑〕酒保那裏。〔副淨〕酒酒酒。有有有。〔見介〕衆位相公是酤酒的。還是借宿的。〔丑〕酒也要喫。宿也要借。先拿酒來。〔副淨持酒上先下丑〕方纔行路匆匆。不曾請問列位老兄高姓貴表。〔生〕小弟杜羔。字伯裘。襄陽人氏。〔小生〕小弟溫庭筠。字飛卿。并州人氏。〔外〕小弟賈島。字浪仙。范陽人氏。〔衆〕老兄高姓。〔丑〕小弟姓胡。名談。字諏之。世居謊州。其實與當朝令狐

丞相是一族。〔外〕兄自姓胡。他自姓令狐。如何是一家。〔丑〕不瞞列兄說。丞相自嫌家族單寒。把天下同姓。盡行招納。猶自嫌少。如今我們姓古月的。都改姓令狐。希求親近耳。〔小生笑介〕原來如此。小弟口占一絕奉贈。〔丑〕願聞高詠。〔小生吟介〕族譜從來記不清。逢人只合問公卿。自從元老登庸後。天下諸胡盡帶令。〔丑不語介〕生外笑介〕飛卿好詩。雖是謔言。有關風化。〔丑背怒介〕這等輕薄。可惡可惡。〔生〕胡兄。我們飲一杯解嘲何如。〔衆飲丑不飲介〕

〔一封羅〕〔衆〕朋情契最賒。偶相逢卽一家。莫惜十千平樂價。任取村壘浮紫霞。西窗翦燭。歡情轉加。梨花門掩。良宵正遐。〔生〕胡兄。偶然相謔。君休訝。〔丑〕小弟天性不飲。適纔閒話。我也不計較。〔衆〕我們不要閒談了。大家去睡罷。

蘭陵美酒鬱金香。

玉碗盛來琥珀光。

但使相逢能盡醉。

不知何處是他鄉。

〔衆下丑弔場〕聞說小溫輕薄。果然如此可惡。就是那杜羔賈島。也不該大家奚落我。待我到丞相跟前去。背他一場是非。叫他明鎗容易躲。暗劍最難防。〔下〕

第十一齣 合諧

〔副淨上〕但知丞相貴。無奈秀才喬。空馳千里道。答罵恐難饒。自家令狐丞相府中一個院子。蒙丞相爺差我去見溫庭筠。要他與我公子場中代筆。我見他時節。雖然略大樣了些。也不道這溫庭筠這等傲撇。竟把我呵叱了一場。勞而無功。怎麼去回覆丞相爺。既要脫得自己干係。又要使丞相爺擺佈得他便好。今我且不要進去。在此算計定了。然後去回覆丞相爺。〔丑上〕胡談骨格輕纖。爲人最愛趨炎。闖門極要有膽。見人定用無廉。撮哄全憑口快。鑽求無奈頭尖。冒認瓜將李搭。拔援柳共花拈。背是非將沒作有。討便宜換苦成甜。謁相公人以爲諂。央大叔我自能謙。此間已是相府門首。且有個管家在那邊。不免上前。央他引見。有何不可。〔見介副淨〕足下高姓。何來。〔丑〕小子是你老爺堂姪。爲應舉到京。相煩引見。〔副淨〕我丞相爺不會有你這個阿姪。〔丑笑介〕小子怎麼不是丞相的姪兒。見有溫庭筠的詩爲證。他說自從元老登庸後。天下諸胡盡帶令。被他這等嘲笑。怎麼不是你老丞相的兒孫。〔副淨〕那溫庭筠這等輕薄無禮。小人也爲着一事。丞相爺差去見他。到被他呵叱了一場。〔丑〕阿呀。相府管家。就敢呵叱。這等說。煩管家引小子參見丞相。那時節你一句。我一

句。在丞相跟前背他一場是非何如。〔副淨〕如此甚好。你看府門開了。我先進去。你隨後進來。我與你稟知便了。〔丑〕多謝多謝。〔淨冠帶上〕

〔生查子〕趨朝曙色寒。退食餘清宴。千里覓才人。使我頻凝盼。〔副淨進見介〕院子。你回來了。〔副淨〕是。〔丑執手本跪介淨〕階下跪者何人。〔副淨〕是爺一家。〔淨〕接手本上來。〔看介〕小姪令狐談參見。既是一家。請起作揖。〔揖坐介淨〕賢姪爲何到此。〔丑〕小姪應舉到京。特來參拜相公老叔。〔淨笑介〕我族中可謂多賢了。〔丑〕不敢。〔淨回顧副淨介〕我差你去見溫秀才。說的事體何如。〔副淨〕小人領老爺嚴命。去見溫秀才。他聞丞相兩字。就發惱起來。千不允。萬不允。把老爺埋怨了一頓。把小人搶白了一場。〔淨〕敢是你放肆激惱了他。〔副淨〕小人怎敢放肆。一見他就磕了十二個頭。〔淨〕怎麼磕這許多。〔副淨〕替老爺磕四個。替大爺磕四個。小人自磕四個。湊成十二個。〔淨〕哇。胡說。我向年也會與他往來。不是這般劣別的。〔副淨〕老爺不會知道。便是向年叫他替做了菩薩蠻詞進呈。囑付他不可對人說。轉背就去告訴人了。〔淨〕我不信你一面之詞。〔丑〕小姪斗膽。請問那溫秀才莫不是溫庭筠麼。〔淨〕正是。〔丑〕若是此人。怪不得盛使了。前日小

姪與他途中相遇。偶然說起丞相老叔。他就有許多謗毀。許多嘲笑的話。〔淨〕他怎麼嘲笑我。〔丑〕這也小姪不敢說。〔副淨〕小人也聽得兩句。說老爺沒有學問。〔淨〕原來如此可惡。〔丑〕溫庭筠自家也罷了。又結交兩個契友。一個叫做杜羔。一個叫做賈島。大家捏造歌謠。譏謗丞相老叔。還說今春得第。專要與丞相老叔作對哩。〔淨〕有這等事。可惱可惱。

〔瑣腮郎〕怪喬才忒煞輕儇。特傳言。輒作慳。不思領諾敢肆刁頑。如今悔卻當初垂盼。〔合〕從教文成雲錦定遭訕。空落莫。枉嗟歎。

〔前腔〕〔丑副淨〕那酸丁慣作波瀾。播流言。徒實繁。一朝得勢便擬包彈。乘其未發急宜防患。〔合〕縱教文成雲錦定遭訕。空落莫。枉嗟歎。〔淨〕這個不難。我明日就對考試官說。溫庭筠輕薄無行。專在場中爲人代筆。杜羔賈島結黨畜緣。法宜并斥。記認了三人試卷。不中便了。〔丑跪介〕小姪萬望吹噓。〔淨〕我也通箇關節與試官就是了。〔丑〕多謝厚恩。

怪得鰕生多倒顛。

須知扼吭制人先。

但教名落孫山外。

任取詩成宋問前。

第十一齣 摧落

〔生小生同上生〕曉月難爲光。愁人難爲腸。誰言春景榮。起見葉上霜。〔小生〕鷓鴣失勢病。鷓鴣假翼翔。棄置復棄置。情如刀割傷。〔生〕飛卿。吾輩在此應試。自分可登上第。不意今早放榜。三人都落人後。怎麼樣好。榜上有令狐瀆令狐談兩人。一定是丞相一家了。〔小生〕令狐瀆就是丞相之子。令狐談就是前日相遇的胡談了。〔生〕原來如此。可歎可歎。〔小生〕伯裘。功名遲速。自有定數。不必惆悵。〔生〕言之有理。賈浪仙早間自去看榜。如今日已過午。怎麼還不回來。〔小生〕一定就回來了。〔外僧扮上〕十五能文西入秦。三十無家作路人。時命不將明主合。布衣空惹洛陽塵。我賈島。累赴科場。不得中第。真好悲憤也呵。

〔北點絳脣〕杏苑迷途。蓬山失步。儒冠誤。謾自嗟吁。怕向青天訴。〔見介生〕呀浪仙。忽然祝髮。有何緣故。

〔混江龍〕〔外〕別無緣故。只爲長安獻策。枉馳驅。直弄得一身困乏。兩鬢蕭疎。姓字難教題甲榜。聲名甚日滿皇都。空懷楚玉。浪泣鮫珠。前程漸迫。後事難摹。

不能勾領春風看遍洛陽花。到不如討閒身靜對菩提樹。皈心禪定。寄跡精廬。

〔小生〕浪仙。你髮便祝了。只可惜只一部美髯。何不留了他。

〔油胡盧〕〔外〕待說甚留鬚表丈夫。又不是戴烏紗不可無。到省得白鬢鬢終日費妝塗。〔小生〕只怕穿的戴的都不如意。〔外〕帽僧伽盼不上宮花簇。着袈裟巴不就羅袍綠。一副生擦擦苦肝腸。一條瘦巖巖賤體膚。到頭來劉蕢命薄馮唐暮。因此蚤拚卻做浮屠。〔生〕浪仙。你有尊嫂在家。怎生撇得他下。

〔天下樂〕〔外〕你曉得季子還家事也無妻也麼。孛忒狠毒。怕他討花封惹得多瑣瑣。〔小生〕浪仙。既不歸家。便在此投個相知。閒游幾時也罷。何必祝髮。〔外〕如今五侯宅不待賓。七貴門空自呼咳。便有樹誰家肯借烏。〔生〕浪仙。只怕書再讀得飽些。文字再做得好些。定有個出頭日子。〔外〕伯裘伯裘。你豈不聞說。縱教書向牕前讀。無奈場中不論文。

〔寄生草〕古用三冬足。今開萬卷餘。論多聞記得起軻賢註。有神思搜得出湘靈句。負奇才撰得就阿房賦。可憐教妾若爲容。這是文章自古無憑據。〔小生〕浪

仙。比如令狐瀉令狐談。這夥庸才也得中榜。難道我們偏終身不遇。〔外〕飛卿飛卿。豈不聞說。總因拾芥兒曹易。益遣登科我輩難。

〔么篇〕逐狡兔人爭捷。守枯株我獨愚。靠家風沒個親爺護。賂權門少的錢神鑄。換儒衣羞把新聲度。從教曳白白登科。饒咱製錦空延佇。〔生〕浪仙。既出了家。可還讀書麼。〔外〕因怕讀書。做了和尚。還讀他怎麼。

〔煞賺〕剛跳脫世間塵。誰耐做書中蠹。再學那寒窗喫苦。祇不過漫興吟詩趁蹇驢。竹院風徐。梅嶺香舒。這都是山僧受用清閒趣。〔小生〕浪仙。你說便如此說。到底來終須還俗求名。〔外〕咳。論年華隙駒。覷功名腐鼠。休想俺今生逃墨更歸儒。請了。〔急下生〕浪仙只因不第。有激而逃。可爲浩歎。〔小生〕他也別自有見。請問伯裘兄。行止若何。〔生〕小弟爲家下孤單。不日就作歸計了。〔小生〕小弟在京。頗多豪貴之游。不乏鶯花之興。還要留連幾時。〔生〕這也各行其志便了。就此告別。後會非遙。一葉浮萍歸大海。人生何處不相逢。

第十二齣 詩激

〔似娘兒〕〔旦同丑扮侍兒上〕柳色已深深。空懊惱。望斷佳音。幾番不語停織紵。怕他柔腸轉熾。雄心漸折。特地沈吟。久別非無悶。聞歸豈不歡。愁君墮壯志。番覺翠眉攢。奴家趙氏。我官人下第。落魄無聊。昨日鄰舍人回。稍得我官人一個口信。說在明後日准可回家。奴家想我官人天資穎異。上進何難。只怕自此以後。奚落了志氣。荒廢了學業。不如乘其未歸。做一首詩寄去與他。中寓譏笑之詞。動他激發之意。勝似見了面時節。癡癡呢呢的說他。也不醒。昔有樂羊子遊學一年而歸。其妻引刀斷機。羊子感激。遂成大儒。奴家雖是不才。有意效之。侍兒取紙筆過來。〔丑〕娘子。紙筆在此。〔旦寫介〕

〔九回腸〕〔解三醒〕數日來凝思偏甚。比春初悶緒還深。心苗別是愁波沁。不是盼歸舟。信息難尋。淹將繞指閒中意。墮卻英雄百煉心。單愁恁。〔三學士〕詩成不羨迴文錦。效樂羊竊比規箴。郎才出衆因何放。妾面羞郎傍晚臨。詩已寫完。侍兒。你拏去交與老蒼頭。叫他明早一路接上去。見了官人。送這書與他看。〔丑〕曉得。〔旦〕〔急三鎗〕教他明日裏往前途去。須迎問。這雙魚袋休得付浮沈。

爲囑長鬚蚤出門。

寸牋好與遞歸轅。

憑將一首詩中意。

勝似三更枕上言。

第十四齣 勵志

〔縷縷金〕〔生策馬上〕驅驕馬。逐輕車。不辭筋力倦。路途賒。鎮把家鄉盼。看看近也。恨前途早已夕陽斜。歸心轉深切。歸心轉深切。小生杜羔。下第之後。別了溫飛卿。卽日起身。來到此間。離家不遠。只是天色已晚。怎麼好。〔問內介〕借問一聲。今日可還趕得到襄陽城北的趙村麼。〔內應介〕天色已晚。到不及了。〔生〕這等。只索尋個酒店安歇了。明早躡行罷。店小二有麼。〔副淨〕昏迷須覓主。倦鳥欲投林。官人可是借宿的。請裏面去。〔生〕店小二。我明日五更就要起身。你千萬不要睡熟了。〔應介生嘆介〕今晚到得家纔好。可恨天色一會就晚了。

〔前腔〕〔丑扮老蒼頭上〕年華邁。怕跋涉。身扶青竹杖。〔跌介〕又遭跌。日行三十里。看看將夜。望前村燈火店星列。誰家可安歇。誰家可安歇。〔作尋介〕不知那一家可安歇。〔小二〕老人家。小店還有空房。進來進來。〔丑進見生介丑〕呀。卻好官人在此。來得湊巧。〔生〕

老蒼頭。你爲何在這裏。家中可好麼。〔丑〕家中平安。娘子特差小人來迎接官人。有書在此。〔送書介〕你老人家走路辛苦。先去睡罷。待我慢慢的看書。〔丑下生看書介〕原來是一首詩。〔念介〕良人的有奇才。何事年年被放回。如今妾面羞君面。君若來時傍晚來。〔作怒介〕

〔榴花泣〕新詩讀罷。不覺赧盈頰。多訕笑。浪譏切。〔看介〕怎麼說教咱歸傍晚來些。又說見郎君妾面羞遮。〔想介〕且住。我娘子這詩是激勸我的意思。不要怪他。只是我做了堂堂的男子。直待婦人譏笑。不思奮發。豈不自愧。我今晚如醉初醒。如夢初覺了。我待磨穿硯鐵。喜從今喚醒莊生蝶。看他年書錦還家。免教人獨歸昏夜。我如今看了這詩。有何面目回去。不如再往京師。埋頭勵志。以圖再舉。有何不可。待我打發了老蒼頭回去罷。〔叫介〕老蒼頭快起來。〔丑上〕天色大明了。起身回去罷。〔生〕我不回去了。你自回去罷。〔丑驚介〕阿呀。娘子特地叫小人一路來迎接官人。官人怎麼到說不回去了。

〔撲燈蛾〕〔生〕我猛然思去日。剛腸欲自裂。若不用辛勤。只恐又遭前轍也。從今志決。棄家鄉。不憚周折。〔丑〕官人。你要讀書村莊靜貼。又何須他州外郡苦離。

絕。官人。你便要游學。此處已不遠了。乘便回到家裏。見了娘子一面。再出來也不遲。〔生〕我若到了家裏。再不能勾出門了。你自回去。不必強我。〔丑〕官人可有書信。寄與娘子麼。〔生〕我沒有書。你上覆娘子。說我

割愛辭家心事違。

老奴戀主只牽衣。

玉京有路終須到。

金榜無名誓不歸。

第十五齣 品詩

〔七娘子〕〔小旦道妝貼隨上〕洞簫聲徹清塵垢。掩松關逍遙自由。〔貼〕積忒黃房。

凝神絳府。〔合〕隨緣好把詩囊搆。〔小旦〕星點花冠道士衣。紫陽宮女化身飛。能傳上界春消

息。若到蓬山莫放歸。小道魚玄機。嬌如蕙質。弱比蘭芽。性格偏靈。詞章特豔。向爲義氣而攜衾。後因

落莫而入道。寄跡咸宜觀中。一向人跡罕到。近因太和公主曉得我夙負詩才。花朝之日。邀賞牡丹。

賦詩一律。大爲稱賞。因此名播京師。乞詩者不必說起。就是那送詩請政者。亦且應接不暇。並沒一個可意的。甚覺不耐煩。如今掩關謝客。凡是送詩的來。綠翹留他在殿上坐了。替他傳詩進來便了。

〔貼應介小旦〕

〔字字錦〕煙霞繞畫樓。羽鶴迎清晝。逢迎嬾出門。誰是忘機友。自清幽。手捧一卷黃庭。黃庭外那識人間塵垢。休休。虛名所累。惹起無端應酬。如今掩關。掩關春雨後。好謝卻剡溪舟。好謝卻剡溪畫舟。屏牛車載酒。紫芝歌一曲。紫芝歌一曲。終朝討得安安靜靜。瀟瀟灑灑。着甚的勞勞碌碌。奔奔走走。況又苦與人不偶。〔末丑中淨淨上〕

〔接雲鶴〕久聞仙子冠名流。將因問俗一相求。〔末〕我們聞得咸宜觀中女冠魚玄機才貌雙全。特來獻詩。求他賞鑒。〔中淨〕此間已是咸宜觀。不免逕入。〔貼〕煉師。外面有人來了。〔小旦〕結廬在人境。客至嬾逢迎。〔下衆進見貼介貼〕列位相公光降。有何見諭。〔衆〕小生們久仰魚煉師詩名。特來請教。〔貼〕煉師掩關謝客。相公們若有佳作。待小道傳進去。〔衆〕我們是要覲面請教的。〔貼〕煉師自來不會見客。列位相公請回。佳作待煉師看了。改日送還。〔衆〕我們一定要在此請見了纔去。〔貼〕怎麼說得能容易。

〔賞宮花〕佳篇見投。他怎敢糊塗了應酬。〔衆〕他胸中懸藻鑒。何難筆底恣搜求。
〔合〕滴露研硃非草草。從容鑑定庶無尤。〔衆〕一定要等了去。〔貼〕這等請少坐。待小
道拏進去。與煉師看了送出來。不識相如渴。徒吟子美詩。〔下中淨〕列兄。你看侍兒生得這等丰緻。
那魚玄機不知更當何如。〔淨〕列兄。不消羨慕得他。若看得詩好。就是囊中之物了。〔衆〕正是。我們
羨他。

〔黃龍袞〕香風展素裘。香風展素裘。蓮步紆雲袖。綽約丰姿。望望頻翹首。〔外〕
只不知他看中那個的詩哩。〔衆〕鶯儔燕侶。鸞交鳳友。只在這霎時間相成就。〔貼上〕
鑑衡應不爽。品藻定無差。〔出詩念介〕樹色閨人古。鐘聲入夜圓。避喧山僻借。觀以爾名仙。這是那
一位的。〔末〕是小生的。〔貼〕煉師說。這詩但求句之險。不顧理之安。是學長慶而僻者也。近日新尙
此體。若去做山人。可稱第一流。只是還爲識者鄙。叫小道送還了。〔又念介〕混俗同魚服。游仙學紫
綃。寸心君莫問。攜手一長謠。這是那一位的。〔淨〕是小生的。〔貼〕煉師說。這詩膚勝于理。是勦集西
崑而濫觴者也。有了這等詩。求些薦書。各處有三五錢的書儀賺了。〔中淨〕都送還了。只留我兩個

的。有些意思。〔貼〕這也難道。二位的詩到在此。只是怕得罪。不敢將出來。〔中淨〕正要請教。何妨。〔貼念介〕自從盤古分天地。幾人作佛幾人仙。今朝仙女臨凡界。住在咸宜觀裏邊。煉師說。請相公去唱門詞罷。做甚麼詩。〔中淨〕門詞正是女眷極喜的。你煉師怎麼不留我唱唱。〔貼又念介〕西施當日配夷光。夷光就是西施。怎麼說配夷光。月裏姮娥嫁姓張。月裏姮娥何會嫁姓張的。〔又念介〕就是仙姑何氏女。當初也許聘裴航。裴航娶雲英。與何仙姑有甚相干。煉師說。故事也不會查考明白。做甚麼詩。〔丑〕如今做詩的一個故事也不記得。還要談天說地。我記得幾個故事。就是飽學了。管甚麼用差也用不差。〔貼〕列位如今請回罷。〔衆〕承煉師指教。怎麼得面謝謝便好。〔貼〕這不勞得。可人期不來。俗子推不去。〔下淨〕我們獻詩。要他賞鑒。成就姻緣。怎麼到喫貶剝了一場。〔中淨〕既是他不睬。我們竟自去罷。好掃興。好掃興。

〔清江引〕〔衆〕詩人終日街頭走。不顧人疵謬。今朝剝得面皮紅。笑破傍人口。及早把扇兒遮。休回首。

第十六齣 覓鸞

〔鳳皇閣〕〔小生上〕風花拈詠。謾把才情誇宋。儘堪蹤跡似飄蓬。不換醉鄉一夢。覓鳳求鳳。近有個人兒意中。天付功名會有時。人生不必浪愁眉。且將洛下愁眉客。暫作長安游俠兒。小生溫庭筠。春闈不第。自謂才高寡和。誰知是令狐丞相有心擯落。咳。溫飛卿豪俠性兒。不道會苦了我。只可惜連累了杜賈二兄。這也不在話下。我一向流寓京師。繁華富盛。任意追尋。游俠輕肥。隨人徵逐。南鄰北里。無非愛客之家。九陌三達。盡是看花之地。少甚麼。早入吳姬之肆。笑指銀瓶。夜眠楚豔之樓。香迷翠枕。儘堪適意。無可鍾情。聞得咸宜觀中。有個女冠魚玄機。本係豪家之女。來抱衾裯。出爲道院之仙。偏嫌脂粉。才堪詠絮。貌復羞花。真個毛女重生。玉清再世。京中豪華貴客。風雅詞人。儘有銜服窺門。不能迴其一盼。飛牋引玉。無所得其片言。豈不懷春。定因擇壻。我不如做下一詩。央人送去。他若有憐才之意。能無許配之心。這一位溫夫人。不怕走到別家去了。興言及此。不覺自快。

〔黃鶯兒〕聞道紫雲叢。有飛僊絕世容。謾誇神女雙成董。詞華錦籠。清思玉融。一齊都上毛錐弄。問天公。才情相對。能有幾人同。且待我做起詩來。〔作做介〕我溫飛

卿詩才。平日也不弱于人的。只是這首詩要打動那人。更須精妙。宋大夫。司馬長卿。本朝李太白。一班知情知趣的人兒。都來幫我便好。

〔前腔〕從小擅雕蟲。這詩詞要更工。助情還仗多情種。花牋一封。春心幾重。會親符籙。憑他用。似題紅。憐才有意。必定許乘龍。詩已寫完。這鄰家張老嫗的女兒。在玄機處做侍兒。名喚綠翹。不免托張老嫗。將與他女兒。轉送魚玄機。有何不可。

世人若個解憐才。

卻望嬌眸特地開。

爲要仙姬成美眷。

因將詩句作良媒。

第十七齣 鑿訂

〔緜山月〕〔小旦上〕靜鎖白雲堂。睡起竹方牀。展黃庭一卷自焚香。奈朔風初壯。詩情未快。悶思偏長。春花秋月入詩篇。白日清宵是散仙。空捲珠簾不會下。長移一榻對山眠。小道魚玄機。寄居咸宜觀中。不覺又是三年了。只爲我才貌出羣。聲名播遠。京中多少王孫公子。騷人墨客。戶外之履常滿。笥中之句頻投。他雖多銜飾之心。我終絕應酬之意。仔細想將起來。苦空之

守。尙未卜于久長。伉儷之緣。頗留心于選擇。只是要一個可意的人兒。真也難遇。目今初冬天氣。好不悽楚人也。

〔四塊玉〕翠屏空。金風蕩。鴛瓦上。霜初降。空對着景物淒涼。偏惹得情懷悒快。雲窗月宇。料得難終傍。待覓個人兒相隨唱。整衣衫賣弄容光。學吟哦矜誇伎倆。那些可心情便許成雙。

〔雁過聲〕〔貼上〕娘行。有人懸想。題詩句代他轉將。〔見介小旦〕綠翹。方纔你母親到來。有何話說。〔貼〕有個西鄰宋玉。饒清況。把新詩寫柔腸。倩青鸞殷勤遞送雲房。〔小旦〕近來送詩的頗多。可意的甚少。我也不耐煩看他。〔貼〕這詩不比他人。溫郎。人共獎。詩詞俊逸多名望。比似你俏心兒還自賞。〔小旦〕你說溫郎。莫不是溫飛卿麼。〔貼〕正是。〔小旦〕

既是他的。拿來我看。〔貼遞與小旦念介〕玄府仙人碧玉房。紫霞衣覆白霓裳。謝家詠雪難爲句。虢國朝天不是妝。曾記山中逢阮肇。更聞湘渚嫁蘭香。有緣欲乞真消息。肯向巫山夢渺茫。好詩好詩。豔若含葩。清如翦水。不枉了溫飛卿也。

〔傾杯序〕詩章語句新。意味長。才貌都休講。只盼着天台。比着湘渚。踐着巫山。多少思量。信豪如太白。豔過韓偓。賦同元亮。好似弄琴心。坐間翻出鳳求凰。

〔貼〕他的詩。煉師既已賞鑒。不消說了。依我母親說起來。他少年美貌。種種的可人。

〔玉芙蓉〕潘安貌比芳。衛玠神偏朗。論丰姿特秀。照眼琳瑯。年華未滿三旬上。欲締佳姻恰正當。奴家會記得煉師有詩說。易求無價寶。難得有情郎。珍奇賞。縱千金易償。算難求風流獨占有情郎。〔小旦〕既如此說。待我也答他詩一首。就是你替我送去。〔貼〕煉

師若單單答一詩。怎見得與他訂婚姻之約。〔小旦〕正是。贈他一件東西便好。〔貼〕奴家見煉師有碧玉鸞鏡一枝。十分精巧。何不就贈了他。〔小旦〕這是我結義姐姐送的。不好贈人。〔貼〕這也何妨。少不得成了婚姻。依舊還煉師的。〔小旦〕這也說得是。且待我做起詩來。〔做詩介〕

〔山桃犯〕打疊下新詩樣。結抹在瑤釵上。輸情已逐青鸞往。傳言謾學紅娘莽。種桃許折向玄都傍。審端的。不如嫁作鴛鴦。

〔尾聲〕難擺脫情魔障。肯向人間魅阮郎。怕學那少室仙姝枉自忙。

孤鸞飛去得成雙。

一段姻盟賴主張。

有眼自能窺宋玉。

無情何必恨王昌。

第十八齣 喜諧

〔挂真兒〕〔小生上〕客院寒風漸灑灑。淒涼味早入窗紗。綠綺空挑。丹楓未轉。惹得無端縈掛。着悶嫌宵永。含情覓信稀。何因窺戶數。只恐應門遲。小生溫飛卿。爲慕魚玄機。投詩表意。求媾傾心。鄰居張老嫗來說道。昨日已叫他女兒綠翹送去了。怎麼這時候還沒回音。好生放心不下。

〔太師引〕送新詩不是輕勾搭。俊秋波曾經看麼。爲甚的沒些音耗。好教人悶煞情芽。若是雲心水性。情分寡。怎供出夢蝶尋花。還疑訝。敢是詩詞未佳。鴛鴦簿須別有緣法。

〔前腔〕〔貼上〕袖籠着兩種多情話。問仙郎西鄰幾家。奴家綠翹。承煉師差遣。送詩與溫飛卿。聞得母親說。西鄰第二家是他寓所。此間想是了。不免逕進。〔見介貼〕官人敢是溫飛卿

麼。〔小生〕小生正是小仙姑。莫不是魚煉師的侍女綠翹姐姐麼。〔貼〕秀才們天生幫襯。小名兒甚處詳察。我本是仙家侍女金雀把。差排做奉使乘槎。〔小生〕既是煉師差來。有何說話。〔貼〕相酬答。新詩一札。教賤妾親來拜覆賢達。〔貼出詩小生念介〕苦思搜詩燈下吟。不眠長夜薄寒衾。滿庭木葉愁風起。透幌紗窗怕月沈。疏散未聞終遂願。盛衰空見本來心。幽棲莫定梧桐處。暮雀啾啾空繞林。此詩淒涼宛委。綽有風人之致。飛卿自愧遜他一籌。只有一件。小生投詩之意。非爲炫才。實因求配。如今詩中既乏見許之言。此外別無可憑之物。小生放心不下。如何是好。〔貼〕奴家記得我煉師有詩云。多情公子春留句。少思文君晝掩扉。今日回你一詩。也是多了。那裏還有甚麼信貨。〔小生揖介〕做姐姐不着。再轉去替小生說一聲兒。〔貼笑介〕官人這些話。都被綠翹參透了。信物到帶得一件在此。只是出不得手。〔小生〕姐姐忒會留難人。〔貼出釵介〕這一枝碧玉鸞鏡。是我煉師奉贈的。〔小生接介〕妙妙。鏡以明結髮。鸞以表雙飛。小生得之。如獲拱璧。

〔三學士〕詩句包籠憐俊雅。多情討箇根芽。鸞堪比翼期相偶。鏡取加冠許配。

咱有日契姻成結髮。相酬和消受煞。

〔前腔〕〔貼〕一首詩神權執伐。不須費酒賠茶。郎如鏡裏鸞成匹。娘似釵頭玉未瑕。只怕你得第之後。有個綵毬樓上打。他情分辜負煞。〔小生〕姐姐。你說得小生能不知趣。辜負了魚煉師的美情。只是還有一件。怎麼引得我見煉師一面便好。〔貼〕我煉師從來不曾見人。況我觀中都是女伴。男子進去。甚不方便。此事難以奉命。〔小生揖介〕再做姐姐不着。一定要見一見兒。〔貼笑介〕好個會勾搭人的秀才。〔想介〕觀中決難進來。除非。〔小生〕除非怎的。〔貼〕除非明春二月花朝。太和公主每年接至園亭賞翫牡丹。去時人衆。不好相見。傍晚回來。你到賓賢坊口相候。可圖一面。〔小生〕領命領命。〔貼〕你日後把甚麼謝我。〔小生〕煉師嫁了我。姐姐少不得也隨到我家來。那時節呵。

新婚燕爾恰纔過。

惜玉憐香到你多。

笑殺韓郎休賣弄。

我到頭學道賽輕娥。

第十九齣 勸仕

〔鎖南枝〕〔外賈島僧服上〕行吟遍。散步閒尋思。景色真宛然。我得趣在言前。描情直無限。山僧賈島。欲題李凝幽居。模情寫景。信步到此。〔作沈吟介〕哦有了。閒居少鄰並。草色入荒園。鳥宿池邊樹。僧推月下門。過橋分野色。移石動雲根。暫去還來此。幽期不負言。〔作又沈吟介〕僧推月下門。推字敢怕不如敲字麼。驚人句。只在一字間。費商量肯胡亂。〔作吟介〕推敲還是那一字好。〔末冠帶衆擁上〕

〔前腔〕鳴鷗盛。擁節嚴。行行避人誰敢前。〔外闖過衆拿見末介衆〕稟老爺。這和尚闖道。〔末〕你既出了家。怎不趺坐向蒲團。到閒游在街畔。〔外〕山僧怎敢閒游。只是因題詠覓句艱。苦沈吟不覺把節旄犯。〔末〕你會做詩。念與我聽。〔外〕山僧做的。鳥宿池邊樹。僧推月下門。欲待改推字作敲字。躊躇未決。因此失于迴避。〔末〕你既是出家人。月下之門該敲。不該推了。〔外〕老爺此言足爲山僧決疑了。〔末〕這兩句做得儘有意致。你且隨我到衙裏來。〔作行到介末〕下官就是韓愈。你把方纔的詩。總念與我聽。〔外〕原來是韓老大人。待山僧念來請教。〔念介末〕妙妙。這詩頗有臺閣氣象。不似山野人之作。〔外〕實不相瞞。山僧就是賈島。偶因下第。有激而

逃禪。〔末〕原來是賈浪仙。下官聞名久矣。今始識荆。幸甚幸甚。先生似你這般才藻。何難一第。竟自逃禪。拋了舉業。甚爲可惜。

〔前腔〕我聞名久。會面難。今朝始識賈浪仙。你難道有意習枯禪。竟無心事軒冕。如今大比將近。你及早把精藍遠梵。頂捐整儒冠。事鑿戰。〔外〕多謝大人指教。

〔前腔〕承明府獎借偏。須臾死灰覺復然。只怕知己望雖專。我鰥生運多蹇。不能勾登金馬步木天。〔末〕先生你說那裏話。及早蓄鬚眉事柔翰。〔外〕山僧敢不領命。回到寺中。蓄髮就是。正是

與君一夕話。

勝讀十年書。〔末〕再休說

削髮除煩惱。

留鬚表丈夫。

第二十齣 春賞

〔念奴嬌〕〔旦扮公主生末扮內監副淨丑扮宮女上〕洛陽盛麗。但春當三月。花開爭賞。誰似皇家多寵澤。貴主園亭虛敞。雜樹生香。流鶯弄響。占得春暉廣。名花無價。

曉來人報齊放。皇家貴主好神仙。別業初開雲漢邊。山出盡如鳴鳳谷。池成不讓飲龍川。妝樓翠

幌留春在。舞閣金鋪借日懸。憶昔乘輿來此地。稱觴上壽樂鈞天。自家太和公主是也。目今花朝佳節。園中牡丹盛開。已曾差人去請令狐夫人。與那成宜觀女冠魚玄機同來翫賞。怎麼還不見到來。內侍們。看令狐夫人與魚女冠到門。即便通報。〔生末應介淨扮令狐夫人上〕

〔生查子〕鸞封沐寵榮。托荷隨夫命。主第請看花。妝點多齊整。奴家令狐丞相夫

人是也。太和公主請賞牡丹。特來赴席。不免遲入。〔見介淨〕奴奴蒙公主娘娘召請賞花。怎麼不多設些鼓樂。吹的吹。打的打。做他幾個雜劇院本。鬧熱一鬧熱。到是這般靜悄悄的。〔旦笑介〕花前張樂陳戲。謂之俗因。〔淨〕管甚麼俗與不俗。只是熱鬧些的好。〔小旦同貼上〕

〔前腔〕春光滿帝城。車馬天街競。貴主喜相招。暫了看花興。〔見拜介旦扶小旦介〕

魚煉師。你是方外之人。免拜罷。〔小旦〕領命。〔旦〕見了令狐夫人。〔見介淨〕公主娘娘。奴家入宮朝見太后。不知見了多多少少的嬪妃彩女。不會有這位女冠這般標致的。〔旦〕那些人間粉黛。怎比仙姿。這還不足爲異。魚煉師的詩詞歌賦。當世罕出其右。這纔可敬。〔淨〕既如此。失敬了。〔旦〕我們

同到花前一看。〔看介小旦〕今年牡丹十分茂盛。比往年大不同了。〔鷓鴣天〕翠蓋牙籤幾百株。楊家姊妹夜游初。〔淨〕五花結隊香如霧。一朵傾城醉未蘇。〔小旦〕閒小立。困相扶。夜來風雨有情無。

〔旦〕愁紅慘綠今宵看。卻似吳宮教陣圖。侍兒看酒。〔送酒介〕

〔念奴嬌序〕春風旖旎。把韶華萬種。一齊交付花王。錦繡叢中誰得似。嫣然傾壓羣芳。不枉國色朝酣。天香夜染。詩人費盡此誇獎。〔合〕休負卻名園勝景。同舉霞觴。〔淨〕

〔前腔〕搖漾赤玉盤傾。碧囊香散。不須聲價。數姚黃。勾引得幾陣蜂蝶顛狂。相向。微暈檀心。輕籠鶴羽。壽安姿態最堪賞。〔合前小旦〕

〔古輪臺〕占風光園林此日。鬪奇芳千紅萬紫。將人晃。憑欄爭賞。細與平章。敢借名花廝傍。傾國嬌姿。可堪俛仰。應知含笑有君王。歡情獨鬯。向沈香亭北。徜徉指痕尙染。臉窩宜笑。醉容難狀。麗質果無雙。開花傍日邊。紅杏稍堪方。

〔尾聲〕天將暮別去忙。謝不盡樽前雅贖。〔旦〕你這女長庚好和平章詩一章。〔小

旦〕小詩明日送覽。〔旦〕專望賜教。內侍們。還着女奴與車輦。送煉師回觀去。〔生末應介淨作醉譚介〕

傾國姿容別。

多開富貴家。

臨軒一賞後。

輕薄萬千花。

第二十一齣 途迨

〔小生上〕雲想衣裳花想容。春風拂檻露華濃。若非瓊玉山頭見。會向瑤臺月下逢。小生溫飛卿。自去冬與綠翹相約。道明春二月花朝。在賓賢巷口與魚玄機會面。今日正是花朝也。被我盼到了。天色將晚。不免先去候他。則個。〔行介〕

〔一江風〕盼花朝。好日看看到。準備雙眸瞭。那妖嬈。冒地迴車。要看十分飽。斜陽掛柳梢。斜陽掛柳梢。天街漸寂寥。香車未至難猜料。你看遠遠的有一輛車兒推來。多分是魚玄機了。待我且站立一邊。等他過來。飽看一回。〔小旦坐車內行介貼丑隨上〕

〔前腔〕愛春韶。賦得清平調。歸路昏烟遶。〔小生招貼貼見介〕阿呀。我走不上了。車兒慢

些走〔雜〕曉得了。〔作慢行介貼〕天色晚了。便揭起這簾兒。怕些甚麼。〔揭簾介小旦〕謾招搖。試捲湘簾。四顧人蹤杳。〔小生覷小旦介小旦〕誰家一俊豪。誰家一俊豪。將奴魘地。瞧。教人掩面羞難道。〔雜〕天色晚了。我們快些走。送了煉師到觀。還要趕回家去。〔丑同雜急推車下小生趕遇貼貼〕我們車兒往大路走。你從小路抄出迎仙里。還好相見。〔下小生〕魚玄機。魚玄機。

〔前腔〕我覷丰標。似對鏡剛一照。入眼平生少。恨香輶。驀地驚塵。聽徹金鈴小。不免從小路作急趕上去。〔行介〕心慌路轉遙。心慌路轉遙。天昏意自焦。呀。好了。行來喜得重逢巧。〔雜推小旦車貼丑同上介〕

〔前腔〕逐回颺。油壁車兒小。早近迎仙道。〔遇介丑〕這位官人又在前面了。〔貼〕左右是這些應試的秀才。一雙餓眼。便捨他看看罷。管他則甚。〔丑〕這等我也布施他瞧瞧罷。正是與人方便。自己方便。待我也慢慢的行。〔小旦見介〕戀游鑣。去了還來。怕就裏藏圈套。〔貼附小旦耳介〕煉師你休疑。這就是溫飛卿。〔小旦〕原來可意苗。原來可意苗。丰神故自超。

天生一副才和貌。〔雜丑〕煉師請下車。已到觀門首了。〔小旦〕有勞列位。回去與我拜上公主娘娘。〔衆應介小旦貼〕歸來愁日暮。孤影對琉璃。〔下小生〕你看他進去了。

〔單調風雲會〕乍消魂再顧偏添俏。玉臉芙蓉笑。嗟。難整翠雲翹。柔枝頻嬾。後來幾步輕那。顯得金蓮小。不負多才配阿嬌。記取蛾眉仔細描。

第二十二齣 廷獻

〔出隊子〕〔生上〕久離鄉井。久離鄉井。游學留連在帝京。三年大比集羣英。思想扶搖萬里程。同赴春闈。顛望轉深。小生杜羔。來赴科場。你看貢院門尙未開。不免在此等候。那壁廂有個朋友來了。〔小生上〕

〔前腔〕風流獨占。風流獨占。長被春愁帶酒淹。飛仙幸許傲鸚鵡。走馬催妝彩筆拈。來赴春闈。顛望轉添。〔見介生〕原來就是飛卿兄。〔小生〕伯裘兄。久違了。你看又有一個朋友來了。〔外巾服上〕

〔前腔〕禪心清淡。禪心清淡。懶把浮名擔子擔。桃畚撇卻杏園探。無奈昌黎說

再三來赴春闈。顛望轉貪。〔見介〕原來伯裘飛卿二兄早已在此。〔生〕前日小弟聞得人說。浪

仙兄遇着韓昌黎。因烏宿池邊樹。僧敲月下門的詩句。勸兄蓄髮還俗。小弟在疑信之間。不道果然。

〔小生〕這個正是逃墨歸儒了。〔外〕休得取笑。〔丑上〕

〔前腔〕全然不濟。全然不濟。休說文齊福乃齊。日家許我定聯魁。莫待看花去較遲。來赴春闈。顛望轉癡。〔見介丑〕列兄。你看貢院將次開了。我們上前去。魚貫而進。不要挨

擠。〔末扮試官衆擁上〕

〔海棠春〕欽承朝命司春試。看濟濟盛明多士。〔末〕今年大比。下官知貢舉事。叫左右

開門。放舉子進來。〔衆應介衆進見介末〕今年試士。只樂府一篇。近日吐蕃納款。進千里馬到京。如

今就以馬爲題。諸士各進號房去聽題。〔衆應介雜〕天字號生員領題。〔生應介〕你的題是君馬黃。

曲名是駐雲飛。專取多士凌雲之兆。〔生〕生員有了。

〔駐雲飛〕君馬龍驤。大宛騎來進上方。曉立金鸞仗。暮宿天開帳。嗒。色映御袍

黃。輝煌一樣。聖主無爲。不遣游情蕩。八駿空傳送穆王。〔末〕深合君馬黃本意。末寓

規諷更見忠愛〔雜〕地字號生員領題〔小生應介末〕你的題是紫騮馬。曲名也是駐雲飛〔小生〕生員有了。

〔前腔〕汗血驊騮滅沒權奇骨相優。響道金環鬪。照眼銀鞍溜。嗟。人馬擅風流。紫衣輕覆十里天街。一望春如繡。整備看花得意游。〔末〕才情俊麗。正是少年得意之文。〔雜〕玄字號生員領題〔外應介末〕你的題是飲馬行。〔外〕生員有了。

〔前腔〕玉面驪騮跨上征鞍八尺高。騎出長安道。馳向陰山嶠。雲外玉鞭搖。橫行天表。慣逐輕車。淨把胡塵掃。歸飲城隅氣正豪。〔末〕高爽不羣。足占奇絕。〔雜〕黃字號生員領題〔丑應介末〕你的題是愛妾換馬。〔丑〕生員有了。只是異乎三子者之撰。〔末〕卻怎麼。〔丑〕他們都是崑山腔板。覺道冷靜。生員將駐雲飛帶些滾調在內。帶做帶唱何如。〔末〕你且念來看。〔丑唱弋陽腔帶做介〕

〔前腔〕懊恨兒天。〔末〕怎麼兒天。〔丑〕天者夫也。辜負我多情。〔重唱〕鮑四絃。孔聖人書云。傷人乎。不問馬。那朱文公解得好。說是貴人賤畜。如今我的官人將妾換馬。卻是貴畜賤人了。他

把論語來翻變。畜貴到將人賤。怪得你好心偏。記得古人有言。槽邊生口枕邊妻。晝

夜輪流一樣騎。若把這媽換那馬。怕君暗裏折便宜。爲甚麼捨着嬋娟。換着金韉。要騎

到三邊。掃盡胡羶。標寫在燕然。圖畫在凌烟。全不念一馬一鞍。一馬一鞍。曾發

下深深願。如今把馬牽到我家來。把我擡到他家去呵。教我滿面羞慚。怎向前。且抱琵琶

過別船。〔未笑介〕好一篇弋陽文字。雖欠大雅。到也鬧熱可喜。左右開門。放舉子出去。〔衆應介〕

聖主招賢日。

英才入彀時。

文章知有用。

考試定無私。

第二十二齣 捷賀

〔寶鼎現〕〔旦上〕征人久滯長安。少婦閨中目斷。奴家趙氏。前科因我相公下第。寄詩

勸勉。我相公見詩勵志。三年不歸。又且母親去年病故。奴家孤身獨處。目今又當大比之年。此時想

已放榜。怎麼音信杳然。難道我相公又下第了不成。好生放心不下。

〔番山虎〕兩地暗相牽。小立無言獨倚闌。簾捲東風。鎮日重門掩。含愁攢翠黛。

無心整鈿鬟。鴛闈自守。繡線懶拈。頻將著艸揲。金釵當卜錢。試問題橋客。何時
畫錦還。雁帛魚牋。雁帛魚牋。怎得迢迢遠傳。〔末扮院子上〕喜中青錢選。才高壓衆英。自
家杜相公家院子便是。我相公中了進士。差我回來迎接夫人。此間已是不免進去。〔見介旦〕院子。
你回來了。相公可中麼。〔末〕相公中了。特差小人來迎接夫人。有書在此。〔旦看介〕我相公果然中
了。可喜可喜。我想起來。他昔年不中。我會以詩激他勵志。他今日中了。我怎麼不寄詩賀他。待我做
一絕。先叫院子寄去。我隨後起身便了。〔做詩介〕

〔前腔〕他掛名金榜。得意長安。想此時人爭羨。翩翩一少年。我正愁無賴。幾將
望眼懸。驀地裏泥金捷報傳。不是我昔年相勸勉。今日裏緣何得上天。我再寫
詩牋。再寫詩牋。聊志區區賀言。〔念介〕長安此去無多地。鬱鬱葱葱佳氣浮。良人得意正年
少。今夜醉眠何處樓。〔作封介〕院子。你先將這封書去寄與相公。說我隨後就起身來了。〔末〕夫人
還是幾時起身。〔旦〕我今日收拾了。明早就起身。你速去報與相公得知。〔末應介〕

〔尾聲〕〔旦〕長安此去無多遠。你好把程途速趨。我今日愁顏換笑顏。

第二十四齣 京晤

〔天下樂〕〔生冠帶上〕當年蹤跡困泥塵。不意乘時亦化鱗。爲報鄉閭親戚道。如今席帽已離身。下官杜羔。忝中賈島榜進士第五人。身授禮部員外。已曾差人去接取家眷。此時也該到京。怎麼音信杳然。好生放心不下。〔末上〕去傳天上信。來達世間書。〔見介生〕院子。你上來了。夫人在那裏。〔末〕夫人將次到京。小人馬上先帶得家書在此。〔送生看介〕原來是夫人一首詩。〔念介〕長安此去無多地。鬱鬱葱葱佳氣浮。良人得意正年少。今夜醉眠何處樓。賢哉夫人。下官下第之時。寄詩激我。下官得第之後。寄詩賀我。不減樂羊之婦。梁鴻之妻。可敬。

〔步步嬌〕〔旦同雜上〕翠幕雕輿把長途併。歷盡蘼蕪徑。驅馳不暫停。瑞靄欣瞻。帝城遙映。〔雜〕稟夫人。此間已是老爺寓所。請進去。〔末〕夫人到了。〔生接見介〕得意上金門。喜夫榮妻貴誰相並。〔生〕夫人。岳母爲甚麼不同來。〔旦〕去年已棄世了。〔生悲介〕可憐可憐。夫人。昔日承你以詩相勵。語句何等激切。今日又承你以詩相賀。語句何等穠麗。似你這般詩才。不怕杜羔不退避三舍。〔旦〕相公。你當日見了詩。敢也怨着奴家麼。〔生〕下官怎敢怨夫人。

〔江兒水〕〔旦〕我曾把譏評句。聊申勸勉情。也只爲牛衣對泣憐同病。一向魚書久絕誰堪倩。鴛儔兩拆空孤另。盼得到南宮得雋。女壻乘龍。自覺不勝欣幸。

〔生〕夫人。下官若不是你以詩激勵。安得致有今日。我爲

〔僥僥令〕詩詞多慨切。發憤在神京。得尙友羣賢相馳騁。博得這功名煞有因。〔尾聲〕珠璣兩授殊刻銘。怎能勾今宵可閏。把三載離情慢慢評。

術淺方觀海。

恩深忽見天。

學開丹殿籍。

名與石渠賢。

第二十五齣 探婚

〔步蟾宮〕〔小生冠帶雜隨上〕龍津春碧驚時變。取上第官居京苑。友朋迎宅眷慶團圓。拜賀令人欣羨。下官溫庭筠。叨中賈島榜進士。昨聞杜年兄迎取年嫂到京。特來拜賀。此間

已是杜爺寓所了。左右通報。〔雜報介〕

〔女冠子〕〔生冠帶上〕傳呼契友過庭院。忙倒屣敢遲延。〔見介小生〕小弟聞得迎取年

嫂到京。特來拜賀。〔生〕多謝。正是室家之樂。也是人生第一事。年兄不知肯聽小弟的管見麼。〔小生〕願聞。

〔紅衲襖〕〔生〕我羨你玉京游方少年。我羨你畫屏間多妙選。問溫家應覓乘龍眷。效楊生須尋種玉田。爲甚麼詠周詩尙餘窈窕篇。爲甚麼掩章臺未描眉黛淺。常聞得不孝三條無後當憂也。早難道醉枕書囊只獨眠。

〔前腔〕〔小生〕喜今日荷仁兄金玉言。念吾曹不是遠人情。木石轉幙中人空有牽絲願。月下老曾無繫足緣。〔生〕如今儘好擇配。〔小生〕我也曾向蘭房訪麗娟。我也曾倩蜂媒求淑媛。饒與你看遍長安無數名花也。只有那紅杏高枝近日邊。〔生〕原來年兄意中。已曾看上一個了。請問是誰家的女子。〔小生〕這個也不好就說出來。〔生〕待小弟猜一猜何如。

〔前腔〕有一個偶相逢佛殿前。〔小生〕他也不是相國之女。〔生〕有一個暗牽情紅葉片。〔小生〕他也不是個宮人。〔生〕有一個傍村莊色比桃花舊。〔小生〕他也不生在村家。〔生〕有一個住紅樓名和柳帶連。〔小生〕他也不養在豪家。〔生〕莫不是逗春心綠綺絃。〔小

〔生〕不是新寡的文君。〔生〕莫不是墜銀鞭爲那紅粉面。〔小生〕不是李亞仙這般妓女。〔生〕多分是路近藍橋有個雲英也。勾引裴航得遇仙。〔小生〕年兄說是仙。到也差不多了。〔前腔〕他本是蕊珠宮女僮伶。今住在白雲鄉間小院。〔生〕這等說起來。是個女冠了。他有甚好處。〔小生〕綻芙蓉不數他。嬌姿倩。灑琅玕偏誇他。錦字鮮。〔生〕既如此說。這女子是才貌兼全的了。年兄曾與他訂盟。〔小生〕他已贈鸞鏡情意堅。〔生〕哦。贈鸞鏡。〔小生〕許我配鸞儔盟誓遠。〔生〕這等何不就娶了他。〔小生〕只爲着徑路無媒有約難成也。擔閣佳期空自煎。〔生〕年兄方纔說有鸞鏡相贈。可借得一看麼。〔小生〕小弟偶然帶在身邊。〔付釵與生看背介〕這鸞鏡是我夫人贈與魚蕙蘭的。怎麼到在那道姑那裏。哦。是了。恐怕這道姑就是魚蕙蘭。〔轉介〕年兄。這女冠可姓魚麼。〔小生〕正姓魚。叫做魚玄機。〔生〕可曾在李補闕家麼。〔小生〕聞是李補闕生前所聘。入門之時。補闕已死。因此出家在咸宜觀中的。〔生背介〕是了。今日且得明白。〔轉介〕既如此。年兄住在小弟寓所。待小弟央人與年兄說合。只管打點成親便了。〔小生〕如此多謝。〔生〕鸞鏡暫留在小弟處何如。〔小生應介〕這個使得。

有約無媒莫謾猜。

圓成端的在鸞釵。

百年夫婦來朝合。

一段姻緣宿世諧。

第二十六齣 合鏡

〔遶紅樓〕〔旦上〕曉聽雞鳴問寢初。臨鏡了日滿庭除。〔生上〕晉接纔休。雨餘春暮。〔合〕閨閣且歡娛。〔旦〕相公。你留溫飛卿在寓同居。不知爲着甚麼。〔生〕下官因他旅邸無聊。留他暫消遣。還有一件。昔日魚家小姨。曾有恩于夫人。今日還想他麼。〔旦〕奴家怎麼不想他。只是不知他的下落。無從酬報耳。相公特然問及。必有緣故。〔生出釵介〕夫人。你看這鸞鏡。便有了落了。〔旦〕這鸞鏡那裏來的。願聞其詳。

〔剔銀燈〕〔生〕他來京邸衰□已殂。拋塵垢雲房長住。〔旦〕哦。李補闕死了。魚家妹子就出了家。這信可是實的麼。〔生〕怎麼不實。玄機寶號多聲譽。與溫郎許諧鴛侶。〔旦〕哦。與溫飛卿訂了婚姻之約。這等說。這鸞鏡一定是魚家妹子與溫飛卿的了。〔生〕正是。姻符鸞鏡定取。〔旦〕是那個做媒。〔生〕便是沒有媒人。這事還要借重夫人。執伐事勞卿爲渠。〔旦〕原

來有這等事。如今他出家在那裏。〔生〕他就出家在咸宜觀中。〔旦〕這個不難。侍奴家就去叫侍兒隨我同行。〔生〕下官不得奉陪。眼望旌捷旗。耳聽好消息。〔下旦丑行介〕

〔前腔〕行過路風景甚都。瞻望處琳宮瑤戶。〔貼上見介〕夫人請瞻拜聖像。〔旦拜介〕

三清廟貌千靈護。願皈依與人作福。道姑我問你觀中有仙妹。西房姓魚。須傳說我專來叩廬。〔貼〕我煉師自來不曾見人。夫人請回罷。〔旦〕你對煉師說我姓趙。是他舊相識。〔貼〕煉師有請。〔小旦上〕

〔風馬兒〕身住神仙白玉京。塵不到。斷逢迎。〔貼〕煉師殿上有位夫人。說姓趙。是煉師的舊相識。〔小旦〕一定是趙家姐姐了。道有請。舊知交相叩。開花徑。〔見介合〕相看掩面。休說眼還青。〔小旦〕姐姐到此何幹。〔旦〕奴家別後。就招贅杜郎過門。今年幸叨一策。迎取奴家來的。〔小旦〕令堂好麼。〔旦悲介〕老母已棄世了。〔小旦〕可憐可憐。姐姐爲何曉得妹子在觀中。今日寵臨。〔旦〕賢妹的大名。播滿京城。怎麼不曉得。賢妹。奴家思量當日呵。

〔二郎神〕承垂憫。做冒漢衣冠紀信。解我重圍心自領。今日夫榮婦貴。分毫總

賴擔承〔小旦〕姐姐。這也不消說起了。〔旦〕聞你身在雲房。心暗省得全名不勝欣幸。
〔笑介〕還有一件。締新盟。特爲你打合雙星。〔小旦〕打合雙星。這話怎解。〔旦〕我特與你做媒。你嫁了一個官人罷。〔小旦〕妹子旣已出家。這話休提了。

〔啼鶯序〕出家已絕塵世情。喜形影淒清。伴花前一卷殘經。夜來獨對孤燈。玉壺中清思映徹。火宅裏熱心灰冷。〔旦〕只怕未必。〔小旦〕枉垂矜。凌霄野鶴。端不羨和鳴。〔旦〕賢妹。不是我做姐姐的來唐突你。〔出鸞鏡介〕只因我見了這鸞鏡。特來與賢妹撮合。

〔小旦〕這鸞鏡原是姐姐自家留下的。怎麼到與妹子撮合。〔旦又出釵介〕奴家留下這一枝。也在這裏。〔小旦作不語介〕

〔簇林鶯〕〔旦〕你休推故當順情。管明朝開繡屏。孤雌幸有雙鸞並。一個多情的長卿。一個能文的女媧。果然才貌相輝映。〔合〕早圓成溫家玉鏡。準備照娉婷。

〔旦〕賢妹。你在觀中成親。甚覺不便。不如今日就請小寓中罷。況且溫飛卿與我相公同寓。豈不兩便。〔小旦〕綠翹。你隨我去。〔貼應介〕

明日凝妝整翠鈿。

今朝先過艸堂前。

〔小旦〕姐姐。你當初抵死不從豪門之聘。今日得夫榮妻貴。這是

得成比目何辭死。

〔旦〕賢妹。你出家入道。如今嫁了溫飛卿。這是

願作鴛鴦不羨仙。

〔貼〕好。正是的對。就此請行。

第二十七齣 圓成

〔淨扮掌禮人上〕屏開金孔雀。褥隱繡芙蓉。自家掌禮人便是。今日溫老爺與魚玄機成親。奉杜爺呼喚。只得在此伺候。〔生日冠帶上〕

〔于飛樂〕掃華堂供帳具。今日裏幸逢佳麗。〔生〕夫人。今日溫飛卿與魚家妹子成親。分付安排筵宴。可曾完備麼。〔旦〕完備多時了。〔生〕這等喚掌禮人。〔淨見介生〕良時已至。快請新人。〔淨念介〕新郎莫要笑。新人請出轎。今日來拜親。前晚看打醮。〔生〕不要胡說。〔淨照常念介〕小生

小旦冠帶上

〔稱人心〕笙歌促沸。對面難堪嬌帶。〔同拜介小生小旦送酒介〕

〔梁州序〕花攀紅杏。身依青桂。天遣姮娥作配。洛陽春好。名園徧覺芳菲。若論名傾南國。貌壓東家。絕豔真無比。那堪才思也謝娘齊。何幸高枝得並棲。〔合〕佳景至。良緣會。暮春天分外鶯花媚。須暢飲十分醉。〔外冠帶雜隨上〕

〔前腔〕趁天街儘放香蹄。過花谿遙聞清吹。下官賈島。聞溫飛卿成親。特來賀喜。〔雜報

介旦小旦貼下見介外〕適聞君新娶。特來賀喜。怎麼夫人們見了小弟。都避了進去。〔生〕

想是年兄做過和尚。怕你眼毒。〔外笑介〕若論溫年嫂從道姑出身。正該同席。好畫做三教一圖

了。〔生〕說得妙。快請二位夫人出來。〔旦小旦見介外〕真個神如秋水。態比春雲。雅帶神

仙氣。〔向小生低介〕溫郎雖不俗。還也落便宜。須傍柔鄉深處棲。〔合〕佳景至。良緣

會。暮春天分外鶯花媚。須暢飲十分醉。

〔節節高〕升沈會有時。枉心癡。文章聲價俱高貴。今何夕。是吉期。稱良會。儘將

女俠標奇異。憑教打入英豪隊。更對斜暉進餘觴。人人莫負昇平世。
〔尾聲〕榭園性格耽遊戲。把兩個佳人扯作一堆。妝點新詞自解頤。

鸞鏡記終

王

合

目錄

第一齣 標目

第二齣 贈處

第三齣 懷春

第四齣 宸遊

第五齣 邂逅

第六齣 緣合

第七齣 參成

第八齣 除戎

第九齣 詞約

第十齣 懷仙

第十一齣 義姤

第十二齣 譯賓

第十三齣 驛負

第十四齣 逆萌

第十五齣 逢世

第十六齣 拒問

第十七齣 言祖

第十八齣 悟真

第十九齣 發難

第二十齣 焚修

第二十一齣 航海

第二十二齣 西幸

第二十三齣 祝髮

第二十四齣 兵變

第二十五齣 逃禪

第二十六齣 入道

第二十七齣 通訊

第二十八齣 感舊

第二十九齣 嗣音

第三十齣 奏凱

第三十一齣 砥節

第三十二齣 卜居

第三十三齣 閨晤

第三十四齣 道造

第三十五齣 投合

第三十六齣 出山

第三十七齣 還玉

第三十八齣 謝讐

第三十九齣 聞上

第四十齣 賜完

玉合記

明 梅鼎祚 箸

第一齣 標目

〔玉樓春〕〔末上〕畫堂春色濃於酒。花插盈頭盃到手。百年三萬六千場。人世難逢開口笑。青天高朗閒搔首。眼底英雄誰更有。試歌垂柳覓章臺。昔日青
青今在否。

〔滿庭芳〕才子韓翃。名姬柳氏。多情打得成雙。參軍出塞。鞞鼓起漁陽。暫向禪林寄跡。遭番將強逼專房。還朝後。香車綺陌。邂逅各沾裳。雄威看許俊。立時飛馬。奪取孤凰。把當年玉合。再整新裝。爲問王孫侍女。重相會下界仙鄉。章臺詠風流節俠。千古播詞場。

李王孫仙遊濁世。

許中丞義合良緣。

柳夫人章臺名擅。

韓君平禁苑詩傳。

第二齣 贈處

〔遶池遊〕〔生韓君平唐巾服上〕雲和日燦。着眼春濃淡。展青旛玉田初暖。嬌鳥華林。雜英芳甸。儘行吟風流少年。〔韓詩〕時輩已爭先。書敎守太玄。絳紗儒客帳。丹訣羽人篇。魏闕心猶戀。周才道豈捐。一丘自無逸。三府會招賢。小生姓韓。名翹。字君平。本貫鄧州沔陽人也。築戟門牆。何止朱輪千乘。詩書戶牖。真看縹帙千函。自家穆穆天成。軒軒霞舉。幼叨文筆。挾二酉之珍藏。長學陰符。占六庚之害氣。一向來風花寄勝。婚宦無心。卽今天寶十載。正陸機入洛之年。應賈誼對廷之薦。暫違鄉國。留寓帝京。季布名高。楚人重百金之諾。君卿舌在。漢世食五侯之鯖。這長安城中。有個李王孫。散財結客。置驛邀賓。與小生契合雲霞。遊同山澤。屢遷幸舍。不勞彈鋏馮驩。信美他鄉。頗似登樓王粲。只他卻不肯道出名來。也曾聞希知則貴。多管是有托而逃。目下二月中旬。春和景麗。殘梅灑雪。細柳餐風。好約李王孫攜他家樂。郊外一遊。正是紅箋色奪風流座。白紵詞傾翰墨場。道猶未了。王孫早到。〔小生李王孫上〕

〔前腔〕年光曾換。草色青袍亂。問春在幾家庭院。〔生接合介〕遊鑣早辦。好趁韶

華半。願歲歲花前相見。〔見禮介生〕年光遍原隰。〔小生〕春色滿江洲。〔生〕飛軒結良驪。〔小生〕寶劍擁輕裘。韓兄。花朝在邇。緹琯漸和。願整遊驂。一開吟興。〔生〕小生正有此心。至期敬當如約。李兄。君才如干將。鎡。陸則破駟。水則殲蛟。能忘一割之司。久作雙函之祕。

〔黃鶯兒〕三尺字龍泉。影含星。氣燭天。芙蓉溢水精光變。這時節。那貴妃專寵。祿山擅兵。眼見得天下將亂也。妖狐在前。長蛇在邊。五都名價。君當獻。〔合〕問蒼天。學成文武。遇主是何年。〔小生〕韓兄。你雄譚非馬。禪世雕龍。以君之才。有如圭璧。須薦明堂清廟。可終懷寶迷邦。

〔前腔〕雙壁產荆山。望如虹。氣吐烟。悠悠抱璞空流怨。你看朝廷之上呵。璠璣在軒。瓊琚在懸。連城重價。君當獻。〔合前丑牽馬上〕駿馬繡障泥。紅塵撲四蹄。歸時何太晚。日照杏花西。啓郎君。馬在此了。〔小生〕韓兄。小生不惜千金。市得此馬。你試一賞者。〔生〕是好馬。那竹批雙耳。鏡夾方瞳。滅沒權奇。追風躡影。小生雖乏鴻章。敢揚駿騎。〔小生〕願聞。〔生讀詩介〕鴛鴦赭白齒新齊。晚日花□□碧蹄。玉勒乍回初噴沫。金鞭欲下不成嘶。〔小生〕佳作佳作。馬媿龍媒。詩稱

鳳采。就捐匹練。代報雙珠。〔生〕自非千里之材。何當太一之況。多謝了。小生今有此馬呵。

〔琥珀貓兒墜〕驕嘶噴沫。玉勒控金鞵。處處春風醉管絃。章臺晚出半籠鞭。

〔合〕翩翩向綺陌香塵。拾取遺鈿。〔小生〕韓兄。你如馬斯良。與龍爲友。但願早窺金馬。入侍銅龍。

〔前腔〕鴛鴦赭白。紫豔鏡雙懸。大宛龍駒汗血傳。贈君快着祖生鞭。〔合〕翩翩管萬里橫行。所向無前。蒼頭把這馬送到韓相公廐中去。〔丑應介〕車馬原堪共。金蘭久定交。

〔牽馬下淨外衆執樂器上〕

〔六么令〕帝城春暖。看千紅萬紫爭妍。傳聲御駕幸名園。排鹵簿。設宮懸。〔合〕

太平時節天家宴。〔生小生〕你們那裏去的。〔衆〕我們是御前供奉人。皇帝爺與貴妃娘娘要往

樂遊園賞春。如今去教坊司點名哩。〔生小生〕原來如此。〔衆〕相公方便。我們去也。太平時節

天家宴。〔下丑末衆執樂器上〕

〔前腔〕天街遊衍。看千門萬戶爭先。來朝相國出秦川。鳴鼓吹。鬧喧闐。〔合〕太

平時節侯家宴。〔生小生〕你們那裏去的。〔衆〕我們是楊相國家樂人。相國爺與諸姨們要遊秦川。如今去府中點名哩。〔生小生〕卻又如此。〔衆〕相公自在。小人們別了。太平時節侯家宴。
〔下小生〕往年天子行幸。賜長安士民大酺三日。我們雖不得侍駕。也去遊翫一番。〔生〕便是。

蓬萊闕下是天家。

上路新回白鼻騮。

急管畫催平樂酒。

春衣夜宿杜陵花。

第二齣 懷春

〔祝英臺近〕〔旦柳氏上〕柳籠烟。花蘸雨。春色已如許。〔貼輕蛾持妝盒上〕繡戶羅幃。

採取起還未。〔旦〕我待嬌倩人扶。懶嗔人喚。〔合〕是何處流鶯雙語。〔臨江仙〕〔旦〕

幽閨欲曙聞鶯囀。紅窗日影微明。好風頻謝落花聲。〔貼〕隔幃殘燭。猶照綺屏箏。〔旦〕繡被錦裯眠

玉煖。炷香斜裊煙輕。淡蛾羞斂不勝情。〔貼〕暗思閒夢。何處逐雲行。〔旦〕奴家柳氏。長安人也。從小

養育在李生家。李生他本籍天潢。藏身地肺。交遊任俠。聲色自汙。奴家生來二八。方且待年。長在綺

羅。儘堪永日。輕蛾我女侍數人。只有你粗通文義。頗識人情。卻也那曉我心事來。〔貼〕姐姐。你朝雲

含笑。春旭揚輝。繞梁雅足清歌。長袖由來善舞。標梅將及。奪花隊之金篋。芳草堪憐。拾蘅皋之翠羽。有甚麼心事來。〔旦〕我性厭繁華。情耽藻翰。合歡裁扇。班婕妤好彤管齊名。素手縫裳。薛夜來神針可數。況且我郎君暫稱豪俊。每托仙遊。詠天桃雖則有時。歎匏瓜終當無匹。這些時日暖風恬。花明柳媚。好惱人的春色也。〔貼〕姐姐。曙色初高。曉妝久待。雙鸞鏡。九鳳釵。寫頰胭脂。拂眉螺黛。已都在此了。我看你星眸半掩。笑靨慵開。還像是春夢未醒哩。

〔綿搭絮〕〔旦〕夢魂無賴。山枕印紅腮。〔對鏡介〕顧影徘徊。片玉寒生玉鏡臺。

〔貼〕姐姐。拭纖埃。粉膩輕揩。則見你鬢雲光繞。怕溜金釵。〔旦〕待我把眉來重描一描。〔貼〕便做道翠黛重描。那兩道春愁掃不開。〔旦〕我有甚春愁掃不開。〔貼〕姐姐治妝已畢。那杏子衫。茱萸帶。凌波羅襪。鏤麝金裙。已都在此了。可試穿一穿。

〔前腔〕冰紈舒彩。巧趁身裁。畫約香煤。拂袖花穠。誤蝶來。〔旦〕我且下階行行。看可好麼。步搖階。淺印蒼苔。則見那一鈎羅襪。半露弓鞋。〔貼〕姐姐。你帶圍寬了些。〔旦〕便做道錦帶圍寬。我半點春心鎖不開。〔貼〕你半點春愁鎖不開。〔旦〕輕蛾。那畫闌

干外簇簇搖搖的。甚麼東西。〔貼〕這是雲影和那花陰。

〔前腔〕〔旦〕花陰雲靄。翠影斜篩。眼慢驚回。幾度風搖卻暗猜。〔貼〕這豆蔻花就是

我姐姐。嫩紅催豆蔻含胎。我近來絃管都生疎了。爲甚的滿牀絲竹。月冷烟埋。〔旦〕消受那一種閒情。把門掩梨花晝不開。〔貼開門介〕你門掩梨花且半開。姐姐。這兩日不到門前。那銀塘上草都青了。且隨你步幾步去。

〔前腔〕王孫空待。草遍天涯。紫陌青臺。風暖銀塘綠縹迴。〔旦整髻倚貼貼扶介〕髻兒歪。忽地相挨。這的是晝長人靜。不奈幽懷。〔貼〕姐姐。幾時得玉管偷香。把孔雀金屏選日開。〔旦〕我便是李家人了。那望金屏選日開。天色薄暮。且與你回繡閣去者。

細樹含殘影。

深閨散晚香。

羞令白日暮。

車馬鬱相望。

第四齣 宸遊

〔集唐〕〔末高內侍上〕天子春遊動地來。黃金瑞榜絳河隈。微臣昔忝方明御。長命先添獻壽杯。自

家唐朝內使高力士的便是。本馮盎之曾孫。冒延福之養子。幼經給事。今上皇帝。佐平中難。啓屬內坊。累功做到右監門衛將軍。只今畫袴懸魚。朱扉施馬。殿頭供奉。名掛著紫微垣中。班首傳宣。位列黃門郎上。說起今上。是神堯皇帝五代玄孫。踐祚三十餘載。朔更天寶。諱曰隆基。武戢聖功。一怒風霆迅掃。文成睿藻。片言雲漢。昭回試看。萬國咸賓。平堯柳。通舜梧。梯山航海。若問四靈畢至。獻玉環。出銀甕。援契應圖。況兼那天縱多能。李三郎風流得數。合配這春生百媚。楊太真秀色可餐。他果然降自瑤臺。卻好的貯來金屋。神光離合。燦燦爛爛。乍陰乍陽的五采並馳。骨法穠纖。閃閃爍爍。似遠似近的萬方希見。怎顯得名花傾國。沉香亭北。一枝芍藥露華濃。曾說個宿酒凝妝。寶鏡臺前。竝蒂海棠春睡足。播羯鼓。撥琵琶。調絃弄管。靡靡新聲。又何減神童撫瑟。皇娥讌戲窮桑。鬪百草。盤五木。蹴踘彈碁。纖纖曲伎。卻一似天帝投壺。玉女警嘯閃電。更有那馬仙期。李龜年。張野狐。賀懷智。宜春苑。嘈嘈雜雜。雍雍肅肅。奏九成威鳳來儀。千尺竿。半仙戲。啣盃馬。距芥雞。長秋宮。亭亭裊裊。玲玲瓏瓏。呈百戲。遊龍角觥。有時節六蹕巡遊。步輦飛輪。天迴地轉。聽歷歷碌碌。空中拋下阿香車。近日來五家分隊。明妝袞服。雲簇霞鮮。看的的霧霧。河邊織出天孫錦。紅塵奔一騎。六宮爭笑。無人知道。

荔枝。清夜發明馳。千里兼程。有使私遺瑞腦。雲開霽宴。願陛下永固南山。億萬歲遙承露掌。雷占豫樂。祈海內常依北斗。三千界盡上春臺。今日花朝之日。聖上同着貴妃娘娘。娘有幸曲江。聞得楊國舅和那虢國夫人們也去遊賞。敢或者中道相逢。又不知幾多恩澤。正是男不封侯女作妃。君看女卻是門楣。幸願一生同草樹。年年歲歲樂于斯。道猶未了。只見有兩個宮娥笑嘻嘻走將來。卻是怎的。

〔淨丑宮女上〕

〔字字雙〕〔淨〕調脂弄粉學宮妝。〔丑〕嬌養。〔淨〕掃地金蓮尺八長。〔丑〕加兩。〔淨〕尋來個內監摸空湯。〔丑〕不長。〔淨〕好風揭起繡裙香。〔丑〕白鴛。〔末收介〕此時對雪遙相憶。這不是白想。〔淨〕你想起我們來。我們也多想你幾想。我就要一個紅想。〔末〕夢爲蝴蝶也尋花。這不是紅想。〔丑〕我要一個黑想。〔末〕月隱青林人未歸。這不是黑想。〔丑〕我要一個黃想。〔末〕叢菊兩開他日泪。這不是黃想。〔丑〕我要一個綠想。〔末〕不堪芳草思王孫。這不是綠想。〔丑〕我要一個青想。〔末〕柳色如今深未深。這不是青想。〔丑〕我要一個紫想。〔末〕遍插茱萸少一人。這不是紫想。〔淨〕我曾伏事娘娘誦佛經。記得兩句。就要一個非想。〔末〕庭花含笑似無情。這不是非

想〔淨〕我要一個非非想。〔末〕半是思郎半恨郎。這不是非非想。〔淨〕我要一個非非非想。〔末〕野
人心地都無著。這不是非非非想。〔丑〕我要一個非非非非想。〔末〕諱不過三。〔淨〕着手畢竟喫我
們想倒了。〔末〕宮娥。御駕今日遊春。此時貴妃娘娘象還未動身。你道聖上如何卻這般寵他。〔淨〕
高公公。怪他不得。去年重陽。我隨去繡嶺宮登高。娘娘醉了。我也就戴他在頭上哩。〔末〕調謊。娘娘
若醉了。好少人扶。你怎麼戴在頭上得。〔丑〕聽他扯淡。他折得一枝醉楊妃菊花。戴在頭上。說是娘
娘一般。〔末〕這算不得。美人半醉朱顏酡。〔丑〕我前幾日春色困人。略與娘娘睡一睡。委的是好。
〔末〕一發胡柴。娘娘如何與你睡。〔淨〕他賴風月。前日在御几上偷得本郭舍人壺譜。投了個楊妃
春睡。就說是娘娘一般。〔末〕只好道當時求夢不會眠。呀。隱隱的聞得蹕聲。想是聖駕來了。我在此
伺候。你們且速避去。〔淨丑下小生明皇小黃門引上〕

〔女冠子〕金宮玉沼。祥雲麗日初韶。絳闕神霄。黃圖光運。紫霞觴裏。昇平新調。
〔小旦貴妃宮女引上〕稀聞清漏報。帶人錦帳留春。轆轤傳曉。〔末引衆跪介〕試宸
遊趁早。莫待南陌鶯殘。上林花老。〔行禮介〕〔小重山〕〔小生〕春入神京萬木芳。禁林鶯語

滑蝶飛忙。〔小旦〕曉桃凝露妬啼妝。紅日永。風和百花香。〔末〕烟鎖柳絲長。御溝澄碧水。轉池塘。時微雨洗風光。〔合〕天衢遠。到處引笙簧。〔小生〕妃子。朕與卿玉瑄方調。金環有序。臣民歡忭。夷夏宴安。遇此月夕花晨。正好天行雲從。〔小旦〕臣妾職在當熊。容非落雁。金符寶冊。多慚象月稱尊。霓裳羽衣。略配歸風送遠。願同牛女。永莫參商。〔末進花介〕百花院採得千葉緋桃進獻。〔小生〕妃子。此花既可消恨。又足助嬌。何止萱草忘憂。鉢羅善笑。朕與你親戴者。〔簪花介末〕奴婢奏上。早已傳旨。鑾駕司列仗。光祿寺排筵。金吾衛清道。宜春苑演樂。俱各齊備。〔小生〕啓駕前行。〔行介衆合〕

〔好事近〕縹緲五雲高。萬點龍鱗飛耀。〔內呼萬歲介小生〕金吾官。不得驚動都人。由他

瞻仰。〔衆應介〕翠華臨幸。都人共瞻天表。攀花踐草。輾宮車。處處雷霆繞。〔小生〕

高力士傳旨。到曲江南苑去。〔末〕領旨。〔傳介〕御離宮漢寢椒塗。開別院曲江蓬島。〔衆下淨楊國忠旦貼魏國秦國夫人衆引上合〕

〔前腔〕神皋麗色破花朝。儘遊處綺薄珠叢春早。〔淨〕奴客們俺們五家。每家一隊。不要混雜。〔應介〕籠絲串轡。都來五家爭巧。風流隊裏簇歌塵。暗雜衣香裊。〔淨〕

那一片綠的是何處。〔衆〕是秦川。望函關紫氣經天。對秦川綠波縈繞。〔下小生小旦衆上〕

〔千秋歲〕護妖韶。匝路春先到。一片片紅凝青了。鳳吹鸞輿。鳳吹鸞輿。隱約那半面芙蓉花貌。霓裳奏。雲光耀。海棠醉香魂輕俏。並輦招搖。好似鴛鴦碧沼。翡翠蘭苕。〔下淨旦貼衆上〕

〔前腔〕索春饒。看掩映長楊道。急穰穰來去多少。百寶闌前。百寶闌前。爭窺翠鬪紅渠光照。花心動。黃蜂鬧。草色引青驄頻躍。綺宴醒猶惱。更紛綸象筋縷。切鑿刀。〔下小生小旦衆引左行上貼右行上淨旦合〕

〔越恁好〕綺羅深處。綺羅深處。約翩翩拂袖招。一羣兒鬧咳齊打哄。嬌還小。忽錚錚射毛。忽錚錚射毛。聽嗶崩崩琵琶兒撥着紫槽。吉支支笛兒骨瑟瑟羯鼓兒間着玉簫。淩波曲。得寶詞。譜入梨園了。遇良辰美景。趁取年少。〔衆遇介小生〕

高力士。何處喧嚷。〔末〕是楊丞相大姨八姨們遊春到此。朝見聖駕。〔見介淨〕臣楊國忠見。〔旦貼〕

臣妾號國秦國見〔小生〕卿等少禮。今日之遊樂乎。〔淨旦貼〕陛下恩波。俯及臣等。樂事仰同。〔小生〕今春乍雨乍晴。不寒不暖。真好天氣也。〔淨旦貼〕陛下玄德格天。聖母徽儀應地。自當雨師效駕。風伯掃塵。〔小生〕高力士。可命梨園子弟。與謝阿蠻王大娘輩。各隨本技。一路承應前去。〔末應傳介合〕

〔前腔〕醞寒仍勒暖。醞寒仍勒暖。漸融融雨點消。柘枝兒研光花作帽。繡纏腰。顛巍巍錦標。顛巍巍錦標。見翠亭亭戴竿兒。挺着細腰。皎團團月兒豔。騰騰火蛾兒簇着絳綃。遺朱履。墮翠翹。御道烟花繞。近天顏有喜。莫惜歡笑。〔末〕日御暫停。夜筵已啓。請聖駕回宮。〔淨旦貼〕臣等趨送。〔合〕

〔紅繡鞋〕羨太平天子風騷。風騷。看大家極樂逍遙。逍遙。逐鳥栖。詠魚藻。珠斗直。卿雲飄。斟聖酒。進仙韶。〔淨旦貼〕臣等告退。年光陌上發。香輦禁中遊。〔下小生小旦衆合〕

〔前腔〕握雨攜雲妖嬈。妖嬈。青繒綵燾飄蕭。飄蕭。縷鯨飛。影蛾照。金波麗。燿火燒。歸月殿。駕虹橋。

〔尾聲〕蓮壺漏促星榆耀。願萬歲千秋玉燭調。屏缸膩曉。只恐春寒花睡了。

秦地山川似鏡中。

紫雲香駕御微風。

古來徒羨橫汾賞。

今日宸遊聖藻雄。

第五齣 邂逅

〔薄倖〕〔旦上〕薄曙妝凝。生烟夢杳。對玲瓏玉樹。瑣牕縈照。問春何似。又添多少。〔貼上〕春多少。試看你修蛾慢臉。更一搦腰肢漸小。〔河滿子前〕〔旦〕無語殘妝淡。

薄。含羞鞞袂輕盈。〔貼〕幾度香闌眠過曉。綺窗疎日微明。〔旦〕雲母帳中偷惜。冰晶枕上初驚。輕蛾。

我曾許法靈寺繡幡一掛。前幾日繡得大半。沒情沒緒。又丟下了。今早紅樓妝罷。好不清閒。乘此春和。須要釐完前件。你再注些香。去烹茶來。〔貼〕姐姐。牙尺剪刀。金針綵線。俱安在閣子上。沈水香也。注在博山鑪了。我自去烹茶來了。焚香修正果。汲水煮新茶。〔下旦繡幡介〕

〔香遍滿〕紅樓春曉。金針綵線閒自挑。一縷心香還細裊。繞身珠珞搖。垂頭寶蓋飄。奴家如此虔心。或有顯應。也不見得。偷然現白毫。仗諸品圓明照。〔貼持茶上〕螺甲烟

猶篆。龍團月有痕。姐姐。茶在此。你旛繡完了。掛起來看。〔掛幡介〕呀。你看星粲色絲錦麝。月圓法相華鬘。一任劫灰難燼。管他佛日常瞻。是好一掛旛也。〔旦〕輕蛾。後日是黃道吉日。你可去法靈寺尋悟空老師。辦些香水。掛在佛前。〔貼〕曉得。〔旦〕我前日教你的曲兒。可記得麼。〔貼〕這幾時姐姐不去理會。輕蛾也失記了。〔旦〕繡倦無聊。試再教你一番。〔貼合介〕

〔北〕一犯江兒水。歌喉清俏。聽百轉歌喉清俏。似啼鶯風外曉。要脣朱不動。黛綠輕挑。掩桃花團扇小。白雪調須高。白雪調須高。幽蘭曲自操。聲振林皋。響入雲霄。恰正是羨驪珠一串巧。梁塵暗消。繞華堂梁塵暗消。當筵懽笑。圖得個當筵歡笑。最宜人是悠揚逸韻乍飄。〔貼〕多謝教道。姐姐。春氣餘寒。閒愁轉逼。那紅樓之外。香車寶馬。穠李落梅。都是些長安士女。與你倚闌遙望。則個。〔旦行介〕軒車映日過。〔貼〕簫管逐風來。〔旦〕若非邯鄲夢。〔貼〕便是洛陽才。

〔懶畫眉〕〔旦〕綠鬘雲散裏金翹。雙釧寒生玉粟嬌。〔貼〕待我把簾兒捲起。〔旦〕畫簾高軸望春遙。〔內馬嘶介〕姐姐。那西郊頭一個少年郎。騎着匹馬。敢打從此間過哩。〔旦望介〕

是那騎紫騮的白面郎麼。把簾兒放下來。花源怕有漁郎棹。檢點流波莫泛桃。〔生騎馬丑僕隨上〕

〔前腔〕紫騮珠勒驟四郊。綠水回通宛轉橋。〔內吹簫介〕玉人何處教吹簫。這是章臺之下。適方那樓上的人兒。想在此了。〔下馬介〕你且控馬回去。我隨後步來。〔丑〕香來知驟近。汗斂覺風吹。〔牽馬下生〕門開在此待我窺看呀。有這般好樓閣哩。雕闌十二春寒峭。〔貼〕姐姐那碧桃花開得爛熳也。〔笑介生〕一笑東風放碧桃。〔貼〕門外爲何犬吠。我去看來。

〔前腔〕金鈴小犬吠啾啾。莫不是風送花陰隔院搖。是誰郎君輒敢到此。兒家樓閣倚重霄。〔生〕便是瑤池蓬島也。須有路。〔貼〕誰引你來。縱瑤池有路無青鳥。〔生〕小娘子就是王母使者了。〔貼〕吓。你錯認三偷阿母桃。〔生〕小娘子。豈不聞青青子衿。悠悠我心。〔貼〕我又不是鄭康成家婢。誰與你調今弄古。〔生〕小生尋春郊外。迷路到此。願借瓊漿。以慰消渴。〔貼〕且不要忙。我去問姐姐。肯時擎一甌與你姐姐。門外便是那騎馬的少年郎在此。你嫁得這般一個。也勾了。〔旦〕這丫頭是甚說話來。〔貼〕你常則如此說。難將無限意。虛度可憐宵。

〔前腔〕〔旦〕可憐人度可憐宵。柔暈香魂付寂寥。冰心那肯逐春消。〔貼〕他道是青青子衿。悠悠我心。〔旦〕他可知道豈不夙夜。謂行多露。夜行多露愁霑草。〔貼〕茶借他一盃也無妨。〔旦〕你與他甚往來。難道是瓊瑤報木桃。〔貼對生〕快去快去。偏你會說詩。我姐姐道。豈不夙夜。謂行多露。夜行多露愁霑草。〔生〕借茶何如。〔貼〕也說了。你與他有甚往來。難道瓊瑤報木桃。姐姐。我們掩上門自去也。〔旦〕日暮且歸去。江城未可邀。〔貼旦下生弔場〕

〔朝天子〕日暮江城未可邀。笑倚東窗下。眼色嬌。就中間處暗相招。繫心苗。誰禁曉夜魂搖。逐驚花亂飄。逐驚花亂飄。這是我鄰近人家。到不知有這般絕色。好生驚魂

動魄也。

倡樓對三道。

吹臺臨九重。

誰能暫留客。

解珮一相從。

第六齣 緣合

〔誦子令〕〔淨尼姑上〕身如楊柳面如花。削髮披緇學出家。道是佛胎容易結。年

年生個小呱呱。南無阿彌陀佛。師弟來了。〔丑上〕方便人開方便門。菩提枯樹就盤根。雪山見火應須化。水底燈明也要昏。〔淨收介〕好一個十方普照。〔丑〕討便宜。我纔尋得一個孤老。你就要十方普照。〔淨〕那水底燈也是昏的。〔丑〕師兄稽首。〔淨〕師弟到來。我們一向在此。不會說出各人行徑。今日試說一說。小尼喚做法雲。糊塗投入空門。不曉參禪面壁。可知說呢。看經。沙彌原稱眷屬。行者就是魔君。弄得出生入死。那管倒褲翻裙。說甚五禪五蘊。只做不見不聞。涅槃去見閻老。下階接禮殷勤。〔丑〕他爲甚的殷勤你。〔淨〕道我救苦救難。靈山會上觀音。〔丑〕怪道你身邊常有個善才童子哩。待我來說。小妮喚名慧月。生來有些劣撇。替人指點迷方。自己積成冤孽。遇酒餓虎投巖。好色蒼蠅見血。前門婆子收生。後戶情人作別。撮合幼男少女。就中吹個木屑。死去若見閻君。真道不生不滅。〔淨〕卻怎的來。〔丑〕十八地獄何方。准准送君拔舌。〔淨〕這個是口業報了。師弟。我這法靈寺是先朝長孫娘娘蓋造的。香火最盛。如今春明景和。多有那燒香士女。隨喜官員。都要來此。師父下山去了。且與你打掃殿堂。開門伺候則個。〔貼上〕

〔出隊子〕皇都佳麗。皇都佳麗。十里香風紫陌吹。靡蕪水暖泛銅池。榆莢春殘

疊繡闌。何處鐘聲遙出翠微。僧臘階前樹。禪心江上山。疎簾看雪捲。深戶映花關。迤邐行來。此間已是法靈寺。只聽得鳴鐘擊鼓。想禪師們都在殿上了。不免逕入。〔見介〕列位師父萬福。〔淨丑〕呀。柳娘子家輕蛾姐。爲何到此。〔貼〕我姐姐向日許下佛前繡幡一掛。今日特還前願。命我來此拜上老師父。酌水焚香。通個意旨。〔淨〕家師不在荒山。我們就此行事。〔動法器介合〕

〔誦子令〕巍巍妙品紫蓮臺。法鼓金鐃動地雷。四萬八千降伏盡。玉毫光裏見如來。輕蛾姐拈香待我宣疏。〔跪讀介〕竊以金仙出世。啓震旦于東方。寶律披文。衍恆河于西界。仰憑法力。締結良緣。南瞻部洲大唐國長安李門柳氏。向許本寺世尊座下繡幡一掛。今遣侍女輕蛾。特資信香。拜還前件。伏願韋馱尊者主盟。忍辱仙人普化。過去未來兼見在。明證三生。多福多壽。以多男消除百難。又願輕蛾就爲廝養婦。也借鸞鳳之歡。若近主人翁。常踏鷺鷥之步。〔貼〕佛前休得取笑。〔丑〕好好。幡掛起了。順星轉燈。〔貼同轉介合〕

〔前腔〕金燈照徹寶花開。日主星君順序排。願得法身常不壞。楊枝甘露灑千災。

〔前腔〕四天神女獻花來。八部龍王大會齋。小姐今年還促對。輕蛾明歲定懷胎。〔貼〕經上那裏說懷胎。〔丑〕我念的是胎骨經。禮佛已畢。師兄。你去收拾。我陪輕蛾姐閣上廊下行。〔淨下貼丑行介〕

〔孝南歌〕龍池遠。鷺嶺巍。鳴鐘罷齋停午時。〔丑〕這是潮音閣。〔貼〕梵語出林稀。潮音向空起。〔丑〕這是諸位禪院。那是迴廊。〔貼〕暫來隨喜。諸院逶迤猶傍迴廊倚。幾曲雲連。一片如秋水。呀。你看花影移。日影遲。鳥亂啼。歸路恐成迷。〔丑〕山門下又有人來也。

〔前腔〕〔生上〕生衣試步履遲。禪林借棲雙樹枝。看那洋圖直上。朱戶半開。已到法靈寺了。寶鐸聽風吹。珠扉破雲啓。〔貼驚避介生〕乍逢高髻。一道行光初見驚還避。半面低回。似惱還如喜。我那裏會見他。好似紅樓下那女子一般。是也非。且住。天下少甚斷像的。信也疑。〔貼背介〕這郎君像會見來。〔生〕他也費尋思。俊人兒像是誰。〔見介〕小娘子拜揖。〔貼〕相公。萬福。〔丑〕韓相公。荒山慕緣。疏頭要請大筆。古人道。不看僧面看佛面。就是你

家孔聖人也重我們。〔生〕怎見得。〔丑〕你不見孔聖人叫做仲尼。〔生〕使不得呵佛罵祖。〔丑〕師兄取茶。再不見來。我催一催去。你們坐坐。枕簟入林僻。茶瓜留客遲。〔下生〕小娘子。記得小生那里相遇來。莫是採桑城南。曾遣使君之吏。或者挹流阿谷。嘗抽孔子之琴。〔貼〕賤妾名在下陳。職參中饋。將命言雖出闢。送客足不過門。今偶相逢。原無半面。〔生〕數日前尋春郊外。章臺之下。紅樓之上。曾遇小娘子來。

〔醉羅歌〕當日當日曾逢你。今日今日我爲誰。〔貼〕你會到章臺。便說此間從何處去。〔生〕何勞夾轂問華居。柳市南頭去。小生那日借一杯茶。兀自不肯。就把門兒鎖上了。忒下得瓊漿無分。藍橋轉迷。葳蕤暗鎖。簾旌半垂。惺惺那惜惺惺的。小娘子何事來此。〔貼〕爲掛幡而來。〔生〕小生代小娘子佛前祈禱。〔拜佛介〕慈雲庇。佛日輝。佛囉。保佑小娘子早招風流俊雅似韓君平的個郎君。願他做蓮花會上並頭枝。宅上小姐無恙麼。〔貼〕承問何爲。〔生〕小生居止頗與章臺相近。雖非西第之賓。實慕東家之子。〔貼〕相公差了念頭。只似想做春夢也。

〔前腔〕夢遠夢遠春迢遞。眼飽眼飽肚中饑。我姐姐呵。清冰徹底不霑泥。莫認東鄰女。〔生〕小生馬上遙望。尙未分明。像也不見何如。〔貼〕你唐突西子了。纖腰束素。隨風漸欹。雙眉寫翠。和烟漸舒。〔生〕果然這般好。敢是未成人哩。〔貼〕章臺弱柳三眠未。妾身也與相公佛前祈禱。〔拜佛介〕慈雲庇。佛日輝。保佑這位相公急收妄想。早建功名。願他早攀仙桂最高枝。〔生〕扳話良久。到不會動問小娘子誰家宅眷。〔貼〕妾是萬歲街李王孫家女郎。

〔生〕呀原來是我好友家。失敬了。〔貼〕適間長老叫韓相公。敢是與我郎君相契的韓君平麼。〔生〕就是小生。〔貼〕郎君常道相公才貌來。〔生〕多承獎借。那紅樓上小姐是誰。〔貼〕便是李王孫柳姬。因他性好幽閒。別居在此。〔生〕是人傳的那章臺柳麼。〔貼〕正是。〔生〕如此小生枉勞心了。

〔好姐姐〕羅敷知他有夫。不着緊目成心許。雖多夢見。此生應見稀。春何處。從今打疊香魂死。飛絮遊絲無定時。小姐年也在時了。李郎怎生只放閒他。〔貼〕相公又來勞神。他好事也只在這早晚了。

〔前腔〕亭亭十二有餘。這早晚破瓜將及。野鴛休學。難教彩鳳隨。春何處。聲聲

杜宇催歸去。流水桃花又一時。〔淨上〕竹徑通幽處。禪房花木深。你們在此話長哩。〔生〕長老。小生有一個小玉合。原是族中韓林相國家的。欲托令師換數百文錢。以爲杖頭之費。〔淨接介〕好玉合。輕娥姐。你看氣吐白虹。文雕彩鳳。雖然徑寸。便是連城。〔貼〕我姐姐妝奩中王導金篋都已有了。正少個玉合兒。〔生〕便奉小姐。聊充膏沐。〔貼〕自當奉價。

〔尾聲〕〔生〕這是藍田白璧無瑕器。〔貼〕你莫猜做雲英玉杵。〔生〕小娘子好多心。我只換三百青錢佐酒貲。小娘子告別了。長老拜上令師。改日相訪。〔淨〕多慢多慢。

細蕊穠花滿目斑。

忽聞春盡強登山。

因過竹院逢僧話。

偷得浮生半日閒。

第七齣 參成

〔西地錦〕〔旦上〕細雨閒銷香燼。微風暗揭簾瓊。雕梁語燕驚殘夢。呢喃春恨難平。〔天仙子〕柳色披衫金鏤鳳。纖手輕拈紅豆弄。翠蛾雙臉正含情。桃花洞。瑤臺夢。一片春愁誰

與共。奴家這幾日身子不快。輕娥去法靈寺掛幡未回。我且到繡簾下候他。想是來也。〔末冠帶小

未便服引衆上。

〔翠地錦襠〕龍樓鳳閣繞秦城。一片輕烟望裏生。垂鞭殘照踏花行。韓君平家那
里去。〔衆〕柳營西去。夾路春陰十里營。〔下旦窺介〕這去訪韓君平的。〔外冠帶引衆上〕

〔前腔〕銅駝草色映空明。長樂花枝拂曙輕。同官載酒出郊行。問他們去不曾。〔衆
問介〕我們是高常侍去訪韓相公。王摩詰員外孟浩然山人去了麼。〔內應介〕有兩個過柳營去
了。〔衆〕柳下停車遙問津。〔下旦〕這又去訪韓君平的。那韓生十年作客。未有鸞棲。末路依
人。還同燕幕。所幸門如流水。猶多長者之車。筆可凌雲。定獻子虛之賦。但今日下方困泥中。想起我
李郎。珠圍翠擁。何在一姬。我雖慚司馬之琴。願舉梁鴻之案。只是此事。我卻怎生好說來。早見那飛
絮橫空。香塵撲地。好春光都則孤負也。

〔宜春令〕空中絮。陌上塵。笑春光何曾戀人。殘雲沒定。乘風日斷東牆影。吾聞
士羞自獻。女愧無媒。假饒他碧玉多情。也須要明珠爲聘。罷罷。我終是籠中物了。算分

明圍鸞檻鳳倩誰着緊。〔睡介貼上〕

〔前腔〕金屏晚。畫閣春。料他們臨風待人。姐姐晚妝未畢。怎生睡了。梨雲夢冷。闌珊翠壁窺妝影。〔旦起介〕輕蛾。你回來了。〔貼〕是回來。幃已掛完。早收拾半捻檀痕。好問取一枝梅信。〔旦〕有甚梅信問得。〔貼〕你道向日紅樓下那郎君是誰。就是東鄰的韓君平。〔旦〕早知是他。借杯茶與他也罷了。〔貼〕如今也尙未遲。〔旦〕他認得你麼。〔貼〕他一雙俊眼兒就認得。再三問姐姐起居。〔旦〕這丫頭。問我則甚。〔貼〕姐姐。還有一件東西兒。謝了我。方與你看。〔旦〕我也不要看他。〔貼〕姐姐好喬作衙。〔出玉合介〕這分明是溫家勾鳳引鸞的玉鏡。〔旦〕好個玉合兒。溫家玉鏡。是結姻的故事。你說他怎的。〔貼〕姐姐。我家李郎。雖則豪俠。你在此也不過選伎徵歌。分行逐隊。那裏是到頭的勾當。倘隨着韓君平。早討個夫榮妻貴。縱不然。郎才女貌。卻也相當。〔旦〕李郎負氣愛才。素重韓生。無所吝惜。只是我原非斥女。他也難同棄妻。如何使得。〔貼〕姐姐。事不可知。〔旦〕哎。這話也休提了。李郎說今日來看我。還不見到你。且去門前伺候。〔貼〕他來想看你溫習歌管哩。正是丈人且安坐。調絲方未央。〔下〕

〔太師引〕〔小生上〕少年場幾載曾馳騁。且藏身珠圍錦屏。前幾日邀得念奴來教柳

姬唱。他是內家人。又走去了。我待看柳姬如何。試探他明妝金屋。還按取鏤字瑤笙。

〔見介〕柳姬。你香羅半鞦春烟暝。鎮日裏粉殷脂剩。你好生妝裹。數日後要會客哩。華堂宴裙釵繡裯。多情處要殷勤翠勺銀餅。〔旦〕天氣困人。這早晚好生體倦。有的是他們

一班絃管。好省我了。〔小生〕我這番宴客。不是他們好應承的。〔旦〕是誰。〔小生〕是韓君平秀才。

〔旦〕韓君平一窮士耳。〔小生〕你怎曉得。他雖窮士。是當今一個大才子哩。近有寒食詩。都譜入御前供奉了。〔旦〕可是那春城無處不飛花的詩麼。〔小生〕便是。〔旦〕清新俊逸。庾子山鮑明遠也只如此。〔小生〕你在此數載。一向深藏。但這般人也須一見。〔旦〕豪客貴人。郎君不以妾一見。而見一窮士。真高義也。那韓秀才呵。

〔前腔〕家徒四壁如懸磬。況沒個當壚麗人。郎君所不足者非財也。況且那後房玉立。有女如雲。少甚麼黃金結客。可教他白雲窺臣。韓生所與遊多名士。必非久貧賤者。那雕輪畫轂遊豪俊。想多緣席上堪珍。〔小生背介〕這妮子到是個女英雄。自古道凌霄之姿。安能作人耳目之玩乎。我有道理。〔轉身介〕柳姬。韓君平僕馬之費。我儘贖與他。只是一件。憑他這般

才貌。必須得個麗人。只今誰有似你的。〔旦〕呀。郎君不用多疑。也終須石見水清。今日且休猜有女懷春。〔小生〕你且安心。還是去麼。〔旦〕郎君有命。妾須強行。〔小生〕如此我去。其日你到春明園來。不要送了。正是桂山留上客。蘭室命嬌妖。〔下貼上〕

〔二學士〕隔戶春催花信緊。姐姐。你聽得郎君說麼。試聽葉底流鶯。他開籠擬放凌霄翼。你出峽應輸夢雨情。〔旦〕輕蛾。你好輕信。倚玉蒹葭須分定。那辨取假共真。

〔貼〕大丈夫一言爲定。那有不真的理。只是韓郎忒貧些。〔旦〕這何足病。你且看他人地。豈有韓夫子而長貧賤者乎。

〔前腔〕北海鵬程終一奮。又何方食穀衣鶉。我只慮他兩件來。縱多情桃葉羞相接。怕薄倖青樓浪得名。〔貼〕敢或有大娘子。也不可。料他不做薄倖。倚玉蒹葭多分定。還辨取假共真。〔旦〕輕蛾。適間那玉合做甚。我不曾問你。〔貼〕這也是韓君平的。他容囊羞澀。將來托悟空師父轉賣。是我袖來與姐姐。韓君平說道。就奉姐姐。聊充膏沐。〔旦〕那有這話。你可送錢十千。爲取酒之費。〔貼〕輕蛾有計了。只做送錢與他。因便探他事體何如。〔旦〕你總來閒在此。這也使得。

何用識夫婿。

難言夫婿殊。

取婦得如此。

齊姜亦不如。

第八齣 除戒

〔番卜算〕〔外侯節度戎裝引衆軍上〕手握赤麟符。坐鎮盧龍府。桓桓上將挺雄圖。戮力酬明主。漠南春色到滹沱。邊柳青青塞馬多。萬里江山今不閉。漢家頻許郅支和。下官姓侯。

名希逸。營州人也。身長七尺。敵學萬人。陷陣登先。論功居後。以此從戎十載。只得副將平盧。一月前因那王玄志之子殞身。部下共推我爲節度。押衙許俊。義烈超羣。饒騰絕世。他道是六師無主。衆意所歸。勸我權且俯從。以安反側。我就遣他具表奏聞去了。此地東連渤海。西握長安。又聞安祿山這。斷善得虜情。將窺神器。不時竊發。須要預防。目下羽檄稍閒。狼烟暫靜。把軍士們操練一番。中軍官那有。〔小生中軍官戎裝上〕星月開天陣。山川列地營。中軍官見。〔外〕今日開操。你好去將臺上傳令中軍。操鼓擐旗。四面分營結隊。務要首尾相應。步伐整齊。違者以軍法從事。〔小生〕得令。〔照前傳介合〕

〔倒拖船〕排陣勢。按營圖。按營圖。風雲變化在須臾。只須臾。好把蛇蟠聯虎翼。
休將鷓鴣混魚麗。混魚麗。〔合〕試看驃姚新出塞。管教一鼓滅強胡。〔外〕中軍官

再傳令。務要旗幟鮮明。戈矛犀利。弓彎滿月。馬逐奔虹。違者以軍法從事。〔小生〕得令。〔傳介合〕

〔前腔〕攢畫戟。佩雕弧。佩雕弧。星流電轉耀雲衢。耀雲衢。闔外先威明號令。軍
中殺氣滿旌旗。滿旌旗。〔合前末許俊冠帶捧勅上〕

〔番卜算〕三錫剖金符。後命加茅土。盈盈又向府中趨。紫鳳啣天語。聖旨已到。跪
聽宣讀。皇帝勅攝平盧節度使侯希逸。頃者禍降平盧。變生肘腋。共戕若主。歸命于卿。爾卽暫攝本
官。撫茲狂狡。雖少嫌于專制。實有利于國家。爾奏以聞。朕心加悅。今就拜爾爲平盧節度使。兼御史
大夫。爾其益懋忠貞。作先敵愾。乃眷西顧。守在四鄰。押衙許俊。面闕之日。進階二級。別有勅行。欽哉。
毋忽。謝恩。〔外謝恩介末見介〕許俊久違麾下。恭喜主帥玉節光臨。彤弓寵錫。〔外〕下官暫借權宜。
處非其據。薦膺恩錫。罪浮于功。私懼方深。何喜之有。

〔奈子花〕念微臣暫攝銅符。荷皇恩竟掌平盧。媿干城心腹。折衝樽俎。誓捐軀。

奮先戎伍〔合〕文武好誦取萬邦吉甫〔外〕許押衙一路生受你了〔末〕

〔前腔〕遠駢駢四牡馳驅〔外〕朝廷之上也談兵歷〔末〕振堂堂九伐謀謨〔外〕范陽聲

息頗自不佳〔末〕范陽與此處地相接踵。災近剝膚。有俺主帥在上。料不患他。笑春生組練夜

高笳鼓擁羆貅臨邊都護〔合前外〕許押衙軍士們今日我已操演一場。自後你可常監督他。

定要精強。須同甘苦。其不用命者。付軍政司治之。〔末〕領鈞旨。

王師非樂戰。

之子慎佳兵。

莫負盧龍塞。

歸邀麟閣名。

第九齣 詞約

〔唐多令〕〔生上〕心折大刀頭。咸陽客幾秋。牀頭金盡敝貂裘。又見青梅贈柳。

春欲暮。歲空流。高田種小麥。終久不成穗。男兒在他鄉。焉得不憔悴。我韓君平從來慷慨。不會淒

涼。卻怎生說出這般話來。想我的平生。風流出衆。才氣無雙。管討個一顧傾城。片言入彀。到如今孤

身久客。四海空囊。有賦聲金。未許看花立仗。其人如玉。空教擲果盈車。當此春景融和。不奈鄉心迢

遞。正是自在飛花輕似夢。無邊絲雨細如愁。

〔醉扶歸〕歎西歸難把秦烏守。向南栖空教越鳥留。隔園桃杆卻要攀頭道。傍李料不能甘口。更長安花落送春愁。正風風雨雨清明候。

〔不是路〕〔貼上〕試覓風流。曲曲橋西百尺樓。〔扣門介〕把雙環扣。爲何沒人應門。敢垂楊何地玉驄遊。〔生〕滴溜溜聽他百轉鶯求友。待我開門看。〔見介〕呀。原來是李家女

郎。〔貼〕相公。管你遷喬在上頭。你在此何幹。〔生〕眠清晝。〔貼〕想夢爲蝴蝶和花瘦。莫非中酒。〔生〕那些中酒。〔貼〕非關中酒。定是傷春。〔生〕我那得春傷來。〔貼〕前者玉合姐姐

奉錢十千。爲取酒之貲。〔生〕這平樂價了。女郎請坐。〔貼〕相公是郎君契友。怎生好坐。〔生〕女郎原是大人家風範。況且柳夫人有命。道不得個敬主及使麼。〔貼〕僭了。相公客舍蕭條。何以娛日。〔生〕歸思甚濃。馬首東矣。〔貼〕一向與我郎君相處。到不曾曉得相公行藏。

〔紅衲襖〕你甚的困新豐似馬周。〔生〕是久留在此。〔貼〕敢只爲出函關尋李叟。〔生〕李郎也只傾蓋相與。承他顧盼。〔貼〕可輕拋舉案的齊眉偶。〔生〕室中無人。〔貼〕想

貪他倚門的獻笑流。〔生〕不欺女郎說。閒花野草。也不到小生眼底。〔貼〕呀。久別故園。又無妻室。你怎免得雉朝飛在野愁。更教那烏夜啼臨霜候。〔生〕只是松楸在望。況且雨露既濡。小生青年。不愁佳麗。〔貼〕相公少說。只恐你韶顏不久留春也。露溼荷裳已報秋。

〔前腔〕〔生〕我只爲悞看花帝里遊。〔貼〕原來爲春試到此。〔生〕卻討個結如蘭豪俠友。〔貼〕是與我李郎厚了。〔生〕恨生平種璧在藍田後。那裏去懷珠向漢浦求。〔貼〕縱

有個人兒縫裳綴綻。難得你一心哩。〔生〕怎拚得賦淒淒怨白頭也。不得弄摻摻縫

素手。〔貼〕你這等會看待。怕沒有人麼。〔生〕只恐那仙宮鎖定嫦娥也。斟酌天寒奈九

秋。〔貼〕細看月輪還有意。定知丹桂近嫦娥。〔生〕你小姐到似嫦娥。誰近得他來。〔貼〕韓相公。你未必

近得他。他卻也說得你不遠哩。〔生〕願聞。〔貼〕姐姐常對我說。韓夫子豈長貧賤者乎。〔生〕這般說。

李王孫有孟嘗君之賢。柳夫人也就是僖大夫之婦。〔貼〕他還說得你好哩。〔生〕一發見教。〔貼〕

〔解三醒〕美詞華天垂列宿。〔生〕小生也是識得幾字。〔貼〕好風神水湛清秋。〔生〕天

生如此〔貼〕你好不識誇。〔生笑介〕小生就話答話。休要認真。〔貼〕當壚沒個人偎守。更臨
邛四壁堪愁。〔生〕四壁堪愁。不在話下。小姐也想到當壚上了。〔貼〕那瑤姬判夜歸巫岫。
我驛使傳春到隴頭。雙星湊。雙星湊。似盈盈一水。織女牽牛。〔生〕此是小姐美意。知
你郎君何如。〔貼〕料我郎君雖無粉黛三千。不少金釵十二。尙堪換馬。何況贈君。〔生〕女郎雖然如
此。只是小生與李郎。禮周賓主。契洽弟昆。極欲攬子之祛。無奈據人之席。這事也多難了。

〔前腔〕只贏他提心在口。早難言有鵲巢鳩。纍纍已似忘家狗。誰承望燕侶鶯
儔。怕桃花爛熳迷仙岫。教柳眼安排怨陌頭。〔合前生〕女郎多多致謝小姐。只恐此生無
以爲報。〔貼〕相公耐心。就是李郎也有幾分在意了。

柳色參差隱畫樓。

遠書歸夢兩悠悠。

春風無限瀟湘思。

欲采蘋花不自由。

第十齣 懷仙

〔粉蝶兒〕〔小生李王孫上〕恁懶琴慵。一曲懷仙堪弄。〔集唐〕心期仙訣意無窮。十載青春

不負公。歌舞教成心力盡。一時回首背西風。俺李王孫。想起那浮生易往。先路難期。練色微聲。都歸欲界。輕財任俠。也屬微塵。雖已變跡埋名。還要棄家訪道。只是我室稱金穴。座有玉人。難道是斥如犬羊。棄同溝壑。那柳姬衆中最少。才色絕倫。前對我說。韓君平日今暫在泥中。必不久居。下這妮子所見。略與我同。我今日設酒春明園。就把這妮子配與他。先遂室家之願。後寄筦籥之司。其餘女侍。驅他出閣。亦有何難。此時且不須提起。丫頭那裏。〔末上〕招之則來。麾之則去。請郎君差遣。〔小生〕昨日分付你庖人樂部。想俱齊備。可去接柳娘子先到春明園。我自尋韓相公。由宣陽里一路來。〔末〕領命。小山叢桂初招客。東閣觀梅欲待人。〔下小生〕俺便從天街上去。想柳姬年貌也在時了。

〔普天樂〕麗華濃。芳塵動。須有個人兒共。只是我自要遊仙。誰顧得你。今就與韓君平恰好相稱。春歸急。春歸急。擲翠拋紅。雙雙的宛轉玲瓏。似珠連璧融。人生都只爲這一個情字。管多少。明煩惱。俺早已打破也。從今把多情付與東風。

閒雲不繫東西影。

野鶴寧悲去住心。

蘭渚蒼蒼春欲暮。

落花流水怨離琴。

第十一齣 義姁

〔一江風〕〔貼上〕怯春寒。綠襯芳茸淺。嬌護金蓮倦。我還了韓君平玉合錢。又透出他實信來。回覆姐姐去。做蜂媒着意花間。逗得花心亂。東家望眼穿。東家望眼穿。西樓好夢圓。說話之間。不覺已到。呀。如何鎖上門在此。試問一聲。柳娘子今在何處。〔內應介〕李家接去春明園了。〔貼〕姐姐。你去則去。只恐你乘興而來。興盡而返。怕啼鴉灑血空成怨。行來此間。是韓君平門首。如何也鎖上門。想是我們郎君請去韓郎。韓郎。你事多難成。到不見姐姐也罷了。怕啼鴉灑血空成怨。這便是春明園。那花徑中遮遮掩掩走來的。多是我姐姐也。

〔前腔〕〔旦上〕惜春殘。徑踏飄紅遍。簇蝶香裙散。輕蛾。你來了。我今日妝束好麼。〔貼〕鬢兒梳得絕精。只是安黃不正些。〔旦〕問安黃不正。纖纖鬢墨光浮道。〔貼〕韓郎好生致意。早承鸞信。願協鳳占。〔旦〕飛鸞信早還。飛鸞信早還。〔貼〕姐姐。他並未新婚。亦無外宅。〔旦〕住口。輕蛾口暫緘。怕金籠鸚鵡能傳怨。前話只好你知我知。怕金籠鸚鵡能傳怨。

郎君自去邀韓相公。想必就到。我們一壁廂候他。〔生小生衆作樂同上〕

〔海棠春〕〔小生〕開林選勝貪遊衍。着罨畫樓臺當眼。陰洞宿烟迷。曲檻餘寒淺。〔生〕北斗城邊。南山掌畔。承露金莖霄漢。〔合〕把酒送春歸。萬點春零亂。〔歸

國遙〕〔小生〕春欲暮。滿地落花紅帶雨。〔生〕惆悵玉籠鸚鵡。單栖無伴侶。〔旦〕南望去程何許。問花花不語。〔貼〕早晚得同歸去。恨無雙翠羽。〔小生〕柳姬過來。見韓相公。〔旦〕相公萬福。〔生〕柳娘子拜揖。這就是章臺柳麼。〔小生〕他久已深居。今特薦上客耳。〔生〕李兄。名園不殊金谷。麗人何減綠珠。仗此花神。願得青春無恙。白首同歸。〔旦〕相公與郎君同心聯璧。可參騎省之遊。賤妾澀指縫絲。良媿石家之婦。〔小生〕叫樂人們承應。輕蛾拂席。柳姬把盞。〔衆作樂旦送酒介〕

〔桂枝香〕押簾銀蒜。拂纓珠串。啼妝半貼。鈿蟬手語。斜飛金雁。看花期漸闌。花期漸闌。露條香濺。風心紅綻。在長安。人遠天涯近。春歸客路先。〔小生〕韓兄。你寒食佳篇。柳姬近來頗習。試歌侑酒。〔旦〕

〔北寄生草〕催風雨。愁中節。怨龍蛇。原上田。那花飛細蕊。胭脂絢。門垂御柳金。

絲顫。宮傳蠟燭青烟變。知何方火向客心然。便禁烟也不禁侯家宴。〔生〕李兄。綺庭玉樹。聲聲自合鸞歌。繡幌金荃。字字偏諧鳳律。不數四時子夜。絕勝舉國陽春。〔小生〕小生手奉一卮。

〔桂枝香〕風回彫扇。春催檀串。璇題梓澤高騫。玉柱梁州低按。韓兄請酒。把金樽再拈。金樽再拈。羞蛾偷換。清臚流盼。笑嫣然。引鳳停歌拍。驚鴻試舞筵。柳姬。我久不見你舞了。好一折腰。試他垂手。

〔北對玉環帶過清江引〕〔旦舞衆合介〕碧玉珊珊。羅裳風外單。紫燕翻翻。纖腰掌上安。頓趾卻仍前。迴身斷復還。飛雪流波。盈盈舒媚眼。餘姿逸態張猶掩。障袂驚香散。急鼓會繁絃。白紵縈清彈。乍猶矜。忽如疑。中似幻。〔生〕看他矯若遊龍。超踰集鳥。春風香徑。花前翠帶從風。夜月紅樓。樹下霓裳出月。是好舞也。〔小生〕當直。把酒移到瑤光臺。我們從金波橋過去。〔移席介合〕

〔燒夜香〕金波蕩影弄雲鮮。織女橋回幾曲聯。洞口花源別有天。〔合〕別有天。

邀客儘留連。向晚。扇月斜窺。繩河半展。〔到介生〕王孫別舍擁朱輪。〔小生〕不羨空名樂此身。〔旦〕門外碧潭春洗馬。〔貼〕樓前紅燭夜迎人。〔小生〕酒到。〔送生酒介〕

〔梁州序〕瑤臺新列。金波虹瞰。十二屏山不斷。籠香拈翠。臨春笑攬韶年。韓郎。

你名士無虛。柳姬你佳人獨立。一個赤繩未繫。一個玄的猶存。自合雙飛。真難再得。便相配偶。不必

遲疑。〔指生介〕看你詞華掞日。〔指旦介〕麗彩升霞。絕世俱堪羨。玉笙吹徹也會

雙仙。一任天風駕紫鸞。輕蛾掌燭。柳姬送酒。〔合〕然錦燭。開羅薦。把玄漿合盞頻頻

勸。酒來。我代你們一祝。〔對天酬酒介〕祝此二人。佳期之後。天長地久。夫貴妻榮。期百歲結良緣。〔生〕

李兄。他雖未抱衾裯。已在小星之列。小生後來烏鵲。敢分明月之栖。況你玉牒名流。合配金屏豔質。

〔前腔〕〔指小生介〕天潢貴種。〔指旦介〕星橋仙媛。掩映金輝玉璨。絲蘿喬木。根株

豈合纏綿。〔小生〕咳。大丈夫相遇。杯酒間一言道合。尙許以死。何況一女子乎。〔生〕大德不報。知己

誠難。安得復勤子之施。奪人之好。況我窮林賦鳥。幸舍歌魚。涸轍波非淺。褰裳何處

也。隔蓬山。敢望文簫逐彩鸞。〔合前旦〕郎君。妾方待歲。不止周星。弄管持觴。旣免蒸梨之過。

稱詩守禮。何來唾井之嫌。

〔前腔〕捧瓊蘇醉壓銀蟬。點松肪光飛玉繭。更沈香火底。穠李花前。〔小生〕柳姬
差了。你就是仙女。也有個吹簫碧落。怕不做悔藥青天。〔旦〕可是嫦娥奔月。帝女乘雲。覲
面將人閃。〔悲介〕謾憐雙笑也。鏡空圓。翠影羞窺舊舞鸞。〔合前貼〕姐姐他相女配夫。
韓郎爲君擇婦。佳人才子。真如二曜經天。吉日良宵。試看三星帶月。

〔前腔〕道新人琬琰名鑪。問才郎金華時彥。看花房低綴。繡帳高懸。郎君。這是
推雲出岫。掇月移宮。好事行方便。姐姐。今朝遷次也。笑啼難。一曲離鴻雜引鸞。
〔合前小生〕韓郎柳姬。你們當此星月之前。花燭之下。誓同結髮。都莫負心。〔生旦拈香介〕

〔節節高〕名香炷博山。瑞鑪烟。〔拜天介〕深深拜發。低低願。憑天鑒。交頸鴛雙飛。
燕。春光到處常相見。風波縱有休輕散。〔合〕一日長安遍看花。管教早晚魁金
殿。〔小生〕蒼頭們。將鼓樂花燭。送到園中西洞房去。〔衆行介〕

〔前腔〕蘭房笑語喧。擁嬋娟。銀缸隱見桃花面。香鬟亂竇唾沾。靈犀泮。遊蜂細

簇幽黃淡。啼鶯暗度驚鴻散。〔合前〕

〔尾聲〕銅龍午夜催銀箭。障溶溶香氳夢暖。〔生揖小生介〕小生奉謝。〔小生〕意氣相與。

何所可謝。〔生〕你海樣恩深石樣堅。〔小生〕韓兄三日之後。同柳姬到俺宅中。一言相告。

〔生〕領教。

仙史高臺十二重。

巧將花木占春風。

可憐今夜千門裏。

銀漢星回一道通。

〔小生下生日弔場介生〕柳娘子。向者紫陌閒遊。紅樓乍遇。山陂相隔。恐成千里之遙。蓬梗還逢。喜遂同根之願。我想起當日呵。

〔啄木兒〕紗窗倚繡陌遊。不是從前相識久。猛偷傳一縷柔情。卻空拋萬種閒愁。想今生沒路投機。穀東風怕不堪回首。可料浮槎替入舟。〔旦〕那日綠柳烟勻。纔

堪繫馬。碧桃春老。似誤停舟。將無永絕今生。何意爲歡此夜。

〔前腔〕瑠璃榻。翡翠樓。手捲眞珠上玉鈎。擲年光幾樹楊花。躍春風甚處驂騮。

記初窺薄怒頰相逗。將辭轉盼精堪授。今日蒙羞載鄂舟。〔貼持燭上〕

〔二段子〕綿藤話兜。算從前相思盡勾。香甜味投。趁新來風流上頭。呀韓郎。你那得閒坐。〔生〕他防身寶襪牢牢扣。耽驚翠黛輕輕縐。兀那一段銷魂乍喜乍羞。〔貼〕好不卽溜的相如。

〔歸朝歡〕留心的留心的緊偎慢抽。姐姐。恰好處些兒着手。你們到要緊時莫丟了我。針和線。針和線計他引頭。韓郎。你如今真喚個章臺折柳。姐姐。這替不得你的。你怕他待怎生。〔旦〕怕他燈前光眼將人瞞。牀頭絮語將人搆。〔貼〕韓郎走來。我教你個七字經兒。〔引生攜旦手介〕做道是軟款溫柔不識差。〔生旦下貼〕他兩個洋洋去了。卻怎生發付我來。你看。

春風拂檻露凝香。

花燭熒熒照洞房。

一樣玉壺傳漏出。

南宮夜短北宮長。

第十一齣 譯寶

〔夜遊朝〕〔淨番將衆上〕擊鼓吹螺分別部。捧盃槃酥酪酣呼。飲馬黃河。射雕赤嶺。西日近長安何處。平沙落日大荒西。隴上明星高復低。孤山幾處看烽火。戰士連營候鼓鼙。

自家吐蕃大將沙吒利的是也。蒙贊普擢我鎮守河隴。令嚴金箭。名綴銀塗。近日來被唐朝哥舒翰攻拔諸城。盡收故地。郡澆河于積石。軍神策于臨洮。這國中蘇毗彊部。又以歸降。封王賜姓。我想起那日禪辭胡助漢。由余從戎入秦。這都是用夏變夷。到落得畫圖標史。俺身留番地。心慕華風。願備外藩。將稱內屬。且待俺部將乞力斤到來。把都兒們喚乞力斤來帳中議事。〔衆應喚介末乞力斤上〕鶯領金僕姑。燕尾繡螯弧。獨立揚新令。千營共一呼。乞力斤見〔淨〕乞力斤。俺意欲散離戎部。歸附唐朝。倘列雁臣。猶勝鳥使。你道如何。〔末〕大唐統接帝王。西戎親本甥舅。合有金鵝之獻。以代銅馬之圖。只是要力修表章。得預朝請方好。〔淨〕俺正意如此。你聽我道。

〔瑣窗郎〕喜天王撫有輿圖。築降城徹拂廬。和我賜樂。拜表平胡。還呈玉馬不勞銀鵝。〔合〕試看他河源東注隴頭路。隨碣石片鴻度。

〔前腔〕〔末〕望中朝紫氣黃圖。蝕星旄偃月弧。好教筵鷺。莫恥垂狐。漢官今日

威儀重覩。〔合前淨〕俺一面修表。收拾玉帶金肌。作貢獻之物。勞你前去長安。〔末〕小將便須速行。此時長安已是三月了。

秦中花鳥已應闌。

塞外風沙猶自寒。

夜聽胡笳折楊柳。

教人氣盡憶長安。

第十三齣 驛負

〔小生上〕轉知名宦是悠悠。分付空源始到頭。待送妻兒下山了。便隨雲水一生休。俺一向不樂人間。意欲尋仙方外。只有柳姬。撇他不下。又已配與韓君平。前約他夫婦。三日之後。過俺宅中。早已着輕蛾請去。待他來時。這幾十萬家計。盡付與他。俺便飄然長往了。韓郎。韓郎。你怎知俺數十年前曾爲名將。北征突厥。西討吐蕃。後來卻混跡屠沽。逃名花酒。到今日都似做一場大夢也。

〔雙調北新水令〕一生塵土夢初醒。幾年來隱名留姓。烏飛和兔走。虎鬪與龍爭。誰是惺惺。百忙裏難提省。〔生旦貼上〕

〔南步步嬌〕曉帳沈沈菜萸冷。鳥喚東風醒。香肩併影行。一抹生烟。柳昏花冥。

何處把車停。〔貼〕此間是李郎宅子了。試看人在瑤臺境。〔見介小生〕韓兄。你們都來了。來得恰好。俺檢點些小家費。大約有數十萬。家僮數百人。都已在此。今日就交付你們。俺從此逝矣。

〔生旦〕呀。卻爲何這般說起。〔小生〕韓兄。俺與你都是英雄輩。一諾無雙。不必再讓。〔旦〕怎好受這許多。〔小生〕柳姬。你知俺是豪爽的人。怎做得守錢的虜。年來費用。其實不多了。

〔北折桂令〕則空憐一事無成。儘家緣一諾都傾。穩趁着。一介書生。今日這繡戶銀屏。鴉青獸錦。婢織奴耕。一任你支分管領。伴他們媿娜娉婷。早成個錦片前程。〔生〕李兄。縱要尋仙。再住幾時。去未遲也。〔小生〕遲了遲了。俺可待無錢斷酒。折末也垂老修行。

〔南江兒水〕〔生〕一片英雄氣。二年客旅情。疎財仗義交曾訂。李兄。我那件不受你惠來。騎來匹練穿花影。偎將雙袖臨妝靚。況復傾家相贈。三匝堪棲。到教你南枝孤另。〔小生〕韓兄。你道俺仗這幾貫腐物了。你聽俺道。

〔北雁兒落帶得勝令〕俺也曾脚蹬將日窟平。俺也曾手撼得天關應。俺也曾

指河山帶礪。盟俺也曾驅虎豹風雲陣。〔生〕原來李兄身曾爲將。到頭來卻何如。〔小生〕到頭來長揖謝公卿。暗妝孤花柳情。打滅下粗豪性。做幽居不用名。〔旦〕你如今卻又怎生。〔小生〕盈盈漸白髮。飄明鏡。泠泠我則待駕鸞驂上玉京。駕鸞驂上玉京。

〔南僥僥令〕〔旦〕佳期空自定。別恨轉多縈。縱有日相邀雲路迴。料環珮只空歸月下聲。

〔北望江南〕〔小生〕呀。你子道環珮只空歸月下聲。誰待會到蓬瀛。可知那飛梭日月一棋枰。更茫茫欲海幾千層。俺虛飄飄此行。甚的是東風回首不堪情。

〔南園林好〕〔貼〕聽金雞雲中共鳴。看青鳥筵頭共行。郎君輕蛾雖則婢子。性亦有靈。願傍着蓬山芝嶺。隨子晉學吹笙。擣靈藥兔長生。擣靈藥兔長生。〔小生〕輕蛾肯從我去麼。你縱不是仙才。亦非凡骨。好做個秦宮毛女。梁家玉清。數年之內。到是你先會俺哩。〔貼〕

郎君此去。雲水浮蹤。雖無定所。蘧廬寄跡。亦在何方。〔小生〕俺多在終華二山了。

〔北沽美酒帶太平令〕蓮峯矗紫閣橫。蓮峯矗紫閣橫。仙露掌白雲庭。〔生日悲

介〕你定要去了。相見之期。今生未卜。待將一盃渭城相別。〔小生〕這盃酒殷勤唱渭城。疊

陽關你送行。正垂柳怨青青。俺此去呵。早除卻花魔酒病。慣聞他鶴唳猿聲。守

清夜藥鑪丹鼎。張碧落粉圖霞幃。你呵若問俺今生。試聽一待滿千齡再經。呀

怕難尋舊家門徑。俺就此去也。仰天大笑出門去。卻伴青霞入翠微。〔下旦〕他就長揖而去。你何

不追及。還讓與他。〔生〕不是。此豪達者。適已備言之矣。勿復致謝。我想起人生呵。

〔南尾〕風花聚散真無定。〔旦〕憶歲歲王孫草色青。〔貼〕空擲下千金結客名。

〔旦〕相公資用頗給。家室有人。日月蹉跎。功名在意。〔生〕天子行幸將歸。尚須春試。禮部侍郎楊渡。

他常知我才名。至期自當努力。

人無回意似波瀾。

琴有離聲爲一彈。

縱使空門再相見。

還如秋月水中看。

第十四齣 逆萌

〔北點絳脣〕〔淨安祿山衆軍引上〕掌握河山部兼蕃漢。鴻圖建地覆天翻。穩坐那黃金殿。營州少年厭原野。狐裘蒙茸獵城下。虜酒千鍾不醉人。胡兒十歲能騎馬。自家東平郡王安祿山的是也。俺本營州胡人。姓康名軋。幼蒙張守珪養爲己子。後來累官做平盧節度。兼柳城太守。天寶初年。入朝稱旨。唐天子坐俺金雞大障。起第京師。又拜楊貴妃爲兒。出入宮掖。卽今總領范陽三道。進封東平郡王。恩寵極矣。想起俺生多異相。難道只位極人臣。況且那海內無兵。朝中多故。正是天與不取。反受其殃。俺帳下蕃漢各兵之外。又有那契丹曳落河八千人。家奴善弓矢者數百人。日前曾遣人築雄武城于范陽之北。又遣人買錦繡數萬。以佐軍費。想俱完備。叫曳落河。你們近來勇力何如。俺指日就要渡河入洛了。〔衆〕大王聽稟。〔外〕

〔浪淘沙〕一鼓奮爭先。帳捲胡天。黃河似帶可投鞭。管取軍威如破竹。飲馬三川。〔淨〕家奴等。你們近來弓矢何如。〔末〕

〔前腔〕破的聽鳴弦。一箭雙穿。驚鴻虛發下平原。管取射人先射馬。七札誰堅。

〔淨〕叫築雄武城的。那城果是何如。〔小生〕

〔前腔〕千仞看高鶩。雉堞言言。秦城北斗料空傳。管取金湯成保障。百萬當關。

〔淨〕那羣賈們。前買的錦繡服色何如。〔丑〕

〔前腔〕霞邊共霜氈。日耀雲鮮。戎衣一着白旗懸。管取春溫如挾纊。組練三千。

〔淨〕你們成功之日。都有重賞。〔衆謝介淨〕數日前何千牛與俺說。平盧一帶。雖則屬俺節制。那侯希逸是個不良的人。倘或俺直入中原。哥舒翰提潼關之衆。以衝其前。侯希逸統河北之兵。以躡其後。卻不做腹背受敵。進退無門。俺已命高尙修一書。遣中人韓朝敷去說他連和便了。

晝暗狐狸得勢。

天陰魍魅持權。

不能流芳百世。

亦當遺臭萬年。

第十五齣 逢世

〔一剪梅〕〔旦貼上〕臚傳三殿日華重。滿眼英雄。誰識英雄。〔貼〕花明十里曉烟

籠。滿眼春風。誰領春風。〔小重山〕〔旦〕正是神京爛熳時。羣仙初折得上林枝。烏巾白紵最相

宜精神出。御陌袖鞭垂。〔貼〕柳色展愁眉。管絃分響亮。探花期。光陰占斷曲江池。〔合〕新榜上名姓。徹丹墀。〔旦〕輕蛾。韓郎今日裏幸宮引奏。北闕敷言。不知他文福何如。〔貼〕姐姐。相如獻賦。猶幸同時。主父陳書。方嗟見晚。你也曾說來。似韓郎才貌。那得長貧賤麼。少刻就有佳音了。〔旦〕說便這般說。你見那顯達的。幾個有才貌來。我想此時呵。

〔賞宮花〕桃花浪融。風雷百道通。乘流妨點額。一躍可成龍。〔合〕但願泥金飛喜信。應知剖壁遇良工。〔末上〕才子已爲金殿客。好音速報玉樓人。報夫人。相公喜得高第了。

〔旦〕奚奴。你見誰來。〔末〕小人親在午門外見來。只有俺相公年少。主上賜名探花。使特敕金兆府儀從鼓樂送歸第里。〔旦〕他如今在那裏。〔末〕如今赴瓊林宴。到曲江題名去了。〔旦〕你還去接相公。〔末〕小人就去。曲江院裏題名處。十九人中最少年。〔下貼〕

〔前腔〕芙蓉紫宮。春光醉九重。祥雲看五色。女壻近乘龍。姐姐。你好喜了。〔旦〕也只偶然。何足爲喜。時世人得個科名。便似做驚天動地。着甚來由。〔合〕已見泥金飛喜信。真教剖壁遇良工。〔旦〕你且去排個夜筵。待相公回來作慶。〔貼〕知道。闕下開金榜。闈中肆夜筵。〔下〕

生冠帶衆儀從鼓樂上

〔黃龍袞〕宮袍柳色濃。宮袍柳色濃。烏帽花枝重。簇出神仙左右飛鸞鳳。〔合〕

天門日拱。香街繡擁。誇得意馬蹄歸。東風送。〔生〕勞列位了。〔衆〕誇得意馬蹄歸。

東風送。〔下見介生〕獨受主恩歸。〔旦〕當朝似者稀。〔生〕玉壺分御酒。〔旦〕金殿賜春衣。相公你遇

主已收東箭。許身好比南金。幸無一第爲多。須要孤忠自獻。〔生〕小生偶膺鳳舉。夫人與有鸞封。願致警于齊風。得傾心于堯日。

〔大聖樂〕大羅天蕊榜。臃臃奏芳名。禁籍通。凌雲一賦龍顏動。歌湛露荷天工。只今那瓊林。賜出皇風重。準備你玉殿新頒紫誥崇。〔合〕雞鳴可諷。好趁取金

門待漏。長樂聞鐘。

〔前腔〕〔旦〕羨才華錦繡蟠胸。策臨軒過賈董。簫韶奏引虞廷鳳。看咫尺覲重瞳。分明是連枝紅杏依雲種。還効那一點丹葵捧日忠。〔合前〕相公。可惜李郎不見

你有今日。〔生〕我正此念他。只是他已塵垢浮名。糠粃濁世。看着我們。就如浮漚在海中。鷓鴣視腐

鼠了。〔旦〕正是。早已命輕蛾設宴後閣。且自少敘一回。

萬年枝影轉斜光。

三道先成君激昂。

谷永直言身不顧。

郗詵高第轉名香。

第十六齣 拒間

〔掛真兒〕〔外侯節度末許俊引衆上〕笑談功成膺上賞。藉王靈捍禦邊疆。〔末合〕燕

寢香凝。平安火報。好圖取文修武講。〔外〕分關仍推轂。援桴且訓車。風揚旌旆遠。雨洗甲兵

初。許虞侯。俺在此節鎮數年。所喜胡塵不動。日羽停飛。苔臥綠沈。花明畫戟。此皆主上之威。及諸將

校之力也。〔末〕許俊聞得安祿山招軍買馬。積草儲糧。又聞得多進駱駝犬馬。以蠱上心。日前獻媚

玉樂器。以諂妃子。真個是狐媚方深。豕心難化。肘腋之變。只在旦夕了。〔外〕他必有細作往來偵候。

俺們須要謹防。〔末〕有如高見。〔丑中官韓朝敷上〕曾盜張儀璧。還裝陸賈金。懸河吾有口。篡位爾

何心。自家中人韓朝敷的便是。領俺東平王之命。來說平盧侯節度。定約連兵。共舉大事。此間是他

轅門了。牙門官可通報。東平王有使人在此。〔報介外〕我們方纔議他。卻好就有人來。着他進見。

〔丑〕中人韓朝敷見。〔末〕你是東平王差來的。有書麼。〔丑〕先曾有書。生怕軍情漏洩。遣小官口代天言。〔外〕怎麼叫做天言。大意何如。〔丑〕大意欲興晉陽之師。以清軍側之惡。元帥若能互相掎角。效力囊鞬。則天下不足平矣。〔外〕差了。差了。當今天衢清朗。社稷靈長。女謁雖行。王綱猶振。何損桓公之霸。敢借晉陽之名。俺說你那祿山呵。

〔八聲甘州〕三方保障。似羣星拱北。睿日當陽。〔丑〕俺大王功高賞薄。以此不安。〔外〕天恩浩蕩。怎做得反戈相向。〔丑〕他有這般勇略。怎肯置身人下麼。〔外〕他嚙人乳虎威難抗。似負主饑鷹飽。即颺。〔丑〕古今霸王之主。也都是及時成功。〔外〕哎。他已封東平王了。試詳少甚麼列土分王。

〔前腔〕〔丑〕騰驥兵彊馬壯。要親提霜甲。一掃天狼。〔外〕他自作孽罷了。怎的污及于我。〔丑〕輔車相仗。況總是楚弓得喪。〔外〕他既廢人倫。又昧天道。〔丑〕元帥。你要問天道麼。那氣占沸粉。晨空望。月暈圍參。夜少光。〔外〕便是霸王之業。豈就容易成得。〔丑〕誠量管教成定霸圖王。〔末〕中官。俺元帥呵。

〔前腔〕忠良金符玉帳。看妖摧太白。士列中黃。〔丑〕唐家多少功臣宿將。有甚明白處。賢勞鞅掌。怕不做烏盡弓藏。〔外〕哇。閒說。我從軍白髮三千丈。報國丹心一寸長。

〔丑〕你若不見從他。一定移兵相擊。怕當他不過哩。敢當定須教斬馘擒王。

〔前腔〕〔外〕猖狂陰謀妄想。看鼎魚暫息。暮燕終亡。〔丑〕識時務者爲俊傑。請元帥三

思雲。移日盪笑當車。怒奮螳螂。〔外〕怒介。哇。這斷好無狀。叫羣刀手推出轅門。梟首示衆。

〔衆應〕綁丑下末。元帥。這斷斬訖。賊必先加兵我了。這相持勢已拚鷓蚌。一戰功須淨

犬羊。〔合〕誓當取前茅討賊勤王。〔外〕許虞侯。俺如今幕下少人。聞得金部員外韓君平。文

武兼資。才力俱壯。遣人去長安把祿山反狀奏聞。就辟他爲書記。〔末〕如此極好。

家散黃金酬士死。

身留一劍答君恩。

漁陽老將多迴席。

魯國諸生半在門。

第十七齣 言祖

〔丑〕童子上。〔集句〕花氣渾如百和香。不辭啼鴉妬年芳。樓臺深鎖無人到。綠樹陰濃夏日長。俺是

韓相公家小園丁。相公官授金部員外郎。夜來入直去了。今日是賜沐之期。分付俺在此打掃園亭。你看這烟中蟬咽涼柯。燕雛午暮。新桐飲露。密柳眠風。卻就是初夏景象。俺打掃已畢。待相公回來。與夫人到此。儘着他春宮祕戲。真可愛。夏閣微涼。呀。只見那輕蛾姐也走來了。我且閃在左廂。看他說甚。〔做虛避介貼上〕

〔駐雲飛〕玉樹瓊葩。帝苑春來第一家。這園中春去夏來。又是一般了。朱果纍纍亞。荷葉此三三〔內鳥鳴介〕。何物叫喳喳。〔做打鳥介〕把青梅閒打。原來是一個鵲兒兩個。個鵲兒飛去了。我想那烏鵲也會填橋。織女一年一度。誰似我們。縱有烏鵲填橋。織女還空踏。〔丑出介〕我是牛郎。你是他。〔貼〕吓。誰是牛郎。誰是他。這小廝。你是牛郎。可曾沾一滴天河水兒。〔丑〕你那天河水。賜我一滴兒。也是你陰騭。〔貼口介〕一滴何曾到九泉。〔丑〕你就罵我。又說起詩來。我唱一個曲兒贈你。〔貼〕使得。〔丑〕

〔北清江引〕小梅香百樣相勾搭。眼挫將人抹。筵頭謊沒查。橈角忙凹軋。幾番兒眼巴巴。想着那光踢邊。〔貼〕這小廝到會抓人癢處哩。我也唱個曲兒贈你。〔丑〕也好也好。

〔貼〕

〔前腔〕小哥哥後庭花早發。背地和人刮。好處把頭抓。忍處將胸掐。幾番兒吹地灰。全得雙眼睛。〔丑倒地哭介〕你賊污我。我死了。〔貼〕癡孩子。你起來。我打桃子你喫。〔丑〕要你喫半個。我喫半個。〔貼〕你還要啖我以餘桃哩。〔旦內叫介〕輕蛾。天色大曉。把銀缸滅了罷。〔貼〕夫人來了。〔丑慌下旦上〕

〔駐雲飛〕簾幙重遮。破曉膏凝。鬢半鬢。春與東風嫁。夢怯餘寒壓。書省正隨衙待歸來。花下相公此時還不見回。〔做弄花介〕只把細蕊輕按。立倦鞦韆架。耳聽鳴珂眼盼他。〔內馬鳴介〕相公回也。去看茶來。試聽鳴珂管是他。〔貼下生冠帶末僕隨上〕

〔駐馬聽〕下直金華。紫馬春殘踏落花。常直的。把朝衣解去。〔末應解衣下生〕我方乘月出朝。到家卻早見日了。只見星移閣道。月轉勾欄。日動窗紗。〔進見介〕夫人。你曉妝畢了。〔旦〕鬢兒好麼。〔生〕那流波入鬢。向人誇。〔生〕你爲何雙眉未畫。〔旦〕留待君歸。作京兆故事。〔生〕我與你畫。〔畫眉介〕遠山橫黛。邀郎畫。〔抱旦介〕試約裙鞞。趁背人深處

妝初罷。〔旦〕這是甚樣子。可象個官人們麼。〔生〕依你說。紗帽到會俗了人。〔貼上〕逢時方燕喜。退食且從容。相公夫人。茶來了。〔旦〕我們去園子邊行行。〔同生行介〕

〔前腔〕景湛清華。問信風吹到棟花。可是南薰漸引。嫩紫輕掩。慢綠交加。〔生〕

穿着這洞過去。〔做穿洞旦整頭介〕低穿花洞翠翹斜。〔生〕天氣乍暄。待脫衣着。〔脫衣介〕

半褰蘿薜。綺衣挂畫。永無譁。正困人天氣鶯啼罷。〔住介旦〕輕蛾。可將酒移到水樓上

去。〔貼應介〕樓似陽臺上。池如洛水邊。〔下旦〕相公。妾有一言。願效左右。〔生〕試說何妨。〔旦〕榮名

及親。昔人所尚。豈宜以濯泥之賤。稽採蘭之美乎。日器具資用足。以俟君之來也。〔生〕夫人。桑梓久

違。枌榆係念。無奈春光殢客。難教秋氣將歸。〔旦〕我和你俱係少年。爲歡有日。請無內顧。決意前行。

〔生〕如此再當卜日起程。〔末上〕西羌榮漢將。白起佐軍威。相公。那安祿山意欲謀反。使人去說平

盧節度侯希逸。侯節度斬了來使。奏聞聖上。要請相公爲書記。聖上就着相公去參他軍事。因便體

察安祿山反狀。卽日就要動身了。〔生〕呀。如何是好。你可去打點行裝。領着隨行軍校。都到青門外

俟候。〔末應下旦〕相公。方言畫錦。又歷星軺。卻不是兩得其便。大丈夫正當立功邊陲。安可繫情兒

女。你此去呵。

〔勝如花〕清和近。紫塞賒。一路烟花飄灑。道參軍妙算前籌。管成功先聲震瓦。妾有玉劍一口。贈君佩之。〔送劍介〕贈玉劍蓮花妝靶。〔合〕理愁蹤紛然似麻。問來期還當及瓜。白艸黃沙。指長安日下。盼不到片心無那。好翩翩結束辭家。懶翩翩結束辭家。〔生〕我此番雖屬壯行。終多別恨。想我與你呵。

〔前腔〕連枝樹並蒂花。襯着風流俊雅。是誰教蕩子從軍。虛撇下嫦娥守寡。我把別物來贈你。也都是閒。只有這帕上幾點眼淚。見是痛腸中出的。〔出帕拭泪介〕贈泪點傳情羅帕。〔旦〕輕蛾。置酒到青門外去。〔內應介〕旦相公送你到青門外別者。〔合前末持冠帶貼持酒上〕功名萬里外。心事一盃中。〔末〕相公冠服在此。〔貼〕夫人酒在此。〔旦〕黃雲斷春色。畫角起邊愁。不識陽關路。新從定遠侯。古今送別。多唱陽關。我便歌陽關送酒也。〔送酒介〕

〔榴花泣〕陽關一曲。幽恨寫琵琶。〔悲介〕和淚雨注流霞。魂隨芳艸。遶天涯。似東西溝水爭差。〔生〕適方何等慷慨。到如今也泪下了。〔旦〕蟬聯歲華。怕遊絲到處將春

望。閃孤眠帳額芙蓉可重逢。人面桃花。〔生〕聽你的歌兒。雖是嬌嬌滴滴。多少切切悽悽。

正是思聲應帶別。聲斷似兼秋。岐路風將遠。關山月共愁。古今邊塞多唱關山。我也歌關山一曲。勸你一杯。〔送酒介〕

〔前腔〕關山一曲。萬里逐輕車。看折柳聽吹笛。離腸悵觸斷無些。怎支吾一捻香娃。紅顏自嗟。怕行雲早趁東風化。倘相逢肯詠蘼蕪。或歸來好覓菱花。〔旦〕

歸覓菱花。莫不是徐德言與樂昌公主麼。你不須過慮。自後妾當罷妝。一意相待。

〔急板令〕斷冰絃鴛鴦柱斜。減香肌茱萸帶賒。〔生〕你決不要消瘦了。〔旦〕我還有幾句話祝付你。你奉使乘槎。奉使乘槎。只恐白磧沙寒。綠髻霜華。龍劍休離。貂錦時加。〔合〕從今去。出塞還家。張大蠡擁高牙。〔生〕

〔前腔〕想鼓鞞漁陽幾擲。料王師出征有嘉。我不久就回。少要想憶。且休教憶咱。休教憶咱。此時天氣漸暑了。辦取透骨龍綃。拭汗蟬紗。若到秋來呵。玉琬雙纏。寶襟交又。〔旦〕我還送你一程。到渭河相別。〔行介〕從今去。出塞還家。張大蠡擁高牙。〔生〕臨河

濯長纓。〔旦〕念子悵悠悠。〔生〕行人懷往路。〔旦〕何以慰我愁。〔末〕已到渭河。相公行了罷。

〔一撮棹〕垂柳渡隔水促驕騮。〔貼〕日色將晚。夫人別了罷。桑柘影依斜日數栖鴉。

〔生旦拜介〕我們就此別了。尊前路室邇處覺人遐。〔旦〕紅愁併綠慘鏡無華。

〔合〕清秋裏思歸似邊馬。飛夢也一點暮雲遮。〔衆捧勅旗隊上〕萬里鳴刁斗。三軍出井陘。小的們隨老爺去河北。在此久等。〔生〕叫捧勅官先行。衆軍校們照隊前進。飛夢也一點

暮雲遮。〔下〕

〔尾聲〕〔旦〕那臨邛駟馬車高駕。〔貼〕看諭蜀爭傳司馬。〔丑軍官上〕韓爺差小官拜

上夫人。請就回車。〔旦〕拜上韓爺。邊庭之事。務必留心。不須念我。〔丑應下〕〔旦〕拚白首文君不怨他。〔下〕

第十八齣 悟真

〔外道妝張果上〕紫烟衣上繡春雲。青隱山書小篆文。明月在天將鳳管。夜深吹向玉宸君。吾乃九霄仙伯張果的便是。生本堯時。歷經唐代。名題仙籍。職掌天曹。寓身汾晉之間。栖志蓬瑤之上。三晨

默運。邢和璞不見其形。萬劫常通。師夜光莫窮其算。放驢曾戲朝元殿。真看揮手如神。騎驢每過趙州橋。須信回頭卽道。俺一向隱在中條。這幾時雲頭起處。望見那長安城中。有個李王孫。原係仙都散吏。到今來謫限將滿。功行未圓。他已棄家到此。指點他去西岳華山金天部下。修真煉性。又還須虔誠度物。來往人間。方可上昇。復歸本位。且分付山神土地。多設魔難。試他一番。正是欲尋仙路近。須辨道心堅。〔下小生李王孫道妝上〕生在儒家遇太平。繁纓重滯布衣輕。誰能世上爭名利。臣事玉皇歸上清。自家李王孫。棄家求道。雲遊到此。聞得那通玄先生張果。向隱中條。意要訪他。一路來千峯蔽日。萬嶂凌雲。或聞牧唱樵歌。只有獸蹄鳥跡。這是中條山了。呀。忽律律的無影無形。半明半暗。好一陣怪風也。〔做虎上叫舞介〕呀。卻原來一隻金精白額虎來了。怎生是好。

〔剗鋏兒〕悽悽樹杪風生霧。蕭蕭嶺外日臨晡。中途乍逢虎。驚魂半無。我聞昔人投巖餵虎。不過爲道。還向前去也。則憑他張牙怒呼。搖頭肆舞。訪道投巖。拚教餵汝。〔虎舞下小生〕謝得靈聖。虎到去了。呀。又見那陰雲四合。腥風滿耳。卻爲何來。〔淨丑二鬼上叫舞介生〕呀。是山中神鬼都來了。怎生的好。

〔前腔〕三頭六臂神驚顧。朱睛紺髮鬼羣趨。冥冥望難數。紛紛載車。我聞山鬼伎
倆有盡。至人不聞不見無窮。也則憑他穿林亂呼。吹燈暗舞。秉正驅邪。須教任汝。〔外〕
張果上鬼驚下。李生。你來了麼。要尋通玄先生。則我便是。〔小生拜地介〕既蒙聖恩。使弟子枯骨
復見光明。刻骨銘心。願隨雲駕。〔外〕李生。你道心雖固。仙骨未全。更須煉性修真。還要虔誠度物。
〔小生〕願賜一言。終身佩服。〔外〕你試聽者。夫大道守真。三品爲則。以一爲度。以正爲德。子能知道。
萬事將畢。〔小生〕敬領真言。〔末金童小旦玉女持節衆作樂上〕雲臥留丹壑。天書降紫泥。〔見外
介〕羣僊已集蓬萊上宮。請先生赴天池會。論五元真人神遊記事。〔外〕如此俺就去也。〔衆行介
合〕

〔江頭送別〕鵝笙導。鵝笙導。妙音低度。蜺旌送。蜺旌送。慶雲深護。〔小生〕弟子拜
送。〔外〕還有兩言。你再聽者。待後應驗。又來訪我。〔小生〕弟子願聞。〔外〕遇華則止。遇候則行。後會
有期。珍重珍重。〔衆行介〕不久洞天還重聚。管有日扈駕玄都。〔外末小旦先下小生〕
你看玉蓋金鈴。朱裳翠佩。乘雲西去。冉冉如飛。〔望介〕

〔前腔〕飛鸞御。飛鸞御。月中歸去。飛鳧望。飛鳧望。道傍空竚。只恐洞天難重聚。可有日侍宴仙都。俺本意要往終南太華。今日先生說遇華則止。一定是華山了。又說是遇侯則行。這卻不曉其意。想後必有驗處。聞得華山是金天氏所掌。雲臺道觀。好生靈異。俺須索那裏去也。

得道從來相見難。

又聞東去幸仙壇。

先生去後身須老。

乞與貧儒換□丹。

第十九齣 發難

〔梁州令〕〔淨安祿山末丑二將衆雜上〕

雄兵百萬擁天驕。驟胡馬風飄。初頒正朔。

是燕朝。〔合〕鑣鼓奏。金鐙響。寶鞭敲。

鸞旗掣曳拂雲迴。羽騎驂驔躡影來。隱隱驪山雲外聳。

迢迢御帳日邊開。俺安祿山做了大燕皇帝。今日新坐朝堂。隨駕官拿平天冠朕戴。〔戴冠介〕這冠戴得不自在。御製幾句來贊他。平天冠。平天冠。壓得頭痛眼又酸。有朝打碎天靈蓋。要做光頭其實難。〔末〕好一個服周之冕。〔淨笑介〕這是秀才官。只有那四書學問。拿袞衣來朕穿。〔穿衣介〕衣上花花斑斑。是甚東西。〔末〕是虞廷十二章。〔淨〕這衣穿得不自在。也御製幾句贊他。十二章。十二章。

鮑老當筵笑郭郎。若教鮑老當筵舞。舞袖郎當轉更長。〔末〕又道是服之不衷。〔淨笑介〕這官兒擗來擗去。還記得左氏摘奇。且休閒說。俺既登寶位。速傳羽書。以討楊氏爲名。河北之地。望風瓦解。如今先下東都。長驅西入。百萬江山。在吾掌握矣。〔衆〕就此起兵前去。〔行介淨衆〕

〔四邊靜〕橫行鐵騎如風掃。飛虹亘天眇。萬壘肅弓刀。連營列魚鳥。〔淨〕你看這洛陽地面。人不知兵。勢猶捲籜。好喜好喜。〔合〕黃河可超。中原直搗。歌舞入長安。龍文紫宮繞。〔淨〕將校們。此去潼關。是長安要隘。聞得哥舒翰鎮守。他只欺吐蕃部落。怎當得我的前鋒。不日就攻破了。

〔前腔〕潼關百二當秦表。泥封料難保。帳月宿鳴雕。城雲集烏鳥。〔合前〕

秦中自古帝王州。

萬里風烟接素秋。

花萼夾城通御氣。

芙蓉小苑入邊愁。

第二十齣 焚修

〔老尼上〕名門利路兩何憑。百歲風前短焰燈。只恐爲僧心不了。爲僧心了總輸僧。自家法靈寺老

尼悟空是也。俺自到這寺中。白馬駝經。黃龍說法。禪心久定。僧臘已高。當此長夏清閒。且自安禪打坐。正是白日無來客。青山獨坐禪。〔坐介淨丑一小尼上〕心將流水同清淨。身與浮雲無是非。呀。師父又在此入定了。我們且試他一試。〔淨〕我做個白衣大士。我是白衣大士。你那老尼姑法行雖全。宿緣猶在。下界固然擾擾。西方也只漫漫。此間最近渭水。可去尋八十歲的姜太公。結本來之眷屬。完未了之姻親。〔丑〕我便做鳩摩羅什。那老尼姑聽者。我是鳩摩羅什。偶有欲障。必須婦人。天帝勅我與你一交。就生二子。〔合笑介〕弄得他好。〔老尼醒介〕徒弟那有。〔淨丑〕徒弟在此。等師父出定。〔老〕我心已如死灰。何以革囊見試。定是你這兩個搖樁做鬼了。〔淨丑〕師父不要罵。動了嗔心。要變白蟒哩。〔老〕好兩個佛口蛇心。你且去殿上伺候。怕有客來。好生支應。或是女郎。我也與他相見。〔旦貼上〕

〔玩仙燈〕樓閣丹青。祇苑半開蒼嶺。〔貼〕試看花雨長明。幡風飄影。〔合〕峯雲堪
蔭。猶喜火龍初暝。〔旦〕十里松蘿映碧苔。〔貼〕一川晴色鏡中開。〔旦〕遙聞上界翻經處。〔貼〕片
片香雲出院來。夫人。這是法靈寺。早有小尼相候了。〔淨丑接介旦〕令師在麼。〔淨〕待我去報師父。

柳娘子們在此〔老出見介〕何緣蓮駕下及花宮。〔旦〕專待清談兼伸私禱。〔老〕李王孫一向好麼。〔旦〕王孫棄家訪道了。弟子已嫁與韓君平。他叨領科名。官授金部員外。參軍河北。我們到此燒一炷香保祐他。〔老〕原來恁的。老僧全然不知。請到殿上。〔旦〕相去咫尺。兀自不知。〔行介〕家住城南杜曲傍。〔貼〕兩枝仙桂一齊芳。〔老〕山僧都未知名姓。〔淨丑〕始信空門意味長。〔老〕這是大雄寶殿。夫人拈香。〔旦拜介〕長安善女柳氏。頂禮諸天。

〔亭前柳〕嬌婿是韓翃。畫省署高名。他如今呵。過家休汝騎。出塞佐戎兵。〔合〕試憑金粟如來證。供養香燈。願歸早與功成。〔貼〕輕蛾也燒一炷香。我相公與夫人呵。

〔前腔〕連理共枝生。他如今去了。比日卻單行。舊人妨薄幸。短夢悔多情。〔合前末

僕上〕纔趨驃騎府。又到梵王宮。俺是沙府中院子。奉老爺命。齊一炷香到這法靈寺來。此是山門下了。有人麼。〔淨〕沙大叔何來。〔末〕且見你師父。〔見老介〕老師父。俺老爺前因太奶奶病。許下本寺香願。如今全愈。因往隴西巡邊。不得自來。着我代還。〔老〕大叔請殿上拈香。〔末拜介〕

〔前腔〕珠藏普光明。寶筏度迷津。主人驃騎大將軍。沙吒利。因母太夫人有疾。全仗聖力。得

保平安。樹萱憐半萎。說果借重榮。〔合〕試憑金粟如來證。供養香燈。願離障保遐齡。〔背介〕老師父走來。有句私話。這幾位娘子。也是燒香的麼。〔老〕便是。〔末〕前日老爺托老師父尋個房中人。只說沒有。似這娘子。再要怎生好。〔老〕他是韓員外家柳夫人。因家員外遠出。到此燒香。京城女子。那裏有這般好的。法靈慧月陪大叔茶堂告茶。〔末〕俺就回去。及此烟霞暮。相看復欲歸。〔同淨丑下旦〕這是那家。〔老〕這是沙將軍府中人。將軍常托我覓個專房。我出家人。且他太奶奶好不利害。那管這閒事。〔旦〕輕蛾。前日我家的馬。說賣與沙府中。敢就是他。〔貼〕多便是了。〔老〕夫人。請方丈閒話。〔旦〕弟子一語。請印大師。比如一切有爲。何爲正法。三千大界。何界安身。〔老〕夫人。是身非身。是法非法。三千大界。盡屬恆沙。一切有爲。皆如幻泡。試觀見在。便見來生。〔旦〕多承指教。弟子言下有悟了。〔老〕你看這世上人呵。

〔玉胞肚〕塵蹤難定。總虛花勞勞此生。〔貼〕夫人。這寺中分外清涼。〔老〕乍消炎大地清涼。暫棲禪別界空明。〔旦〕我們今日到此。也是前因。〔老〕誰從藥樹解經行。人在蓮臺第幾層。夫人到禪堂一遊。從西廊去靜些。

〔前腔〕〔旦〕西廊人靜。轉東廂禪堂半局。〔貼〕是甚麼香得好。〔旦〕是旃檀觸鼻幽香。〔貼〕堂外海榴花開了。〔旦〕正榴花照眼分明。〔老〕那松下是翻經臺。〔旦〕千株松下兩函經。雲在青天水在瓶。〔貼〕夫人。天色已晚。上車去罷。

〔前腔〕忙尋歸徑。映斜陽浮圖半傾。聽鳴蟬隔水堪悲。看栖禽着樹猶驚。〔旦〕大師就此相別。〔老〕夫人請退。〔貼〕卻早月又上了。一方明月可中庭。遙向清峯禮磬聲。〔老〕夫人。前時相公常到荒山。〔貼〕那玉合兒也在此與我。〔老〕但願相公早早榮歸。再與夫人隨喜。

東巖月在僧初定。

南浦花殘客未回。

爲是仙才登望處。

臨岐終日獨徘徊。

第二十一齣 航海

〔神仗兒〕〔生〕冠帶持節領衆軍上。行邊列隊。行邊列隊。飛塵疊騎。歎關山迢遞。隨處烽煙四起。啣玉命。下彤墀。滿目悲生事。因人作遠遊。西征問烽火。心折此淹留。自家奉命

參軍平盧兼訪范陽消息。誰知安祿山果然反了。先收河北。直破東都。況我家在清池。料他松菊之間。都成荆棘之地。侯節度又拔兵從海上去了。我既已許國。安得顧身。只索速追向前去。啣玉命下彤墀。〔下外侯節度末許俊並戎妝領軍上〕

〔前腔〕流星舉燧。流星舉燧。愁雲曳旆。渡殘兵遼水。三北還期雪恥。呼左袒。振前綏。一望幽燕隔。何時郡國開。東征健兒盡。羌笛暮吹哀。許虞侯。你看反了安祿山這廝。河北一帶。

盡爲賊有。俺且拔兵到此。以避其鋒。前去辟韓員外爲書記。又不知可來否。如今意欲泛海。竟至青州。你道如何。〔末〕主師。此去借淄青之師。控江淮之呢。再圖一舉。可保萬全。〔外〕如此便從海路去。呼左袒。振前綏。〔生領衆軍追上〕啣玉命。下彤墀。〔遇介末〕後來官長是誰。〔生〕韓翊奉詔

參軍。〔末〕啟主帥。韓員外到了。〔外〕快請相見。〔生外拜介外〕久沃蘭芳。幸披芝宇。〔生〕忝參蓮幕。自媿蓬樞。〔末〕參軍拜揖。〔外〕這是虞侯許俊。〔生〕虞侯。你名在五陵。豪俠之雄。〔末〕員外。你詔從三殿。文章之伯。〔外〕韓參軍。賊黨縱橫。驛途勞險。〔生〕特由問道。追及前塵。〔外〕許虞侯。你可從陸路潛行。探取青州事體。到海岸來相會。俺們祭過海神。就開舟了。〔末〕小將卽行。主帥前途保重。正

是沈牛答雲雨。如馬戒舟航。〔下外〕韓參軍。俺差人去看海上水勢。想必回也。〔小生軍校上〕之罘思漢帝。碣石想秦皇。稟爺爺。海勢極平。不必過慮。〔外〕怎見得。〔小生〕小的道來。〔臨江仙〕萬頃沈沈鋪玉鏡。水天上下爭光。文淪細縠引波長。雨師塵欲灑。風伯勢先降。〔外〕怕有甚水怪麼。〔小生〕海若天吳俱遁迹。金臺絳闕微茫。〔外〕如今就可行舟麼。〔小生〕就教一葦定堪航。卻正似洪濤經變野。翠鳥屬成桑。〔外〕叫長年來俟候。〔丑水手上〕黃雲迷鳥路。白雪下鳧舟。〔見介外〕你是長年麼。〔丑〕小的曾見那王母纏腳。彭祖剃頭。委是長年。〔外〕不是。你可是舟師。〔丑〕關關雎鳩。振振麟趾。這都是周詩。〔外〕不是。問你可是水手。〔丑〕然也。〔外〕你那舟好麼。〔丑〕小的舟原有名。〔外〕怎見得。〔丑〕老爺聽稟。〔西江月〕蒼隼還加綵。縵飛龍緊逐長鯨。八槽三翼併戈樓。太白餘皇交鬪。青翰張來翠蓋。靈鷲釣得金鉤。〔外〕這都是說古人的。你的怎麼樣。〔丑〕又好。又好。無邊無底也無頭。〔外〕呀。這卻不漏了。〔丑〕君子居之何陋。〔外生〕你這廝胡說。作速開舟。〔開舟介外〕

〔望吾鄉〕滄海東歸茫茫控地維。翻成浴日滔天勢。下官誓不與此賊俱生。樓船一舉終當濟。眼見鯨鯢逝。〔生〕吾聞太平之世。海不揚波。安有今日。〔外〕古今治少亂多。以此孟

博登車。祖生擊楫。揚波日。擊楫時。莫負澄清志。〔生〕元帥下官一路來不勝去國之思。又作無家之別。名雖星使。跡類波臣。

〔前腔〕趨命東垂。波臣涸轍悲。駕寵鞭石真無計。〔外〕漢朝管寧也。由此渡遼避亂。生我們奔走無成。到是他全名高節。何日皂帽歸遼去。望見那城郭樓臺。想是青州了。這是海市。一到城中盡消滅了。〔生〕人世浮華也只如此。蜃氣看成市。想起那齊桓五伯。猶思共主。魯連匹夫。尙不事秦。望元帥乃心王室。永作純臣。尊周日。蹈海時。莫負朝宗意。〔外〕承教承教。〔末〕許俊衆上。浮雲連海岱。平野入青徐。〔見介〕可喜主帥參軍。布帆無恙。〔外生〕青州事體何如。〔末〕冠帶三千。河山十二。真用武之國也。朝廷又已有詔。主帥仍以平盧節度兼領淄青。專等入城開讀。〔外〕君命既臨。疾趨前進。

胡風千里驚。

漢月五更明。

縱有還家夢。

猶聞出塞聲。

第二十二齣

西幸

〔滿江紅〕〔小生唐皇小旦貴妃末淨內侍老旦貼宮女引上小生〕璫岳金宮。珠箔繞迴廊盡捲。正冰山堪倚。夏雲忽變。〔小旦〕巫峽屏開生綠冷。漢宮妝懶描黃淺。〔合〕是何方許借半天秋。秋當眼。〔小生〕人皆苦炎熱。我愛夏日長。〔小旦〕好風自南來。殿閣生微涼。〔小生〕妃子俺與你行幸驪山。多在秋後。今年來此避暑。別有一種佳處。〔小旦〕妾身方浴湯泉。十分困倦。〔小生〕看你浴後。光似凝脂。潤如餐玉。淡妝銷粉。涼思滿襟。呀。殿前花落苔新。想是一番朝雨了。

〔六犯宮詞〕〔梁州序〕嫩苔生閣。殘英承輦。百尺層巒。蜚觀南薰乍轉。臨闌細鼓虞絃。〔老旦貼〕玉牀銀篋都設在此。〔小生〕你浴來困倦。少睡片時。〔小旦睡介小生〕〔桂枝香〕湘水鋪文簟。宮衣疊素紈。宮娥把團扇來。輕輕扇着娘娘。〔甘州歌〕裁明月。寫合歡。笑看秦女畫乘鸞。〔老旦貼〕那沙邊鷓鴣戲得好。〔小生〕〔傍妝臺〕一任你銀塘鷓鴣沙邊戲。怎如我錦浪鴛鴦被底眠。〔老旦貼〕奏爺爺。娘娘身上出血了。〔小生〕癡婢子。娘娘汗是紅的。〔皂羅袍〕汗流珠雨。香凝翠烟。正華清新浴花枝倦。〔小旦起介〕是何物驚醒我。〔老

旦貼〕是那柳上新蟬。〔小生〕黃鶯早記纖纖。瑤臺夢破。高柳亂鳴蟬。〔小旦〕我方睡起。又早亭午也。〔末淨〕午宴排在芙蓉殿了。

〔前腔〕〔小旦〕蘋香輕度。桐陰初滿。睡起枕痕一線。芙蓉別殿。排當避暑華筵。

〔末淨〕進水晶藕。〔老旦貼〕進綠沈瓜。〔小旦〕雪藕供冰碗。浮瓜薦玉盤。那點點滴滴是珍珠泉麼。〔小生〕這是疏龍激水做成的。〔小旦〕真好涼景。鬢雲溼。臂粟寒。疏龍激水濺

珠圓。〔小生〕叫內侍宮娥都去放舟採蓮。要唱個採蓮歌兒。〔衆應介末淨〕俺們唱。你們和。〔採蓮

子〕菡萏香連十頃陂。〔老旦貼〕舉棹。〔末淨〕小姑貪戲採蓮遲。〔老旦貼〕年少。〔末淨〕晚來弄水

船頭溼。〔老旦貼〕舉棹。〔末淨〕更脫紅裙裹鴨兒。〔老旦貼〕年少。我們唱。你們和。船動湖光豔豔秋。

〔末淨〕舉棹。〔老旦貼〕貪看年少信船流。〔末淨〕年少。〔老旦貼〕無端隔水拋蓮子。〔末淨〕舉棹。

〔老旦貼〕遙被人知半日羞。〔末淨〕年少。〔小生〕這儼然江南風景了。〔小旦〕只聽那歌泉暗

透頻敲竹。又見那舞蓋低擎。試採蓮。夜舒晝偃。妝明笑喧。把蘭舟桂檝淋池泛。

妾已醉矣。且停酒罷。醉厭厭。蘭臺風快。吹酒壓銀蟬。〔丑探子上〕警急烽常報。傳開檄

屢飛報報報。〔淨〕聖駕正與貴妃娘娘在華清宮飲宴。天大的事。也明日來報。〔丑〕軍情緊急。這般時候。還不許俺們見。俺撞進宮門去。〔撞進介〕報子叩頭。〔小生〕這廝急急忙忙來報甚事。〔丑〕小校是郭子儀李光弼差來報安祿山反信的。〔小生驚介〕卻怎生說。快些快些。〔丑〕那安祿山帶甲百萬。擁將數千。收河北之地圖。鳴洛陽之天鼓。好不猖獗哩。

〔風入松〕漁陽鞞鼓動喧天。易水蕭蕭風慘。〔小生〕敢大半是胡兵麼。〔丑〕金戈鐵騎連蕃漢。〔小生〕他無故起兵。以何者爲名。〔丑〕還說到娘娘和楊國舅身上哩。他說着牝雞生亂。又道是雄狐肆姦。〔小生〕如今那兵在何處。〔丑〕僭位東都。做大燕皇帝了。兵渡洛國稱燕。〔小生〕長安與東都。只隔潼關。有哥舒翰領着朔方健兒。料他沒事麼。〔丑〕做官的大家蒙蔽。還不曉得潼關已破。關隴以東都是賊據了。

〔前腔〕朔方兵馬鎮潼關。一夜胡笳吹散。閃將河隴旌旗遍。〔小生〕那一路吏民何如。〔丑〕逃的逃。死的死。賊兵不日攻長安城了。愁不做渚鴻林燕。還辦取雲梯木鳶。看烽火照甘泉。〔小生〕這報子辛苦。內庫支賞與他。〔丑〕謝了。天地日流血。朝廷誰請纓。〔下小生〕

高力士。你可傳旨。即日駕幸蜀中。傳位太子。詔郭子儀爲兵馬大元帥。李光弼侯希逸等副之。各立忠勳。刻期恢復。〔末應下小旦〕宮娥們。可收拾錦幄鈿車。妝奩樂器。從駕西行。〔老旦貼應下小旦跪介〕賤妾蒙陛下厚恩。漁陽之變。妾實兵端。何惜一死。以謝天下。〔小生扶起介〕妃子。他原是借名你們。奈龍運偶遭陽九。料狙智不過朝三。暫爾遷岐。終當興漢。〔末領衆卒上〕八駿隨天子。羣臣從武皇。遙聞出巡狩。早晚遍遐荒。高力士奏陛下。邊信更嚴。敵氛甚惡。就請發駕。〔衆行介〕

〔玉山頽〕〔小生〕六龍飛傳。度高標。蠶叢路難。佇中興。鶴駕臨軒。料東征。鯨封成觀。〔末〕蜀都是錦繡之鄉。花鳥之地。請寬聖懷。〔小生〕高力士。怎忘得長安麼。錦城春綻。瞻隴首。秋雲夢遠。渭水無時返。望長安。百官何日再朝天。

〔前腔〕〔小旦〕蛾眉幽怨。怯春心。難託杜鵑。曲迴腸。學字巴江。引飛魂。連雲天棧。〔末〕娘娘當指日還宮。不消悲泣。〔小旦悲介〕嬌啼轉盼。似帶雨梨花數點。界破殘妝面。望驪山。九疑如黛隔湘川。〔小生〕來到何處。〔末〕前邊是馬嵬了。〔小生〕天晚駐駕。百官有赴行在者。即許隨侍。〔末〕承旨。

月殿真妃下綵烟。

漁陽追虜及湯泉。

君王指點新豐樹。

幾度親留七寶鞭。

第二十二齣 祝髮

〔霜天曉角〕〔旦貼上〕秋風暗遞。一片邊聲至。〔貼〕客似行雲東去。心隨大火西飛。〔集浣溪沙〕〔旦〕萬戶傷心生野烟。千門空對舊河山。紅衣落盡暗香殘。〔貼〕幾處吹笳明月夜。何人倚劍白雲天。百年多在別離間。夫人。城中人都說安祿山奪了東都。殺入潼關來了。我們何處避好。〔旦〕輕蛾。相公久在行間。京城忽生兵變。似我治容。恐遭毒手。想起法靈寺最近長安。老尼又是舊識。到不如剪髮毀容。投禪寄跡。天倘見憐。賊平之後。再得會丈夫一面。就不然也好全身保節了。〔貼〕夫人所見極是。輕蛾也願隨行。〔旦〕又一件。這般兵荒時歲。寺中齋供甚難。我前日燒香。見那熙陽觀只隔數里。且是女冠。你去做個道姑。早晚往來。卻不兩便。〔貼〕既然如此。我辦了鏡子剪刀。在此。再到門前打聽賊信報你。正是寧爲太平犬。莫作離亂人。〔下旦對鏡介〕頭髮不是我獨虧你。古人也有披髮佯狂。斷髮文身的。只我自丈夫去後。久不治妝。一種妖嬈。萬般憔悴。縱使人見。安得

似前。我還要翦你爲尼。是我過慮了。

〔小桃紅〕蟬鬢翠減。螭首蓬飛。尙恐人多忌也。〔剪髮介〕玉翦將伊斷。膏沐爲誰施。休束帛。且披緇。髮我旣翦了你。說甚麼縮如雲。滑如脂。眞道是何須鬢也。恨結髮空教人兩處。柏舟詩上道是髮彼兩髦。實維我儀。我今日翦髮呵。諒之死無移。誦彼柏舟詩。〔貼急上〕夫人。賊已薄城。聖駕奔蜀了。

〔下山虎〕笳吟壁月。織冷機絲。葉滿空宮裏。變輿忽的遠馳。夫人。我便做道姑去。縱不得跨鶴遊仙。且伴孤鸞暫棲。聞得相公與侯節度泛海去青州了。想歸海樓船未。有期。夢與飄風會。似斷梗飄萍誰可繫。〔合〕形影聊相倚。白首怎離。歎息人間萬事非。夫人。你把伽帽緇衣扮起看。〔旦扮尼姑介貼〕夫人。你就似佛前的天女。〔旦〕你把星冠羽衣扮起看。〔貼扮道姑介旦〕輕蛾。就似王母前頭的許飛瓊。

〔蠻牌令〕〔貼指旦介〕天女似獻花枝。〔旦指貼介〕飛瓊似赴瑤池。輕蛾。那玉合兒是相公當原的。須帶隨身。其餘家計。費用將完。縱有些須。也顧不得了。贏得蕭蕭身獨自。雲外

去。月中歸。〔貼〕只圖伊珠還劍合。儘拋他玉豔金輝。〔合〕待重來長安帝畿。只恐人民城郭半非。〔內喊介貼〕夫人消息甚緊。快出門去罷。〔旦合〕

〔尾聲〕城頭鼓角驚秋氣。腥風不斷九衢吹。這等時候。豈在我和你。少甚王孫泣路岐。〔內喊旦貼下〕

第二十四齣 兵變

〔水底魚〕〔淨安祿山領衆卒上〕羯鼓羌歌。東來滿駱駝。秦城北斗。渭水似天河。將校們。且喜那隴地俱平。長安已近。唐皇逃去蜀中了。大家奮勇入城。論功行賞。秦城北斗。渭水似天河。〔下旦尼妝貼道妝上〕

〔前腔〕載道干戈。烟塵混綺羅。偷雲掩月。誰識是仙娥。輕蛾賊兵早已入城。聞說是孤寡僧道。都不殺害。我們速向前去。偷雲掩月。誰識是仙娥。〔內喊旦貼驚散下淨衆卒上〕

〔前腔〕殿閣嵯峨。西來王氣多。千門萬戶。錦繡漢山河。衆官們扈駕入紫宸殿。梨園樂部都到凝碧池供奉。千門萬戶。錦繡漢山河。〔下末王子小旦宮女急上〕

〔前腔〕擊斗鳴螺。因風想玉珂。白衣王子。紅袖泣宮娥。〔下旦上〕

〔縷縷金〕心兒怯。步兒那。褊衫看拂縐。着人拖。〔跌介〕半折紅鬃綻。行行坎坷。

遊兵一衝。各自逃避。怎不見了輕蛾。含顰何處問輕蛾。悽惶獨留我。輕蛾。輕蛾。〔內喊介〕

旦〕呀。賊又來了。只得前行。且尋法靈寺。含顰何處問輕蛾。悽惶獨留我。〔下貼上〕

〔前腔〕身隻影。淚層波。悠悠思遠道。隔山陂。〔整冠介〕一束香雲繞。冠兒怎裏。夫

人。夫人呀。何處去了。翻飛折翮轉蓬科。虛弦獨驚我。此非久停之處。想起李王孫行時。說

只在鍾華二山。只得那裏尋他。再作理會。〔內喊介貼〕翻飛折翮轉蓬科。虛弦獨驚我。

〔下〕

第二十五齣 逃禪

〔瑣窗寒〕〔旦尼妝上〕避豺狼道路縱橫。涉水盤山不記程。且喜隨路行來。賊鋒漸遠。

月明中望見那朱甍畫棟。多是法靈寺了。趨向前去。向雞園託跡。虎口逃生。眉愁翠斂。

容羞紅潤。怕難藏舊家行徑。此間已是山門下。門掩在此。〔敲門介〕開門。開門。扣門鐘殘。

月午篆烟輕〔內問介〕是誰扣門。〔旦〕早有人應了。隔牆誰啓朱唇。〔老旦老尼丑小尼執燈上〕

〔東甌令〕燈青暈。月黃昏。〔窺介〕像是個女僧麼。想像紅顏是法身。〔開門見介老尼〕呀。果然一位師兄。這時候呵。秦城金鼓連天震。甚處相投奔。〔旦〕特來奉投上方。〔丑〕好寶相。敢是一位活菩薩麼。〔老旦〕師兄莫怪我說。你不似慣出家的。看風流一種暗生春。難道個中人。〔丑〕你們月下坐談。我取茶來。塵中人自老。天際月常明。〔下老尼〕師兄年來行脚。請示同門。〔旦〕師父聽啓。一言難盡。

〔三換頭〕胡塵乍驚。家緣都罄。風流誤也寄空門。此生。〔老〕只怕你剃頭不剃心哩。〔旦〕如今也都罷了。妬嬌愁靚。這其間又誰把那心旌似舊時閒引。〔老尼〕可原有夫麼。〔旦〕不敢相瞞。先曾有夫來。缺月人孤影。浮雲壻遠征。〔老〕我左顧右盼。你到像是柳夫人。怎麼至此。〔旦〕師父。弟子就是柳氏了。一意歸依。做今日花前學誦經。〔老〕呀。原來果是夫人。我曉得你意兒。只因那月貌花容。怕有些風吹草動。

〔劉潑帽〕因此上金刀細剪雙鴉髻。似髻鉗季布藏名。這寺中粗茶淡飯。且度時光。員外不日榮歸了。伊蒲薄饌堪同進。待虜平終有日圖家慶。〔旦〕我已無家可歸。那望這一個日子。師父升坐。待弟子拜禮。請賜法名。〔老〕貧僧原是悟空。夫人便名做非空罷。明日以後。只做師弟相稱了。

亂離無處不傷情。

半夜中峯有磬聲。

願得遠公知姓字。

焚香洗鉢過餘生。

第二十六齣 入道

〔逍遙樂〕〔小生道妝上〕舊事空回首。幾度鸞書曾到否。仙壇醮罷碧雲流。千層弱水。萬里瀛洲。一息神遊。早服還丹無世情。琴心三疊道初成。遙見仙人綵雲裏。手把芙蓉朝玉京。俺李王孫棄家訪道。徑入中條。見張果尊師。他教我納新吐故。卻老還童。來這華山雲臺觀。做個羽人。明星夜禮。靈藥朝修。綠簡丹文。指日形骸欲委。青天白日。冲霄羽翼將生。住此數年。不覺又是初秋了。且自散步閒行。也可乘時觀化。看這華山景物呵。

〔金井水紅花〕玉井蓮將晚。金天草易秋。遙見五城樓。翠華流。三峯如繡。一片殘霞斜日。仙掌雨初收。信人世有丹丘也囉。俺想遊仙的人。自有幾多樂處。比如那塵世中膠膠擾擾。迫迫忙忙。一霎榮華。千年富貴。都只好做話柄了。我自研朱滴露。弄管迎風。掃石眠雲。笑揭乾坤雙袖。看你峨冠委佩。羞人沐猴。任你誇能鬪智。驅人火牛。滄桑無主。一着殘棋後。這搭兒瀑布飛流。青松夾道。將蒲團打坐一回。正是科頭箕裾長松下。

白眼看他世上人。〔坐介貼輕蛾道妝上〕

〔前腔〕故國無歸處。隨方作遠遊。吹角動邊愁。幾時休。朱顏非舊。一簇哀猿啼鳥。前路晚山稠。待花下問漁舟也囉。〔小生〕遠遠望見人來。且自回觀去也。〔行介貼〕前邊

有個道人來了。待去問他。看他高標野鶴。古貌長松。散跡雲間。卻趁天風歸岫。〔見

小生介〕仙長稽首。〔小生〕道姑何來。〔貼〕數年前有個李王孫。在這華山麼。〔小生〕這裏沒有甚

李王孫。既別數年。想多不在了。他原是何人。〔貼〕他是青門覓隱。東陵故侯。〔悲介〕怕做銅臺望幸。西陵故塚。不敢造次。仙長到像李王孫。劉郎今日一似栽桃後。〔小生〕你是何

人〔貼〕是他侍女輕蛾。〔小生笑介〕我道你也像他。〔貼〕呀。這等仙長是李王孫了。〔小生〕韓君平
和柳姬何在。你爲何道妝起來。〔貼〕王孫尙自不知。韓相公次年及第。官授金部員外。因去平盧參
軍。安祿山這賊攻破長安。夫人猶恐不免。剪髮爲尼。我也做道姑了。〔小生〕怎生你一人來。〔貼〕當
時要一投法靈寺。一投熙陽觀。行至中途。遊兵衝散。我特來華山相訪。欲託餘生。兼尋前約。〔小生〕
原來恁的大亂了。我這山中人那裏曉得。正是尙不知有漢。又安知魏晉乎。

〔玉鶯兒〕東王北斗。鬱藍天瓊宮玉樓。只圖將落翮神霄。可知他牧馬皇州。韓
君平。韓君平。你旣得佳麗。又享科名。何等榮華。到如今兩下飄零。不如我蕭然無累了。鴛鴦錦
綉。龍庭荆棘。看飄零轉眼繁華後。〔合〕總悠悠。千秋靈氣。仙籍在高頭。我住在雲
臺觀。此去數里。有個蓮花庵。都是女冠。你可從柳姬姓柳。那里入道去好。〔貼〕我到幸遇王孫。尙有
栖身之處。不知我夫人流落何方。

〔前腔〕孤身奔走。憶多嬌何方逗遛。恐棲禪怖鴿難安。似離羣旅雁誰投。〔小
生〕道家清淡。你敢還想着當時哩。〔貼〕物極則衰。華落必賤。也一意清修了。紅絲滿壚。香羅

半鈎。到如今蕭蕭花落銀牀後。〔合〕問仙遊願隨笙鶴。時過北山頭。就此別了。〔小生〕待我過數日到庵來看你。

頭白金章未在身。

唯將雲鶴自相親。

舞衣施盡餘香在。

一飯胡麻度幾春。

第二十七齣 通訊

〔破齊陣〕〔生冠帶上〕故國初來白雁。高秋乍攬青貂。亂杵驚風。悲笳弔月。絕塞離心如擣。玉繩低度。雙星渺。銀漢斜分一水遙。何由駕鵲橋。〔少年遊〕長安古道馬遲遲。高柳亂蟬嘶。夕陽鳥上。秋風原上。目斷四天垂。歸雲一去無蹤跡。何處是前期。狎興生疎。酒徒蕭索。不似去年時。自家參軍來此。又是數年。所幸太子早踐鴻基。祿山已遭獍難。兩京光復。大駕西還。只是那長安破後。宮殿灰飛。士民星散。知我柳姬存否何如。哎。縱免他壁碎珠沈。少不得雲孤月寡。風塵荏苒音書絕。關塞蕭條行路難。〔外侯節度冠帶引衆上〕

〔七娘子〕油幢畫戟營邊徼。看秋烟遍傳千竈。大角猶纏。前星喜曜。夢魂終夜

長安道。〔生見介〕元帥拜揖。〔外〕參軍拜揖。〔生〕元帥可喜長安已平。多想朝元有待。〔外〕參軍下官遞守東隅。師徒左次。坐觀賊敗。生戴君籬。何如泛五湖之舟。歸南岡之步。

〔傾杯玉芙蓉〕玉輅重歸萬國朝。逆節張天討。誰做得痛哭包胥。狙擊留侯。出塞嫖姚。傳聞晉水興龍詔。空負邊塵涯馬勞。還長嘯。這丹心自老。卻正是可能無意向漁樵。〔生〕元帥。青徐稀警。海甸宴安。此皆由節度先聲制人。洪威及遠。卽今那三方多難。餘孽猶存。聞得李太尉又代郭令公爲將了。元帥就露表請朝。連兵討賊。豈不是身名俱泰。終始兩全。

〔前腔〕坐鎮軍聲壯海濤。賜履猶堪表。儘着你撫臂淄青。扼吭江淮。舉足燕遼。好將馬革孤忠效。莫學鴟夷萬里逃。還長嘯。把中原汛掃。試聽那夷歌幾處起漁樵。〔外〕承教承教。下官便振旅長驅。參軍望同心掎角。〔生〕願依大樹。一借前籌。〔外〕權且告別。國待賢良急。〔生〕君當拔擢新。〔合〕佩刀成氣象。行蓋出風塵。〔外下生弔場〕我數日間又要從侯節度赴義河陽。長安漸近。先遣一介西行。討問柳姬所在。這般亂後。縱好也只留得一身了。如今把

個練囊盛着麩金百兩。權寄他爲朝夕之費。哎。柳姬。柳姬。想起你來。且都不要說別的。只你那窈窕的身兒。溫存的性子。也就有無窮想處。

〔玉芙蓉〕柔香蕙性調。膩玉蘭芽小。看輕留。嬾綉。弱映生綃。我與你在家時。少甚麼唱隨。管幾多風韻。喬郎慣處。兜郎笑。得您愁時護您驕。〔合〕章臺杏。問青青柳梢。怕則怕有人攀折。最長條。我就把此意吟成一詩。題在練囊之上。〔沈吟寫介〕章臺柳。章臺柳。昔日青青今在否。縱使長條似舊垂。也應攀折他人手。詩已題了。想我柳姬到渭河相別。眉峯鎖黛。泪雨成珠。道是若逢江上使。須寄隴頭人。自別去數年。那泪痕點點滴滴。尚在那衫兒上。卻纔寄得這一封書。教他怎不怨我。〔怨介〕

〔前腔〕難將玉筋消。兀少瓊書報。做長征不返。短行無聊。只一件。這幾年長安城中。閭里成墟。門庭易主。知可尋得他着麼。庭花月冷。將鶯老。野樹春殘。只燕巢。〔合前〕奚奴那有。〔末上〕家在夢中何日到。春來江上幾人還。相公有何使令。〔生〕我命你去長安。尋訪夫人消息。〔末〕盜賊縱橫。關途阻塞。怕還去不得哩。〔生〕長安久已平復了。只是我羈身王事。不能早歸。

試說你聽。

〔雁來紅〕浮雲散白日高。計遊程歲月遙。夕烽雲外傳光小。西望空城笑。歎人事音書漫寂寥。〔合〕虛年少。何時大刀鏡常圓。人孤照。〔末〕小人省得相公與夫人呵。

〔前腔〕他比芳芸綴露翹。你倚扶桑界日標。自天涯春動王孫草。車馬關山道。想便入空房守寂寥。〔合前生〕這裏有麩金百兩。先寄夫人用度。哎。昔日秋胡的妻。怨其夫懷

金。陌上投水而死。我卻不是那般人。

〔朱奴兒〕聊仗取黃金用饒。休猜做紫陌心挑。這練囊上是寄夫人的一首詩。匹練裁囊動彩毫。也不是白頭風調。奚奴。你敢怕失記夫人模樣了。〔合〕如花貌。纖纖細腰。須想像尋音耗。〔末〕相公不久還朝。且少憂憶。小人去長安。一定尋個下落。

〔前腔〕算不少魂飛夢搖。也多爲粉悴胭憔。做青鳥啣書海路遙。應直上玉京瑤島。〔合前生〕奚奴早去早還。到洛陽城來會我。

洛陽城裏見秋風。

欲作家書意萬重。

復恐匆匆說不盡。

行人臨發又開封。

第二十八齣 感舊

〔月兒高〕〔貼輕蛾道妝上〕蕊珠宮殿。神仙分還淺。擺不脫凡心在。空強使甜津
燕。閒夢多情。霎時間半偷展。罷罷罷。我既度清虛境。也只索把塵蹤斷。正是花
落花開自一年。不信天台別有緣。〔女冠子〕求仙去也。翠鈿金篋盡捨入巖巒。霧捲黃羅帔。
雲雕白玉冠。野烟溪洞冷。林月石橋寒。靜夜松風下。禮天壇。貧道本柳家侍女輕蛾。向因兵亂。與夫
人中途相失。來到華山。得遇李王孫。就此蓮花菴做了道姑。不覺又是數載。想我夫人雖曾削髮爲
尼。不知當時得到法靈寺否。我縱然遊方之外。豈無戀主之情。這幾時好放他不下也。

〔前腔〕歲華驚電。佳人珮環遠。雖已有空門約。怕又落他庭院。回首家山。瞻雲
淚痕滿。聞得昔時神僧杯渡。列仙御風。相見何難。今日呵。他怎做浮杯渡。我枉說乘風便。
正是千里相思一線牽。須信前生未了緣。與李王孫說。我還下山去。到長安近處。訪個消
息。卻不是好。

人作殊方語。

鶯爲故國聲。

懶多山水趣。

稍解別離情。

第二十九齣 嗣音

〔憶秦娥〕〔旦尼妝上〕空拖逗。愛離兩字難參透。難參透。夜燈風外。曉鐘霜候。〔集

漢魏詩〕結髮爲夫妻。皓首以爲期。骨肉緣枝葉。根株不傾移。嘉會難再遇。遊子暮何之。行役在戰場。慷慨有餘哀。微陰盛殺氣。悠悠隔山陂。寄身雖在遠。賤妾常獨依。浮雲日千里。想見餘光輝。涼風率已厲。將從秋草萎。願君崇令德。枉駕惠前綏。妾身投入法靈寺。忽經數載。韓郎參軍河北。近說轉徙山東。多只爲王事賢勞。賊徒充斥。因此尺書不及。一介無聞。噯。我寄跡在此。就是你有個人來。教他何處尋我。想起從初到今呵。

〔二郎神〕分飛久。記當年在紅樓罷繡。立馬長楊相邂逅。這也虧殺李王孫。將雲做雨。拈成一段風流。總百歲無多常廝守。誰待識別離儻懣。甚封侯。悔輕教夫婿浪卜刀頭。

〔前腔〕休休。雖難到眼。如何下口。我是如此說。也未必他心能念舊。前番兵亂。便是楊妃也死在馬嵬了。佳人薄命。金鈿碧海虛投。我要死裏尋生。閒着手。向空門暗藏機殼。只是我累這頭髮了。鏡奩收。真道是無端禍到臨頭。這轉輪藏中有經在此。翻一翻。〔翻經介〕末僕持囊上。萬里家遙三載別。一封書寄數行啼。俺是韓相公家奚奴。相公着俺來長安訪柳夫人消息。這長安兵荒之後。真個是第宅皆新主。衣冠異昔時。那裏去尋他。聽得一路人說。法靈寺近日有個尼姑。才色雙絕。原是達官人家。到像俺夫人行徑。俺一直投這寺來。〔進介〕呀。禪堂上一個尼姑翻經。果然似夫人一般。且竟去問他。〔見介〕柳夫人。韓相公有信在此。〔旦〕客官何來。是甚柳夫人麼。〔末〕夫人。你怎忘了。小人是奚奴。相公特遣來尋訪夫人。〔旦認介〕呀。果是奚奴。〔悲介〕相公好麼。〔末〕相公平安。小人來城裏城外都已走遍。偶來此處。不意得遇夫人。〔旦〕

〔轉林鶯〕章臺何處尋畫樓。碧雲天外悠悠。〔末送囊介〕相公書就寫在練囊上。囊裏有麩金百兩。〔旦看囊介〕原來是一首詩。問青青今日那還又。怕他人再折春柔。哎。這卻說差了。縱使長條似舊。怎猜做陌頭垂柳。他只道我還似當時哩。枉追求。楚王宮

裏。腰細漸驚秋。相公一向在何處。敢也憶着長安麼。〔末〕

〔前腔〕東方千騎居上頭。望長安不見人愁。投至得家書烽火後。把囊金特地相投。〔旦〕我出家人要這金來何用。〔末〕夫人權做清齋生受。終有日舖糜同守。〔旦〕悲

〔介〕知他幾時歸來。〔末〕且寬憂。隨陽孤雁。歸路及清秋。相公願望回報。夫人作速寫書。〔旦〕我也把鮫綃一幅。寫詩一首答他。〔沈吟悲介〕我這首詩管着幾多心事。

〔啄木鷗〕含新怨。理舊愁。打併鮫綃詩一首。〔寫介〕楊柳枝。芳菲節。所恨年年贈離別。一

葉隨風忽報愁。縱使君來豈堪折。〔末〕夫人。看你這樣文才。何減蘇蕙。只是俺相公須不比竇安南。

〔旦〕便做道織錦回文。這千絲萬縷難抽。〔末〕相公近在河陽。夫人不如去那裏相會。

〔旦〕這般時候。我孤身怎麼去得。看芳菲節變蕭森候。做洛陽一葉隨風透。倩誰收。寒波九曲。還是寄鱗遊。奚奴。你把這鮫綃帶去罷。〔末〕小人去就對相公說。夫人別後呵。

〔前腔〕熒熒兔。泛泛鷗。夢斷雙蛾春後柳。〔旦〕到他來時。知我還在麼。〔末〕小人省得。怕桃源誤卻仙郎。教他早辦歸舟。又一件。似你才貌。就是翦髮毀容。猶恐招人耳目。比如那六

祖隱于獵家一十九年。今後更要深藏些。你心兵緊按休交鬪。那禪鋒好祕休輕漏。
〔旦〕怕他要淹留哩。〔末〕相公也只無奈。肯淹留。洛陽雖好。不爲看花遊。小人去了。〔旦〕
你再說與相公。〔哭介〕

〔隔尾〕休爲我耽消瘦。道閨中少婦不曾愁。〔末〕夫人放心。俺相公呵。管取衣錦歸
來當晝遊。〔下老尼上〕塵情良易著。道性故難溜。師弟。你自入寺來。頗能擺落。今日卻爲何啼哭。

〔旦〕不欺師父。韓郎遣信到此。不覺故態復萌。情緣難斷。〔老〕這練囊是他寄來的麼。〔旦〕是了。
〔指囊介〕

〔簇御林〕這是無明網。屈曲鈎。鈎情濃把恨兜。〔老〕你將何物答他。〔旦〕他寄我麩金
百兩。囊上是一首詩。也寄一首詩答他。〔老〕將近授衣時節。你何不寄件征衣麼。〔旦〕縫裳難
忖他肥瘦。況無衣我更臨霜後。〔合〕謾凝眸。鴻來燕去。秋老白蘋洲。〔老〕相公既有
信來。便不忘你。也就歸了。

〔前腔〕他金囊贈寶札。修轉星鳥會女牛。這金呵。歸來佩印還如斗。又何須買

賦長門後〔合〕謾凝眸。關關匹鳥。相詠在河洲。〔丑僕上〕松竹閒僧老。雲烟曉日和。俺是沙府中沙虫兒。老爺聞知韓員外家柳姬。在法靈寺爲尼。分付俺只做太奶奶喚他師徒講經。待到府中。憑他區處。這里是寺中了。〔見老尼介〕老師父。沙府太奶奶生日。要誦蓮華經。聞你有個新來徒弟。法律最精。請你二人到府中來。〔旦老尼背語介旦〕師兄。還是去好不去好。〔老〕太奶奶平昔好善。他老爺原是吐蕃大將。歸順我朝。近日立功隴西。十分得寵。怎生違得他。〔旦〕如此領教。〔老轉介〕大叔拜上太奶奶。自當奉命。〔丑〕俺回復去。聞鐘投野寺。乘月過前溪。〔下淨丑二小尼上〕罷經來宿鳥。支策對秋山。師父們在此做甚。〔老〕這囊中是韓員外寄柳夫人的金子。你們可收進去。〔淨〕待我來拿。〔做倒介〕不好了。我一發動憚不得。〔丑〕你從來強健。今卻怎的。〔淨〕這叫做財多身弱。〔丑〕待我來拿。〔做倒介〕不好了。我待死休。快買沙板。〔淨〕卻怎的。〔丑〕這叫做財旺生官。〔淨〕呀。這囊上原有字。我們若識得的。就收這金子。〔丑〕拿來我識。〔沈吟介〕金子是我的。〔淨〕你一字不識。怎生要這金子。〔丑〕一字不識的。到有金子哩。〔老〕休要囉唆。隨我去罷。

高秋望斷正長吟。

關塞迢迢故國心。

假若應時還得見。

須知勝似岳陽金。

第二十齣 奏凱

〔步蟾宮〕〔小生李太尉小末李抱玉戎妝領卒上〕坐整龍驤開虎帳。平鼠寢易如翻掌。雲高太甲映明堂。〔合〕行見凱聲歡暢。捲旆生風喜氣新。早持龍節靜邊塵。漢家天子圖麟閣。身是當今第一人。下官李光弼是也。本營州人。屢以戰功。晉位司徒。近加太尉。只爲國家多難。祿山始平。思明復起。如今史朝義又已弑父稱尊。河洛悉爲戰場。幽燕是其營窟。蒙主上命俺總統六師。討平諸鎮。李抱玉那有。〔小末應介小生〕俺取徑陳留。你可潛薄河陽。聞得侯節度韓參軍部兵自淄青赴義。但得諸軍如此。賊不足平矣。待他來再作計議。〔外侯節度生韓參軍戎妝衆卒上〕

〔前腔〕〔外〕列戟環轅遙入望。傳節鎮令嚴威壯。〔生〕檀車駟馬卽戎行。金石何時歸賞。〔外〕此間是李太尉營前。將校們通報。侯節度等到此。〔卒報介小生〕疾忙請進。〔外小生見拜介小生〕三月師逾整。〔外〕羣凶勢就烹。〔小生〕瘡痍親接戰。〔外〕勇決冠垂成。〔生小生

拜介生。妙譽期元宰。〔小生〕殊恩且列卿。〔生〕安危仍屬從。〔小生〕莫作後功名。〔外生〕聞得太尉代郭令公。軍麾不動。氣象一新。真在玉帳之中。圖上金城之略。〔小生〕節度東方留守。可當節制之師。參軍西第稱賓。足具先謀之伐。〔外生〕願依左律。一效中聲。〔小生〕下官刻期進兵。專候諸君見顧。節度帳下有虞侯許俊。義勇之士。何不相從。〔外〕下官帶來臨淄十萬戶。卽墨五千人。是他爲殿。以此來遲。〔小生〕下官料此賊一戰必敗。敗則必奔幽州。已遣僕固瑒等伏兵追擊。前哨官可傳一令。許虞侯竟提一枝兵去助他。不須來此。〔衆應傳介小生〕俺們卽此拔營。前到橫水。與回紇朔方兵合。倘遇賊來。卽便接戰。〔衆行合〕

〔錦上花〕一戰虜名王。直搗河陽。雞田衆合。虎旅威張。陣堂堂。陣堂堂。管劍倚崆峒上。〔下丑史朝義淨田承嗣戎妝領軍上〕

〔前腔〕將勇與兵強。拓土開疆。看三河霧捲。九鼎天亡。氣堂堂。氣堂堂。管位正飛龍上。〔淨〕田承嗣見。〔丑〕田將軍。李光弼師次洛陽。又來個侯希逸。他們部伍十分嚴整。好生隄防。〔淨〕不妨。不妨。輸了也少不得你個平頂冠。〔丑〕卻怎麼。〔淨〕你去了頭。自然平頂了。〔丑〕

你也少不得封個並肩王。〔淨〕卻怎麼。〔丑〕你去了頭。卻就並肩了。〔淨〕都好利市。只管殺向前去。
氣堂堂。氣堂堂。管位正飛龍上。〔行介小生外小末生領衆上〕陣堂堂。陣堂堂。管劍
倚崆峒上。〔遇介小生〕向前打話。〔衆〕俺這裏是李太尉侯節度親自領兵。〔丑〕俺這裏是大燕史
皇帝親自領兵。〔小末〕鑾鈴響處。李抱玉當先出馬。〔淨〕綵旗分處。田承嗣當先出馬。〔戰淨輸介
外出介〕你那反賊。敢曉得侯希逸麼。〔丑〕待朕決戰。〔出介〕侯節度。唐事已去。天命在吾。何用多
言。〔戰丑輸介衆合戰丑淨輪走下外〕俺們作速追去。務誅此賊。〔小生〕且住。窮獸勿逐。窮寇勿追。
俺們只大師徐躡其後。又一說。怕他詐敗。或有伏兵。須若大敵之臨。莫作中軍之好。發號前去。〔衆
行介〕

〔柳搖金〕驚塵已蕩。遊魂暫揚。河上莫徜徉。日羽朱烏耀。雲塵畫隼張。前後連
營合隊。前後連營合隊。左右翼分行。管周歸玉馬。夷歌白狼。〔合〕縱金太社。著
帛旗常。太社旗常。看取功成有象。〔末許俊戎妝上〕幾時回節鉞。戮力掃邊槍。〔見介〕太尉。
許俊參見。〔小生〕許虞侯你來了。史朝義今在何處。〔末〕史朝義自前敗去。欲還幽州。僕固場合小

將等追及漁陽。他就醫巫閭祠下縊死。降將李懷仙傳首京師去了。雍王及僕固元帥們侍候太尉早臨。調停河北東都事體。〔外小生小末〕太尉妙算。允服輿情。〔小生〕候節度。你可同韓參軍。便傳露布。先到長安。下官調停事畢。卽與李將軍改解國之軍容。舉飲至之曠典。〔外〕謹依尊命。〔小生〕就此別了。不改周南化。〔小末〕仍分趙將憂。〔外〕雙旌過易水。千騎入幽州。〔小生小末衆前合先下外〕河陽之役。預有微功。皆由參軍指訓。〔生〕元帥虞侯如此元功。自宜懋賞。〔外〕將士們班師回朝。

〔前腔〕前籌坐帳。東方破戕。黃髮袞衣裳。橫吹先傳鷺。妖星已射狼。此際玉關生入。此際玉關生入。幾載臥沙場。喜神京日近。微垣夜光。〔合〕還軍細柳。扈帝長楊。細柳長楊。看取凌烟畫像。

月蝕西方破敵時。

及瓜歸日未應遲。

斬胡血變黃河水。

梟首當懸白鵲旗。

第三十一齣 砥節

〔梨花兒〕〔淨沙將軍丑僕上〕鶻突做官風耍性只少一個貌傾城。村的醜的偏守命。〔丑譚介〕嚙。奶奶知時請一頓。〔淨〕千金不惜買蛾眉。揀得如花三四枝。若使得他心肯日。多應是我運通時。自家歸義王沙吒利的便是。俺本吐蕃部落。投順唐朝。屢立戰功。竟承茅土。卽今這寶應皇帝。好生愛俺。恩分甲第。何言去病無家。寵出宮懸。豈止和戎賜樂。俺雖是個番將。烟花心性。風月襟懷。府中頗有數十房侍兒。卻少一兩人可意。長安城中。只有那章臺柳。色豔無雙。才情第一。到落在韓翃之手。向年俺院子曾在法靈寺見來。訪得他近入此寺爲尼。改名非空了。俺母親一向好佛。前遣沙虫兒去說。太奶奶請到府中誦經。他畏我的勢。許着就來。倘若來時。卻也不問原由。只要從俺。沙虫兒。這般時候。如何還不見到。〔丑〕他敢就到。只一件。俗說一來沒惹油頭。二來莫惹光頭。他先是油後是光的。不要惹他。〔淨〕胡說。光則光着他。由則由得我。〔丑〕又一件。這風流行中。當以情親。莫以勢壓。老爺要近人。也放溫存些。〔淨〕漢家自有制度。你且去府門前打聽。〔丑應介老尼旦尼上〕

〔三臺令〕〔老〕半空樓閣丹青。花柳長安錦城。〔旦〕應召赴侯庭。怕春在泥燕

捎鶯〔老〕師弟來到沙府門前了。小心進去。〔旦〕此來勢不自由。事出無奈。全望師父調停。同來同去。〔老〕憑他怎生。決不可說出你相公來。〔旦〕知道。〔丑〕二位師父請進。〔旦老見淨叩頭介淨〕你這是悟空老尼。那就是非空的麼。〔老尼旦〕便是。〔淨〕看他雖是禪蹤。自然冶態。正是那天生尤物。世不虛名。小尼姑。你方在妙年。空門冷落。不若住俺府中。喫些安樂茶飯如何。〔旦〕塵世無緣。禪心久習。難從尊命。請勿多言。

〔山坡羊〕影幢幢蓮燈秋淨。氣寥寥蒲團人定。〔淨〕女奴們捧妝奩來與他。〔旦〕我已斷髮。將何飾妝。碧圓圓空盤髻螺。一絲絲久斷雙鸞鏡。〔背介〕魂暗驚。盈盈汨欲傾。前緣一夢。一夢三生醒。怎撇牛車來驂魚乘。〔淨〕不是你吹笙鼓瑟的佳人。孤負俺惜玉憐香的子弟。〔旦悲介〕吞聲。銀字笙寒炙不清。傷情。心字香殘爇不成。〔老尼〕哎老爺。你後宮那少這一個人。

〔前腔〕錦層層圍屏幽靜。翠重重閒房嬌倩。他怨悠悠香銷玉沈。亂紛紛碎滴珠囊迸。〔淨〕那老尼還要勸他。〔老〕貧僧是老年的人了。我難主憑。蕭蕭兩鬢星。他初來面

腆且從容些。你牢寵好放。好放些。兒緊怕做寶瑟摧絃。銀餅落井。〔淨怒介〕把那老尼扯出去。〔旦抱老尼哭介老〕他別是一般人。怎好勸得。休輕。不是陽臺暮雨行。閒評。卻映冰壺夜月明。〔丑扯老尼下淨〕俺適方是怪那老尼。不是怪你。你既有這般麗色。卻怎好挫過芳年。

〔憶多嬌〕看你容滿月。膚勝雪。芙蓉帳冷單枕怯。空使泪染桃花雙袖。腕。〔丑合〕試聽啼鳩。試聽啼鳩。轉眼芳菲易歇。〔旦背介〕我那韓郎呵。

〔鬪黑麻〕我夢斷秦樓。空瞻漢月。歎古道咸陽。音塵永絕。難相見。易相別。〔轉介〕你要撥柳撩花。有甚連枝帶葉。〔丑〕你轉心從老爺罷。〔旦〕中懷耿烈。海山盟舊設。破鏡難圓。破鏡難圓。寶簪半折。〔丑慌介〕奶奶走來了。〔淨慌跪接介老旦沙母上〕屬垣須

有耳。嘯柱是何心。你們爲甚事在此大驚小怪。〔淨〕元來是母親。叫沙虫兒。你怎麼說是奶奶來。弄我喫一大驚。〔丑〕小的也說是太奶奶。〔淨〕今後太字說高些。做定心丸。母親。這是法靈寺尼姑。孩兒喚來。伏侍母親誦經。〔旦見老旦介〕聞得見招。速來趨命。奈將軍太相凌逼。小尼堅不肯從。幸接

慈顏。願來解脫。〔老〕元來恁的。

〔憶多嬌〕看他恨轉結。我中更熱。翠鈿含情羞再帖。孩兒。你御水空教題紅葉。

〔旦悲介〕不如死休。〔老〕你快不要。〔淨合〕試聽啼鴉。試聽啼鴉。轉眼芳菲易歇。〔老〕

你只一人獨歸。又恐中道有變。且傳壞我將軍名了。料想女工是你本等。暫隨我去繡幾尊佛。再作區處。〔旦〕

〔鬪黑麻〕我翠鎖羞蛾。紅潮印頰。便日侍瓊窗。春裁綵纈。〔背介〕愁不定。計潛

設。我有個道理。若要玉杵邀盟。就把金鐙刺血。〔老〕孩兒。你聽他說麼。〔旦〕中懷耿烈。

海山盟舊設。破鏡難圓。破鏡難圓。寶簪半折。〔淨〕母親。作成孩兒娶這房小媳婦。〔內叫

介〕是那里來的個嬌滴滴聲音。〔丑〕老爺不好了。這真正奶奶來了。〔老〕孩兒。你又惹動媳婦性

子了。〔淨慌介〕母親可救我一救。〔老〕尼姑便隨我去。〔旦〕情知不是伴。事急且相隨。〔老旦旦先

下淨〕沙虫兒。幾乎弄出事來。〔丑〕老爺。怎麼太奶奶不怕。到這般怕奶奶。〔淨〕這孩子。你不曉得

老婆的娘。〔丑〕老爺。你長長大大。千軍萬馬。一些不怕。小小一個奶奶。到是這般怕他。〔淨〕你又不

曉得。蜘蛛吞象。海青拿天鵝。這都是大怕小。〔丑笑介〕做官的人怕老婆。有幾多解說。老爺爲這尼姑。費盡心計。又打脫了。你可自嘆幾句。小的也續兩句。〔淨〕

狗愛熱油又怕。

蠶無桑葉空思。

〔丑〕吼動河東獅子。

驚回海底鷗兒。

第三十二齣 卜居

〔高陽臺〕〔小生李王孫道妝上〕真境幽棲。高秋暮景。白蘋風起天末。波冷烟沈。鱗鱗細翦楓葉。霓旌影斷。簫聲遠。問碧桃海上。初結醉春雲。憶宴瑤池。去年時節。

〔法駕導引〕朝元路。朝元路。同駕玉華君。千乘載花紅一色。人間遙指是祥雲。回望海光新。俺自棄家來此。將及二十餘年。真個車馬絕塵。只與漁樵爲友。數日前韓君平有個書來。道是目今見訪。就卜他出處的事。他與俺原係金石之交。況負烟霞之性。既非俗品。又是舊遊。倘若來時。未免相見。道童那有。〔丑道童上〕道童道童。剔透玲瓏。常參北斗。別號南風。師父稽首。〔做醉譚介小生〕你怎生這般醉了。〔丑〕師父。小官們那里不喫幾杯酒。自台道南風之薰兮。〔小生〕師長之前。好生不敬。

〔丑〕自古道南風不競。〔小生〕閒話。韓參軍說來相訪。你去門前俟候。〔丑應介〕生冠帶領衆軍上。〔勝葫蘆〕渭水西。縈華岳尊。停使節。擁回軍。左右的。前邊有個道童。問他雲臺觀在何處。〔衆叫問介〕丑轉過那松林是了。〔生〕一到山間。試把仙童問。幾回徑轉。松火隔秋雲。這到雲臺觀了。問那道童。李真人在麼。〔衆問介〕丑松下問童子。言師採藥去。〔生〕今在何處。〔丑〕只在此山中。雲深不知處。〔生〕你去說韓君平相訪。〔丑〕敢是韓參軍麼。我去報來。〔生〕左右人馬。都到山前伺候。不可在此打攪。〔衆應下〕小生見介。〔減字木蘭花〕〔生〕擎拳仰止。不是凡人名。尹喜。〔小生〕道骨仙風。與帝神遊結信通。〔生〕獻花跪酒。清徹雲璈歌益壽。〔小生〕所願維何。願得昇平樂事多。韓兄高掇巍科。遠參名鎮。功鐫五釜。價重千金。〔生〕我等碌碌。因人成事者也。至如李兄。所謂安石不起。其如蒼生何。

〔高陽臺〕幻世投簪。浮名脫屣。黃塵碧海相隔。當今賊黨雖平。皇輿未正。李兄雖守箕山之節。豈忘魏闕之心。九地橫流。崑崙砥柱將折。須涉。褰裳濡足。休遲也。早難道視同秦越。待功成還辭赤社。更歸丹穴。〔小生〕韓兄。故人知君。君不知故人了。

〔前腔〕差別玉女擎漿。天神對博。洞裏幾番日月。喚醒黃梁。如何又迷蝴蝶。你
說當今的人麼。朝列蠅營。蟻聚還競擾。這餘羶怎污牙頰。算自有峯頭玉版。鼎
中金屑。〔生〕下官以小人之心。度君子之腹。敬聞嘉命。頓悟昨非。

〔前腔〕從別。月露光陰。風塵勞攘。朱顏鏡裏飛雪。揭地掀天。昆明那辨灰劫。虛
設懸魚掛紫空。在眼漫回首。五雲雙闕。願隨他升天雞犬。怕做送春鷓鴣。〔小生〕
韓兄。你又差了。看你世緣未絕。才略有餘。先畢運籌。方宜辟穀。

〔前腔〕英烈。半世雄心。一腔熱血。腰間寶劍誰脫。況你玉質金相。邊庭正看持
節。功業封侯。萬里君自取。問顏當漢時。龍額還相待。重扶神鼎。再傳仙訣。韓兄。

你從行後。聞得閩中信息麼。〔生〕向曾遣人尋訪。尙未回來。〔小生〕柳夫人落髮爲尼。輕蛾也來蓮
花菴。做道姑了。〔生〕輕蛾如今在麼。〔小生〕數月前下山去尋訪柳姬了。〔生〕元來如此。〔末〕奚奴

上。種玉嫌山淺。傳書怪鶴遲。小人出得長安。聞知相公先已回朝。到華山下。又說在雲臺觀了。
〔見生介〕小人訪問夫人信息。卻在法靈寺爲尼了。討得回書在此。〔生〕我已知道。回書前路去看。

李兄。王程有限。不得久留。就拜別了。

〔尾聲〕歡逢一日成悲別。待再把仙緣雲外結。〔小生〕韓兄。你再來呵。只恐路遠天台空萬疊。〔衆軍上接〕

征西車馬羽書遲。

故國平居有所思。

怨別自驚千里外。

論交卻憶十年時。

第二十二齣 閨晤

〔小旦女使上〕繡幕珊瑚鉤。春開翡翠樓。深情不肯道。嬌倚鈿筵。俺乃沙府中女奴。見隨着新夫人。這夫人聞得原有丈夫。不知怎的在法靈寺爲尼。俺老爺誘他到府。堅志不從。幾番尋死。太奶奶收在身邊。同他臥起。老爺只索無奈。他雖在府中數年。鏡中窺影。常則含啼。檻外將花。何能共笑。卻正是龍悲別劍。鶴怨離琴。怎怪得他。昨日老爺分付俺再三勸解。且待出來。試說一回。

〔意遲遲〕〔旦女妝上〕紅藕香銷驚雁語。記別人南浦。殘夢五更風。吹成一寸愁。千縷。多情誰用管。無情。怎做道東邊日出西邊雨。〔長相思〕朝有時。暮有時。潮水猶知

日兩迴。人生常別離。來有時。去有時。燕子猶知社後歸。君歸無定期。「小旦」夫人。你只不從俺老爺罷了。卻這般愁悶怎的。俺府中金漿玉饌。繡闥錦衾。好生受用。老爺分付道。常令照影雙來。一鸞羞鏡。勿使窺窗獨坐。嫦娥笑人。「旦」女奴。你怎知道。玉饌金漿。都成鳩毒。錦衾繡闥。便是豺牢。教我如何不悶。「小旦」叫府中樂部們承應一番。解悶好麼。「旦」也都是游童豔婦之詞。誰要聽他。你去門前看。或有尼姑。叫他誦些經。若是道姑。唱個道情兒到好。「小旦」應出介。貼輕蛾道妝上。東遊久與故人違。曾向長生說息機。借問欲栖珠樹鶴。何年卻向帝城飛。自家特下華山。尋訪柳夫人消息。誰知兵火之後。法靈寺也都燬了。聞說韓員外尚未回朝。待再到長安城中。試看一番。「行遇小旦介」
小旦「是好一位仙姑也。」「貼」

「北水仙子」遙天鶴唳破秋孤。幾畝梅開乘月鋤。三間草蓋依雲住。「小旦」你甚道術麼。「貼」說咒咒水。談劍術。兼領他地籙天符。「小旦」你住在何處。「貼」敢列在金天仗。也曾投玉女壺。「小旦」這是華山來的了。「貼」今日裏降自清都。「小旦」這是沙

府中。你且在此相候。「進介」夫人。門外有個道姑。華山來的。「旦」記得李王孫別時。曾說只在終華

二山。這道姑或者知他蹤跡。喚他進來。〔小旦喚貼進介〕旦背介。呀。這道姑到似我輕蛾。〔貼背介〕這夫人到似我家柳夫人。且把幾句話探他。〔旦〕女奴。你去取茶來。〔小旦應下〕道姑。你是從幼出家。是在嫁出出家的。〔貼〕夫人聽稟。

〔么篇〕香塵昔日慣踐輕軀。弄笛曾經伴綠珠。飛天早借茅龍馭。〔旦〕依你說是人家女郎了。主人甚麼名字。〔貼〕問王孫名字無。主人是李王孫。還有個侍姬來。〔旦〕他又姓甚麼。〔貼〕指門前柳樹千株。〔旦〕這是姓柳了。後來怎麼。〔貼〕李王孫把這柳姬配與韓君平。竟入華山。後來韓君平官拜員外。也出塞參軍了。算丹訣空留婦。戍蕭關別有夫。〔旦〕你卻如何。〔貼〕小道與那柳姬。爲戎馬兩地奔趨。〔旦〕呀。你敢是輕蛾麼。〔貼〕夫人。你敢是柳夫人麼。〔抱哭介〕

〔寶鼎兒〕向來幾載分攜。何意片言相晤。〔旦〕你在華山。會李王孫麼。〔貼〕王孫在雲臺觀。輕蛾就在蓮花菴。〔旦〕你們都在華山。只道錦水丹鱗。素書稀遠。玉山青鳥。仙使難通。那知有今日之會。〔貼〕你當時分散。還到法靈寺否。〔旦〕那時節呵。

〔白練序〕秋風緊似鍛。翻西飛雁影孤殘。生寄只在寶坊蓮宇。凝佇。贈錦書。
〔貼〕相公書來是怎生說。〔旦〕問別後長條還在無。〔貼〕你如今在這府中。卻安樂了。〔旦〕說那裏話。被他計誘到此。我朝夕只與太夫人相處。飄颺處。飛花比雪向風羞舞。

〔醉太平〕〔貼〕記取韶華共享。疊鞦韆繡褥。宛轉金鋪風波霎起。空想舊日歡娛。模糊迢迢歸夢半成虛。更誰問畫欄朱戶。沙將軍你錯用心了。陌頭桑婦贏得眼前駐馬踟躕。〔旦〕輕蛾你今在名山洞府。飲露餐霞。大強似我了。

〔白練序〕仙妹儼畫圖。綃衣繡襦。分明是弄玉暫來天衢。〔貼〕夫人轉眼一別。又十數年。〔旦〕歎噓歲已徂。怎望得吹簫引鳳雛。你在此伴我幾時。再候韓郎信息如何。〔貼〕貧道既遊方外。豈能復久人間。況這府中人多。倘若露形。反不全美。〔旦悲介〕你就要去了。春無主。殘英頓逐水流東去。〔貼〕夫人輕蛾告別了。

〔醉太平〕須臾天涯地角。總閒情到此。不堪分付。相公有日歸來。你且寧耐。枝梧就裏。暫做淡勻輕注。只一件。歸歟。怕朱門金鎖護蟾蜍。許誰到百花深處。〔旦〕昔時

莊姜送其妾歸陳。因作燕燕于飛之詩。我今日送你。怎比得他。〔貼〕舊堂雙燕。差池送別。又巢春樹。

〔尾聲〕縹緲雲歸人間阻。〔旦〕殘燈對影和夢孤。〔合〕真道是一世生離恨有餘。

知君忘卻曲江春。

再到天台訪玉真。

黃鶴有心留不住。

白雲何事獨相親。

第二十四齣 道邁

〔金蕉葉〕〔生便服上〕千難萬難。早歸來星移物換。別烏衣謾駕雲軒。問仙娥多奔月殿。〔訴衷情〕燒殘絳蠟泪成痕。街鼓報黃昏。碧雲又阻來信。廊上月侵門。愁永夜。拂香裯。待誰溫。夢來憔悴。擲果淒涼。兩處銷魂。自家一向參軍。新從入覲。仍以本官擢兼御史。前日裏奚奴將我柳姬回信。說在法靈寺中削髮爲尼。只是長安再經吐蕃之變。知他竟是如何。適間謝恩已畢。且自乘晚出城。訪他下落。多少是好。〔行介〕

〔羅江怨〕秋榆半隱天。秋蟾半舊絃。遊夢掛碧雲邊。這是章臺之下。當初與他相遇。正在此間。今日知他在何處麼。紫騮踏處落花殘也。飄過東家。不道西家怨。鴻飛楓葉丹。鴉啼金井寒。料等閒難識春風面。〔下旦女妝上〕

〔金蕉葉〕緣慳分慳。怎填得相思限滿。打不脫閒庭野鴛。盼不到上林歸雁。

〔生查子〕侍女倚妝奩。故故驚人睡。那知本未眠。背面偷垂泪。懶卸鳳頭釵。羞入鴛鴦被。時復見殘燈。和烟墜金穗。自家在沙府幾年。雖能全節。終是偷生。昨聞得淄青將佐。近已入朝。想我韓郎。亦在數內。他卻怎知我陷身在此。且這沙將軍。朝廷好不寵幸。就便知道。不敢申言。今日府中女伴們。約我閒遊。我雖沒這情緒。或者在外討個信兒。也不見得。正是已知無益事。還作有情癡。〔小旦丑上〕流蘇帳暖春雞報。油壁車輕金犢肥。啓夫人。車已駕了。他們都出延秋門去。〔旦〕也出延秋門去罷。

〔上車行〕

〔羅江怨〕長河泪眼懸。雙情故單。心如膏火夜同煎。〔小旦〕這來到金溝上了。〔旦〕金溝曲曲漱流泉也。一葉隨波。怎得題紅便。〔小旦〕夫人。你雖守志不從。外人都道你專

房之寵哩。〔旦〕咳。韓郎聽得。只道我真個如此。新人工織縑。故夫逢下山。做重來難見江東面。〔下生上〕

〔香柳娘〕問章臺那邊。問章臺那邊。畫欄雕檻。曉風殘月垂楊岸。我纔到法靈寺。

大半燒殘。那老尼也不知去向。何況柳姬。這是不合久留在外了。歎浮生枉然。歎浮生枉然。絕塞損朱顏。深閨賺青眼。怕珠沈在淵。怕珠沈在淵。步幄姍姍。來遲相見。

〔下旦小旦丑上〕

〔前腔〕駕香車翠駟。駕香車翠駟。愁腸共轉。萋萋芳草歸程緩。算離輕會難。算離輕會難。朝雨疊陽關。秋星隔河漢。自古道兵凶戰危。韓郎知他在麼。怕沙場不還。怕沙場不還。倘遇華山。開棺相見。〔下生上〕

〔前腔〕看風氳翠烟。看風氳翠烟。東華塵滿。聽搖搖環珮聲低轉。這到龍首岡上。

望見前邊那駝牛。駕着車兒。兩個女奴在後。我且稍住。隨着他行。〔傍立介旦小旦丑上〕且歸籠晚驂。且歸籠晚驂。〔生〕呀。那車中女子。似我柳姬一般。〔旦〕呀。那路邊立的。似我韓郎一般。且開

簾看。珠鏤箔偷寒。檀紅袖輕展。道傍立者。得非韓員外乎。〔生〕便是韓翃。車中得非柳夫人乎。〔相望各悲介〕這相逢有緣。這相逢有緣。似環解重連。絲棼難斷。〔生〕你爲何卻在此間。〔旦〕女奴可對韓相公說。妾今陷身沙府。非不能死。正圖郎君一見。還尋出頭日子。〔小旦應介旦〕

〔前腔〕誤侯門幾年。誤侯門幾年。非關盟變。圖他兩翼乘風便。〔生〕待我向前說一句話兒。〔丑攔介〕哇。閒人不得近前。〔生進復退介〕步踟躕欲前。步踟躕欲前。秀色望堪餐。層波遞相盼。〔旦〕今日同行有人。難訴衷曲。明早到通政里門來。切莫爽約。我就此去也。〔生旦合〕問來期肯淹。問來期肯淹。一旦悲歡。心搖魂斷。〔旦衆下生望介〕柳姬。你怎的就去了。天殺那駕車的牛。也這般快哩。

〔前腔〕似颺車乍旋。似颺車乍旋。磷磷聲遠。驅將金犢奔龍輦。惜香雲半闌。惜香雲半闌。恍惚接飛仙。容光掣驚電。呀。原來遺下許多花鈿也。是他頭上物件。我且收拾去。拾遺來翠鈿。拾遺來翠鈿。恨擲人間。春歸天畔。〔下旦小旦上〕

〔前腔〕那情蹤可憐。那情蹤可憐。就中牽絆。似伯勞東去西飛燕。〔小旦〕他們車兒都先去了。天色已晚。可攛入城去。〔旦〕正龍城夜嚴。正龍城夜嚴。朱戶約花關。青燈逗雲閃。〔做下車小旦丑先下旦〕已到府中。怎好下泪。把雙珠暗彈。把雙珠暗彈。無限心間。難消枕畔。

莫卷龍鬚席。

從他生網絲。

且留琥珀枕。

或有夢來時。

第三十五齣 投合

〔小旦女奴上〕絲布澀難縫。令儂十指穿。〔丑蒼頭上〕黃牛鈿犢車。遊戲出孟津。女奴。夫人昨夜分付駕車伺候。車已駕了。原來這夫人自有丈夫。昨日出城。卻好遇見。怪道他死不肯從哩。俺老爺那知他心裏事來。我把這車輪兒比着夫人。做個吳歌兒。〔吳歌〕姐兒好像個鐵車輪。推去推來由子個人。外頭光滑骨碌碌。介轉囉哩知渠裏頭自有介一條心。〔小旦〕有些意味。我把這推車的牛比着那個郎君。也唱歌兒。〔吳歌〕情郎好像駕車個牛。東山頭奔子去西山頭。說喊你千萬弗要喫車

前草。直落得個眼淚一似小水流呀。夫人來了。我們一壁立地。〔旦女妝上〕

〔謁金門前〕街鼓動。驚破一痕春縫。門外綠波縈曉夢。又吹寒作淞。罷去四五年。

相見論故情。殺荷不動藕。蓮心已復生。妾身昨日出遊。不意龍首岡上。果然遇着韓郎。眼見得咫尺天涯。真道是神留足往。今早約他來通政里門。再圖一會。夜來分付蒼頭。依舊駕車相候。料不誤也。

〔小旦〕夫人。今日往何處去。〔旦〕到通政里門去。〔上車行介〕我那韓郎呵。

〔五供養〕棲分隻鳳。奏絕回鸞。跡印飛鴻。將軍將軍。縱君難再得。教妾若爲容。聲繁思冗。怎別做瑟調琴弄。水流何日反。花戀舊春叢。對面無緣。百年殘夢。

〔同下生便服上〕

〔謁金門後〕放着心兒空。猛落得口兒頻誦。縱有佳期多作哄。又添冤業重。昨

日龍首岡得遇柳姬。元來落在沙府。又已蓄髮了。看那容銷色沮。不做棄舊憐新。約我今早到通政里門再會。〔行介〕只索前去。想起他昨日的行狀呵。

〔五供養〕鬟雲乍攏。鏡翠慵窺。趾玉羞籠。浮蹤雖浪蕊。薄命歎飛蓬。又一件。那石

衛尉喬知之。豈非明鑑。還仔細着。中心自懂。怕容易將人斷送。我來得太早。門還未開。他還未到麼。狐冰須聽徹。魚鑰待傳封。〔旦小旦丑駕車上〕對面無緣。百年殘夢。

〔遇介〕韓郎來了。真信人也。〔生〕柳姬真個到此。你好多情也。

〔玉交枝〕畫輪雙控。似銀河星橋路通。卿卿原是多情種。忍拚教你西我東。我想起我家故事。昔日吳王之女紫玉。欲從韓重。竟不遂而死。你不記南山之詩乎。南山有烏雌失雄。可如紫玉從韓重。〔合〕誰破得愁城萬重。誰叫得天闔九重。

〔前腔〕〔旦〕無枝堪共。算都來飄零趁風。妾還記得君家一事。昔日韓馮之妻。爲宋王所奪。賦詩見志。相繼而死。有雙塚鴛鴦之異。妾得一見。死有何難。但願韓郎別選高門。再圖後事。勿以

妾爲念也。君不見河水之歌乎。淫淫河水歌私詠。誓當心日出瞳瞳。你青鸞飛入合歡宮。怕今生難作鴛鴦塚。〔合前旦〕向日題詩鮫綃。今尙在否。〔生出鮫綃介〕鮫綃無恙。

〔川撥棹〕詩常諷。記題梅傳故隴。這鮫綃墨透香濃。這鮫綃墨透香濃。〔投鮫綃與旦介〕不如還你。免致相思。帶啼痕絲絲染紅。〔合〕暫相看疑夢中。待來生尋舊

蹤〔生〕我初時與你的玉合在麼。〔旦出玉合介〕玉合無恙。

〔前腔〕我玉合依然寶色融。〔帕包玉合投生介〕做賜玦投伊難再逢。〔生〕便留你處罷了。〔旦〕肯隨他兩面玲瓏。肯隨他兩面玲瓏也難將瓊瑤報同。〔合前小旦〕夫人請回。老爺一定有人體訪。〔丑〕這相公揩了眼泪。別處去哭。〔旦悲介〕當遂永訣。願置誠念。

〔尾聲〕〔合〕清秋古道霜華重。歎馬足雞聲爭送。多少離魂蕭蕭滿碧空。〔旦小旦丑〕並下生弔場。呀。他又去了。看他輕袖搖搖。香車磷磷。目斷意迷。失于驚塵。呀。那樵樓上早則鐘動也。

〔尾犯序〕春隔景陽鐘。一片驚塵行影嬌動。待我看這玉合兒。原來一幘輕素。結着個同心。又着些香膏在內。素結同心。把香膏暗封。這玉合呵。光瑩。知不做連城再返。早悔卻藍田雙種。當初做良工心苦。空自費磨礱。〔丑公差上〕相看勞旋日。及此御溝花。稟韓爺。小的是溜青帥府差來的。後日列位老爺合樂酒樓。請老爺同赴。〔生〕只恐有事。不得來了。〔丑〕衆老爺會說。韓爺一人不至。一席爲之不歡。還望俯臨。〔生〕我知道了。先去拜上。〔丑應下生〕

哎。所喜將佐凱還。朝廷宴樂。只我有去帷之歎。怎能免向隅之悲。好不苦也。

公子王孫逐后塵。

綠珠垂淚溼羅巾。

侯門一入深如海。

從此蕭郎是路人。

第二十六齣 出山

〔天下樂〕〔小生道妝上〕洞裏神仙碧玉簫。青山隱隱水迢迢。世情已逐浮雲散。歲晚誰能訪寂寥。俺自與韓君平相別。纔是秋暮。忽已冬深。未知他與柳姬得相會否。前日輕蛾來約我同下山去。輕蛾從舟。俺便由陸。一路來寒威乍減。凍雪漸開。好一片清景也。〔行介〕

〔排歌〕霽雪長途。江梅野橋。馬蹄遍踏瓊瑤。暫依冰樹識清標。細翦天花下紫霄。這雪呵。因風起。向日消。貴人頭上不曾饒。星冠映。鶴鬢飄。琳宮初罷玉宸朝。輕蛾行時。約在西岸相會。俺早到此。他還未來呀。那前邊有人泊舟了。〔貼道妝上〕

〔前腔〕雪斷空林。冰開暗潮。相逢倚棹江皋。〔遇稽首介小生〕你來了。舟中雪景好麼。

〔貼〕夜乘剡水放輕舸。絕勝騎驢上灞橋。〔小生〕且喜長安城近。此時早朝初散了。

〔合〕瑤京近。玉關高。誰歌黃竹和仙韶。銀盃覆。縞帶搖。恩光初散紫宸朝。我
與你各尋菴觀且住。再探韓君平事體何如。〔貼〕正是如此。

一別心知兩地秋。

寒鴉飛盡水悠悠。

山中舊宅無人住。

來往風塵共白頭。

第二十七齣 還玉

〔外丑伶工老旦小旦官妓作樂上外丑〕率土歸王貢。鈞天夢帝游。〔老旦小旦〕世間無比酒。天
下有名樓。〔外〕今日淄青將佐。合樂酒樓。俺們教坊人等。在此承應。官妓們。你樂器齊備麼。〔老旦〕
聽道。吹篴先弄曲。調箏更撮絃。鶯啼歌扇後。花落舞觴前。〔丑〕還有麼。〔小旦〕琴曲隨流水。簫聲逐
鳳皇。細縷纏鐘格。圓花釘鼓牀。你們有甚戲場麼。〔外〕聽道。羌笛隴頭吟。胡舞龜茲曲。假面飾金銀。
盛服搖珠玉。〔老旦〕還有麼。〔外〕臥驅飛玉勒。立騎轉銀鞍。縱橫旣躍劍。揮霍復跳丸。〔小旦〕有
甚好樂府麼。〔外〕有的是將進酒。臨高臺。君馬黃。雉子斑。這都是盛世之音。軍中之樂。〔老旦〕你
便做一篇將進酒看。〔外〕君不見黃河之水天上來。奔流到海不復回。〔老旦〕呀。這是李太白

的詩。你怎生抄他。〔小旦指丑介〕你便依本朝樂府。做一個酒樂行罷。〔丑〕昔日洛陽董糟丘。爲余天津橋南造酒樓。〔小旦〕這也是李太白的詩。你如何又抄他。〔丑〕咳。李太白詩。我們便抄不得。如今人抄得李滄溟幾個字。就說做詩哩。〔外笑介〕這叫做活剝杜工部。生吞李義山。〔丑〕又道是老虎口中討脆骨。死人項下括殘盤。呀。遠遠的望見一簇人馬。有兩位老爺來了。我們作樂迎候。〔作樂介小生韋巡官生韓君平冠帶上小生〕

〔傳言玉女〕拜表初回。又見大酺恩霈。畫樓前歌妍酒美。〔生〕歡娛在眼。只暗滴心頭雙淚。〔合〕正太平時節。帝京高會。〔小生〕下官韋巡官是也。〔生〕下官韓員外是也。韋巡使。俺們淄青將佐。今日合樂酒樓。與你須索走一遭也。〔行介〕行來此間。許虞侯還不見到。且待他來者。〔末許俊冠帶上〕長楊鄂杜昔知名。何似今來應聖明。正覩人間朝市樂。忽聞天上管絃聲。某帥府虞侯許俊的是也。且喜那西征奏凱。國泰民安。聖上賜長安大酺五日。俺這將佐們相邀合樂酒樓。迤邐行來。只見那鼓樂喧闐。烟花繚繞。是好一座酒樓也。

〔黃鍾北醉花陰〕寶閣雕闌鳳城裏。聽一派仙音乍起。鑼鼓奏。管絃催。光皎皎

雲日交輝蓬島般多佳致〔小生生共見介末〕俺們先謝過聖恩。方飲酒也。〔拜介〕願福壽海山齊。這的是萬國來朝聖天子。〔衆送酒作樂介小生〕下官僭長。先把盞了。

〔南畫眉序〕車馬羽書遲。將士東歸在。今日正歌揚杖杜。酒泛醪醪。丹墀下玉帛。星聯綺席上。衣冠雲集。〔生悲歎介小生〕韓員外風流談笑。絕自可人。今日卻爲何慘然不

樂麼。官妓送酒。〔合〕黛眉粉面分行隊。莫惜遇時沈醉。〔生做不飲介末起介〕

〔北喜遷鶯〕恰甚的有心無意。打乖兒弄出虛脾。癡也麼迷。沒波浪秀才聲氣。把樂以忘憂。做不知。俊雖不才。頗以義烈自許。倘可效用。決不辭勞。遲共疾。俺敢待尋生替死。自古道見哭興悲。

〔南畫眉序〕〔生〕含笑半含啼。便要藏頭怎遮尾。〔悲介〕歎同林宿鳥。兩處分

飛。〔末〕說起是尊夫人的事了。樂人們都退去。後樓聽用。〔外丑老旦小旦下生〕不欺虞侯。向年參軍

出塞。家姬柳氏。留寓京城。後因祿山兵變。削髮爲尼。下官歸朝。到法靈寺尋他不遇。回至子城東南龍首岡上。卻向車中偶見。原來落在沙府了。相約次日通政里門再得一面。從此訣矣。難拋下

剩雨殘雲。空閃得煩天惱地。〔末〕如此小事。左右的備馬來。〔衆應末〕願得足下數字。當立致之。且自飲酒。〔合〕黛眉粉面分行隊。莫惜遇時沈醉。〔末〕

〔北出隊子〕則早辦追風單騎。把數行書親自題。〔生寫介末脫冠帶戎妝介小生〕好

好。腰間佩雙鞬似月。座下跨疋馬如雲。越顯得雄威八面。卻勝他猛將千羣。〔末上馬介〕俺此去非同小可也。管引他倩女一魂離。出落俺將軍八面威。呀。你準備着筵開花燭喜。

〔末走馬下小生〕好義氣的人。就則去也。〔生〕去則去。未知他事體何如。我們到後樓待咱。正是青龍共白虎同行。吉凶事全然未保。〔小生生下淨戎妝沙將軍老旦貼女侍領衆軍〕

〔南滴溜子〕軍聲闐。軍聲闐。長鎗大戟香塵擁。香塵擁。濃妝豔質。〔衆〕稟老爺。到

何處打圍去。〔淨〕西郊外去。〔行介〕看野外霜風正急。呼羣大打圍。將鷹犬集。走兔奔林。飛鳥絕跡。〔淨衆下末走馬上〕

〔北刮地風〕呀。這馬兒忽騰騰舉四蹄。懷揣着風月文移。撞轅門似入無人地。早穿過綠水橋西。又經他碧楊樓際。斜刺裏畫棟朱扉。適方見沙吒利這厮打獵去。

了。趁着那蜂未窺蝶未知。把暗香偷遞。你道是巧張羅。慣打圍。俺可也見兔兒纔放鷹飛。〔急下外軍校上〕門迎朱履三千客。戶納貔貅百萬兵。俺們是沙府軍校。老爺早間去打獵了。這位新夫人苦不肯去。分付俺們把守着府門。呀。望見夫人走來了。〔旦上〕

〔南滴滴金〕重門暗鎖春歸急。錦樹辭條歲輕擲。香車寶馬相逢地。枉經心空浪跡。〔悲介〕天那。天天鑒識。區區兩心還似一。還似一。百年恩愛了何日。〔末走馬上〕

〔上〕報報報。將軍墜馬。勢且不救。要見夫人一面哩。〔做撞進軍慌走旦見介末〕

〔北四門子〕病尉遲剗地臨危勢。召召召夫人把駿馬騎。〔旦〕你是甚人。將軍召

我做甚來。〔末背交書介〕這蠅頭錦字交傳與。可是那廂兒親自題。〔旦見書悲介〕我

那韓郎呵。〔末〕住聲。作急的上馬去也。〔抱旦上馬速行介〕步兒要高。嗓兒要低。漏東風

將流鶯輕喚起。人兒又忙。馬兒又遲。死央殺龍駒做美。〔末扶旦急走馬下生小生上

生〕

〔南鮑老催〕追思往昔。絞綃半幅餘泪溼。玲瓏小合餘香積。望箏雁齊。被鴛雙

釵鸞匹〔小生〕員外放心。就有好音也。〔生〕怕銀瓶落井還空汲。金針墜海還空覓。側耳聽。臨風立。〔末扶旦走馬上〕

〔北水仙子〕呀呀呀。日墜西。早早早早。一似夜靜江寒。載月歸。他他他。做宿鳥驚還。你你你。那孤凰再配。我我我。憑着我破龍城打虎圍。兼兼兼。領着燕約鶯期。〔生望介〕呀。許虞侯早則來也。虞侯走快些咱。〔末〕快快快。豎起花柳場中旌捷旗。把把把。章臺舊壘。牢牢砌。〔見生做扶旦下馬介〕以君之靈。幸不辱命。〔攜旦扶生介〕看看看看。柳色尙依依。〔生旦抱哭介〕

〔南雙聲子〕雲和日。雲和日。自去後。攀誰及。虛和實。虛和實。敢甚處尋消息。喜共泣。喜共泣。翻倒極。翻倒極。任高燒銀燭。問今何夕。〔生〕多謝虞侯。使下官去壁復還。破鏡再合。只是一件。沙吒利那厮。恩寵殊等。立見禍生。諸公何以處之。〔末〕俺們明日把此事啓知元帥。今晚且送員外夫人到館中去。叫樂人們承應者。〔衆應作樂上行末〕今夜呵。

〔北尾〕祝付你那雞兒莫啣氣。算新婚不強似遠別多離。沙將軍。沙將軍。俺打合

這才子佳人直閃殺你。〔衆作樂介〕

莫辭換羽更移商。

吹律陽回一線長。

不是一番寒徹骨。

爭得梅花撲鼻香。

第二十八齣 謝誓

〔雙勸酒〕〔淨沙將軍上〕人才出羣。風流幫襯。紅鸞運輪孤辰。打褪閉門。走卻脚頭人。〔笑介〕真好個捕虜將軍。世間好物不堅牢。彩雲易散琉璃脆。俺沙吒利道這兩句。有個緣由。俺爲那章臺柳。千方百計。弄到府中。誰知是一位古古怪怪不通情的小娘子。又遇着個遮遮護護不抽趣的太夫人。卻趁着那吉吉刮刮做冤家的正奶奶。辜負殺俺個標標致致慣風月的大將軍。以此喫他白白的住了幾年。昨日又被個人輕輕的借去一用。千軍萬馬。只做飛塵。鐵壁銅牆。就如平地。早已差沙蟲兒打聽來報。好多一會。想必來也。〔丑沙蟲兒上〕

〔普賢歌〕將軍情性生得村。那有些兒會着人。羊羶空滿身。狼心養不馴。俺勸你列位們一勸。別個的妻兒休要問。〔笑介〕可笑俺老爺。平空地弄甚柳夫人到府裏。准准

的寡頭醋喫了百來瓶。活活的乾相思害了十幾頓。喇喇的蒲萄架倒了十數遭。枉費辛勤。沒些巴臂。近日又被個人忽的賺去。好生喫惱。着俺打聽信來。就回復他。〔見介淨〕信息何如。〔丑〕恭喜。照舊隨着韓員外。〔淨〕到俺府裏的是誰。〔丑〕日前淄青部將。赴宴酒樓。韓員外席上說起事因。內中有一個虞侯許俊。將他手書。飛馬請去了。〔淨〕他怎知在我府裏。〔丑〕原來那夫人出遊時。中途遇見。聞得人說。把甚麼玉合兒從車中投與他。〔淨〕他們再待怎生。〔丑〕小人來時。他們要見侯節度。像要動本哩。〔淨怒介〕這厮安敢無禮。想我在唐朝呵。

〔大趂鼓〕桓桓號虎臣。況是叨承恩寵。建立功勳。笑他們厮敢相持挺。待來朝先把封章進。玉石崑岡。須教盡焚。

〔前腔〕〔丑〕雷霆且息嗔。不因親者。到底非親。老爺若先奏本。反惹事端。況這夫人原是韓員外的。如今去了。只叫做物歸其主。那一心已許文園令。這私奔難比卓文君。救火披蓑。休教自焚。稟上老爺。要先奏時。只說是近方曉得。送歸原夫。也道他在府數年。完名全節。若是如此。非但盛德遠傳。亦且聖心加悅。請自尊裁。〔淨〕這孩子也說得是。俺向年買韓員外家的。

馬。喚做如意騮。一發進獻罷了。〔丑〕這等更好。倘或朝廷把這馬轉賜韓員外。他夫婦是一馬一鞍。老爺只落得見鞍思馬。〔淨〕這廝胡說。

樹頭樹底覓殘紅。

一片西飛一片東。

自是桃花貪結子。

錯教人恨五更風。

第二十九齣 聞上

〔生查子〕〔外節度冠帶上〕東方久建牙。北海將稱霸。班首鷺鴛羣。身上麒麟畫。

金殿當頭紫閣重。仙人掌上玉芙蓉。太平天子朝元日。五色雲車駕六龍。下官侯希逸。由淄青入覲。仰蒙聖恩。加授檢校工部尚書。圖像凌烟。賜封實戶。未歸本鎮。暫寓神京。今早賀冬回朝。有人報道。昨日俺部將們合宴酒樓。許虞侯飛馬到沙府中。奪取一女子。付與韓員外。又說這女子原是韓員外家內君。真奇事也。待他來時。須問端的。左右的。韓員外許虞侯一到。速通報者。〔衆應介〕生韓君平末許俊冠帶上。

〔前腔〕新情覺轉加。舊事猶堪詫。〔末〕自有好商量。且免閒牽掛。〔生〕許虞侯。此是

元帥府門了。請同進去。〔末〕員外請。〔衆報介外見介〕昨來諸君曾宴酒樓麼。〔生末〕是曾宴來。〔外〕聞得許虞侯從席上作一奇事。果有之乎。〔生〕是有。〔外〕員外願聞其詳。〔生〕元帥聽稟。

〔刮鼓令〕當年奉使槎。閃閨人歷歲華。忽戰鼓漁陽聞變。暫寄空門禮釋迦。

〔外〕原來尊夫人曾落髮爲尼了。後來如何。〔生〕流落五侯家。〔外〕五侯是誰。〔生〕是沙吒利計誘到府。家姬誓死不從。幸遇他老母向留身畔。日前下官入京。城隅乍逢。雙輪東下。〔外〕相逢時說甚來。〔生〕備說前由。又自車中投一玉合。從此遂別。料歸來抱蔓已無瓜。若非得許虞侯呵。又誰知枯樹再開花。〔外〕虞侯。你將酒樓中始末。試說一番。〔末〕

〔前腔〕青樓大道斜。聽清謳泛紫霞。那日一席之間。惟有韓員外慘然不樂。怎忍見當筵歌笑。對東風獨自嗟。把雙鞦佩弧。單身飛馬。〔外〕卻怎進他府中麼。〔末〕只說他將軍墜馬。要見夫人。一時闖入。衆軍披靡。這時節呵。正寒雲深鎖絳窗紗。做宮鶯啣出上陽花。〔外〕異哉異哉。此吾平生所難事。君乃能之。

〔前腔〕英豪實可誇。信干城在兔罝。員外。夫人尊姓。〔生〕姓柳。李王孫待年之妾。卻歸下

官。那王孫又將家資幾十萬。盡數相讓。竟入華山尋仙去了。〔外〕又一奇事。俺便須具奏。此事亦當上聞。況今朝廷蓋造先天觀。也得一位高真。掌管教事。便到華山迎他。況說那仙風堪慕。嘆吾生未有涯。把封書奏聞。安車高駕。〔生〕日前有書約這幾時下山。倘若來時。多在玄都觀下。〔外〕如此就去相訪。怕青牛西出指流沙。向玄都先去問桃花。俺聞報時。曾撰一奏草。只待諸君問明。然後奏上。且讀請教。〔生末〕願聞。〔外讀介〕金部員外郎兼御史韓翃。久列參佐。累彰勳效。頃從鄉賦。有柳姬氏。阻絕兇寇。依正名尼。將軍沙吒利兇恣撓法。憑恃微功。驅有志之妾。干無爲之政。臣部將兼御史中丞許俊。族本幽冀。雄心永決。卻奪柳姬。歸于韓翃。義切中抱。雖昭感激之誠。事不先聞。固乏訓濟之令。大略是如此了。〔生〕多謝主帥。〔丑公差上〕暫離青瑣闥。來報紫微郎。〔見外介〕稟老爺。小的是中書省差來的。韓爺已陞駕部郎中知制誥。是御筆親點出的。又遣中使特召韓爺來早面對哩。〔外〕恭喜喬遷。兼承晝接。〔生〕才薄望輕。恐無此事。〔外〕員外且別來早進對。許虞侯。你隨俺入朝。〔末〕謹領。

五夜漏聲催曉箭。

九重春色醉仙桃。

欲知世掌絲綸美。

池上于今有鳳毛。

第四十齣 賜完

〔繞紅樓〕〔旦上〕畫閣紅梅照曉霜。春漸破。流轉風光。眼底歡來。眉尖愁放。羞減少年妝。〔更漏子〕相見稀。相憶久。眉淺淡。烟如柳。垂翠幕。結同心。侍郎熏繡衾。虛閣上。倚闌望。還似去年惆悵。春欲至。思無窮。舊歡如夢中。奴家自陷侯府。一意捐生。不意得遇許虞侯。復脫重圍。頓還舊好。聞得侯節度也將此事奏聞。早間韋巡官來報。相公新陞駕部郎中知制誥。朝廷特遣中使引對御前。此時想多回朝也。〔生冠帶淨丑隨上〕

〔前腔〕勅使傳宣出建章。承對罷兩袖天香。鵲樓前。鳳凰池上。歸去馬蹄忙。

〔衆稟介〕此間已到館前了。〔生做下馬介〕左右的。把馬牽到後槽去。〔衆應介生日見介旦〕相公回了。聞得相公又有新擢。可喜可喜。〔生〕近日制誥闕人。中書凡兩進名。御筆抄出道與韓翃。原來有個江淮刺史。卻與下官同名。御筆又親寫下官寒食詩。春城無處不飛花。寒食東風御柳斜。日暮漢宮傳蠟燭。輕烟散入五侯家。道是與此韓翃。方知是的。〔旦〕聞得這詩向在御前供奉了。適方那

馬像原是我家的。〔生〕這馬乃是沙將軍所獻。賜名做如意驄。今早面對時。官裏因誦下官調馬詩。就便賜與。〔旦〕敢是看李王孫調馬的詩麼。〔生〕正是此馬。不知爲何歸在沙府。〔旦〕相公行後。妝貲盡費。也將此馬賣了。〔生〕夫人。鈿車昔別。玉合相投。已道西陵之柏。始結同心。誰知南浦之珠。再歸雙掌。我和你豈容易得見今日。

〔別銀燈〕抵多少雲勞月攘。消難盡舊時嬌樣。從今再把章臺傍。穩倩取婦隨夫唱。〔合〕雙雙。休輕撇漾。儘餘生風流幾場。〔旦〕相公。新歡重整。往事多慚。所謂思之又思。果然痛定猶痛。

〔前腔〕落侯門在深潭萬丈。似黃姑把秋期懸望。算由來好事多磨障。喜玉合重歸掌上。〔合前生〕夫人。適聞李王孫輕蛾俱已下山。想必就到。叫左右。李真人同一道姑到來。即便請進。〔衆應介小生李王孫貼輕蛾並道妝上〕

〔金菊對芙蓉〕歲月空忙。河山猶壯。千年鶴返遼陽。〔到介〕門上的通報。李王孫柳道姑相訪。〔衆〕即便請進。〔生旦接見介〕故人相向。還憶別幾度風霜。〔合〕眞如隔世。乍

逢歡暢。轉覺淒涼。〔旦〕王孫別來所喜道體清佳。玄宗大振。〔小生〕夫人別來所喜節傳哀鵲。緣合孤鸞。〔生〕輕蛾向日李兄許你是秦宮毛女。梁家玉清果應其言。不負所志。〔貼〕相公夫人既仍諧宿世之因。須早結來生之果。〔生〕李兄自從華山相別。不覺白日如流。侯節度說來奉訪。曾一面否。〔小生〕節度曾來見訪。因知韓兄與柳夫人之事。他要舉俺爲先天觀主。俺也許了。〔生〕李兄爲何許他。〔小生〕俺昔年出家。初見張果尊師。他命俺虔誠度物來往人間。臨別之時。又傳兩句真言。道是遇華則止。遇侯則行。以此久住華山。今偶遇着侯節度。正相符合。以此許他。〔生〕輕蛾。你方外的人。休拘前禮。便請坐了。李兄今日除夕。且逢立春。嘉會不常。舊知咸集。大家少敘一回。看酒來。

〔山花子〕一麾東海乘邊障。黃雲白草沙場。喜還京驟沐寵光。掌絲綸祕省仙郎。〔合〕問明朝屠蘇遍嘗。條風送臘春載陽。千官拜舞稱壽觴。玉佩朝元。寶曆迎祥。

〔前腔〕〔旦〕胡颺乍起秋驚蕩。分飛又在他行。喜雙栖當年畫梁。那教倚堦爲郎。〔合前〕

〔前腔〕〔小生〕邯鄲道傍。早破黃塵障。須看白晝翱翔。喜歸來紅雲帝鄉。重逢
題柱田郎。〔合前〕

〔前腔〕〔貼〕巫雲夢長。喚醒梅花帳。纖珪瘦玉殘妝。喜歸來桃開又芳。仙源且
覓劉郎。〔合前衆〕侯老爺到了。〔外侯節度冠帶領衆上〕

〔菊花新〕分茅列鎮號淮陽。象服蟬冠映日光。前隊儼成行。滿路絳鷓聲唱。

〔衆報生接見介生引旦見介〕這便是家姬柳氏。通家之義。理當出見。〔外〕韓君平。你詩傳薇省。夫
人。你名播蘭閨。已遇好文之時。又遂合歡之願。特來奉賀。〔生日〕多謝多謝。〔小生見介〕昨承光重。
〔外〕幸接清輝。〔小生引貼見介〕這道姑是昨日說的輕蛾了。〔外〕下官領教之後。一併奏聞。因留
許虞侯守候玉音。少刻定到。〔衆報介〕聖旨到了。快排香案。〔末許俊冠帶齊詔上〕

〔前腔〕天書飛下五雲傍。紫陌珂聲夜未央。天子坐垂裳。周道正看平蕩。聖旨
已到。跪聽宣讀。皇帝詔曰。朕惟昭明大節。實開王化之源。弘獎名流。式暢玄風之旨。天絃宜廣。聖德
益章。茲爾駕部郎韓翃。謀參箸畫。學異管窺。當代天言。用施巽令。可授中書舍人。仍知制誥。柳氏智

占衛足。才敏揮毫。趙璧終完。南金愈礪。封昌黎郡夫人。仍歸韓翅。王孫李峯。遺榮方外。探祕環中。賜號混元真人。主持先天觀事。侍女輕蛾。青衣脫跡。黃籙預司。賜號通德先生。歲給祿米。及具奏工部。尙書侯希逸。久著元勳。誕膺懋賞。進封淮陽王。實封二千戶。中丞許俊。勇張克敵。義切全倫。出拜關東觀察使。驃騎將軍沙吒利。取其悔過。合有議功。賜錢二百萬。嗚呼。光天所覆。咸沾湛露之仁。太岳雖高。須竭纖埃之報。允承駿命。不闡鴻猷。謝恩。〔外生旦小生貼謝恩介生〕自揣微生。忝茲嘉命。皆由主帥吹噓。中丞汲引。〔外末〕好說好說。〔生〕李兄。你向無名字。聖上何以知之。〔小生〕貧道初名李翼。出將有功。嘗爲李林甫所排。告歸隱跡。後來入道。改名李峯。〔外〕下官昨日問知。因而具奏。〔鷓鴣天〕〔外〕赫赫金貂引上公。〔末〕又分玉節出關東。〔生〕鳳池草詔言如綉。〔旦〕鸞閣臨妝首似蓬。〔小生〕攀海日。趁天風。〔貼〕一朝鷓鴣透樊籠。〔合〕今宵剩把銀缸照。猶恐相逢是夢中。〔合〕
〔太和佛〕仰荷天恩遍八荒。書折紫泥香。鴻鈞初轉。德澤布春陽。萬物盡輝光。靈芝疊產銅池傍。又見鳳儀獸舞。郊野牧夷羊。況地出甘泉。瑞露三危降。眞道是太平有象。試看取喜氣歡心共洋洋。

〔舞霓裳〕染翰朝朝侍君王。侍君王。列騎翩翩鎮邊疆。鎮邊疆。遊仙任俠俱堪
尚。更那妻賢節操凜冰霜。併譜入管絃歌唱。開宴處聽取新聲正嘹亮。

〔尾聲〕春風折柳章臺上。問舊日青青無恙。願百歲人長在醉鄉。

璧月團團玉樹新。

尊前歌舞醉留春。

試翻翦雪裁雲句。

且作拈花弄柳人。

玉合記終

金

蓮

目錄

第一齣 首引

第二齣 偕計

第三齣 彈絲

第四齣 郊遇

第五齣 射策

第六齣 捷報

第七齣 構衅

第八齣 外謫

第九齣 閨詠

第十齣 歸田

第十一齣 湖賞

第十二齣 媒合

第十三齣 小星

第十四齣 詩案

第十五齣 就逮

第十六齣 生離

第十七齣 廷讞

第十八齣 聞繫

第十九齣 飯魚

第二十齣 控代

第二十一齣 重貶

第二十二齣 蜀晤

第二十三齣 賦鶴

第二十四齣	詬姦
第二十五齣	量移
第二十六齣	驚譌
第二十七齣	焚券
第二十八齣	賜環
第二十九齣	釋憤
第三十齣	同夢
第三十一齣	慈訓
第三十二齣	覲聖
第三十三齣	便省
第三十四齣	證果
第三十五齣	接武

金蓮記 目錄

第二十六齣 晝錦

四一 開明書店

金蓮記

明陳汝元箸

第一齣 首引

〔臨江僊〕〔末上〕詞曲元人稱獨步。到今戶叶宮商。夷堅豔異總荒唐。何如蘇學士。才節世無雙。赤壁一游閒事耳。生平梗概宜詳。金蓮新譜慢鋪張。未能追雪調。聊取佐霞觴。

〔漢宮春〕蘇軾奇才。應制科獨對。名壓儒流。特賜金蓮歸第。帝眷綢繆。恩沾椿樹。羨連枝翰苑同游。奈奸惇計傾外調。朝雲契合鸞儔。驀地獄成詩案。幸子由申救。遠謫黃州。不久量移儋耳。重拜宸旒。怨將德報。喜雙兒克紹箕裘。戒和尙一朝提醒。合門共證前修。

蘇學士金蓮寵渥。

王美人玉管姻聯。

章丞相讎擠南海。

印禪師果證西天。

第二齣 偕計

〔滿庭芳〕〔生扮東坡儒服上〕秀毓山川。靈分草木。幾番焰奪台星。筆驚風雨。膾句擲金聲。看雄風鼓翅。南圖九萬鵬程。駕征車長安日近。曉夢遶瑤京。〔鷓鴣天〕薄雲輕雨曉晴初。陌上春泥未濺裾。行樂及時雖有酒。出門得伴漫看書。行騎促。暮山孤。空把鷓鴣夷載後車。他日玉堂應鶴立。豈慚獻賦老相如。不佞姓蘇。名軾。字子瞻。眉州眉山人也。學富五車。才高八斗。睿智聿超鼠獄。玄明克駕雞碑。詩泣鬼神。寶氣半騰吳練。文搜丁甲。精芒全燦秦金。龍浮馬負之圖。已曾扶輿。鼇擲鯨吞之句。無不深研。明害氣于六庚。曉麗占熊之日。披珍藏于二酉。春橫倚馬之雲。筆聳詞峯。豎詩標于劍閣。觚翻文浪。飛翰藻于錦江。閣上華玄。嘗接白衣之載酒。壚頭滌器。未酬彩管之題橋。縱繡虎窗前。當趁青春努力。而非熊堂上。未便白首灰心。嚴君老泉居士。家慈程氏安人。春風庭畔。每叨詩禮之聞。夜雨燈前。時念門閭之望。舍弟子由。墳篋調叶。喜連翩而登雲。室人王氏。琴瑟聲和。更駕才于詠雪。新有弄璋之喜。允符種玉之祥。女弟蘇美。霜管題梅。早已絲聯家室。妹婿秦觀。月梯因桂。曾聞食寄京師。茲奉嚴君而同上公車。須別慈母而載馳孔道。且待娘子出來。與

他少罄別。悵則個。道猶未了。娘子早到。〔旦扮王氏上〕

〔一翦梅〕畫樓百尺滑流鶯。欲掃眉痕。淚溼眉痕。不堪朝雨浥輕塵。舉日長亭。

怕見長亭。〔相見介坡〕蒲帆將駕。雖有橋燕留人。桂棹半橫。會見柳鶯送客。孤幃冷簾。難辭白髮于

北堂。另楚寒巫。更撇紅顏于別闌。況嬌兒索乳。詎消夜半之魂。而亂鳥啼春。復起舟中之恨。〔王〕愛

深百歲。豈忘情于月蝶花蜂。志在四方。難阻路于雲龍風虎。堂前白雪。妾當執掌以奉萱花。眼下青

衫。君莫揮啼而染楊柳。〔坡〕但願題名玉署。通籍金閨。庶慰丸熊。更消織錦。〔坡〕

〔太師引〕論文章圍棘堪馳騁。願藏身龍樓鳳城。試探他飛花送酒。早慰卻寸

草懸情。你羅衣冷落脂香暝。休怨我雨闌雲剩。驚春夢題詩錦屏。整歸鞭重問

青青。〔王〕期爾香浮曲水。誇得意于春風。念奴粉隱瀟湘。守愁懷于夜月。當爲鵬翎努力。莫因蛾影

繫心。〔王〕

〔前腔〕瑤臺春冷孤鸞鏡。誰念我青閨麗人。惟願你班聯豹尾。須早個書寄魚鱗。想天朝羅網收豪儁。獻皇家楚璧隋珍。我便是魂飛夢驚也。甘心怨翠啼春。

〔外扮老泉幅巾氅衣老旦扮程夫人小生扮穎濱帶僕上〕

〔一翦梅〕游絲曳楫欲長征。鬢自星星。淚自盈盈。天街小雨洗青萍。苦走風塵。

無限離情。〔相見介程〕白雪將侵。正可怡情泉石。青雲覺遠。何須奔走風波。〔老〕李廣難封。豈忘情

于鵲印。馮唐雖老。尙屬意于龍頭。況因麟紱兩兒。觀光上國。故此鷁舟千里。衝浪長江。吾意決矣。爾

何阻焉。〔坡穎〕東風回首。詎不傷心。春酒盈甌。願壯行色。

〔三學士〕碧柳筵前春酒進。扁舟已促行程。堪嗟擊缶千秋壯。莫道揮毫兩鬢

星。〔合〕祖別臨岐愁耿耿。看歸來衣錦新。〔老程合〕

〔前腔〕老大徒悲泉石隱。他年進退難憑。總然日月雙蓬鬢。不負乾坤一草亭。

〔合前王〕

〔前腔〕細雨孤燈愁隻影。不堪聞腸斷猿聲。離懷總付春流咽。別恨羞看疊嶂

青。〔合前僕〕劍匣琴囊。已經整理。筆牀茶竈。亦復相攜。請相公官人登舟。〔老〕就此相別。

〔香柳娘〕念飄蓬遠行。念飄蓬遠行。悲啼自省。翠幃冷寂桑榆景。〔程〕我離愁

頓增我離愁。頓增你皓首。逐浮萍。我殘顏。怯看鏡。〔合〕唱殷勤渭城。唱殷勤渭城。陽關雨輕。河梁雲另。〔坡〕〔坡〕

〔前腔〕別慈幃淚零。別慈幃淚零。春暉陡恨。怕萱枝無耐。風霜緊。〔程〕嘆雙兒遠征。嘆雙兒遠征。堂上怨雞聲。天邊怯鴻影。〔合前坡〕

〔前腔〕怕孤鸞夢驚。怕孤鸞夢驚。瓊樓妝靚。含啼人遠。天涯近。〔王〕送征人短亭。送征人短亭。千里滯羅裯。三更恨珊枕。〔合前各拜介程王先下老坡〕

〔前腔〕嘆馳驅玉京。嘆馳驅玉京。愁填花徑。孤帆着雨。春波迴望。迢迢遠程。望迢迢遠程。此去對彤廷。雙雙畫歸錦。〔合前〕

〔老〕亭亭孤月照行舟。〔坡〕人自傷心水自流。

〔穎〕日暮鄉關何處是。〔僕〕烟波江上使人愁。

第二齣 彈絲

〔薄倖〕〔小旦扮朝雲正旦扮夢巫同上雲〕細雨妝凝。輕烟夢杳。正春寒江樹。愁濃湖

草聽流鶯百轉。縈人煩惱。試看腰肢一捻。更爲春來漸小。〔渡江雲〕晴嵐低楚岫。暖回雁翼。陣勢起平沙。驟驚春在眼。借問何時玉枕印桃花。〔巫〕塗春暈色。增粉黛。競作妍華。千萬絲陌頭楊柳。漸漸可藏鴉。〔雲〕妾身姓王。名朝雲。字子霞。錢唐人也。蕙質多奇。蘭媚堪畫。金牋玉管。偏超織錦之才。寶氣瓊香。不羨投珠之號。正是腰纒勝露。未曾南戶窺郎。年已破瓜。豈向西園待客。當此春深。悶人殊甚。夢巫。你說琴操姐姐今日來看我。須索候他。〔巫〕曉得。〔貼旦扮琴操上〕

〔掛真兒〕翠館香深鶯乍老。依然夢入蘭苕。髻束芙蓉。眉描楊柳。堪恨青樓腔調。〔琴〕妾身妓女琴操是也。少逢漂泊。偶爾失足于風塵。長厭繁華。每欲投身于空寂。與朝雲妹子同

枝連氣。原爲中表之親。搦管拈針。更結相知之雅。昨曾邀我。今特訪他。呀。夢巫已在門首了。〔巫〕等候多時。就此請進。〔相見坐定介雲〕姐姐。殘雪欺梅。斷雲嚼柳。如斯景物。可是賞人。〔琴〕

〔好姐姐〕當筵調笙弄簫。羞殺我韓娥蘇小。但閒房坐臥。羅衣擁柳條。驚春早。應承勉強非心好。無耐飛花點翠翹。〔琴〕賢妹。花呼蜂對。香殢蝶羣。舉目生嗔。傷心無耐。

〔雲〕

〔前腔〕樓頭紅妖翠嬌。芳心逗闌干低靠。鸞臺塵積。蛾眉只自描。愁誰掃。殘花
萬縷縈青草。夢入箜篌伴寂寥。〔琴〕瑤琴在御。應知指法過人。〔雲〕桐譜未窺。深愧師傅無

自。望姐姐見教一二。〔琴〕恐污尊聽。不敢胡彈。〔雲〕何必太謙。願聞郢調。〔琴作彈琴介〕

〔二犯江兒水〕徽音清俏。聽縹緲徽音清俏。似求凰聲韻好。這梅窗夜話。蘭操
春調。和朱絃風外裊。流水寫輕綃。高山逼絳霄。音入藍橋。響振瓊瑤。卻是羨焦
桐一曲巧。芳心頓消。問卿家芳心頓消。幽懷偏遠。嘆文君幽懷偏遠。最堪悲是
羅衫萬點淚澆。〔雲〕聲落梁塵。詞超柳絮。願度一曲。博笑大方。

〔前腔〕〔雲〕瓊樓妝曉。正百尺瓊樓妝曉。看青青湖外草。怕蜂窺帳底。燕掠花
梢。倩龍池和鳳沼。寡鵠望秦簫。孤鸞怯楚腰。黛綠慵挑。金粉羞調。卸朱徽銀甲
小。巫山夢遙。怕難尋巫山夢遙。湘江春杏。有誰憐湘江春杏。枉教人背鞦韆珠
淚暗拋。〔琴〕調出廣寒。聲同鈞樂。誠爲絕響。慚步後塵。〔雲〕近日曾見過才子麼。〔琴〕妾閱人多矣。
皆是井底蝦蟆。未有中原麟鳳。

〔懶畫眉〕那曾見鎔今鑄古五車饒。冰壘花生玉粟嬌。雖然是章臺深處醉紅
綃。紫芝未有人年少。羞泛春深數葉桃。〔雲〕真是才子難逢。佳人空老。

〔前腔〕那些個陽春白雪調偏高。賦寫甄神醉裏邀。風流難遇五陵豪。憐奴禁
放漁郎棹。愁殺濃烟鎖碧桃。〔琴〕妹子莫怨。佳人薄命。自有君子好逑。〔雲自羞介琴〕暫且告

歸。又來相訪。飛烟閒遶望春臺。〔雲〕十二山晴花盡開。〔琴〕無限春愁莫相問。〔雲〕明朝有意抱琴
來。〔琴下雲〕琴操姐久居樂籍。尚少奇逢。妾身困守衡茅。怎諧佳偶。

〔前腔〕他胭脂一抹冷金翹。雙釧寒生眉影雕。難逢京兆筆尖描。憐我花關晝
鎖無青鳥。目斷西湖夾岸桃。〔長嘆下介巫弔場云〕我姐姐未舒荳蔻。邊望桃夭。好笑好笑。

〔前腔〕他淒涼挨過可憐宵。浪想銀河駕鵲橋。只恐怕參商難做女牛交。我姐

姐桃李之姿。尙未締鸞交鳳友。我夢巫柳蒲之質。何日成燕侶鶯儔。春愁害得腰圍小。怕見
蜂鬢掠絳桃。

第四齣 郊遇

〔丑扮佛印上佛〕自家叫做佛印。生來有些靈性。只爲了悟一心。因此削光兩鬢。漫言祇樹有緣。落得浮萍無定。不逞花柳風騷。不圖利名僥倖。但曉理會玄詮。也曾透明佛證。三昧上真炁已全。百煉中凡心俱淨。縱然遊戲塵寰。不落腥膻陷穽。筆管中有譴浪的文章。舌頭上有談諧的高興。縉紳行裏。也去伴食銜杯。羅綺筵中。偏要猜拳行令。堪笑世人懵懂。不識菩提路徑。我佛印怎麼說這兩句話。我前世與蘇子瞻並生秦谷。同臥招提。我有明悟之名。彼有五戒之號。曾拾赤繒于雪地。遂留翠黛于禪關。名曰紅蓮。麗超金粉。恨五戒之偶見。恰六塵之未消。自慚敗壞前修。因此托身後世。清一胎投琴操。紅蓮舍奪朝雲。當完再世之姻緣。爰示三生之契合。共消宿障。復隸玄臺。第慮彼永劫難撈。且望他悟機重闢。遂走轉輪之路。仍爲祝髮之徒。八拜相交。三年間隔。只是回頭欠早。罔知往世現世之因。舉眼成迷。未證前身後身之果。前秦少游來京。說他兄弟俱叨鄉薦。今會場已畢。想來看我。這也不在話下。昨日黃魯直章子厚約我同游郊外。怎的還不見來也呵。〔外扮黃魯直忠靖冠服淨扮章子厚便服攜家樂上〕

〔阮郎歸〕南園春半踏青時。風和聞馬嘶。桃花如臉柳如眉。日長蝴蝶飛。〔相見

介章〔黃笑介〕 禪師前敢道光字耶。〔佛〕這也何妨。

〔章〕禪師既然不罪。我要個上頭光。〔黃〕削髮除煩惱。卻不是上頭光。〔章〕我要個下頭光。〔黃〕江邊赤脚僧。卻不是下頭光。〔章〕我要個中間光。〔黃〕裸體坐松風。卻不是中間光。〔章〕我要個光打光。〔黃〕諱不過三。〔合〕

〔窄地錦襠〕東風吹水百花低。一片輕烟翠嶂迷。攜僧載酒出郊西。肯向青山話息機。〔下末扮秦少游便服上〕金谷銅駝非故國。青春作伴好還鄉。巡簷共索梅花笑。暫醉佳人

錦瑟傍。不佞秦觀。字少游。才富珠璣。倒神女之三峽。文成雲錦。奪天孫之七襄。曾約內兄弟蘇子瞻。子由出郊尋春。兀的尙未來也。〔坡頰上〕

〔阮郎歸〕花露重。草烟迷。前村酒旆飛。山光半染薄羅衣。攀蘿訪釣磯。〔相見介〕秦〔鞍馬既當孔道。琴尊復伴奚囊。願拉翠袍。同游芳草。〕〔合〕

〔窄地錦襠〕銅駝草色夾花飛。十里春陰送鳥啼。畫橋流水抹霜蹄。每日江頭盡醉歸。〔坡〕此處青山似削。碧水欲飛。石髓滲苔。自翦天然之梅。岸楊擲鳥。如聞信口之簧。就此開

筵。莫辜麗景。〔各坐介黃章上唱攜僧載酒出郊西背向青山話息機復云〕你看紫嵐扮景。青嶂
撩人。奈王孫公子與學士大夫。浪傾綠蟻千杯酒。先佔白鷗三尺沙。〔佛〕佳興須同。勝游無禁。推門
看竹。何妨王子乘輿。索酒指瓶。便做灌夫罵坐。大家撞去則個。〔相見介坡〕呀。原來是佛印魯直子
厚也。〔黃章佛〕原來是子瞻子由少游也。〔坡〕數載風塵。竟睽膠漆。一朝尊俎。偶會金蘭。願浮白以
敘交情。且來青而譚別意。〔黃章佛〕覽勝逢朋。頓增佳貺。游春話舊。更暢幽懷。還須塵尾同揮。是用
兕觥共進。〔進酒介坡頌秦〕

〔集賢賓〕春山千點藍似水。遙看翠影參差。雨蘸湘桃紅散綺。嘆宿昔離情別
意。今日尋春相會。消一片愁城恨壘。〔合〕芳徑裏。人在花磚蘚地。〔黃章〕

〔前腔〕花嬌柳鞦韆春萬里。還宜酒漾螺卮。羨君家雨粟霜毫詞賦美。還擬卻柏
梁沈醉。真個是文園風致。應指日天池聯翅。〔合前佛印〕

〔前腔〕蜂黃蝶粉春色麗。□相逢暗裏心知。縱白鳳瑤章多美技。論世態浮雲
可比。看這些蠅名蝸利。心腸熱憑誰淘洗。〔合前佛〕豪懷不淺。莫負山靈。悶飲何當。須頌

酒政。〔黃〕行什麼令。〔佛〕要行個忙令。說得好者。必登上第。就是魯直說起。〔黃〕占了。舉子進科場。全無字半行。燭已相將盡。問君忙不忙。〔坡〕我有十筐蠶。全無一葉桑。春已相將半。問君忙不忙。

〔穎〕我有百畝田。全無一寸秧。夏已相將半。問君忙不忙。〔秦〕自造數間房。全無瓦一張。大雨相將至。問君忙不忙。〔章〕駕艇入長江。中流櫓楫亡。大風相將至。問君忙不忙。〔佛〕和尚養婆娘。相攜正上牀。夫主門外叫。問君忙不忙。〔坡〕禪師之令。雖爲巧弄風流。實是自呈供狀。〔佛〕諸公之令。意辭俱美。優劣難分。〔黃〕今年既是歐陽修主考。此人玉鏡高懸。冰壺朗照。二子定爲首薦。諸君亦合同登。〔坡穎〕才慚東箭。敢佔龍頭。〔章秦〕價愧南金。願隨驥尾。〔黃章坡穎秦合〕

〔貓兒墜〕春江麴米。光溜黑貂衣。細雨花村漾酒旗。破除萬事是心知。〔合〕芳菲。看日落高春。瘦馬扶歸。〔佛〕

〔前腔〕鵬搏鳳彩。堪向玉池飛。聞得宮娥已製衣。知誰能折最高枝。〔合前佛背〕

對坡介。長公繡口錦心。不日連枝奮北。老衲萍蹤浪跡。來朝一葦度西。願借酒杯。預賀看花之喜。暗憐衣帶。不勝折柳之懷。〔坡〕纔得相逢。又將辭去。當此春風。佳會頓爲朝雨。離筵強進。一觥代歌。

三疊。〔黃坡穎章秦〕

〔簇玉林〕銅龍啟。玉署披。正含香敷奏時。晴雲半落龍蛇字。瓊林準擬紅裙醉。

〔合〕笑淒其。僧伽明日。又說走天涯。〔佛〕

〔前腔〕承明裏。太液湄。贈宮袍醉御匜。我自做孤雲野鶴無拘係。寒瓢破衲堪遺世。〔合前衆急上報介〕蘇大相公中了第二名。二相公秦相公章相公俱中了。〔坡等急下佛弔場

介〕我看子瞻纔能進步。便覺揚眉。正是世險未嘗。宦情太熱。恁成鐵網之投。難用金針之撥。我且寄蹤三竺。還期執手兩湖。正是

空門無處復無關。

世上浮名好自閒。

借問路傍名利客。

春來江上幾人還。

第五齣 射策

〔小外扮黃門上〕絳幘籌傳露正垂。峇嶢宮闕壯朝儀。香飄玉鼎晴烟細。日照金莖麗影移。合殿雲濃留嫩草。千官花覆駐游絲。鳳樓出入口焚牘。會見英雄集柏池。自家黃門官便是。班糾豹尾。職奉

螭頭。代喉舌于官家。備腹心于禁地。今日聖上臨軒策士。只得在此祇候。怎見得早朝氣象。只見花迎劍珮。柳拂旌旗。萬國衣冠。盡染御爐細縷。六宮笙鼓。俱傳天樂新聲。日光照在扶桑。露水沾乎禁柳。正是遶殿流鶯。凡幾樹。當蹊亂蝶。許多叢。道猶未了。舉子早到。〔坡頴秦章上〕

〔出隊子〕沙堤春曉。沙堤春曉。五色晴雲寶焰嬌。香烟千縷惹宮袍。喜向銅螭弄彩毫。遙見天庭。一片僊韶。〔黃門〕諸生有何策略。就此披宣。〔坡〕

〔畫眉序〕謹對明廷詔。環視中原尙紛擾。奈宸衷求治。雄心太早。恨張羅玉石無分。嗟懸鐸薰蕕相絞。〔合〕望君王奮志成隆化。莫使豺狼當道。〔頴〕

〔前腔〕草野抒忠告。權酒征茶太紛擾。豈標枝野鹿。家熙戶皞。奮乾綱。旰食宵衣。持國柄。敬天慰廟。〔合前秦〕

〔前腔〕玉陛舒奇抱。看瑣尾啼饑衆紛擾。惟改柱張絃。掄才訪道。太阿持禍絕。怡堂。朝常肅。災消煬竈。〔合前章〕

〔前腔〕披褐陳王道。須委任元僚絕紛擾。惟丹宸靜攝。洪恩駘浩。弄風南霖雨。

時調。居辰北衆星環照。〔合前黃門〕諸生試卷。盡經御覽。蘇軾可第一人。蘇轍可第二人。餘各

賜出身有差。〔衆謝恩介黃門〕聖旨說。軾轍兄弟係何人之子。可再奏來。〔坡〕臣父蘇洵。見在京師。

〔黃門〕聖旨說。蘇軾策略箴今。文章逼古。蘇轍謀猷出世。議論驚人。俱爲宰相之才。當典史官之

任。着兄弟同直史館。撤殿前金蓮御燭。送軾歸第。其父蘇洵。禔躬有道。訓子多方。可授祕省校書郎。

嗚呼。有是父。有是子。咸知家學之淵源。難爲弟。難爲兄。足壯朝端之砥柱。時欽朕命。益靖汝心。謝恩

〔謝恩介章〕既忝同登。吾輩願分鄰照。〔坡〕獨蒙特寵。他人敢借餘光。〔章怒介〕笑譚之頃。便起荆

榛。〔秦〕言語之間。何須芥蒂。〔秦扯章下介衆扮內官宮女持御燭官服上〕

〔滴溜子〕今日裏。今日裏。承明進表。金蓮燭。金蓮燭。祥光普照。喜得紅雲飛繞。

依稀似對青藜耀。雙壁連城。共醉鸞堤鳳沼。〔坡〕已到門首了。快請太爺出來。〔老上〕漫

驚白髮埋魚冊。喜見青年插鳳翹。〔相見介老〕既登黃榜。復賜金蓮。沐此恩榮。須知報效。〔坡〕爹爹

蒙聖旨特拜祕省校書郎。請受冠帶。〔老謝恩介坡〕列位有勞了。〔衆下介秦上〕謾驚御酒傷唇醉。

喜得宮袍着眼新。〔老〕賢壻喜也。須進酒者。〔坡進酒介〕

〔芙蓉紅〕金花轟紫霄。玉蕊開清照。喜塤奏箎鳴。冰清玉皎。千秋霧影飛文豹。
三殿花香落錦袍。〔合〕春風好。紅殷翠嬌。鳳杯傳。鼉鼓鬧。〔穎進酒介〕

〔前腔〕香分宮女條。花壓中書帽。看綺羅開處。燈光圍遶。曲江已備看花棹。雁
塔新披拾翠袍。〔合前秦進酒介〕

〔前腔〕燈煤紫霧消。鞭鐙紅泥淖。一派恩光。滿門榮耀。瓊宮鳳嘴含丹詔。玉殿
龍頭屬紫袍。〔合前老〕

〔前腔〕誰知倚馬高。得遂非熊兆。看晚歲蒲輪。伏波不老。千莖白雪侵紗帽。一
朶紅雲罩布袍。〔合前衆〕

〔意不盡〕錦衣舞處更籌曉。更舞斑衣歡笑好。靖忠猷佐聖朝。〔老〕二子之名既就。

一生之願已酬。當投簪海岸。駕橈山林。以樂天真。無滯世味。蘇傑可先去報知太夫人。接大夫人大
官人同到京師。我不久就回了。

〔老〕和鳴雙鳳喜來儀。

〔坡〕三殿花香入紫微。

〔穎〕聞道甘泉能獻賦。

〔秦〕光添銀燭晃朝衣。

第六齣 捷報

〔花心動〕〔小末扮蘇邁同程王上程〕春雨莎隄。無限閒愁牽掛。捉斷刀頭。寒妬斑

衣。千里幽懷誰話。〔王〕杏園料已題詩罷。望長安使人悲詫。〔邁〕更愁聞百花

深處。鶯聲低亞。〔卜算子〕〔程〕有意送春歸。無計留春住。目斷天涯雁影稀。淚雨流如注。〔王〕顯

望碧天遙。不見春歸路。〔邁〕風急桃花也自愁。點點飛紅雨。〔各相見介程〕媳婦。自你公公與二子

出門。杳無消息。不知功名若何。〔王〕公公望壓人羣。丈夫與叔叔文空海宇。決然高擢。不必過憂。

〔邁〕父祖久留上國。空嗟養雁烹魚。孫兒越在幼齡。何處尋消問息。且須排遣。請勿憂煩。〔程〕

〔駐馬聽〕目斷驕駟。紫燕春風又落花。只見香消金鼎。琴冷瓊絃。蝶隱窗紗。牀

頭孤枕向人斜。眼前彩袖憑誰掛。何處浮槎。登樓遙望愁難畫。〔王〕

〔前腔〕懊恨芳華。粉淡衣襟夢一涯。看瓊林碧月。楚岫輕烟。洛浦浮霞。脂香玉

黛約裙袂。障泥油壁停梳掠。〔邁〕試問蜂衙。何時畫錦春如畫。〔僕上〕

〔不是路〕恩滿金華。紫馬春殘踏落花。餘寒惹舊時庭院柳重遮。報與太奶奶知道。太老爺官授祕省校書郎。不久就回。大爺二爺同授翰林學士。特撤金蓮寶燭。送歸私第。姑爺也中了。燭光斜。桃花春水筵初罷。寵及東牀更可誇。特差小人來接大夫人并大官人進京。舟如畫。蛾眉休戀茶蘼架。快游都下。快游都下。〔程〕你公公暮年沾寵。二子壯歲成名。實徵福于祖宗。喜增光于門祚。孩兒在京懸望。媳婦就此前行。〔王〕膝下紅顏。須代冬溫夏清。眼前白髮。況兼影隻形孤。怎捨庭幃。願供菽水。〔程〕你公公還家有日。莫愁萱室之長孤。孩兒旅邸無人。須戒蘭橈而遄往。〔邁〕媽媽遠征。孩兒固當陪侍。婆婆獨守。孫子豈忍拋離。〔程〕不須啼哭。就此起程。

〔榴花泣〕輕塵浥雨。半曲溼春紗。驚古道。怯殘霞。你車輪芳草度三巴。我白頭人怎聽啼些。悲淒晚鴉。怕東風淚滴鞦韆下。最愁人一捻嬌姿。更難拋三尺啼哇。〔王〕

〔前腔〕垂楊別路。回首暗嗟訝。春草暮。夕陽斜。不堪分手咽胡笳。怎撇得堂北

萱花迢迢路賒。堪悲白髮嫦娥寡。〔邁〕殢紅顏。淒楚風塵。挽青絲。韶齒年華。〔僕

上〕無端司馬登綸閣。催促西施上釣船。稟上夫人公子。船隻俱已齊整。請登程則個。〔王〕就此拜

別。〔程〕

〔急板令〕我冷朝昏門闌倚斜。你走風波山川望賒。嘆鬢老霜華。嘆鬢老霜華。只愁破鏡飛天。愁淚凝霞。懷寄垂楊。夢錯梨花。〔王〕從此去何日還家。看千里暮雲遮。〔王〕

〔前腔〕怯離愁青襟似麻。問歸期西風及瓜。〔邁〕總然是出入金華。總然是出入金華。怕你露冷蓮房。夢斷蘭芽。古渡漁燈。愁殺飛鴉。〔合前各拜介程〕

〔一撮棹〕愁腸裂。寄語到天涯。孫兒你遇着公公呵。桑柘影斜。日辨歸槎。你去對爹爹叔叔說。看青鬢鷺序上顯才華。〔王〕花愁并柳慘。怨無涯。長亭畔淚灑沾羅帕。

〔邁〕魂斷也一帶晚山遮。魂斷也一帶晚山遮。〔程先下王邁後下〕

〔王〕柳色參差掩畫樓。

〔邁〕楚雲湘水憶同游。

〔王〕羅敷獨向東方去。〔邁〕無奈金閨萬里愁。

第七齣 構衅

〔臨江仙〕〔外扮程伊川深衣角巾衆扮僕上程〕太極圖中生意好。鳶魚機趣滔滔。淵

源夙仰泰山高。圖書誰作主。天地屬吾曹。窗前草色悟惺惺。完卻先天一點靈。碧綠滿山

皆意趣。春風沂水伴西銘。下官程頤。別號伊川。人許性天上士。自慚理學名儒。接洙泗之淵源。擬荷

千秋之擔。紹昌黎之道脈。豈興八代之衰。昨奉綸音。今司祕閣。既食朝廷之祿。敢忘廊廟之憂。每勸

聖上誠意正心。求賢下士。聖上爲之改容。今日說王介甫章子厚蘇子瞻來。共議國是。須索候他。

〔僕〕稟老爺。欄前有桃之天天。灼灼其花。請去玩賞一番。〔程〕快移椅子過來。〔僕置椅偏斜介程

做不坐介僕〕老爺爲何不坐。〔程〕你不曉得。席不正不坐哩。〔僕做摘花介程作怒介〕你好不知

道理。〔僕〕老爺爲何發怒。〔程〕你不曉得。方長不折哩。〔衆扮王僕持帖上〕王老爺章老爺奉拜。

〔僕通報介〕王老爺章老爺到了。〔程〕快拿冠服過來。〔易服介衆擁王章上〕

〔謁金門〕千騎導。畫戟黃旗喧擾。朝罷香猶衣袖裊。且尋濂洛老。〔王〕下官王安

石是也。〔章做歪帽介〕下官章惇是也。〔相見介程做走下介章〕老先生怎麼進去了。〔程〕其冠不正。望望然去之。〔章〕這等老先生就替學生整一整。〔程〕學生怎麼該替老先生整冠。〔章〕笑倩傍人爲整冠。〔程〕出于何典。〔章〕出在杜少陵集中。〔王〕他們道學先生不曉得唐詩的。且坐下講話。〔程〕蘇翰林老先生怎麼尙未到。〔王〕這個新進之士。多有傲骨。似不可大用的。〔章〕便是這樣說。他前日金蓮送歸。好不奚落下官。〔坡上〕

〔前腔〕曳珮龍池鳳沼。回首雲低萱草。游子天涯歸路杳。離愁何處掃。〔通報相見坐定介王〕下官有一樁事。請問列位老先生。〔衆〕願聞。〔王〕今日明堂大饗。不知還好去弔司馬相公否。〔章〕似可去的。〔程〕章老先生。你背聖訓了。怎麼說一個似可去。昔者吾先師大成至聖孔夫子。于是日哭則不歌。業已作樂。怎麼還好去弔。〔坡〕但聞哭則不歌。未聞歌則不哭。〔程作怒介〕偏你後生會說。〔王〕這也不要介意。還有一事。〔衆〕願聞。〔王〕我行的青苗法。令民自度麥粟之贏。先貸以錢。俟穀熟還官。號曰青苗錢。此法何如。〔程急拜云〕此真天地父母之心。學生當爲老先生作一歌紀之。〔歌介〕百姓嗷嗷苦橫征。廟堂誰復問蒼生。相公新法如霖雨。從此寰區見太平。

〔坡笑介〕此公太腐了。〔王〕蘇先生。你道此法何如。〔坡〕據愚見。竊謂不可。〔王怒介〕你怎見得不可。〔坡〕出納之際。吏緣爲姦。且方其饒餘。雖良民不免妄用。及其輸納。雖富民不免踰期。恐州縣從此多事矣。〔程哭介〕王老先生一片好心。被蘇老先生埋沒了。可傷可傷。〔坡〕方纔說歌則不哭。如今歌後又哭。何其自相矛盾耶。〔王〕子瞻出言太是逼人。〔程王章〕

〔奈子花〕負空名舌底辭僥。弄虛脾腰頭骨傲。書生見識終窺豹。貌公卿那些忠告。堪誚說不得披肝廊廟。〔坡〕列位老先生說得差了。

〔前腔〕擅紛更訟已盈朝。佐謨猷舍難築道。片言誤國堪悲悼。害蒼生那些忠孝。〔背〕堪誚。衡一味雷同樞要。〔王〕難道此法終不可行。〔坡〕只怕也行不得。〔章〕他偏要行。你卻怎麼。〔坡〕酒逢知己千鍾少。話不投機半句多。〔下淨〕王老先生。我看此人出言無狀。何不置之外任。〔外〕果然不可留他在朝。〔王〕這個何難之有。我就題本貶他杭州去便了。〔章〕要貶子瞻。須把他兄弟子由一同謫外。庶免後患。〔王〕這個說得有理。〔王章〕

〔解三醒〕念吾儕勢焰傾朝。那個不脂韋媚竈。偏這生波濤翻覆招人笑。分明

履尾招鬚料。教他明朝整頓西湖棹。何日重登御水橋。〔合〕還堪惱。做不得怒蛙當轍。說什麼白鶴鳴臯。〔程〕

〔前腔〕他自負半世英豪。那見得一腔奇抱。爛斑三寸人前掉。電光閃爍皆傾倒。管教他早離鶴禁鸞坡上。永絕雲龍風虎交。〔合前王章先下程弔場〕方纔被蘇軾

這廝搶白了一場。好生煩惱。不免在此納悶片時。〔坐介中淨扮賈儒上〕小子喚做賈儒。一生名實不孚。拜在伊川門下。妝成道學模樣。飛語傷人。舌銛似劍。匿名嫁禍。筆毒如荼。使客氣藉口立名抗節。受人錢甘心納垢藏污。哭哭啼啼。假慈悲善瞞老鼠。耽耽逐逐。借聲勢巧勝妖狐。人人罵我做衣冠禽獸。箇箇識我是文物穿窬。孔子見了慌忙答禮。道我不是他的高徒。此間已是程先生門首。不免進去則個。〔相見介賈〕先生拜揖。〔程〕賈子何來。〔賈〕好笑好笑。有事特來相報。另才姦了馬扁的家婆。血次割了貝戎的田稻。恐被不講學的笑譚。只得隱忍不告。先生須索鳴鼓而攻。免使得罪聖門名教。〔程〕陽世雖逃顯戮。陰司自有假獄。莫令蘇軾聞知。又添一番恥辱。〔作頓足介〕罷罷罷。閉門不管窗前月。一任梅花自主張。〔下賈〕我先生收了這般徒弟。可也無法處治了。正是道學偷

了道學婆。道學割了道學禾。道學說與道學道。道學其如道學何。

第八齣 外謫

〔一江風〕〔坡上〕度流年。幔卷春風轉。回首時光變。望鄉關千里鶯花。半入蒼
痕遠。愁來掩鏡看。愁來掩鏡看。繙書淚未乾。嘆梁間又乳新來燕。下官官居禁籞。

職掌絲綸。頗期整頓乾坤。誓欲洗清世界。奈姦臣久據。未拔眼前之丁。新法盛行。已剝心頭之肉。昨
與王介甫輩會議。片言不合。拂袖而歸。吾想金馬玉堂。雖然清貴。竹籬茆舍。亦自逍遙。何須屈膝低
頭。效彼逢迎妾婦。只合揚眉吐氣。做個慷慨丈夫。這也不在話下。前者家君棄職歸山。未知在途夷
險若何。又聞室人挈兒就道。未知到京早晚若何。聊繙殘卷。少遣悶懷。〔王選僕同上〕

〔前腔〕路悠然。轉覺長安遠。暮雨迷庭院。落花前掩袖顰眉。無耐紅潮濺。春流
咽玉川。春流咽玉川。宮雲溼碧泉。繁花偏向瑤京豔。〔僕〕此間就是府中了。〔通報進

見介坡〕經年遠別。千里相逢。常思故國萱堂。難消歲月。料應客途荆室。備歷風霜。〔王〕

〔六犯宮詞〕高堂景暮。長安天遠。曾問白頭庭院。萱花凝翠。偏忻善飯堂前。馬

足淹春雨。蛾眉破曉烟。相公。我在家中呵。閒青粉。冷翠鈿。梨花門掩度芳年。春風
帳裏眉誰畫。永漏燈前影自憐。〔坡〕且喜遇兒稍長。曾入小學否。〔王〕兒郎頭角。曾親
蠹編。晴雲遙望蓬萊殿。舞翩翩。羅衫□□。含笑向金磚。題名龍榜。通籍鸞堤。頓令幃
簿生光輝。真是家門有餘慶。

〔前腔〕〔坡〕名題玉署。恩傳寶殿。漸覺宦情慵懶。淒涼無緒。寒窗自著瓊篇。邁

兒。你叔叔入朝未回。可去門首一候。〔邁〕曉得。〔下介坡〕細雨牀頭溼。孤雲鏡裏閒。我在京
中呵。懷金黛。想玉鬟。舊時風味尙依然。雲籠寶髻憑誰掠。月覷紗窗只自眠。
佳人攜手。風情轉添。相逢重問巫山淡。向燈前。低言挽袖。欲試舊花磚。〔邁急上〕

叔叔回了。〔穎上〕萬縷香烟浮碧鼎。半行珠玉染青毫。紫薇閣下春風暖。共羨池頭有鳳毛。〔相見

介王〕叔叔別來無恙。婆婆向自加餐。同氣同登。可喜可賀。〔穎〕慈親夏清冬溫。多承周庇。賢嫂風
餐水宿。幸得康寧。殊慰鄙懷。敢忘大德。

〔東甌令〕憐孤樹。怯晚萱。萬里相思各一天。白頭猶喜人強健。骨肉重相見。寒

燈偏覺笑聲喧。杯酒醉風前。〔坡〕

〔前腔〕離千里。戀一官。杳杳家鄉玉壘邊。扁舟欲逐魚蝦願。猶被鷓鴣行絆。不知何日整歸鞭。一笑出風烟。〔秦急上〕君恩如草露。世事等萍漚。〔相見介〕子瞻。子由。你還不知

道。聖上有旨。子瞻出守杭州。子由理刑河內。着金吾催促。卽刻出城。不許遲滯。〔坡頴〕這個俱出王道。安石章惇之意。就此起程去罷。夫人邁兒。過來見了姑夫。〔相見秦對坡〕二昆外調。頓興麟鳳之嗟。小弟孤淹。願口驪駒之曲。

〔劉潑帽〕臨行休更成淒斷。且寬懷各整雕鞍。飛花半逐斜陽片。賜金環。重上明光殿。〔衆〕

〔前腔〕相逢不久還分散。看鴻翎兩處盤桓。桃花怕滴珠如霰。翠衣斑。潦倒新亭怨。

〔秦〕客心何事轉淒然。

〔坡〕忽漫相逢是別筵。

〔頴〕同作逐臣君更遠。

〔王邁〕斷腸分手各風烟。

第九齣 閨詠

〔風入松〕〔琴上〕輕風暗透碧紗廚。正是悶人天氣。雙飛乳燕雕梁語。掠浪影。蝦鬚簾細。近日春山落翠。多負了賞花期。〔江神子〕長堤柳絮半搏風。水溶溶。颺殘紅。野渡舟橫。楊柳綠陰濃。望見西湖山色遠。人不見。草連空。妾身琴操是也。頗知絃管。略涉詩書。雖落秦樓楚館之中。殊無送舊迎新之態。欲求落籍。先且杜門。前日去訪朝雲。看他芳心漸露。倦體難勝。今又着夢巫請我。未知有何話說。正是萬點愁心隨絮舞。數行血淚送春歸。此間便是不免呼喚一聲。妹子何在。〔雲攜巫上〕

〔玩仙燈〕花染羅裙。又送韶華歸去。〔相見介琴〕光景如拋機上梭。初晴天氣尙清和。蛾眉不掃爲誰恨。豈少樓頭半斛螺。〔雲〕前屈寵臨。未伸報謁。穠華供眼。敢邀共陟吳山。蒼翠逼人。還擬冥搜瑞石。〔琴〕願追玉步。同覓仙蹤。〔行介雲〕真好風致也。

〔金索掛梧桐〕烟縈翠草絲。雲送黃梅雨。羞抹胭脂。半掠青螺髻。登高迴眺也。謾長吁。帶眼驚愁褪繡襦。無端紗冷西施縷。目斷琴敲司馬壚。愁容易。瑤笙翠

管冷落半年餘。〔合〕嘆流光鳥瘦花飛。挽不住春歸去。〔琴〕

〔前腔〕風簷落燕雛。水荇浮魚戲。糝徑楊花羞殺隨風起。沈香烟燼也冷金猊。睡怯新蟬係夢思。我如今謝客久了。綠陰滿院清如水。怕紅燭燒窗醉似泥。愁腸

碎。柘枝花帽冷落半年餘。〔合前琴〕日麗青山百尺飛。巒掛薛春濃綠樹。一羣嬌鳥啼花。值此

芳辰。可無佳句。〔雲〕繁華節序。觸景須吟。繚繞川原。登高堪賦。卿先走兔。妾願續貂。〔各持筆賦詩

介雲〕

〔鎖南枝〕雲催雨。霧隱枝。和風扇人閒寫詩。清味落江堤。香氣滿蘭蕙。愁誰洗。恨莫題。笑飛花。惹人意。〔琴〕

〔前腔〕花裁障。柳織絲。春愁一腔聞鳥啼。鳳蠟灑羅衣。驪珠滴鬢髻。霜毫弄。璽紙題。怨青山。使人殢。〔雲〕佳篇已就。初學願聞。〔琴做付詩雲讀介〕飛絮全欺雪。殘花乍入衣。

春風如舊識。偏向玉階吹。〔琴〕深慚弄斧。聊作拋磚。〔雲付詩琴讀介〕閒坐吳山巔。拾盡吳山翠。無

耐樹頭鶯。喚得愁心碎。此春閨之最勝者也。借妾攜去細玩何如。〔雲〕

〔錦衣香〕寫新詞愁心碎。怨東風千里翠。怕□□□愁。粉憔香悴。羅衣半隱殘脂。春痕一縫怕□□知。巫山夢斷杳無期。宮腰暫細。薔薇偷注。空將人鎖萬花叢裏。〔琴〕

〔漿水令〕鎖香閨慵窺蝶翅。掩重門休看蜂隊。妹子。朱顏誰怨。落紅飛。腰纔勝露。便掠花鬢。〔背云〕笑他行春心動。增憂慮。閒愁一片常縈係。〔對雲介〕春光去。春光去。雙眉影細。知何日。知何日。是佳期。〔末扮差人上〕纔向黃堂瞻畫戟。又從翠館覓笙簫。自家杭州府中一個差人便是。明日新太爺到任。須尋官妓承應。我想蘇太爺最愛美人。如今

□寶巷延定巷沙皮巷丁絲巷上八街柴垛橋環翠樓並無出色的姊妹。只有琴操。才色無雙。我方纔到他家。說在紫陽菴去了。不免尋他一會呀。果然在此。〔相見介琴〕公差何來。〔差〕新太爺到任。請大姐去承應則個。〔琴〕我杜門已久了。〔差〕既然如此。蘇老爺是個風流太守。素聞大姐芳名。一定要勉強走一遭。庶不使吾輩受累。〔琴〕妾心慕已久。面會何妨。你先回去。我就來了。〔差下琴向

雲〕既有官差。暫且相別。〔雲〕如無俗冗。還望□來。

〔琴〕晴雲漠漠柳毵毵。

〔雲〕獨閉空山月影寒。

〔琴〕越女含情已無限。

〔雲〕更無人倚玉欄杆。

第十齣 歸田

〔桃源憶故人〕〔程上〕堪驚時序如飛電。又早是薰風庭院。朝夕倚門愁嘆。只爲長安路遠。樓頭遙望千山亂。何日斑衣相見。良人已出京都。爭奈山遙水遠。老婦獨

居庭院。自憐影隻形單。況當殘春初夏之時。正值暗綠稀紅之候。頓起愁緒。怎消悶懷。

〔亭前柳〕白首老風烟。解組返林泉。我孤鸞空對舞。他駟馬未聞旋。〔合〕自憐。雙鯉音無見。離恨難傳。知甚日大刀環。兩兒游宦。誰娛彩服于堂前。冢婦之京。詎作羹湯

于廚下。似這般桑榆景逼。怎能殼棣萼榮歸。

〔前腔〕浪子滯歸鞭。少婦怯紅顏。他錦衣歸未得。我倦眼望將穿。〔合前老攜僕

上

〔紫蘇丸〕孤鞭歸去程途遠。早遂卻烟霞心願。空囊羞自到鄉園。誰念飛雲倦。

老夫叩闈謝職。馳驛歸田。此間已是家中。進去則個。〔相見介〕拜命遲非老。休官早亦榮。〔程〕好將已往事。訴與落花風。〔老〕聽我道來。

〔二犯傍妝臺〕恩波曾出九重天。階前雙玉早已□鵬搏。老夫見機。因而勇退。二子遭謗。聞已左遷。軾兒出守臨安。轍兒理刑河內。武林遠謫三閭。怨河洛荒投六月寒。門前柳長迎彭澤。徑裏花香築輞川。婿女兩人還在京師。奄奄弱息。瑤都暫安。不堪千里各風烟。〔程〕相公鳩杖西歸。幸不折腰于五斗。二子虎符南竄。誰憐翹首于一方。禍福靡常。

喜悲交集。

〔前腔〕清宵淚滴玉欄杆。何日裏白頭斑袖。攜手笑燈前。大兒呵。棲遲靈鷲消雄態。次兒呵。漂泊長沙怨少年。幸得老相公回來了。不聞鷓鴣長安漏。喜泛魚蝦震澤船。瀟瀟白髮。家園暫安。餘生聊寄錦江邊。

〔老〕坐臥閒房春草深。

〔程〕羞將白髮對華簪。

〔老〕獨憐京國人南竄。

〔程〕日暮聊爲梁甫吟。

第十一齣 湖賞

〔破齊陣〕〔衆擁坡上〕萍劍龍呼風雨。瓊林兔點虹霓。千里奔馳。一官牢落。翻覺烟霞遠滯。高風未掣飛鴻翅。宿雨空淹瘦馬蹄。蒼山一望迷。五馬嘶風夜入吳。天涯望斷半行書。西湖西畔北山北。一片晴光照玉壺。下官掣將紅粉。戾止黃堂。築起龍堆。柳夾兩湖之岸。駕成虹影。桃敷百尺之橋。實爲蓄洩永圖。非僅游觀私便。今日已完公務。此時須犒征夫。左右的。可打點舟師酒吏。以供皂蓋之游。更傳呼官妓樂工。爰助朱旛之興。〔衆〕領鈞旨。〔下介坡〕退到私衙。謀諸內壺。夫人有請。〔王上〕

〔鷓鴣引〕寶鏡羞蛾烟縷迷。瓊徽冷鳳露痕低。鄉園千里空回盼。斷送閒愁聽鳥啼。〔相見介坡〕身沈宦海。羞看紫綬懸腰。夢遶親闈。無耐白雲當眼。窮如有鬼。酒且無權。空期鹿遶車前。怎脫蛾投火裏。〔王〕相公素耽風月。妾身厭搆雨雲。欲消白首之悲。須遣綠衣之聘。〔坡〕自恨丈夫落魄。豈因女子縈心。聽我道來。

〔玉交枝〕瓊閨春暮。挽鮫綃雲翻雨飛。又不是枝褪花殘。豈重尋蘭香蓮步。

〔王〕不要瞞我。挑燈夜半自嘆吁。幾回夢入桃源路。須再聘沈魚美姿。須再聘沈魚美姿。〔坡〕風味縱濃。心情似懶。金谷雖懷紅粉。文園怕聽白頭。〔王〕妾意已決。不必虛辭。

〔前腔〕雲殘月午。掩妝臺青鸞怕飛。況且只有蓮兒一人。料閨中繡枕驚寒。看膝

下斑衣獨舞。〔坡〕雖然如此。只怕春風暗裏恨棄魚。當壚偷寫文君句。謾重尋鸞

膠鳳絲。謾重尋鸞膠鳳絲。〔僕〕遠絕雙魚信。驕聞五馬嘶。老爺。船隻樂妓。俱已齊備。〔王〕妾身

須迴避者。〔下介坡做行介衆〕稟老爺已到湖邊了。〔琴攜樂工上〕

〔出隊子〕簧調笙沸。簧調笙沸。一派嬌鶯喚柘枝。西湖咫尺紫雲迷。十里花香

上酒卮。遙看高峯一道霏微。〔琴〕官妓琴操叩頭。〔衆〕樂工叩頭。〔坡〕就此登舟。〔做登舟介

坡〕久慕芳名。得親豔質。愧無金屋貯此玉顏。〔琴〕老爺翰苑蜚聲。素羨風流太守。賤妾平康獻媚。

自慚窈窕佳人。既一笑以相逢。似三生之契合。〔坡〕我想青眉粉黛。總屬虛花。歌扇舞裙。終無結果。

在此追歡翠館。甘爲浪跡之萍。不如入侍朱門。永護長條之柳。吾恐冷落王孫車馬。配成商賈鸞凰。

倘悔則已遲。則圖之宜早。〔琴〕老爺興言及此。賤妾迷網頓開。卽當削髮爲尼。不落烟花之隊。豈復

描眉待客。久污清淨之根。

〔玉交枝〕秦樓滋味。最堪悲。王孫夢稀。投至得貌慘雞皮。有誰憐。衣沾鵲淚。到不如拋鉛碎鏡。衫染緇。蒲團贏得窺蓮諦。還勝卻東風絮飛。還勝卻東風絮飛。

〔坡〕你既厭風塵。我欲求佳麗。自幸玉堂貴客。恰逢金谷嬌娃。如此良緣。定爲夙契。俾伊彈箏進酒。共銷長夜鐘聲。勝彼揮塵譚禪。獨閉空山月影。

〔前腔〕銀塘風味。豈甘心叢林自棲。誰念我桃葉無緣。幸逢卿榴裙堪繫。只指望臺高銅雀賦綠衣。夢驚珊枕收殘涕。又何須茶毘共販。又何須茶毘共販。

〔琴〕自慚歌館綺羅。難侍詞林山斗。妾有表妹。名曰朝雲。貌可閉月羞花。才擅迴紋綴錦。欲沽美玉。何吝明珠。〔坡〕高才可羨。佳製願觀。〔琴〕現有新詞。敢呈台覽。〔坡看詩介〕

〔前腔〕盈盈腰細。裏蓄薇春條暗飛。青絲髮半覆螺眉。唾窗絨高妝鸞髻。登樓剩有腸斷詩。檢書顛望紅繩繫。還許得文鸞並栖。還許得文鸞並栖。〔坡〕觀其才

擅謝庭。定是色傾漢國。願將玉管。以聘金閨。儻牽繫足之繩。敢贈纏頭之錦。

〔前腔〕蜂衙蝶使。做媒人紗窗寄詞。我拾得萬種風情。你完成一天好事。教他莫負瓜破時。殷勤玉管傳深意。顛望着霜紅暗題。顛望着霜紅暗題。〔佛上〕閒中惟作偈。醉裏欲逃禪。我佛印來到杭州。聞得蘇子瞻在湖中游覽。不免將幾句言語打動他。看他何如。〔作高叫介〕船上聽者。我要到彼岸。你可撐船過來。〔坡問衆介〕岸上何人喧嚷。〔衆〕是一個和尚。要過岸的。〔坡〕既然是出家人。便度他一度。〔佛〕你度我。我還度你。〔作登舟介坡見佛介〕呀。原來是佛印禪師。〔佛〕你卻還認得我佛印麼。〔坡〕來得恰好。尊有綠蟻。座有紅裙。與你痛飲一回何如。〔佛〕多謝盛情。且問這位是誰。〔坡〕此是琴操。如今就要爲尼了。〔佛〕久聞久聞。幸會幸會。我有一聯。勞卿屬對。〔琴〕願聞。〔佛〕碧紗帳裏睡佳人。烟籠芍藥。〔琴〕青草池中洗和尚。水浸葫蘆。〔佛〕和尚得對佳人。實是榮幸。〔坡對琴介〕你也出一對與禪師何如。〔內作鳥鳴介琴〕斑鳩無理。老僧頭上叫姑姑。〔佛〕白蝨有情。大姐胸前呵奶奶。〔坡〕不要取笑。且進酒者。

〔念奴嬌序〕湖光十里。看千山寒翠。盡教漾入瓊卮。契闊三年。又何緣陡遇相知。榮繫宦跡浮沈。餘生淹滯。新添明鏡鬢邊絲。〔合〕還從此。亭前問水。花裏題

詩。〔佛對坡介〕子瞻既已深居鷓禁。因何反謫熊車。〔坡〕緣中讒言。故投荒裔。〔佛〕斑中鷓鷯。榮華空老春秋。世上蜉蝣。生死堪嗟朝暮。

〔前腔〕世事如同朝露。聽宮漏靴上霜凝。鬢邊華暮。紫綬金章。錮蔽了白馬青蓮舊路。誰悟鏡裏嬌鸞。空中野馬。氤氳出沒。又何殊。〔合前琴對佛介〕妾身擬入空門。頓把紅妝淨洗。師父誕登覺岸。遠須寶筏相招。敢進罅于舟中。願締盟于方外。

〔前腔〕佳麗鉛華盡洗。甘視髮花陣名除。蓮臺籍隸。祇樹瑤華。還勝卻□□□。妝垢膩密諦。燈下添香。瓶中換水。火坑脫出侍摩尼。〔合前佛對琴介〕聞爾久居樂籍。緣何遠想禪林。〔琴〕非干賤妾圓通。多賴明公提醒。〔佛對坡介〕子瞻。你只會啟他人覺路。反不能豁自己迷途。可笑可笑。

〔前腔〕嬌媚紅裙成隊。投至得柳葉妝眉。桃花裁袂。一啟禪機。便解卻鴉鬟蟬鬢。你朦昧掩衲藏珠。提燈乞火。昏昏反做有情癡。〔合前佛〕紫霞注酒。既已沈酣。紅日

銜山。還當暫別。〔坡〕斜照半橫野樹。還看他鳥宿池邊。清陰暗度禪關。少不得僧敲月下。〔佛〕你向

草中放砲。忽聞茅裏傳聲。我歸堤上尋坑。卻是湖邊撒溺。〔坡〕經期作合。紅沾褲裏光頭。〔佛〕產後行房。血滿腰間鬚嘴。〔琴〕賤妾誠無水色。二公豈負湖光。〔佛〕謔毋太虐。別了罷。且將閒裏話。提醒夢中人。〔下坡〕琴操。既勞撮合。毋得逡巡。〔琴〕君若有心。妾當盡力。

〔古輪臺〕綠窗西。青鸞一縷遞支機。芳名已註姻緣簿。花香粉漬。看蝶往蜂來。漏洩春風幽趣。〔坡〕問楚嶂行雲。武陵流水。瓊簫肯逐路傍兒。〔琴〕料應容易。想多嬌肯繫紅絲。花還並蒂。鴛如交頸。樹同連理。早辦畫蛾眉。輕分付。來朝准備高唐賦。

〔坡〕踏閣攀枝恨不同。

〔琴〕青鸞飛入合歡宮。

〔坡〕嫦娥應悔偷靈藥。

〔琴〕會向瑤池月下逢。

第十一齣 媒合

〔佛上〕泥牛到河不可渡。石人控馬定難騎。有人解得其中意。就是無生覺悟時。我佛印看得琴操。舊隸玄門。子瞻夙登慧錄。一個溺愛河而罔悟。只圖暮樂朝歡。一個沈宦海而久迷。空自南奔北走。

一個將青蛾來燎火。且過眼前。一個見黃鵠而關弓。不知背後。一個要把謔談諱語。撥轉瞳神。一個須將啞謎微言。提醒夢幻。遠遠望見琴操來也。不免且躲在柳陰中。聽他說什麼子。〔琴扮尼姑上〕

〔不是路〕纔罷春妝。去訪東家女伴行。堪悲愴。珊瑚夢醒淚沾裳。自家一時醒悟。

祝髮爲尼。蒙蘇爺分付。去朝雲家說媒。未知肯否。問紅窗。風流聘入銅臺上。未審花枝

肯出牆。〔佛做背後抱住介琴驚介〕是那個。〔佛〕是我。〔琴怒介〕出家人休得如此。騷和尚。桃

花豈爲葫蘆撞。是何形狀。是何形狀。〔佛〕我有兩句話。勞你對蘇爺說。

〔前腔〕寄語黃堂。衣鉢從今向外方。還傳上。不能執手話衷腸。我有書一紙。勞你

帶去。恨偏長。匆匆別去西湖上。但遞相思紙半張。〔琴〕敢問禪師。幾時又會。〔佛〕應

難量。浮萍蹤跡多漂蕩。何時合掌。何時合掌。來時只識菩提路。去時還聽海潮音。〔下琴〕

這個和尚書中。不知什麼說話。到擔閣了一會工夫。此間就是朝雲家裏。請他出來則個。朝雲妹子

有請。〔雲攜夢巫上〕

〔一翦梅〕千樹湘桃隱暗香。欲問劉郎。何處劉郎。薰風拂柳控寒房。腸斷蕭娘。

夢斷蕭娘。〔相見介雲〕鳳輦時經。蝸居乏款。敢問姐姐。何由落籍。遽爾洗妝。〔琴〕久染風塵。頓荷黃堂提醒。素耽淨土。幸銷紅粉昏迷。今有一事相干。伏惟片言垂允。〔雲〕卿試垂教。妾當敬從。〔琴〕聽我道來。

〔白練序〕西湖上。偶接多情翰苑郎。就是蘇太爺。姿容美。更是風流清爽。他曾見你的佳作了。詩章看兩行。欲聘深閨窈窕娘。試商量。文園病客。可遂求凰。〔雲〕奴家既無父母。終鮮弟兄。願作嫦娥獨宿。何心蕭史同登。

〔醉太平〕思量。羞蛾難放。願偷丸奔月。獨守雲房。〔長嘆介背介〕徘徊自想。怕他綠衣妬殺黃裳。〔琴〕何妨。小星風度可成雙。莫待躊躇顧望。〔雲〕謾勞勉強。花枝無主。暗自悲傷。〔巫〕不要如此假惺惺使好。〔琴〕

〔白練序〕蘭房。爇麝香屏山象牀。風流處。還有温存情況。他現有玉管爲聘。含光兔彩長。敢奉佳人掃玉章。休推讓。明朝笙管。欲效鸞凰。〔雲〕推阻既嫌絕物。應承實

是羞人。月下傳言。多蒙作伐。堂前醮酒。權作主婚。〔巫〕這番有食喫哩。〔雲背唱琴聽介〕

〔醉太平〕喬妝。星河在想。料腰肢怯處。不耐蜂狂。〔琴〕這個我替你說分上。向蕭郎

低講。扶持須藉東皇。〔雲〕青絲半幅梅花冷。七襄怕逐亂紅飄颺。〔琴〕不須悒

快。便使君有婦。偏問鴛鴦。〔琴〕肯字教傳。明日去回府上。〔雲〕幽情願。此宵且盡杯中。〔合〕

〔餘文〕風傳漏滴蓮銅響。且沈醉花屏蜂帳。只有清話。今宵覺夜長。

〔琴〕春日偏能惹恨長。〔雲〕西宮夜靜百花香。

〔巫〕東風嫁盡紅閨女。〔琴〕雲雨巫山枉斷腸。

第十二齣 小星

〔遶地游〕〔坡王上〕紅深綠淺。着眼山雲淡。泛銅溝荷香初滿。風覩瓊鬢。寒生玉

簪。儘官清畫堂簾捲。〔坡〕長嫌鐘鼓聒湖山。官舍蕭條卻自然。乞食遶村真是飽。無言對客本非

禪。披蓑覓路衝泥入。洗足關門聽雨眠。遙想後身窮賈島。夜來應聳作詩肩。夫人。我杭城久滯。蜀道

遠違。豈無桑梓之懷。更起棣棠之恨。只爲窮愁五馬。空嘆身孤。因而悵望雙蛾。還期心肯。雖傳玉管。

未渡銀河。漫題神女之詞。反亂襄王之夢。〔王〕欲識鶯消燕息。須憑蝶使蜂媒。且待琴操到來。自知

端的〔琴上〕

〔前腔〕紅寬帶眼。掩映桃花片。還問取雨香雲豔。燕語鶯啼。好遂吹簫願。喜羸臺乘鸞風便。〔相見介坡〕請坐下講話。〔琴〕老爺在上。賤妾豈敢。〔坡〕今作尼姑。自殊妓女。已出

風塵之表。休拘禮法之中。〔琴〕告罪了。〔坐介坡〕所浼之事若何。〔琴〕容稟。

〔桂枝香〕羞揮歌扇。慵調檀串。啼妝不貼銀蟬。暗語孤彈金雁。〔王〕如此事不諧

矣。〔坡〕我已打點做新郎。好不掃人興也。〔琴〕不要忙。我是耍你的話。看佳期月圓。看佳期

月圓。紅絲堪絆。瓊桃容泛。笑嫣然。好綰同心結。非爲對面緣。〔王〕旣荷玉成。須將紅

定。早備洞房花燭。更催雕輦笙簫。〔坡〕夫人言之有理。

〔前腔〕花含蔥靨。翠聯珠串。金妝獺髓霞絃。玉鑄魚紋雲輦。〔琴〕夫人呵。怕湘雲

漸闌。怕湘雲漸闌。前魚堪怨。初心還變。〔王作長吁介坡〕謾愀然。雖是拈新管。應

須整舊絃。〔琴〕我到忘懷了。還有一件事。昨日途中偶逢佛印禪師。他說雲游去了。有書一紙。寄上

老爺。〔坡看書介〕腸斷圓扉飯裏魚。夢回赤壁舟中鶴。海波羞渡五更風。畫省重登二品爵。其語一

時難解。且放過一邊。〔琴〕敢別仙郎暫去。還攜淑女同來。〔坡〕早來些。〔琴〕好性急哩。謾將仙侶尋瓊管。分付佳人上玉樓。〔下鼓樂導雲上琴隨後〕

〔海棠春〕春蛾暗畫羞靦靦。看歌管樓臺當眼。繡帶淡雲籠。寶襪餘寒淺。鳩鵲河邊。鴛鴦燭畔。怕見流蘇光豔。何處係人心。惹得春零亂。〔琴〕新人到了。〔坡〕我不

循舊例。就央你贊禮。

〔琴做贊禮畢介〕

紫鸞聲滿。須吹嬴女之簫。銅雀春深。爰鎖小喬之黛。蜂侵雙

蕊。雖然過北穿南。蝶度鄰牆。最怕憐新棄舊。惟願若妻若妾。各厭雨雲。爲正爲偏。平分風月。添來替死鬼。轉盼時酒醋瓶翻。捨去美前程。着手處葡萄架倒。〔坡〕行禮已畢。看酒過來。

〔梁州序〕雲屏初列。彩絲新戀。袖映屏山雲豔。蒹葭玉樹。低回笑攬芳年。傳書橘浦。投杵藍橋。佳遇應堪羨。卻憐雙笑也。會神仙。一曲簫聲駕紫鸞。〔合〕金炬上飛光焰。玄漿玉斝臨風勸。歡笑處越嬌倩。〔王〕

〔前腔〕金門佳客。瑤池仙媛。一笑便成姻眷。三星高照。胡麻喜放桃源。況我恩同江汜。愛叶衾裯。更□花枝豔。紅樓風色好。正相聯。共向天邊駕彩鸞。〔合前雲〕

〔前腔〕向妝臺半貼寒蟬。揮玉管羞題冰蠶。看芳塵暗度。一捻金蓮。怕飛雲嚼柳。亂雨抽梅。着處將人閃。可憐紅袖底。影盤旋。羞帶瑤笙暗引鸞。〔合前琴〕

〔前腔〕道新人翠柳芳顏。知學士青藜時彥。似金釵一股。共成合鈿。我做推雲掇月。約蝶期鶯。兩下行方便。笑我青絲何在也。鏡空圓。羞舞東風舊日鸞。〔合前

坡王〕

〔節節高〕紅紗燭影鮮。繡簾前。榴裙喜遂彈琴願。揮朱線。整玉鈿。飛金燕。翠奩深處偷相見。芙蓉帳額香風扇。〔合〕此夜嫦娥問玉郎。休教蓮漏頻催箭。〔雲

琴合〕

〔前腔〕星橋烏鵲填。笑嬋娟。金尊偏送桃花面。笙簧滿。笳鼓喧。盃盤亂。石榴妬殺羅裙茜。花飛點點侵銀蒜。〔合前〕

〔尾聲〕新來豔逸真堪羨。笑溶溶雨香雲煖。撮合姻緣。只是詩半聯。

〔坡〕暫醉佳人錦瑟傍。

〔王〕南宮夜短北宮長。

〔琴〕禪心已作沾泥絮。

〔雲〕海燕雙棲玳瑁梁。

第十四齣 詩案

〔鳳凰閣〕〔章上〕瓊樓玉殿。日對君王面。年來眼底妬奇才。暗地裝機設陷。欲酬心願。便恣意傾排逞舌尖。自家章惇。才本刁頑。術偏險詐。鼠鑽倖穴。因而位列銅螭。狐假權門。自此威行金馬。最愛尋膾逐臭。直慙者難逃一筆全勾。習成婢膝奴顏。驕傲者竟使十年不調。生前詭計。但圖半世之榮。死後公評。遑惜萬年之罵。前與蘇子瞻。山河訂誓。本爲管鮑之交。名位相傾。頓起孫龐之隙。奪卻鸞堤史職。謫爲熊軾守臣。湖上築新堤。赤子僉嗟苦役。舟中了公事。黃堂共議。鰥官。況復品題。更多譏謗。箱盈案積。盡爲怨主之言。板刻石鏤。悉是嘲時之句。詩腸旣索。毒手堪加。已曾分付御史舒亶動本劾他。約今日會議。恁的尙未來也。〔舒上〕豈是麒麟種。休言獬豸新。全憑三寸舌。斷送滿朝人。〔相見介章〕昨日下官所囑之事。不知稿已完否。〔舒〕稿底已完。呈上求正。〔章看介〕妙妙妙。中間如陛下發錢。以便貧民。則曰贏得兒童語音好。一年強半在城中。陛下明法以課羣吏。則曰讀書萬卷不讀律。致君堯舜終無術。陛下興水利。則曰東海若知明主意。應教斥鹵

變桑田。陛下謹鹽禁。則曰豈是聞韶解忘味。邇來三月食無鹽。此一段尤爲懇切。〔舒〕屬草雖由不肖。設謀實出恩臺。〔章〕此本一上。這廝不獨削籍清朝。抑且置身園土。使衆人魂驚魄落。舌結口鉗。則我輩後患永消。見福長保矣。

〔皂羅袍〕誰識暗藏坑塹。奈腸摧李賀。筆夢江淹。弄得他青鋒入頸。莫辭銛。紅光燒海寧。逃焰詞描月露。災生眼前。言霏珠玉。凶招舌尖。總懸河利口。焉能辯。〔舒〕不是做人太狠。功名之會。最用附羶。勢利之場。猶如騎虎。要官做的。依違豪焰。在所不辭。傾軋善良。又誰能免。

〔前腔〕只要宦途無險。且萋菲言惡。貝錦辭甘。誰教他六橋風雨。絳桃鮮。兩行笙鼓紅妝豔。一生俠氣。遭人制箝。千秋傲骨。窮途自淹。誰知我腹裏陰藏劍。

〔章〕省中啼鳥吏人稀。

〔舒〕退食從容出每遲。

〔章〕休問長安舊賓客。

〔舒〕明朝應作斷蓬飛。

第十五齣 就逮

〔喜遷鶯〕〔邁上〕梅霖妬景。看絳染榴屏。綠沈藻井。角黍包金。香蒲切玉。是處

龍舟飛競。蟬聲花外新。聞蝶夢牀頭初醒。向屏山見珠簾綴燕。華堂幽靜。萬里

家山一夢中。吳音漸已變兒童。每留蜀叟談終日。但覺蛾眉翠掃空。莫笑忘言真有道。自慚搜句百無功。年來蕭索虛齋臥。剩有題詩滿浙東。蘇邁克繩祖武。頗讀父書。詞苑飛龍。天孫爲之奪彩。譚叢揆鳳。神女因此傾瀾。每舉筆而凌雲。似乘槎而犯斗。文旣鮮于貝錦。詞復擲乎金聲。隨任到杭。幽居累歲。枕經籍史。銷燈火于三餘。襲冶承弓。凱風雲于一旦。且請父母。聊賞佳辰。爹媽有請。〔坡王雲

上合〕

〔前腔〕奇景難畫處。翠隱千山。映着湖光冷。五馬聲嘶。雙蛾影細。只爲宦沈成病。孤琴響叶。朱絃翠筆。淡描冰鏡。妝樓曉看荷香十里。貌爐烟燼。〔相見介坡〕孩

兒請我出來。爲着甚事。〔邁〕時逢長夏。節屆端陽。願開麩米之尊。聊寄菖蒲之賞。〔坡〕一門落魄。十口無家。有甚心情。還貪盃酌。〔王〕佳節難逢。愁腸易破。且盡眼前之興。宜酣膝下之杯。〔坡邁〕

〔傾盃玉芙蓉〕玉簫驚涼。永晝清絕。勝蓬萊境。還堪恨椿樹含愁。萱草凝懷。棣

萼懸情。我這裏清風半護珊瑚隱。他那裏斜照偏添石壁驚。〔合〕金荷進笑天
涯游子。問何時一鞭風雨杜鵑城。〔王雲合〕

〔前腔〕十二欄翠色凝。望斷天南信。猛堪憐雨過蓮房。紅滿榴裙。調咽銀箏。湘
簾日送花枝迴。寶篆香消烟縷沈。〔合前坡〕我前日制得琵琶詩一首。西湖詩三首。朝雲可

譜爲曲調。以侑酒杯。〔雲〕當得。

〔北寄生草〕看鳳尾槽新撥。品龍香絃已增。歸舟數字驚魂迸。花條半縷相思
病。綸袍一曲風流性。又不是雲霞十里寂寥天。還勝卻畫圖五月清涼境。〔坡〕

難逢花下開筵。復歌一二。〔雲〕惟欲尊前進酒。不憚再三。

〔北對玉環帶過清江引〕江上風清。門前遇故人。屋裏雲生。湖中膾玉鱗。初試
越羅新。還妝畫榜行。魚釣靴刀相逢幽夢醒。朝曦迎客繁華境。激灩晴光映。黃
帽雨中游。白苧閒時聽。把西湖比西子真堪並。〔淨丑扮校尉持手扭上〕

〔不是路〕千里奔程。索盡狂詞豈六丁。〔校〕門上人那裏。〔坡〕使者到此何幹。〔校〕從容

聽官家有旨逮蘇卿。〔坡〕爲着何事來。〔校〕莫逡巡。更搜詩句爲憑證。速負書囊帶月行。〔坡〕魂難定。如今應落山雞筭。孤忠空勁。孤忠空勁。〔校〕相公平日所制之詩。

俱要取解朝廷。〔坡〕只有二詩。現在案頭。〔校〕難道只有二詩。大家去搜尋則個。〔做搜介一校云〕

這一本是昭明文選。〔一校云〕這一本是六祖壇經。〔一校云〕這一本是漢刻蘭亭帖。〔一校云〕這

一本是晉繪輞川圖。〔一校云〕亂說。晉朝不聞有輞川圖。〔一校云〕亂話。漢朝難道有蘭亭帖。〔王〕

相公儘日題詩。本欲名山之貯。連年索句。宜爲學海之藏。不想因此怖人。抑且由之賈罪。奈何奈何。

〔坡〕昔日有人口召。其妻贈詩曰。再休落魄耽盃酒。更莫猖狂喜賦詩。今日捉將官裏去。這回斷送

老頭皮。卿今日獨不能作一詩贈我耶。〔王作笑介坡〕夫死生有命。何必介懷。第忠佞無分。不能消

恨。須卽離吳地。速赴汴京。快遣蒼頭。報知白首。咳。嘆我蘇子瞻呵。

〔山坡羊〕氣冲冲。枯波欲迸。恨匆匆。驚魂無定。慘淒淒。孤忠見疑。哭啼啼。肝膽

憑誰罄。嘆伶仃。青衫淚亂傾。飛鷗無奈牢籠緊。千里風塵。半行音信。吞聲。一劍

空教毛羽輕。傷情。三尺堪悲煅煉成。〔二校作催促起程介王雲合〕

〔前腔〕恨封姨欺花偏緊。怨青娥侵荷忒勁。似啼鳥更深亂悲。這游魂落落誰相問。斷腸聲。孤猿三峽愁難醒。鷓鴣呼風。蛟龍落筭。偏驚不斷殘陽一片明。孤行。又是蒲帆半幅程。〔琴上〕天有不測風雷。人有旦時禍福。我琴操業已爲尼。忽聞蘇老爺被逮。須索送他則個。〔相見介坡〕只因饒舌。遭此斷腸。謝卿唱疊驪駒。恨我災成鼠雀。〔琴〕罪孤臣子既謫。堪悲雪上加霜。起公論于未湮。定擬雲開見日。〔坡〕就此分別。莫得稽遲。

〔憶多嬌〕愁難說。冤莫泄。花開偏是遭霜雪。淚染胭脂雙袖血。〔合〕愁魂斷絕。愁魂斷絕。轉眼英雄挫折。〔王雲〕

〔鬪黑麻〕腸斷淒風。心摧破月。怕翠印羞蛾。紅潮滿頰。憂莫寫。計難設。路草霜雕。池蓮粉歇。〔合〕幽懷迸裂。回頭瞻殿闕。病鳥聲哀。飛鴻翅折。〔邁〕

〔憶多嬌〕悶轉結。心更熱。隔斷天閣難剖雪。空灑啼痕添哽咽。〔合前琴〕

〔鬪黑麻〕纔上秦樓。又奔漢月。怕回首天涯。殘笳聲徹。愁更疊。形還子。你離恨淒涼。我夢魂飛越。〔合前坡〕

〔鷓鴣天〕漂零風雨苦離家。愁殺無情白鼻騮。〔王〕共道魚腸埋楚岸。〔雲〕誰憐鵬鳥賦長沙。〔邁〕愁似織。淚如麻。〔琴〕不堪枯樹隱殘霞。〔合〕應悲去路霜前草。莫問歸期陌上瓜。

第十六齣 生離

〔夜游湖〕〔穎秦同上穎〕世事千秋悲掣肘。念鴿原早晚含愁。〔秦〕冤雪飛空。怒虹貫日。鬻釜隔忠懷誰剖。明月不長圓。君恩有時薄。早知行路難。可不老丘壑。〔相見介穎〕小弟舊自理官。召居諫院。避人焚草。儘懷匡主之心。逢使寄梅。空滴思親之淚。況鴿原上。旣惜離羣。而鷓鴣班中。寧甘久別。且吾兄之事。由王介甫餘虐。以兆禍胎。嗣章子厚當權。遂張讒口。小弟正欲上書闔闔。解職救兄。還期借劍尙方。奮身誅佞。更鞭王介甫九原白骨。庶顯蘇子瞻一點丹心。旣事同兄弟。反兵之讐可報。而途分邪正。蓋棺之論始彰。出自痛腸。裁諸尊意。〔秦〕麟愁鳳泣。弟兄固當叩闈。兔死狐悲。親戚亦宜伏闕。第聖上之威方熾。奸惇之焰正張。倘起株連波及之謀。不無林木池魚之禍。則彼奸愈恣。勢若崩山。吾黨益孤。衆將下石。不如徐埃。可作後圖。〔穎〕眞爲讜論。敢不敬從。

兄嫂想卽進城。我輩自當出郭。〔秦〕同迎遠駕。聊洗愁襟。〔穎〕

〔黃鶯兒〕荆樹隔三秋。怯魂飛不繫舟。池塘春草添僂僂。雙龍頓愁。孤鴻怎投。悲啼怕是相逢又。〔合〕恨悠悠。洛陽雖好。不是舊時游。〔秦〕

〔前腔〕蹇步恨驂騮。嘆英雄老黑裘。何緣更掉風波口。魚梁餌浮。蛛簷網投。謫居那得蓬萊又。〔合前暫下坡王雲邁同上〕

〔夜游湖〕落魄何曾重索酒。罹風波羞殺盟鷗。淚灑巾邊。禍來天上。淒涼債憑誰消受。〔坡〕千首文章二頃田。囊中未有一文錢。算來卻是能言鴨。驚破王孫金彈丸。自家蒙旨逮

繫。將到京師。你看垂楊起恨。亂草生愁。好不感傷人也。〔坡邁〕

〔黃鶯兒〕疲馬不勝愁。鎮悲看水獨流。楚雲滄海羞回首。魚嗟鼎游。蛟悲涸投。帆歸錦水何時又。〔合前王雲〕

〔前腔〕雨度渭城頭。看斜暉隱亂流。蛾眉蹙損湘江口。囊嘶蒯緱。裙□石榴莖。花況落村籬又。〔合前穎秦上〕百年世事如流水。一旦相逢怯夢魂。〔相見介〕

〔哭相思〕頃刻重相攜手。好教人血淚雙流。〔坡〕忠而見謗。冤莫可伸。屈首受辜。愁腸怎浣。想當初呵。

〔啄木兒〕離千里。寄一州。潦倒西湖閒煮酒。又誰知九尾妖狐。卻驅人萬火奔牛。災來平地風波驟。詩題彩管。遭讒詬。鍛羽西風雁影羞。〔坡〕夫人邁兒與朝雲。可暫寓在叔叔衙中。徐爲歸計。〔王雲邁〕

〔前腔〕黃金盡。血淚稠。回首芳菲逐水流。被奸雄董卓懸河。寄妻孥鴻宿荒洲。東風殢得紅顏瘦。枯鱗望斷西江口。雨慘雲愁咽楚謳。〔穎〕義不反兵。怒還指髮。但重圍有阻。綿力難支。徒悲淚灑風前。未得冤鳴日下。

〔三段子〕無端起愁。恨萋萋繁霜頓秋。何須怨尤。料溶溶浮雲便收。明朝擬候長楊漏。忠冤難向明庭剖。只得把手孤悽。有淚空流。〔秦〕室裏災來。須得纓冠相救。舟中浪起。豈容袖手旁觀。第口舌難爭。肝腸徒痛耳。

〔前腔〕豺狼肆謀。這詩章偏來浪搜。鸞凰被囚。這冤懷何時便勾。堪憐同室人

相鬪。扁舟浪起魂相搆。你看眯目糊心。誰念忠猷。〔內云〕聖上有旨。將蘇軾發到西臺會問。須索赴審。毋得稽遲。〔衆哭介〕穎秦不肖輩業在官聯。恐生吏議。邁兒伏事便了。

〔歸朝歡〕〔合〕危途裏。危途裏。心中暗愁。遭狼毒。難教寬宥。臨崖馬。臨崖馬。韁繩怎收。從今去。端只是花殘玉剖。堪恨雨翻雲覆。加凶手。波飛浪起張護口。怎拚得萬里微骸覆一抔。

〔秦〕何事闌干淚溼衣。

〔坡〕請君看取鬢邊絲。

〔穎〕丈夫漂蕩今如此。

〔雲〕卻話巴山夜雨時。

第十七齣 廷讞

〔步蟾宮〕〔淨扮張操丑扮李定上〕聖主威靈殿斧鑕。恁吾儕羅織何辭。高才何事莽題詩。惹得浮雲蒙蔽。〔張〕下官知諫院張操是也。〔李〕下官御史中丞李定是也。蒙旨着我

兩人勘問蘇軾。須登政事堂者。〔張〕蘇軾以詩謗主。其罪似未甚重。昨日章子厚着我輩重處他。老先生意下何如。〔李〕章子厚乃朝廷重臣。敢不唯命。〔衆稟介〕蘇爺到了。〔坡上〕

〔前腔〕萬死恐悲揮涕淚。遭奇禍。自嘆淒其。人生朝露。怯烟飛。此際愁懷誰訴。

〔相見介張〕聖旨着下官勘問老先生。須得從實供招。免受刑法。〔坡〕我且問你。蘇軾有何罪可招。

〔張〕聽我道來。

〔錦纏道〕謫居時。怨君王揮毫賦詞。兀自個行短心癡。朝廷發錢。本以濟民。你說道

音語兒童。鎮日裏城中住馳。朝廷與水利。你說道變桑田。東海應知。朝廷禁鹽。又說道

解齊韶。三月無滋。俱作數行題。只圖個懸河掉電。準備着呼霜搶地。蟬聲吹赭

衣。早悔卻從前作事。笑區區三寸惹災危。〔坡〕這詩雖是蘇軾做的。其實出于無心。朝廷

安得以此罪天下士。

〔前腔〕論當初。荷君恩。金蓮賜歸。弟和兄侍立銅螭。爲訛言向三刀迴避。本是

木天樓。青藜校詞。翻做控蒲鞭。五馬聲嘶。雖則是浪題詩。止不過消磨歲月。誰

敢把明庭譏刺。說起痛傷悲。這一派忠冤誰洗。恨天闔釜隔淚淒淒。〔李〕你譏謗

朝廷。有不臣之意。〔坡〕那見得不臣。〔李〕聽我道來。

〔前腔〕築蘇堤。六橋邊紅裙醉攜。霜毫弄暗裏相觥。逞風騷將心事都付錦箋題。道朝廷遠謫去憂心如厲。因此上殘蕉獨賦向隅悲。試讀檜枝詞。掉舌刺當時。這根株深泉無曲處。分明是妬殺九重飛。便是吟風情致。怎說得世間惟有螯龍知。〔坡〕我自詠檜。何預朝廷。

〔前腔〕淚空揮。恨奸邪把忠良禁持。心中事惟有天知。誰着你指鳳爲鷗。做不得醉陶潛。霜籬酒卮。拚則個笑東門黃犬難攜。浪灑着青衫眼淚。便燃枝焚雉。千載汗青詞。應寫着忠懷俠氣。便魂飛劍底又何悲。〔邁上〕白首空依主。丹心漫對人。

自家蘇邁。蒙叔叔分付。前來打聽父親消息。且在此伺候則個。〔張〕我和你且做審語。將犯人發到獄中便了。〔衆做拽坡出介邁見坡介〕呀爹爹。如何是好。〔坡〕這都是章惇這廝囑託了問官。我也

有口難辯。如今我到獄中。倘朝廷有害我消息。你送飯時。須將魚爲膾。使我知覺便了。〔邁〕曉得了。〔哭介〕

〔古輪臺〕各含悲眼看。頃刻蹈危機。一生詩舌偏爲禁。孤燈夜雨。枯樹寒灰。都

付與圓室螢飛。雲度天邊。黛消閨裏。淒涼更有斷腸詩。怕依叢煬竈出。廷間難免誅夷。寄語着堂前白雪。房中紅粉。階邊幼棣。回首頓分離。徘徊望。不知何日赦金雞。

該如此。

〔坡邁下介張〕

審語已成。不免先去回覆章相公。把與他看過。然後奏聞便了。〔李〕正

〔張〕可憐桃李斷腸花。

〔李〕冷露無聲恨獨賒。

〔張〕誰念爲儒逢世難。

〔李〕卻令今日死君家。

第十八齣 聞繫

〔唐多令〕〔老程上〕游子客途賒。傷心盼漢槎。遠書無雁到雲中。隔在盈盈衣帶。愁亂草。咽清笳。西山烟雨捲疏簾。北戶星河落短簷。不獨江天解空闊。地偏心遠似陶潛。〔老〕夫

人。自解一官。又經數載。軾兒謫任武林。未獲賜環消息。轍兒召居諫院。猶然落魄規模。兼之雁斷衡陽。魚沈湘浦。當此桑榆之景。不勝鹽米之愁。〔程〕雖是如此。但二子壯歲服官。兩人暮年無恙。亦爲幸耳。〔老〕

〔桂枝香〕青門豪邁。終南瀟灑。心驚賓雁雙翰。目斷孤雲一帶。誰憐鬢華。誰憐鬢華。空有羅襟淚下。秋懷誰寫。盼天涯。吳越低孤樹。河梁隱暮鴉。〔程〕

〔前腔〕歸期有在。歡娛有待。忘憂砌草慵看。夜合庭花空對。川原望賒。川原望賒。誰爲淒涼償債。況兼窮敗。恨無涯。雨擊庭前幌。風敲窗上紗。〔僕上〕才名果累

人。風塵到林莽。鴻飛雖冥冥。其奈遭天網。報知太老爺太夫人。大老爺不好了。〔老程〕爲着甚事。你快說來。〔僕〕被舒御史所劾。就逮進京。性命尙不可知。〔老程哭介〕原來兒子遭了奇禍。兀的不痛殺我也。〔僕〕太老爺太夫人且寬懷。吉人天相。或有脫禍的日子。〔老〕

〔醉扶歸〕怨題詩筆底飛光怪。披忠簡上惹危災。本圖他風暖牡丹開。又誰知霜勁芙蓉敗。兒呵。他風流頓折豫章材。我悲啼怎避西河害。〔程〕

〔前腔〕落牢籠怎了鄒陽債。這禍根苗端爲子雲才。怕堂怡燕雀盡爲灰。鼎游麟鳳寧辭醢。我堂前顛望鹿車來。他天涯剩有驪珠灑。

〔尾聲〕淚滿腮。心驚駭。孤忠偏是致人猜。弄得我夢斷斑衣兩鬢皚。

〔程〕淒淒游子若飄蓬。

〔老〕凍雪摧殘塞上鴻。

〔程〕愁別自驚千里外。

〔老〕可憐半死白頭翁。

第十九齣 飯魚

〔梨花兒〕〔淨扮獄吏上〕人做官兒件件有。我偏靠着赭衣囚。索些三錢兒。索些三酒。

噤。這樣官兒不如狗。自家獄官便是。前日蒙上司發得罪人在此。叫做什麼蘇軾。妝模做樣。

真是蘇州式樣。這也不在話下。舊例進監的有些見面錢油火錢。他如今一些也不採。可惱可惱。不免待他出來。處置他一番。多少是好。〔坡上〕

〔十一時〕南冠空自愁。奈極目蒼雲遠岫。衣上蒙塵。管中生憊。日夕含啼。況復傷秋。看腸斷西風時候。我欲歸休。瑟漸稀。堪悲秋着赭囚衣。多情白髮三千丈。無用蒼波四十

圍。晚覺文章真禍藪。誰知富貴有危機。不堪寂寞文園令。坐聽寒蛩徹夜啼。自家坐誣入獄。抱怨泣囚。萬里關山。時切白雲之望。千秋塵土。怕爲赤族之誅。當此新秋。頓添幽恨。〔獄吏〕你這犯人是那的麼。舊例錢也不送我些。是何道理。〔坡〕

〔紅衲襖〕我本是待漏的列鶴行冠蓋儔。操觚的煥蛇神詞賦首。端只爲墨狼
驕飛越三江口。因此上劍龍嘶淒涼八月舟。到做了楚大夫銅版羞。怎免得賈
大傅承塵疚。怕對西風弄蒯緱。〔獄吏〕你卻緣來是一位官長。然官無大小。要錢一般。依你
這等說來。你難道不要錢的。我如今謀得這個風憲衙門。也要撰些銀子。拿回去造屋買田。供家養
眷。都似你這樣一錢不捨。我難道在此吸風。也用動個本。乞骸骨歸田了。〔坡〕

〔前腔〕我雖則是挽熊車四海游。只落得妬妖錢偏不受。做不得無心雲自迷
巒岫。識倦禽還覓樹頭。怕泣華亭被鶴羞。痛鍾山遭猿詬。只落得血淚愁深咽
不流。〔僕上〕好將呂望魚。送與賓王獄。自家蘇傑便是。大爺在獄。連日是大官人送飯。今日大官人
尋鄉親寄書去了。因二爺差我送飯在此。不免進去則個。〔獄吏〕到那裏去。〔僕〕是蘇二爺差來的。
望乞放我進去。〔坡見介〕留飯在此。你先回去罷。〔僕〕誰想文園客。翻爲姜里囚。〔下介坡見魚介〕
不好了。恁的飯中有魚。是死期到了。〔泣介〕

〔小桃紅〕丁頭就網。鱗尾吞鉤。涸轍苦相投也。縱壑知無日。含餌自空羞。思比

目淚偏流。謾說道躍龍門。游鳳池。占鰲頭也。發笥摧梁。遑恤後。如今呵骨鯁生愁。卻向釜中游。死期既逼。活路無尋。不免題詩二首。寄去子由。一則與他永訣。二則報與雙親。〔做

題詩介獄吏〕你只因題詩。致有今日。兀的尙要弄筆頭也。〔坡〕

〔下山虎〕龍鱗空觸。鯨甲驚秋。盆覆冤誰照。難沾帝澤優游。做不得渭水英雄。反學了湘潭怨尤。想雙鯉緘書淚自流。到不如濠上忘機。日在鼉宮蛟藪。終難振鬣西江口。看魚腸自羞。豈是長鋏歌聲丙穴愁。〔吟詩介〕柏臺霜氣夜淒淒。風動

琅玕月向低。夢遶雲山心似鹿。魂飛湯火命如雞。額中犀角真吾子。身後牛衣愧老妻。他日神游定何所。桐鄉知葬浙江西。聖主如天萬物春。小臣愚暗自亡身。百年未了須還債。十口無家更累人。是處青山可藏骨。他時夜雨獨傷神。與君今世爲兄弟。更結來生未了因。〔獄吏〕想這詩又是怨謗朝廷的了。不免搶去首他。〔做奪詩介〕仍揮三寸管。更惹九重威。〔下坡〕我做得幾句詩。本欲寄與子由。不想又被獄吏搶去。真好苦人也呵。

〔蠻牌令〕江湖隱不能毅。泉石居難自由。拚魚腹埋身無蔽肘。龍陽棄枯肆游。

避不得身烹鼎鑊。悔當初莽惹綸鈎。要尋條活路呵。猛想到鱸肥早秋。又何殊緣木相求。

〔尾聲〕遊鱗恨落他人後。桃花流水半含愁。今夜呵怨氣沖沖結蜃樓。

向晚茫茫發旅愁。

無窮歸思滿東流。

中宵能得幾時睡。

空戴南冠學楚囚。

第二十齣 控代

〔點絳脣〕〔末扮黃門官上〕宮燭燒紅。更籌初送。祥雲擁。靴上霜濃。天樂簫韶動。

月照千門響珮環。東華光曙映南山。簫音一派飛龍近。香氣先傳鷓鴣班。自家黃門官是也。今當早朝時分。恐有百官奏事。只得在此伺候。〔穎上〕

〔么〕客淚沾風。鄉雲入夢。愁懷重敢叩銅龍。要把孤忠控。鴻雁已驚折足恨。鵲鴿偏

抱覆盆冤。下官蘇轍。因兄坐誣成獄。衆奸攢害。百口難分。特來叩闕陳情。願得解官贖罪。今值早朝。竟入則個。〔朝見山呼介黃門〕朝見已畢。百官退班。〔穎〕臣有小疏。冒奏天顏。〔黃門〕有何文表。就

此披宣。〔穎〕

〔刮鼓令〕蘇轍奏堂皇。念臣兄沐寵光。災起詩詞投犴狴。羅撫誰憐裂痛腸。六月恨飛霜。便毫揮珠玉豈爲嘲謗。願吾皇威霽春陽。莫令冤淚澆衣裳。〔黃

門〕想蘇軾自負奇才。覬臻顯秩。今置外郡。中多缺望耳。〔穎〕

〔前腔〕三刀治績揚。節懸魚頌素羊。敢把朝廷來譏諷。抹月批風聊自徇。手足義偏長。願褫臣職歸林莽。好將縲綆孤臣放。莫教風雨斷人腸。〔黃門〕下官與你轉

達天聽。你且退在朝房候旨。〔獄吏上〕劍佩猶含露。旌旗尙帶星。小官獄吏。搶得蘇軾詩詞二首。特來奏聞聖上。〔黃門〕獄吏有何文表。就此披宣。〔獄吏〕臣獄吏拾得蘇軾怨詩。

〔前腔〕他道是惆悵柏臺霜。動琅璫月向窗。夢遶雲山心似鹿。魂魄如雞怖火湯。犀角是兒郎。牛衣身後蘭閨望。神游他日知何向。浙江西去葬桐鄉。〔黃門〕

你且出在午門外聽旨發落。〔下介穎〕你是什麼官兒。在此奏事。〔獄吏〕小官是獄吏。搶得蘇軾怨

詩二首。特奏朝廷。〔穎〕詩中怎麼樣說。〔獄吏〕

〔前腔〕他道是聖德似春光。恨愚臣身自亡。最苦百年難了債。十口無家淚雨汪。白骨向山藏。他時夜雨神還愴。與君今世相親傍。來生更結弟兄行。〔穎〕此詩乃是寄與兄弟的。如何說他怨謗朝廷。這官好生無禮。〔獄吏〕與你何干。〔穎〕你不曉得我就是他兄弟麼。〔獄吏〕如此得罪了。〔黃門上〕

〔神仗兒〕恩波浩蕩。恩波浩蕩。觀仁過黨。況鳴冤疏上。兼筆底情詞悲愴。須曲赦。謫黃岡。聖旨說。精誠之佐。每緣詞賦寫忠。大度之君。不以文章罪士。今蘇軾情揮兔管。怨主之心

實無。蘇轍血灑螭口。救兄之念甚切。且覽獄中之作。情甚宜矜。則知疏內之詞。忠猶可亮。姑發爲黃州團練副使安置。謝恩。〔獄吏〕我本欲假公濟私。誰想他因禍得福。有何面目再見蘇公。〔下穎〕

〔滴溜子〕蒙聖主。蒙聖主。天恩高曠。離園土。離園土。謫居遐壤。追憶前王寵貺。金蓮撒殿前。奇才曾獎。看萬里孤臣。飲惠無疆。

〔尾聲〕一朝提挈雲霄上。泛扁舟楚江凝望。怕巫峽孤猿泣夜長。

目傷留滯去關東。

露冷蓮房墜粉紅。

今日莫論腰下組。

楚雲滄海思無窮。

第二十一齣 重貶

〔金蕉葉〕〔雲抱子同王上合〕千思萬思。滯他鄉愁腸縈係。有誰憐。犴狴傷秋。還喜
卻能羅呈瑞。〔訴衷情〕燒殘絳燭淚成痕。街鼓震黃昏。碧雲又阻佳期。斜月又侵門。〔雲〕愁永夜。拂
寒裊。待誰溫。夢蘭憔悴。擲菓淒涼。兩處消魂。〔王〕自從寄寓京師。每日思歸鄉國。時驚飛雁。人誤書
聲。第無春日之溫。頓起秋風之感。〔雲〕時悲旅食。再換征衣。既因離別銷魂。復爲死生屢念。衆張讒
口。雖多下石之謀。天相吉人。諒有解網之日。〔王〕朝雲。你那裏知道。

〔羅江怨〕秋榆着影稀。鄉關望迷。舊游何處贈支機。怕孤鵬折翼。怯風吹也。鏡
裏青鸞。羞舞當時翅。鴻隨楓葉飛。淚從金井澌。慮等閒玉向秦庭碎。〔雲〕

〔前腔〕凝妝蹙翠眉。幽情怕題。鏡臺膏沐爲誰施。怕簫聲永斷。玉樓悲也。衰柳
斜陽。一望頻吁氣。孤衾君夢飛。寒燈妾淚垂。何時夜話牀頭細。〔坡上〕

〔金蕉葉〕魂飛夢飛。又訝長途日暮。脫鈎魚見月猶驚。離弦鳥聞風還怖。〔相見〕

〔介王〕呀。相公回了。相公既這三尺。朝雲又添一丁。二喜駢臻。一門胥慶。〔坡〕既逃狂狴之災。又獲麒麟之瑞。快抱兒子過來。待我贊他幾句。人家生子愛聰明。我被聰明悞一生。但願此兒愚且蠢。無災無難到公卿。〔王〕贊得好。〔坡〕蒙旨安置。蠲吉起程。奈楚地荒涼。難停馬足。況蜀江寂寞。正候蛾眉。卿且回家。吾當赴任。

〔羅江怨〕雙輪千里馳。荒涼怎支。秋河隔在數峯□。只怕迢遙路遠。損雙眉也。一捻香娃。怎向他州□。我東征湘水湄。你西歸蜀道隈。好殷勤寄卻堂前淚。

〔王〕相公千里遠行。豈容孤另。舅姑百年暮景。最是淒其。待妾歸家。親供菽水。朝雲隨任。奉薦衾裯。〔雲〕庶難擬嫡。敢當寵擅專房。妾可侍姑。惟願早歸故國。〔坡〕下官之心。亦知未妥。夫人之命。豈可有違。朝雲隨我之黃。邁兒奉母歸蜀罷。〔王〕

〔前腔〕相逢頃刻時。離情又催。心如膏火有誰知。伯勞東去燕西飛也。一縷香魂。便逐流波逝。〔雲〕我羞描鏡裏眉。你空彈絃上絲。雲收雨散頻揮涕。〔穎秦邁

同上〕

〔臘梅花〕離情萬斛空自悲。鄉關一望雲遮蔽。寄語秋雁飛。尊酒庭前一樹垂楊折與誰。〔相見介坡〕丈夫蹇謫黃岡。妻子遄歸錦水。何殊星散。怕見雲飛。〔穎秦〕方脫赭衣。又游

赤壁。安得輪生四角。堪憐腸斷九迴。聊進離尊。敢言祖道。〔進酒介坡〕

〔園林好〕吾今去銅堤路迷。關山遠金壺水低。羞孤劍還荒遠滯。知甚日返京圻。知甚日訪庭幃。〔穎〕

〔前腔〕尊前酒鴿原可悲。風前淚鴻洲謾揮。怎忍得臨岐牽袂。知甚日得雙飛。知甚日得同棲。〔秦〕

〔江兒水〕萬里驪歌沸。三秋雁影稀。玉陽險道難迴避。瀟湘一望應無際。林端楓染離人淚。猶自臨行寄語。便是雪調驚人。休被霜毫爲祟。〔王〕

〔前腔〕籠裏舒鵬翅。鞭鞘促馬蹄。千山不掩愁來路。紅顏含涕三川去。青衫應灑長沙淚。〔對雲低唱〕暗對湘娥細語。你那裏雨溼征鞍。我這裏香銷孤被。〔雲〕

〔五供養〕瑤琴欲碎。寶鏡無輝。環珮空歸。楚山雲外斷。蜀國望中迷。況是深宮

腰細。卻難禁霜雕風殢。相公呵馬嘶驚蝶夢。夫人呵鸞舞恨蛾眉。真是兩處相思。一般縈係。〔邁〕

〔玉交枝〕西風愁緒。看天邊霜紅亂飛。椿枝影薄禁風刺。進螺盃無限欸欸。斑斕羞舞西去衣。啼喉偏咽東流水。還恨着荒涼路微。望不斷千山盡期。〔〇〕

〔川撥棹〕臨期淚灑。秋雲千萬縷。望新亭遠草萋萋。望新亭遠草萋萋。又何年相逢酒卮。看雙鴛□□啼。恨雙鴻兩處飛。

〔尾聲〕臨行浪發青衿淚。隔斷雲泥人世。方信今朝是別離。

〔坡〕出盡平川未到家。

〔王〕多情長自惜年華。

〔邁〕此時相見又相別。

〔雲〕水自潺湲日自斜。

第二十一齣 蜀晤

〔逍遙樂〕〔老程攜稍水上合〕天際空回首。萬里鸞書何處有。金風羞自訪西疇。蒼雲懸念。翠嶂凝愁。黃菊驚秋。〔老〕自家老泉是也。因軾兒下獄。轍兒滯京。離恨一天。愁懷萬種。

訪女兒于別墅。偕老拙而同舟。木落孤村。雅覽山川之勝概。稻香故苑。兼看臧獲之收成。

〔金井水紅花〕霞滴楓如染。霜凝草易秋。遙望鳳凰洲。淚空流。青猿聲鬪。猛憶他鄉游子。怕見水中鷗。恨千里客淹留也囉。看丁開丹嶂。翠合蒼屏。馬拂仙雲。日斷萊衣雙袖。牙莖白髮。淒淒賦愁。三江紅蓼。頻頻上樓。桑榆無主。怎度黃昏候。不免泊舟在此。隨喜片時。〔王邁攜稍水上合〕

〔前腔〕歸路隨鴻影。愁懷賦鷓舟。畫角半驚秋。恨悠悠。朱顏非舊。遙憶湘雲楚水。一望萬山稠。料世態等浮漚也囉。想是閒中作賦。醉裏題詩。樓上攤書。阻滯天風歸袖。蠨蛸門戶。烟霞故丘。荒蕪園徑。庭幃白頭。鷓鴣裘冷。難過秋時候。

〔王〕前面舟中坐着一個老翁老嫗。好似舅姑一般。邁兒。須艤舟細認則個。呀。果然是公公婆婆也。〔老程〕呀。媳婦孫兒回來了。〔各悲介老程〕快將你丈夫行徑細說一番。〔王〕聽稟。

〔玉鶯兒〕冤情已剖。嘆分離東西水流。可憐他鍛羽天地。暫時間寄跡他州。且喜朝雲新得一子。已帶往任所去了。紅奩遠投。香雲半鈎。看淒涼孤苦殘碣候。〔合〕

漫傷秋。相逢細話。舟泊小溪頭。〔老程〕子既無恙。孫又新添。還寬白雪之懷。稍拭青衫之淚。
〔前腔〕舒開眉皺。恨孩兒黃岡逗遛。我老生涯鷗水相依。他舊風流鴻塞荒投。
黃花酒甌。青蟬蒨綬。何時歸路兒童候。〔合前〕

〔老〕天涯一望斷人腸。

〔程〕愁聽青猿夢裏長。

〔王〕莫怪臨風倍惆悵。

〔邁〕三年楚客已沾裳。

第二十二齣 賦鶴

〔佛上〕鐵牛不可控。怖鴿終難安。解得空中絮。可與共譚禪。自家佛印便是。爲度子瞻而來。在京時料他有杭州之行。在杭時料他有黃岡之貶。便在今日。也預知他改謫瓊崖。只是不好道破耳。他昨日差人接我。我正要與他細論心曲。不免走一遭也呵。〔下介坡攜稍水上〕天波迥碧虛。落子雲廬。盡是王孫路。何人問謫居。自家攜朝雲并過兒來到黃州。半載有餘。一家無恙。幅巾小屨。偏宜出入烟霞。野老田夫。相與追隨谿谷。近營小築。自號東坡。今日公暇。曾約黃山谷與印禪師再游赤壁。恁的尙未到也。〔黃佛同上〕萬壑西風上鬢毛。相期湖海共持螯。瀟湘一夜青猿嘯。喚起枯禪萬念

消。〔相見介坡〕太史禪師。願登青翰之舟。共覽黃岡之勝。〔黃佛〕學士。你初當七月之時。早挹三秋之景。何事重尋山水。相煩復列杯盤。〔坡〕勝景難逢。舊游可再。就此前往。〔黃〕願得奉陪。〔佛〕前面浣衣美婦。白腿堪誇。願與太史學士聯吟一首。〔黃坡〕請禪師首倡。〔佛〕玉筯插銀河。〔黃〕紅裙蘸碧波。〔坡〕再行三五步。沒入老僧窠。〔黃〕休得取笑。且進酒者。〔坡〕欲罄千鍾。須行一令。〔佛〕請太史主盟。學士糺酒。〔黃〕我要說四物相似者。又須叶韻。我要美的。美妓房。象牙牀。玻璃盞。百和香。〔坡〕我說光的。研椒槌。柳條斗。男子陽。和尚首。〔佛〕我說穢的。推猪水。賺瘡腿。婦人陰。鬍子嘴。〔黃〕笑介。公何相報之速耶。〔佛〕你看雲暗秋深。霜雕木落。好景致也呵。

〔北新水令〕暮秋光景冷瀟瀟。片帆飛頓驚寒峭。憑虛瞻雪海。羽化隱銀橋。滿目風濤。到不若歸來好。〔內作吹簫介黃〕何處好簫聲也。〔坡〕

〔南步步嬌〕蘭橈桂楫隨波棹。秋水連天灩。誰人譜洞簫。菊秀蘭芳。佳人空悼。幽窰舞潛蛟。回頭方識烟霞傲。〔黃〕子瞻。看風波好險也。〔佛〕前途還有險處哩。

〔北折桂令〕大江東湧浪驚濤。只見龍窟銀妝。蜃闕烟飄。問前途淚噴狂瀾。雪

捲秋潮。你道出樊籠。冲天一鷗。誰知懼弓弦。泣露孤雕。更有塵囂。蛻羽難逃。除非是濯足江湖。閃魄林臯。〔黃〕聽禪師所言。子瞻也該解悟了。〔坡〕我也無心作宦。有意逃禪。奈時方多阻。勢不自由。

〔南江兒水〕願戴鳧鷖笠。羞簪鶴鷺翹。扁舟欲向荆溪老。堪悲日月籠中鳥。何時放翮棲山島。雅意參求道妙。做不得桂樹風吹。更難言蓮花泥淖。〔衆扮鶴上

舞介黃〕呀。空中好隻白鶴也。〔佛〕你看此鶴真得自在也呵。

〔北雁兒落帶凱歌回〕來往着蓬萊桂馭遙。歸宿着瀛岫松虬小。全不學凡鳥奔馳。日夜勞。也不受人世弓和繳。他是守清虛。愛寂寥。也不去覓鸞衾。翦鳳翹。羞鼓鷓鴣翅。長隨龍虎窰。也不屑聞野鳴臯。敝衣長伴商山皓。不染炎囂。卻彊如尋枝怖鴿號。〔坡〕此鶴果然得自由也。

〔南僥僥令〕華亭空灑淚。衛駕謾相邀。怎做得十萬揚州長不老。到不如伴蒲團過幾朝。〔鶴下介佛〕今日之游。不可無詩。〔坡〕如此。禪師請先。〔佛〕還是太史與學士先賦。〔黃〕

人生不若蜉蝣樂。〔坡〕誰個受迷誰個覺。〔佛〕腸斷西風飯裏魚。夢回赤壁舟中鶴。〔坡〕這兩句是禪師舊時的隱語。〔佛〕可曾驗過了麼。〔坡〕前日園扉之事。今朝赤壁之游。俱已符合。但後面二句。尙不能解。〔佛〕留待後日。自有分曉。

〔北收江南〕呀。誰沒個參禪的伎倆。呵向碧落好飛翱。端只爲愛河慾海起波濤。名韁利鎖不能逃。這塵緣怎消。何日裏乘風駕鶴上層霄。〔黃〕人世俱是空虛。功名安得長在。何事永沈宦海。不宜久負山靈。

〔南園林好〕寄人生蜉蝣暮朝。笑榮名獼猴儂招。奈被風塵紛擾。知甚日解金貂。知甚日解金貂。〔末扮道士上〕天邊長自妬飛鵬。隨着仙翁去住閒。多少荻蘆焚不盡。卻留清影在人間。敢問蘇學士。赤壁之游樂乎。〔坡〕殘山剩水。可以日窮。明月清風。不用錢買。興真無限。樂自有餘。〔道士〕早知真樂處。何事戀微官。〔下介坡〕呀。這道士憑虛而御。莫非就是飛鳴過舟之鶴乎。〔黃〕造化小兒。乾口大夢。幻裏黃冠白鬘。原是山禽。世間紫綬金章。寧非野馬。〔佛〕蟻游槐上。舉世皆迷。鹿覆蕉中。誰人曾覺。

〔北沽美酒帶太平令〕鳳皇樓。班行曉。翡翠屏。姻緣好。風流儘可供譚笑。試看
吸露花凝霜草。只怕染秋光易槁。怎能勾春色長嬌。問天邊孤鶴。但轉盼向層
雲了。恁呵直待途窮日暮。鐘鳴漏曉。呀。這其間誰識破今日根苗。
〔北清江引〕醉游赤壁攀虬豹。好把靈均弔。還將碧落參。猶被紅塵擾。惟願你
擲華簪游舊島。

第二十四齣 話姦

〔唐多令〕〔琴上〕紅粉坐蒲團。青眉解問禪。隨風早是赴長安。又覺秋光零亂。
人不在。恨悠然。經年一別對禪棲。門外紅塵總不知。聞道故人天外去。非非想後復非非。自家俗
名琴操。法號天然。萍憩十方。雲游四海。與王朝雲數年相別。且蘇學士一字無傳。憐奴錫卓京華。本
擬偕完果諦。奈彼槎浮楚水。堪悲又隔風塵。借居妙覺禪林。徐尋彼岸。暫伴圓通觀主。共啓迷途。道
猶未了。觀主到來。〔丑扮觀主上〕我做尼姑是陰佛。專向和尚尋陽佛。陰佛陽佛一般佛。得佛佛時
須佛佛。小尼圓通是也。天然寓居荒山。到此扳話則個。〔相見介琴〕寶刹雲停。多蒙款待。〔觀〕茅菴

露宿。愧乏看承。今日丞相拈香。敢煩師兄陪款。則古刹生輝。小尼生色矣。〔琴〕丞相是當朝黃閣。小尼是出世緇衣。實是未同。難以相見。〔觀〕既游方外。休縛禮中。〔琴背云〕章相與學士。初方指水盟松。後反操戈入室。不免乘此機會。嘲他幾句。有何不可。〔衆擁章上〕

〔出隊子〕朱宮梵殿。朱宮梵殿。五色晴雲畫棟鮮。清鐘聲裏鶴參禪。香烟半遶。燄摩天。慧日和風。一道紛然。下官章惇是也。此間已是妙覺菴。不免進去。〔觀做迎接請進上

香介觀〕請丞相爺法堂少坐。〔章做窺琴介〕呀。這寺中爲何觀音出現。〔琴〕相公拜揖。〔章〕緣來是一位仙姑。請問仙姑。是常住的是雲游的。〔琴〕暫寓在此。〔章〕原籍何處。俗家甚名。〔琴〕生長臨安。喚名琴操。〔章〕原來是蘇子瞻舊表。幸接丰姿。願聞因果。

〔石榴花〕祇園相遇。揮塵問華蓮。驚人世逐雙丸。玉臺九品照因緣。論金沙滿地拖雲。玄經妙詮。謾搜尋報復如輪轉。還有一言。問嬌娥空隱玄都。笑仙郎已入

桃源。〔琴〕滴柳拈沙。自證西天獅象。飛花流水。休提南國鸞凰。

〔前腔〕浮漚幻影。搔首問青天。爲甚事肆雄姦。今朝風順駕蒲帆。到明朝風息

帆收。中流自淹。看翻雲覆雨如飛電。倘人生裾馬襟牛。後來時鎖鳳囚鸞。〔章〕
仙姑尙爾青年。便銷紅粉。雖是一登淨土。可證圓明。豈如再入侯家。永圖富貴。

〔泣顏回〕古寺遇神仙。使吾儕意惹情牽。你桃花歌扇忍輕拋。虛度流年。荒涼
悟禪。論豪家金谷人爭羨。莫空辜落雁嬌容。再完成鴛鴦良緣。〔琴〕你傅粉盈房。
豈無殊色。我洗妝入道。不變初心。況常漏盡鐘鳴。禍臨眉睫。尙自風嘲月弄。浪想姿容。正是罔覺災
祥。不知進退者也。

〔前腔〕雲堂獨守洗華鉛。使君有婦莫問浮鴛。紅棲翠減。柘枝枯。甘自逃禪。淒
其度年。肯臨風又起襄王戀。料災危曉漏晨鐘。漫追歡暮管朝絃。〔琴〕好將雲補
衲。去訪月臨禪。〔下章〕呀。這妖尼不別而去。可惱可惱。多則是子瞻唆他來嘲我的。我有一計。只說
子瞻遨游山水。放浪壺觴。全無悔罪之心。反有玩世之意。量移儋耳。益羅烟嵐。且假刻朝章。傳言物
故。使他一家啼哭。消我滿面羞慚。〔觀送介章〕正是恨小非君子。無毒不丈夫。〔下〕

第二十五齣 量移

〔似娘兒〕〔坡雲過同上〕細雨滴殘秋。盼迢遙千里含愁。瀟瀟雲縷拋紅豆。問瓜期何日。賜環夢斷。賦鵬還羞。〔坡〕莫負黃花九月期。人生窮達可無時。十年且就三都賦。萬戶

終輕千首詩。天淨傷鴻猶戢羽。月明驚鵲才安枝。君看六月河無水。萬斛龍驤到自還。朝雲自與夫人別後。且喜兒子長成。只是目斷彤管。心懷荆布。青楓江上。誰憐歸雁無書。白帝城邊。但恨啼猿有淚。秋天曠遠。古木蕭疎。□□竹樓。遙瞻玉壘。〔雲〕愁窺白髮。雖懷遠謫之差。情別青山。堪譜思歸之引。既期逾眺。就此同登。〔過〕正是欲窮千里目。更上一層樓。〔做同登樓介坡〕

〔梧桐樹〕身憑百尺樓。目斷千山秀。三徑雲迷。隱約門前柳。傷秋賦寂寥。多病成迤逗。吹笛誰家。惹得雙眉鬪。英雄氣短偏憔悴。〔雲〕

〔東甌令〕楓凝血。草含秋。愁深如病酒。青猿泣雨黃昏後。寬褪芙蓉扣。孤雲亂樹阻歸舟。腸斷一登樓。〔僕上〕既無音信歸巫峽。又合風波到海邦。稟老爺。聖上有旨。量移老

爺儋州安置。欽限就要起程。〔坡〕果有此命。快討船隻。就此前行。〔僕〕領鈞旨。〔坡〕朝雲。我懶朝與世相違。幽居未苦縱飲。拚人共棄。遠謫相宜。第萬里迢遙。更有烟嵐之瘴。一身寥落。豈無泗涕之流。

聖朝未答涓埃。空馳海國。多病況兼遲暮。怎渡江濤。〔雲〕黃菊頻開。淚裏傳將歸思。紅顏頓老。夢中
到得家園。那堪又泛樓船。遠隔錦江秋色。誰念慵調鉛粉。徘徊玉壘浮雲。〔過〕暮歲孤征。空有歸心
問水。齟年遠邁。自嗟旅服沾霜。但臣則忠君。怎避羊腸九折。而子當隨父。更悲猿泣三聲。〔坡〕

〔大聖樂〕瞻西蜀蹙破眉頭。料家鄉重到否。啼痕溼透江州袖。從此波上宅。水
中樓。瓊絃罷卻西窗奏。玉管空攜南海浮。孤帆遠去。蠻烟嵐雨。毳帳霜裘。〔雲〕

〔前腔〕笑朱顏浪蕩鴻洲。怯羅裙千里游。紅潮滴滿楊妃袖。愁脈脈。思悠悠。銀
箏莫弄猱猿吼。翠帶應寬蟋蟀啾。迢遙途路。風塵難避。瘴厲堪愁。〔僕〕船隻俱已

完備。請老爺起程。〔做登舟介坡〕一天秋水。萬里征人。屬望山川。不勝淒愴。〔雲〕料得生還。豈爲死
別。不須過慮。且自寬懷。〔坡〕

〔解二醒〕嘆風波龍嘶海口。駕桅檣蛟奔江頭。滄浪一葉羞回首。看兩鬢漸驚
秋。侵帆暮雨遙相憶。泛海樓船可自由。沾青袖。沾青袖。知甚日菱花重照。知甚
日支石還投。〔雲〕

〔前腔〕蒼烟鎖長源飛溜。暮雲遮古渡寒流。崩崖□樹霜痕透。橫畫鷁逐飛鷗。淒風蕩纜沙邊久。凍雨凝帆水上浮。驪珠漱。驪珠漱。何日裏鶯花吹管。何日裏蝦菜歸舟。〔黃佛上〕逐客雖皆萬里去。悲君已是十年流。蘇子瞻請了。〔坡〕敢問禪師。還往那里去。

〔佛〕子瞻。你不知自己從那里來。還問別人從那里去。〔黃〕傍人問我何方去。〔佛〕笑而不答。心自閒。〔黃佛下介坡〕你看這兩人好生快活也。

〔尾聲〕恨我紅塵落落多馳驟。到不如開山問畝。此去呵怕鬢髮還應雪滿頭。

〔坡〕八月霜飛柳遍黃。

〔雲〕江流曲似九迴腸。

〔過〕誰知孤宦天涯意。

〔合〕泣上龍堆望故鄉。

第二十六齣 驚譌

〔憶秦娥〕〔王上〕分飛久。寒巫病楚成迤逗。成迤逗。怕夜雨燈前。曉霜鐘後。玄

冬幾夜上陽臺。欲問平安無使來。心折此時無一寸。菊花從此不須開。自從相公去國。妾身到家。堪憐歲月奔馳。莫問閨闈冷落。正是天邊信遠。月下人孤。萬戶砧聲。況值秋歸之候。一簾花影。難消夜

半之愁。莫寫憂心。空差遠役。

〔二郎神〕人歸後。記當初綠肥紅瘦。到如今十月寒花霜縷透。尋魚問雁。蘭苕獨擁危樓。一串啼痕香靨溜。憑誰訴烟銷金獸。冷颼颼。問浪子天邊。何日刀頭。〔前腔〕啾啾珠凝帶上。香湮袖口。腸斷啼猿悲卯酉。朱顏薄命。西風萬里荒投。我鼠闕寒燈還白守。重門掩黃花同瘦。看牀頭。一派流波。浸着筵篔。〔邁上〕雖是

家遙千里別。那會書寄數行啼。〔相見介王〕孩兒。秦樓人去。空恨孤鸞。湘水波寒。竟無雙鯉。盡是傷心之日。難尋會面之時。〔邁〕母親不須愁煩。聞公公去買朝報。想就知消息也。

〔轉林鶯〕游人何日歸渡頭。孤雲天半悠悠。問衡陽消息何時有。怕寒風透冽。鷓裘應難消受。青鬢潘郎非舊。謾追求。迢迢歸路。隔斷萬山秋。〔王〕

〔前腔〕殢人風雨侵畫樓。望黃岡頓使人愁。芙蓉隔岸霜華透。這相思怕聽更籌。風塵奔走。何似舖檠相守。越添憂。垂楊陌上。應悔覓封侯。孩兒。你既通經史。當紹箕裘。何不應試汴梁。以成進士。因而遠馳湘楚。用訪嚴親。雖流眼內之珠。不吝手中之線。〔邁〕公婆

年邁慈母身孤。兼之室似罄懸。誰辦桂薪玉粒。況且才如線短。難期紫綬金章。雖身苦離家。九迴腸而更切。然心懷訪父。一舉足而不忘。敢避長征。卽當邁往。

〔啄木兒〕黃金盡。綠鬢秋。況孤帳熒熒獨自守。祇承望舞疊斑衣。誰料想泣掛征裘。念孱軀嬌養年還幼。風霜鞍馬難馳驟。路悠悠。庭幃遠訪。豈爲洛陽游。

〔王〕

〔前腔〕添新怨。理舊愁。欲別兒郎頻執手。怕陶潛悞卻東籬。教劉郎早辦歸舟。看斷雲野樹羞回首。殘花輦路秋光溜。倩誰收。啼珠千點。好寄少年游。

〔隔尾〕兩下裏成消瘦。無端送下半年愁。休忘卻長笛孤吹人倚樓。〔老程急上〕

福無雙至。禍不單行。媳婦不好了。〔王邁驚介〕爲着甚的。〔老〕方纔街上買得朝報。說你丈夫已故

了。〔王邁驚倒介王〕誰道暫離。竟爲永別。萬里游魂驚夜月。百年寵愛付東流。雖來世之緣或能聚

首。乃今生之恨詎不斷腸。孩兒急往奔喪。遺骨免令障海。〔邁〕孩兒就此拜別了。

〔香柳娘〕望千山淚漣。望千山淚漣。愁腸淒斷。江邊障骨憑誰念。嘆孤臣夢懸。

嘆孤臣夢懸。遠謫怨無邊。長辭恨難遣。便匆匆遠騫。孤驄着鞭。飛虹神劍。〔老程王〕

〔前腔〕嘆分離幾年。嘆分離幾年。流光如箭。孤忠未得留殘喘。這冤懷怎宣。這冤懷怎宣。直案侍香烟。修文等飛電。問游魂珮環。名留世間。夢歸天畔。

〔邁〕遠別空城萬里游。

〔王〕楚天多雨在孤舟。

〔程〕行人莫問當年事。

〔老〕離思茫茫正值秋。

第二十七齣 焚券

〔北點絳脣〕〔丑扮鮑不平攜衆戎服上〕紫鐵橫戈。黃金細鎖。英風播。寶劍摩挲。長

嘯函關破。投筆當年膽氣豪。腰間寶劍血瀟瀟。蛟龍豈是池中物。一躍風雷上九霄。自家鮑不平。儂

州人氏。略涉詩書。頗成任俠。赤松爲侶。□懸張子之符。白晝殺人。血染荆卿之劍。浩氣隨虹貫日。英風喝水成冰。想幼年報卻父讐。遭誣坐獄。到今日逃爲海寇。聚衆稱孤。勢震龍關。威宣蜃闕。十萬伍

雄兵飛將。皆能略地攻城。三千員猛士謀臣。豈但如雲似雨。壯山河于水底。何懼丸泥。列介胄于波中。不愁煮海。只是一件。天涯游子。十年消息不通。堂上慈親。一旦存亡未審。不得名題麟閣。徒教淚滴蠶叢。雖對日思家。實爲兒女子之態。而膽雲忘母。亦豈大丈夫所爲。意將歸訪庭幃。以承歡于白髮。兼欲輸誠閭闔。以表暴乎丹心。衆僕僮過來。我要到儋州訪親。須索前去。〔衆〕領鈞旨。〔合〕

〔南倒拖船〕提槩戟。弄干戈。威加海外似天魔。似天魔。一派英風搖社稷。千秋壯氣震山河。震山河。譚笑青萍歸路遠。清笳萬里和饒歌。〔下坡雲過同上〕

〔七娘子〕淒涼又值同雲候。寄孤身冷落鸚裘。銀海生花。玉樓起粟。竹爐相對添僂僂。〔小重山〕寂寂遙天戰玉龍。板扉人不到。掩寒松。路迷海徑斷孤蹤。波痕一縷。蜃樓濃。〔坡〕

從自黃岡。移居儋耳。雪深三尺。誰憐疲馬于藍關。浪捲千重。堪訪牽牛于碧漢。冤何由控。苦不可言。況官舍不容寄跡。愧無尺地。將民房暫且安身。聊借一枝。絮薄燈孤。天寒地凍。蠻荒遷客。自甘獨守。淒涼。翠帳佳人。莫怨同擔寂寞。〔雲〕時當悲鳳。願共窮愁。身已嫁雞。敢辭辛苦。伏願相公少舒醉眼。漫憂海暗三山。聊解愁腸。蛩看春深五嶺。〔過〕行藏任命。窮達由天。願勿過憂。行當履坦。〔老旦扮

鮑姬上。朔風凜凜到林丘。何事多欺人白頭。夜盡血痕沾素帶。誰憐鄰媪冷颼颼。自家鮑姬便是。所生一子。不幸漂流。睽隔十年。竟無消息。罄將產鬻。堪憐片瓦不存。安得人歸。恨把柴門獨倚。老乏立錐之地。空自養兒。餓難數米而炊。愧無積穀。既嗟暮景。況值寒天。好不苦哩。天那。好不苦哩。外面是什麼人啼哭。不免開戶視之。〔開門介〕呀。原來是房主鮑姬。請進裏面講話。〔姬進見介坡〕雪積寒宵。風來曠野。人皆火圍而坐。爾何露宿而啼。〔姬〕容老婦稟上。

〔漁家傲〕誰復念老去愁人怨白頭。只爲暮景無依。孤兒遠游。家資罄鬻難糊口。更生倜傥。又將桑甕茅簷賣與君侯。因此上恨絕鷓鴣哭未休。〔坡〕你似喪家。我權僦舍。願得讓還木戶。不復索取青蚨。〔姬〕幸復燕巢。更全蟻命。垂恩良厚。圖報實難。〔坡〕止爲恤老憐貧。敢曰疏財仗義。我不任德。爾何謝恩。

〔會河陽〕風雨蕭條。衡門暫留。黃齋白飯度春秋。既完口食。身居聊且悠優。兒郎倘是歸來候。何須雪夜蛾眉鬪。何須雪夜驪珠溜。〔內做喊聲介坡〕金鼓連天。喊聲震地。不是赤眉嘯聚。定爲碧眼橫行。待我出門一看。便知端的。〔鮑領衆上遠行介〕

〔水底魚兒〕龍劍蛇矛。龍劍蛇矛。英雄返故丘。思親對雪。不覺淚痕流。不覺淚痕流。〔下介坡〕四下甲兵圍住。三人性命難逃。〔嫗〕方得賜還廬舍。誰知又被干戈。好不苦人也。

〔擲破地錦花〕苦相投。花值繁霜候。真是愁上添愁。又無個煉石奇謀。被燹遭兵。血污荒丘。淚珠浮。拚斷送雪蒙頭。〔鮑復領衆上遶行介〕

〔水底魚兒〕霜滿征裘。霜滿征裘。歸家雪涕收。回瞻故里。一帶白雲浮。一帶白雲浮。〔下介坡〕三軍漸近。萬馬齊來。活路難尋。生離在卽。怎生是好。〔雲〕死葬他鄉。鬼爲異域。料無

謀以脫難。剩有夢以歸家。好不苦也。〔坡雲過合〕

〔麻婆子〕兵戈兵戈連夜起。恨窮途遭石尤。蜀道蜀道堪凝望。怕黃沙瘞黑裘。丈夫空自珮吳鉤。袖卻拿雲手。刀頭拚染紅痕溜。游魂應逐水東流。〔鮑領衆上〕

此間已是我家。不免破門進去。〔坡雲過嫗驚倒介鮑攜嫗〕母親不要驚慌。是你孩兒到此。〔嫗做

認介〕果是我兒。多年不見。如何這般打扮。〔鮑〕孩兒避讐海外。衆頭目推我爲王。今特帶領人馬。

回家省親。〔嫗〕生受你。〔鮑指坡介〕這一夥是何人。〔嫗〕是蘇學士老爺。謫居在此。我將房子賣與

他。今夜聞我啼哭。卽焚左券。不索前銀。彼是大德恩人。爾當小心拜謝。〔媼引鮑見坡介〕謹令小子拜謝大人。〔坡〕愧余何恩。勞卿下拜。〔雲對過介〕緣來就是老媼之子。可保無事矣。〔媼鮑拜介〕

〔一封書〕階前拜我侯。焚券分金濺澤留。非關責後酬。市義應憐人白頭。數椽相讓君良厚。一飯忘恩我自羞。〔合〕甲兵收。話綢繆。草草相逢兩意投。〔鮑〕相公

先前簪筆館中。因甚飄蓬海外。〔坡〕與王介甫一言不合。備受流離。被章子厚百計相傾。連遭擯斥。

〔鮑〕此輩依違權勢。賊害忠良。若逢狹路之車。當借尙方之劍。〔坡〕垂念孤忠。欲除姦佞。是允爲世間義士。怎作海上強徒。

〔前腔〕荒投旅鬢秋。日日悲看水獨流。蒙恩一命留。羨君家俠氣英風寄蒯緱。狼牙早散三千衆。燕頷當封萬里侯。〔合前鮑〕蒙還燕雀之居。當盡犬鷹之力。茲且相別。後

或再逢。〔攜媼下介坡雲弔場雲〕幾乎怖殺人也。〔坡〕若非老媼之兒。定作他鄉之鬼。且收拾去睡罷。

〔坡〕月隱高城鐘漏稀。

〔雲〕陣雲解處雁長飛。

〔過〕丈夫飄蕩今如此。

〔共〕愁聽寒蛩淚溼衣。

第二十八齣 賜環

〔高陽臺引〕〔秦上〕萬里征人一腔忠義。今朝敷奏金闕。回首烟波鱗鱗細剪

殘雪。鄉園雲鎖簫聲遠。問歸鞭何日整。疊笑貂裘玉樓粟起。探梅時節。下官秦少

游。久宦京師。忝居諫職。恨章子厚。恣謀太肆。陷罪名儒。令蘇學士忠惻無伸。永投荒裔。故爾霜飛片

牘。借劍尙方。庶幾日照覆盆。賜環逐客。未奉明旨。好係幽懷。〔邁上〕

〔勝葫蘆〕背劍囊琴盼白雲。停馬足問花村。舉目千山頓覺容顏損。幾回長歎。

掩面欲銷魂。自家蘇邁是也。奉母命而孤征。奔父喪于僻壤。逢人問信。覩物傷懷。聞逐吏之無他。

喜吉人之有相。前途多阻。不免暫止京中。短牘上陳。然後往依膝下。此間便是。徑入則個。〔秦〕數年

隔別。一旦相逢。敢詢闔宅起居。庶慰鄙衷懸掛。〔邁〕容稟。

〔高陽臺〕白髮堂前。紅顏閨裏。偏愁碧海遼絕。凶計譌傳。謝蒼穹天祿未絕。激

切忠懷。一片憑誰說。怎忍得視同秦越。欲待要陳情片楮。謾去控冤雙闕。〔秦〕

昨卑人已上洗冤之牘。想聖主卽有赦罪之條。

〔前腔〕心熱。六月飛霜。三年不雨。短章特奏閭闔。具述冤情。還經楓陛親閱。朝列。姦雄結黨能煬竈。怕從中糊塗阻遏。算除了妬花風雨。自有照盆日月。〔衆扮

舍人上〕聖旨已下。送朝報在此。〔秦看介〕右正言秦觀一本。爲懇恩召還直臣。勦除姦相事。奉聖

旨。蘇軾着以禮部左侍郎兼端明殿學士。馳驛赴京。章惇發雷州安置。永不許敘用。吏部知道。〔對

邁云〕令尊恭喜了。〔邁〕此雖聖主之恩。實出姑夫之力。舉家胥戴。沒世不忘。

〔前腔〕憤雪。鷺隱瓊花。鶯藏碧柳。誰知今日方別。潦倒多年。容顏料應瘦怯。忠烈。崎嶇歷盡纔回首。重瞻雲樹宮闕。端的是盛時麟鳳。迥異春宵鷓鴣。〔秦〕

〔前腔〕歡悅。萬里孤蹤。十年客夢。如今甫得還轍。昔日金蓮。應知此會重撤。功業。平生壯氣凌霄漢。雄心未肯銷滅。喜忠義再陪弭筆。姦佞終教賜玦。〔邁〕小侄

告別。〔秦〕尊君卽返神京。賢侄暫留敝寓。一則重逢骨肉。二則進取功名。不識意下何如。〔邁〕多謝

姑夫美意。〔合〕

〔尾聲〕初逢謾說輕離別。指日歸來持漢節。天道何曾虧俊傑。

〔秦〕寒塞無由見落梅。

相逢正值且銜杯。

〔邁〕若非聖澤深無限。

鴻雁那從北地來。

第二十九齣 釋憤

〔章上〕虎狼心性應難改。富貴迷人不自由。墜馬前頭還墜馬。沈舟側畔又沈舟。下官章惇是也。昨蒙聖旨。安置雷州。只得前行。好生困苦。我想做丞相時。威靈震主。權勢傾朝。手指一揮。兩班裏鳥驚魚駭。眉頭半鎖。滿朝中鬼哭神愁。誰知華轂朱輪。竟成水泡。孰道銅陵金穴。頓作冰山。往常間萬騎千官。歡迎旭日。今日裏孤囊疋馬。獨走秋風。雖然天運循環。亦見人情反覆。昔日遭吾傾軋者。既快彼之熱心。當時藉我扶持者。亦遭他之冷臉。正是勢不宜使盡。冤不可結深。咳。悲何益焉。悔之晚矣。又有一件。如今地僻程遙。天寒晷短。雪壅昌黎之馬。雷慚平仲之羊。提起傷心。言之短氣。只得趲行幾步。又作道理。

〔香柳娘〕看迢迢路途。看迢迢路途。同雲無際。搵心應悔從前事。恨風寒雨淒。

恨風寒雨淒。衰草妬霜蹄。狂藤刺羅袂。聽青猿亂啼。回頭自悲躊躇。揮涕。〔鮑上〕正馬欲追青瑣客。雄驍不作綠林豪。俺鮑不平。蒙蘇學士厚恩。聞他恩旨還朝。須索追送一程也。

〔北醉花陰〕猛將雄兵傍江水。笑吾儕英風俠氣。惟願得千騎散。衆軍馳解弓刀去。佐邊陲。方表男兒志。投寶劍。向龍堤。怕做了豐城埋跡。〔下坡雲過同上〕十

年身不到朝廷。欲伴騷人賦落英。今日已蒙環遠賜。不辭中路伺淵明。下官蒙旨賜環。挈家赴闕。在途風景。殊自淒涼。

〔南畫眉序〕一望楚天迷。想瑤京浮雲蒙蔽。念孤臣千里。正馬秋歸。那章子厚呵。朝堂上嫁毒裊鴟。仕途中陰爻碩鼠。休教提起撩人意。頓灑英雄眼淚。〔下介鮑上〕

〔北喜遷鶯〕誰識俺懷忠挾義。非是我閒弄虛脾。□也麼思。頓省得當年豪致。因此上貫日長虹。猛欲飛。休相滯。遠望着前途旌旆。好一似舊識威儀。前面一隊

人馬。想是蘇學士了。追送一程。有何不可。〔下介章上〕

〔南畫眉序〕眼血謾淋漓。看山頭烟迷蒼樹。想當初人遭顛沛。到如今自受流離。說不得笑罵由人。怎避得揄揶有鬼。〔鮑上〕前面官長可是蘇學士麼。〔章〕俺是章丞

相。何人重問窮途騎。全不似故交蹤跡。〔下鮑〕呀。這就是蘇學士的對頭。恨不得食其肉。寢其皮。如何當面蹉過。不免追上則個。

〔北出隊子〕好教人冠中髮指。看猛趨趨龍馬飛。管教他青萍血染杜鵑衣。只趁俺將軍八面威。呀。教他們狹路難迴避。〔下介章上〕

〔南滴溜子〕長途裏長途裏。泥深草溼。愁腸斷。愁腸斷。天昏地黑。看郊外蒼雲四起。淒涼淚滿衣。匆匆裏舊事重題。羞顏難洗。〔下介鮑上〕

〔北刮地風〕呀。俺只見樹梢頭日漸西。走盡了野路崎嶇。避不得滴溜溜汗雨。沾衣溼。影蕭蕭風起。驄蹄怒轟轟霜橫龍尾。看看的趕着奸回。他那裏蜂未窺。蝶未知。那曉得我除奸天使。誰着他陷忠良將聖主欺。俺這裏不平鳴早已曉。

蹊。〔下章上〕

〔南滴滴金〕烟迷野寺僧歸急。日暮深林鳥飛疾。天涯瘦馬銜殘轡。悔勞心羞往跡呀。方纔年少追來也。怕是強梁追逼區區。此命應教擲。臨崖控馬知何益。〔鮑上〕那裏去。〔拿住介〕

〔北四門子〕笑伊家昔日多權勢。到到到今朝何處歸。〔章〕大王。我止有空囊。別無長物。〔鮑〕誰要你腰間十萬青蚨氣。只斬你肆奸兇老頭顱。不免數落他一番。拽到前途。殺他未遲。你位兒太高。心兒太欺。附權臣誰知災禍起。到如今冤兒又尋。債兒又催。管向着刀頭做鬼。〔扯下介坡雲過同上〕

〔南鮑老催〕殘雲影細。途中夢尙馳。餘雨聲催。天半寒猶積。呀。前面誰人拽着一個官兒來也。莫不是綠林豪。赤眉流。黃巾匹。怕驚蛇打草。愁將集。亡猿禍木災。還及。側耳聽。停鞭立。〔鮑拽章上〕

〔北水仙子〕快快快快走如飛。早早早早一似雪積長空夜破圍。〔章〕前面好似

蘇學士模樣。〔鮑〕果然是也。他他他他做了鵬鶚橫秋。你你你你做了蛟龍失水。

〔坡〕鮑少年。你從那裏來。這是章丞相。何故拿着他。〔鮑〕我我我我趁風行載月歸。笑笑

笑笑着他。詆鳳爲鷗。要要要要除卻了鼓舌搖唇狐媚兒。〔章〕願學士垂情舊好。申

救殘生。〔坡〕他政府相傾。雖非朋友之誼。曲江同宴。實有昆弟之情況。已左遷。未應顯戮。乞推薄分。

望霽雄威。〔鮑〕道道道道如今泄卻當時氣。饒饒饒饒過了血染舊朝衣。〔鮑放

章介章〕逐臣吹毛洗垢。自知積罪如山。學士排難解紛。反使措顏無地。今擬痛加省改。後當圖報

涓埃。〔拜介〕

〔南雙聲子〕驩遭值。驩遭值。螻蟻命。勞相釋。承恩德。承恩德。犬馬報。知何日程。

途急。程途急。馬行疾。馬行疾。感惠忘讐。撫今痛苦。〔章下坡〕少年。雄風旣爾鷹揚。直節

又同豸觸。僕擬奏聞于閭闔。君當報效于邊圉。待爲朝守良臣。勝作江湖俠士。切有厚望。幸勿過疑。

〔鮑〕倘得先容。當圖後報。如今暫別。願望佳音。

〔北尾〕少年家自有鵬鶚志。望長安劍氣橫飛。料四海英雄只有咱共你。〔各

下

第二十齣 同夢

〔淨扮館使上〕堪悲世事如棋局。誰識因緣似夢魂。自家會同館大使便是。前任曾爲司獄。咳。官難驟貴。錢可通神。請託當途。纔升今職。正是仕途偃蹇。難忘白髮之羞。宦海深沈。不比青雲之路。今日兵部尙書蘇爺出鎮。須索祇候者。〔衆擁穎上〕

〔哭虔婆〕旗橫淝水。旛懸細柳。嘆絕塞黃雲。高堂白首。年來空賦宦沈愁。兒童望斷歸來候。人事無涯生有涯。逝將歸釣漢江槎。乘桴我欲從安石。遁世誰能識子嗟。下官蘇轍。向樂家居。自號穎濱居士。今蒙內召。叨遷兵部尙書。旣膺節鉞之分。旋耀旌旗之色。暫辭上國。出鎮窮邊。漢月孤明。莫問馬蹄凍雪。胡沙長暗。空憐龍劍寒霜。不免到會同館起馬則個。〔使做迎接介穎〕本部出鎮。一應官員不許相見。但有太史黃爺。侍郎秦爺。來時須索通報。〔使〕領鈞旨。〔衆擁黃秦同上〕

〔海棠春〕遙瞻驛樹稠。愧別家鄉久。〔使通報相見介黃秦〕足下節制遐方。驅馳孔道。分離

之念。隨衰草而旋生。長別之懷。觀野梅而載簇。敢烹盃釀。聊爲灞柳之需。且拔短毫。以佐陽關之曲。
〔進酒介〕

〔玉山頽〕風塵馳驟。恨今朝繁霜滿裘。謾相驚白雪盈簪。喜歸來黃金拖綬。長亭折柳。羞問卻及瓜時候。〔合〕忍斷盃中酒。醉千甌。驪歌唱徹冷颼颼。〔穎〕二公鸞蓋北留。不肖熊車南去。量有數年之別。可無一席之娛。況兼亂雪堆窗。寒燈照枕。意欲三人同睡。相看蝴蝶之飛。長漏共銷。笑問鷓鴣之血。〔黃秦〕情深大被。誼篤連牀。旣欲譚心。還須抵足。〔穎〕

〔前腔〕風窺刁斗。喜相逢梅花驛樓。問征途雨雪生寒。杳離蹤星霜驚久。連牀共宿。話西窗同銷長漏。〔合前各睡介生扮五戒禪師夢中上〕人生如大夢。卻笑何時覺。至人本無夢。知覺亦非覺。自家五戒便是。下山抄化。不免走一遭也呵。

〔北新水令〕幾年夢裏蛻蜉蝣。笑迷途誰人回首。飄零龍蜃窟。出入鳳凰樓。悞卻真修。悞卻真修。紅蓮諦難參透。〔穎黃秦俱起介〕呀。這是五戒禪師。須索迎接他。〔做迎

接介戒〕生受列公了。〔穎黃秦〕久慕慧明。願聞玄奧。〔戒〕聽我道來。

〔北駐馬聽〕玉帽籠頭。怕烏兔雙丸天外走。金章繫肘。恁鳧鷗兩翅水中浮。千莖白髮頓生愁。彩雲易散琉璃剖。嘆浮生誰不朽。早教入夢裏悲蒼狗。〔下〕穎黃

秦醒介穎〕方纔睡去。夢接五戒禪師。與他講道。〔黃驚介〕奇哉。奇哉。小弟之夢。與子由無二。〔秦

驚介〕怪哉。怪哉。小弟之夢。與魯直相同。且問二公。他曾說什麼話。〔穎黃〕

〔玉山頽〕玄關明剖。嘆人生風塵水漚。看虛名世外浮雲。道繁華天邊蒼狗。笑乾坤戲偶。誰識得個中機殼。〔合〕草草言非謬。似莊周東園蝴蝶兩悠悠。〔穎〕

敢問少游。五戒狀貌何如。〔秦〕

〔前腔〕無塵無垢。幻形骸長身隻眸。翦青螺裋衲單條。繡曇花袈裟雙袖。譚禪

說呪。早把卻無生參叩。〔合前〕穎黃〕果然言語相符。抑且形容允合。三人同夢。千古異聞。〔坡

便服上〕

〔卜算子〕江湖飄泊多。園徑荒蕪久。重問霜靴待漏時。不耐聞清漏。岐路十年別。

江津萬里長。重尋鷓鴣序。流涕忽沾裳。下官蒙聖恩。復補端明學士。加陞禮部尙書。家人先已入城。

舍弟又將出鎮。不免向會同館見他則個。〔使迎接介坡〕我有些認得你。〔使〕小官不曾會着老爺。〔坡〕我卽是向年獄中蘇學士也。〔使〕有眼不識泰山。使小官十分慚惶。〔坡〕蛇黃牛黃。可以療病。你這慚惶。卻是無用的了。且通報則個。〔使〕蘇老爺襟懷灑落。度量寬洪。真世間罕有者。〔走入報介〕大老爺到了。〔相見介坡對穎介〕分離累歲。多縈棣萼之懷。相聚一堂。實切荆花之喜。

〔玉胞肚〕多年迤逗。這相逢天涯淚流。恨窮途落葉驚分。怯殘顏孤雁誰投。〔合〕牽衣執手話綢繆。各問年華共白頭。〔穎對坡介〕連枝久隔。豈無原上之鳴。同氣重逢。再列天邊之字。

〔前腔〕休文腰瘦。問飛鴻何方逗留。料空林秋葉悽悽。恨池塘春草悠悠。〔合前坡對黃秦介〕風烟路隔。當時懷抱依然。霜雪途懸。此際相逢豈偶。

〔前腔〕窮荒奔走。料相知金蘭起愁。恨災殃花夢龍毫。怯離情粟起貂裘。〔合前黃秦對坡介〕十年分袂。天涯情若比鄰。一旦賜環。海內幸存知己。

〔前腔〕瑤京會偶。問投荒沾巾涕流。喜今朝麋鹿相依。恨當初鵬鳥生愁。〔合前

〔穎〕哥哥。適有一事。甚是奇異。昨夜弟與魯直少游俱夢接五戒祖師。細譚解脫。密示玄通。不意剛接着哥哥。〔坡〕聞老母分娩之時。有異僧授胎之報。他一目既然成眇。我數齡常夢爲僧。今以三君之言合之。豈我卽五戒後身耶。

〔前腔〕前生離垢。這清修。今生怎酬。脫塵緣。一葦西歸。笑虛名萬水東流。〔合前〕
穎黃秦合

〔前腔〕龍爭虎鬪。料雄心今朝盡勾。又誰貪畫閣麒麟。且相盟瀚海鳧鷗。〔合前〕

衆軍騎上介。中軍官叩頭。請老爺起馬。〔穎〕就此相別。〔坡〕纔得合歡。又成離恨。勢非得已。情實難堪。〔穎〕孤雲乍合。零雨旋歌。因龍鉞之長征。惜雁行之中斷。高堂白髮。弟當便省椿萱。荒徑黃花。兄望錦歸桑梓。〔拜別介坡〕

〔鷓鴣天〕朔風吹雪滿征裘。〔穎〕一片幽情付水流。〔黃〕咫尺俄驚迢遞路。

〔秦〕相逢頓作別離愁。〔衆擁穎下黃〕回首望。獨雲浮。〔秦〕人生聚散渾蜉蝣。

〔衆上〕蘇爺多拜上三位老爺。〔坡〕中軍官。你到我家中。可對太爺說。今朝空有鱸葦想。指

日還乘蝦菜舟。

〔坡〕二十餘年別帝京。

〔黃〕柳條藤蔓繫離情。

〔秦〕來時萬里同爲客。

〔合〕無奈春風欲送行。

第三十一齣 慈訓

〔金瓏瓊〕〔雲過同上〕鴻溝初隱凍。鸞臺寶鏡朦朧。嗟雙鯉不浮東。無心刺鳳一點青螺愁重。空淚灑杜鵑紅。千里鄉雲蝶夢中。相望無復馬牛風。誰憐雙鳳衾初合。社燕何由戀寒鴻。〔雲〕過兒。我與你父親自成鸞鳳之緣。未遂魚蝦之願。鯨波寄跡。曾遭畫鷁之風濤。鴛帳藏身。頗渥貫魚之寵愛。追想鵲橋初駕。曾將兔管相投。繡虎雕龍。可羨賦中鸚鵡。搏鵬薦鶚。還期膝下麒麟。今汝螢火曾親。蠹書堪讀。可將玉管。從事韋編。想當初呵。

〔宜春令〕雙蛾怯。五馬逢。鵲填河牛郎意濃。從登銅雀。蘭香頓入熊羆夢。猛堪憐舞叶驚鴻。猶自念歌迴啼鳳。〔合〕匆匆。追思兔管。不堪拈弄。〔過〕這管呵。鴻猷

駿業。實資束兔之毫。燕侶鶯儔。權作引鸞之鏡。追昔緣成孔雀。期今慶衍螽斯。

〔前腔〕蜂媒合蝶使通。喜乘鸞。睚鳩偶同。金籠鸚鵡。幽棲淚滴鮫綃重。念孩兒刻篆雕蟲。知慈母吹簫引鳳。〔合前雲〕你父親恩隆鳳炬。全仗鼠鬚。寵錫龍章。多憑兔鬣。願汝蚤招羔雁。令人共羨龍駒。

〔前腔〕三鱸集。一鷓鴣。向雞窗揮霓吐虹。趨庭學鯉。好教千里驂騑縱。碧山中獨羨焚魚。青瑣內同誇鳴鳳。〔合前過〕孩兒自慚鳩拙。怎繩七葉之貂。私擬雄飛。少和九臯之鶴。欲題名于雁塔。當奮志于雞窗。

〔前腔〕歌鳴鹿。賦落鴻。寫鸞箋驚蛇走龍。雞碑未解。自慚豚犬才無用。點蠅頭。詎勉囊螢。揮烏跡何妨題鳳。〔合前邁上〕

〔西地錦〕去馬空尋殘夢。啼鳥虛悵孤鐘。寒山鳥雀瓊花擁。回頭自愧歸鴻。〔相見介邁〕二母過弟。自驪駒之唱。間隔廿年。嘆鴻雁之羣。睽違萬里。猿腸欲斷。麋首堪歡。〔雲〕你父入朝未回。且把家下事情細說一番。〔邁〕容稟。

〔繡帶兒〕自當初鸞飛臺空。望斷鱸魚秋夢。有誰憐謝豹泣殘風。寒螿聲伴啼

紅。堪慟。猊爐烟燼。鴛瑟塵蒙。料今日不堪么鳳。高堂鳩杖螺鐘。嘆穀食鶉衣。鳧鷗相共。〔邁對雲介〕二母鴻宿湘江。烏栖瀚海。鏡裏蛾眉非故。鬢邊鶴髮將生。〔雲〕

〔前腔〕憶鄉園鶯聲春送。無奈蠻腰愁重。嘆三更夢醒鯉魚風。自嗟蝶困蜂慵。堪慟。蠶絲未斷。鳳蠟猶紅。盼不到鶻城猿洞。鷓鴣猶寄枯叢。翠帳還孤。蝸居誰共。〔邁對過介〕兄弟蟋蟀聲中。空懷曉夢。鵲鴿原上。實喜重逢。〔過〕

〔前腔〕別多年蛟潛無用。盼斷游鱗翔鳳。恨雲梯未得接蟾宮。應嗟鼉技遭窮。堪慟。蝸牛空戰。鵬鳥難冲。知何日馬門供奉。家鄉煮鯉烹鴻。料鬪鴨闌前。鳴蛙相送。〔邁〕

〔尾聲〕鷓鴣寒莎雞動。〔雲〕烏輪兔駕迅長空。〔過〕覆鹿尋蕉恍夢中。

〔邁〕紫鳳含花出御樓。

〔雲〕曉鶯啼送滿宮愁。

〔過〕中原不是無麟鳳。

〔合〕匹馬今朝不少留。

第三十二齣 觀聖

〔西地錦〕〔坡冠服執笏從人提燈引上〕閣道銅龍重到。不堪霜滿金貂。凌寒猶候金門詔。還瞻楓闕岩峩。海外漂流已十霜。歸來華髮映衣裳。君恩自是如天闊。何必焚香侍玉皇。下官特蒙內召。祇候早朝。玉輦未升。銅龍初啓。追憶久投海外。永遠劍珮于九霄。何期重入朝端。載列衣冠于萬國。

〔賞宮花〕萍浮浪飄。無由謁聖朝。嗟命薄。慶恩饒。九死自拚埋馬革。五更重幸插雞翹。呀。你看金蓮尙設。寶焰高張。太乙藜懸。何幸今朝重覩。令狐口照。恍疑昔日送歸。

〔前腔〕鸞墀候朝。金蓮照夜高。追往事。念奇遭。愁去空瞻天上日。醒來猶憶夢中蕉。追念先朝。徒有奇才之賞。可憐往日。竟無一事之成。

〔前腔〕明良定交。奇才聖寵叨。籌未展。技空高。片語到今歌盛事。半生何處獻良韜。咳。叨光遇主。金蓮雖寵微躬。借照成讐。玉燭實招讒口。

〔前腔〕長楊燭燒。恩光照紫袍。招佞宄。謫英豪。鳳蠟煉成愁脈脈。龍膏惹起口噤噤。〔小生扮宋徽宗擁宦官等上〕

〔神仗兒〕霜天方曉。雞人籌報。看香烟細裊。鞏覆金甌。熙皞登玉殿。訪羣僚。拂

旦雞鳴。僊衛陳。高憑龍首帝城春。千官黼帳。杯前壽。百福香奩。勝裏人。朕崇寧皇帝是也。嗣登鴻寶。未敢燕閒。閱史披圖。猛欲追謨于賢聖。宵衣旰食。每勤顧問于臣鄰。今當早朝時分。不免升殿。則個。

〔坡朝見介〕臣蘇軾叩見。願陛下萬歲萬歲萬萬歲。〔帝〕卿忠肝義膽。揭日月于重光。繡口錦心。挽文章于一變。致使浮沈外職。抑且漂泊遐方。已明百折之忠。實是九重之過。〔坡〕臣眉山籜質。錦水樗材。丹陛陳謨。荷先帝金蓮之賜。黃堂獻最。遭奸臣貝錦之災。顧瀚海窮居。自甘埋劍。而彤墀寵召。何望賜環。今朝得覲龍顏。此際奚勝雀躍。

〔降黃龍〕寶炬災招。讒口高張。孤忠自保。飄蓬萬里。有誰辭九折。王陽險道。榮叨蘭臺典禮。重謁五雲廊廟。願輸忠銘。常畫釜。啣環結草。〔帝〕錄用孤忠。不揚遺直。

雖是朕躬夙志。實由先帝遺言。

〔前腔〕先朝念子賢勞。寵賜金蓮。恩垂玉照。遺忠海外。念幾番落落淹遲遠道。鵬鵬秋天。鍛羽莫怨殘楓枯草。錄孤臣金章載錫。瓊環重召。〔帝〕卿籌國忠謨。已見

肝腸激烈。傳家義訓。應知頭角崢嶸。行當爵爾後人。用以酬卿舊德。〔坡〕臣子蘇遠蘇過。父書雖讀。慚無倚馬之才。賢籍未登。空有攀龍之志。現居輦轂。敢辱班聯。

〔前腔〕兒曹有愧傳貂黃卷曾親。班衣猶少。那堪□荷。問庭前詩禮羞言跨竈。蕭條青衿未脫。猶困雞窗昏曉。嘆微才鵬搏無翅。牛溲可療。〔帝〕卿老成練達。固應

晉秩台階。卿子年少英豪。定合策名天府。特免西藩秋解。逕投南省春闈。

〔前腔〕英豪粹質奇標。克振名家。堪供清廟。憐卿有子。不枉義方垂教。才高聯芳棠棣。堪把烟樓撞倒。試春闈龍墀獻賦。鸞堤待詔。〔坡〕臣浮沈宦海。羈縛名韁。念鄉

國之飛雲。奚勝惆悵。看桑榆之落日。無任徘徊。乞賜省親。徐圖報主。

〔黃龍袞〕衰親望裏遙。游子天邊老。奈曉夜思家。衣袖驪珠遶。瞻依故道。鄉心如擣。求歸去。供子職。容移孝。〔帝〕丹心靖主。方在今朝。彩服娛親。何妨異日。

〔前腔〕椿萱色未凋。葵藿忠堪效。且佐理皇猷。異日飛歸棹。堪披文藻。還據奇抱。方相合。應未許。青門傲。〔坡〕初歸闔闔。本當圖報于涓埃。久闕庭幃。竊恐興悲于風木。歸心

已切。哀悃宜矜。〔帝〕子情固是難違。准令馳驛。臣職不宜久曠。依限赴京。〔坡謝恩介〕

〔尾聲〕垂恩許訪金川道。〔帝〕看指日重登廊廟。〔坡〕剩有涓埃答聖朝。

〔帝〕芙蓉闕下會千官。〔坡〕柳拂旌旗露未乾。

〔帝〕朝罷須裁五色詔。〔坡〕肯將衰朽惜殘年。

第二十二齣 便省

〔青玉案〕〔老程王同上〕雪隱梅花寒衝柳葉。似候東方騎。爲問游人歸也未。錦

瑟塵生。瓊簫聲杳。悵長安千里。〔老〕爲隔關山遠。因悲道路難。〔程〕白頭羞弄杖。青眼望征

鞍。〔王〕地咽金川冷。雲凝劍閣寒。蛾眉何事鎖。爲道憶長安。〔老程〕自從邁孫出去。未卜軾子存亡。

一望天涯。竟絕游魚于湘浦。百年故國。空尋歸鶴于遼陽。白髮傷心。青山瀆淚。〔王〕殘簫入夢。徒懷

死別之悲。破鏡常懸。未遂生還之慶。昨見晚燈花綻。茲聞曉鵲聲喧。或消息之將傳。庶團圓之有望。

〔老程合〕

〔榴花泣〕滄波淹滯。料亦鬢成絲。三十載。竟無歸。魚枯雁老冷庭幃。淒風凍雨。

惆悵舊縫衣。憑闌揮涕。怕孤臣一逐琉璃脆。慘離魂三月啼鶻。喚愁悰。半夜寒雞。〔王〕

〔前腔〕飄零夫壻。何處問因依。憑繡檻。掩朱扉。鸞□鳳去杳歸期。猖狂落魄。斷送老頭皮。半腔心事。怕青螺頓薄。當時翠恨難逢。隴首梅花。最堪憐。陌上楊枝。

〔衆擁穎上〕

〔粉蝶兒〕銜命歸來。馬繫殷郎枯樹。〔衆稟介〕已到府門了。〔穎下馬相見介〕離家驚十載。

羞見鬢痕蓬。休把銀釭照。相逢似夢中。〔老程〕自揮鞭出去。已驚歲月遷延。雖衣錦歸來。亦覺星霜更變。且說汝兄行徑。以舒父母情懷。〔穎〕

〔漁家傲〕波濤裏數載流離。慘風霜夢斷鷓鴣夷。念從前孤雁羣分。消不盡寒蟄聲唳。喜丹書重召金門侍。繫銀魚容臺班廁。曾在郵亭相會。料歸鞭晨昏便至。

〔老程〕只道已修天上之文。誰知還受人間之祿。況汝歡承膝下。使我喜上眉端。

〔前腔〕愁相看兩鬢垂絲。喜吾兒猶侍銅墀。猛堪驚箕尾光寒。誰承望奎婁輝。

熾。扁舟問道歸來未料鶯花西園重麗。莫把門閭依倚。怕斜陽將人尤滯。〔王〕
敢問叔叔。你哥哥既困風塵。復投坑穽。誰飛諫牘。得照冤盆。〔穎〕復爵朝中。雖乞恩于主上。鳴冤闕下。實借力于姑夫。

〔前腔〕忠懷奮脈脈。魂飛抱彈章。血叩銅墀。道忠臣失水孤鱗。恨奸雄迷人九尾。楓宸重念金蓮意。憶江湖卅年憔悴。欲問奔波滋味。試驗取青衫涕淚。〔王〕

逐客初還。幸得本朝復職。孤兒遠出。未知何地安身。〔穎〕京國棲遲。已喜重逢橋梓。春闈密邇。還期同探花枝。

〔前腔〕悲年少跋涉天涯。料才疎怎赴春闈。恁飄流季子貂裘。怕淒涼小喬鸞被。九疑如黛湘川蔽。問瓜期甚時驩會。試看腰肢憔悴。總爲着兒郎夫婿。

〔尾聲〕〔合〕待歸來細問當年事。有誰念殘香冷膩。共話卻潦倒西窗翦燭時。

〔老〕林花不待曉風開。
〔程〕南陌征人一騎來。

〔王〕悵望玉京無限恨。
〔穎〕共歡明主賜金回。

第三十四齣 證果

〔琴上〕青泥曾說偈。紅粉解參禪。自家琴操便是。久脫紅塵。自消白晝。呼猿聽偈。修成無上涅槃。招鶴參禪。悟徹最玄般若。與蘇子瞻兩心密印。因尋湘沅行藏。對章子厚數語暗嘲。頓起瓊崖禍祟。仍在京師寄住。還期淨土真修。到無量菴說呪焚香。與印師尊繙經入定。正是竹密不妨流水。蓮清何怕淤泥。道猶未了。印師早到。〔印上〕丹霞縹緲見金幢。去後猶留滿室香。口吐醍醐來灌頂。爭教心地不清涼。〔相見介印〕天然。你可知道了麼。蘇子瞻在京已久。我和你去點化他則個。〔琴〕如此就行。〔印〕好將青柳露。〔琴〕點破白蓮香。〔印〕此是子瞻私宅了。通報則個。蘇老爺有請。〔坡雲上〕方尋蝴蝶夢。又被鷓鴣摧。〔相見介印〕從彼別離。到今思憶。可能無恙。以慰有懷。〔坡〕虛拋歲月。盡歷風波。幸得偶逢。可消渴想。〔印〕

〔北混江龍〕道受盡了掀天浪濤。江州血淚灑虹毫。弄得你三更亂雨。萬里驚潮。只落得雲袖傷秋。停玉管。盼不到霜靴待漏。珥金貂。恨回波一望蜃樓高。驚魂千派。鼉宮曉。受用的蠻烟瘴雨。蹉過了月夕花朝。〔琴〕朝雲妹子。一別多時。十年勞

想。〔雲〕梯山航海。白髮將侵。宿雨餐風。紅顏非故。〔琴〕

〔油葫蘆〕因甚的青鏡朱顏頓慘憔悴。又難追別樣嬌。西施褪卻如花貌。只爲着十年奔道路。因此上一日損丰標。誰念湘波澗。更覺楚雲消。謾將歌扇挽。空把翠眉描。天畔雙梭擲。海上一篷飄。恨無情風浪蹙斷玉臺簫。壺中藥倩誰敲。

〔印〕子瞻。子瞻。你也該省得了。〔坡〕久思臥壑養高。奈有難拋人事。卽欲買田招隱。必須先了塵緣。

〔印〕

〔天下樂〕當日災危起彩毫。馳鳥道。涉鯨濤。到如今插鷓鴣。似烏衣返故巢。猶戀着飛牘凌霄。放不下簪筆隨朝。還說道買青山塵緣未了。〔琴〕朝雲妹子。你何不

同學士焚修了。〔雲〕我身沈慾海。自己難撈。他心戀仕途。別人怎挽。〔琴〕

〔節節高〕迷戀了蛾眉蛾眉玉貌。指望看鸞章鸞章金誥。青鏡臺前要人說。娘行俊俏。何不浣了脂香。銷了油膩。將禪關打着。翦了盤龍。閒了舞鳳。擲了飛鮫。正好向白雲關繙經自遊。〔衆上報介〕二位相公會試俱高中了。〔佛琴〕可喜可賀。〔印〕

〔元和令〕這兩個俱搦錦標。舞雙雙斑衣好。準備着封章菽水與梁膏。儘年華承歡暮朝。有一日雲殘月缺。絮捲花消。等氤氳風一掃。〔琴〕朝雲妹子。你令郎既已高捷。身後事也完了。

〔上馬嬌〕耀門閭有小兒曹。呀。日下正逍遙。你等閒忘卻前生約。待誰識舊禪袍。〔坡驚介〕他有什麼舊禪袍。〔印〕子瞻。子瞻。你還不知道。你前世就是五戒。我前世就是明悟。〔琴

指雲介〕他就是紅蓮後身。我就是清一後身。〔印〕

〔勝葫蘆〕全不想古寺當年着破袍。受多少莽風騷。早見了瑤華兒女貌。凡心難咽。塵情頓起。歸去路迢迢。因此上歷難遭。魔猶不曉。好蹊蹺。還被青螺情愛惱。軀藏火坑。魂飛慾海。回首落皮毛。〔琴〕

〔後庭花〕擣不盡鐵河泥顏色好。吹不斷四洲沙長慧曉。假饒血肉相瞞昧。來時路不遙。猛相招。九蓮兒香遶。三車兒悟超。笑娘行呈妖獻笑。跳不出紅裙腔。調好回頭宿孽兒消。新緣斷。舊火燒。度沈淪百尺橋。〔坡大笑介〕原來如此。原來如此。

所以會同館有三人同夢之異。〔印〕

〔柳葉兒〕早則個一聲長笑。舊根源撥盡蓬蒿。妝喬做喬。本來面目真消耗。待玄同印慧覺超。那時節方纔悟夢裏的心苗。〔雲〕既蒙指點。頓悟因依。久味玄關。願聞道

奧。〔琴〕

〔寄生草〕泥牛水流應遠。石磴波飛正杳。住行坐臥空中妙。穿衣喫飯禪中奧。痢屎撒溺玄中竅。若問卻東行鸞鶴滿空飛。算不出西歸龍象回頭早。〔坡雲拜

介〕百年幻夢。一旦提醒。待我暫省雙親。撇塵寰而長往。與君永歸三寶。指覺岸以同登。〔印琴〕前修有在。舊約毋忘。我二人在蛾眉山等候便了。蚤知燈是火。飯熟已多時。〔下坡雲合〕

〔尾聲〕曇花一樹高。貝葉千篇掃。便從此回頭。藤枯蔓槁。好一似半夜羅浮香氣繞。鐵鞋不費勞。覺路逍遙。看金繩寶筏相招。何須慮永劫沈身不可撈。還將宿孽消。洗卻紅蓮圈套。那時節白蓮香相攜共入無生道。〔同下〕

第二十五齣 接武

〔祝英臺〕〔邁過同〕綠衣飄。紅杏暖。春色憑誰管。雁塔名題。馬踏花痕亂。欲問錦水青衫。眉山皓首。惆悵時光流變。春夜子星回。天孫滿月。詠歌麟趾令。簫管鳳雛來。〔邁〕

下官蘇邁是也。〔過〕下官蘇過是也。〔邁〕我兄弟雖已赴宴于瓊林。尙未授官于銓部。意欲奉嚴親而歸故里。兼可侍大父以樂餘年。兄弟意下何如。〔過〕家大人風霜歷遍。旣倦飛而知還。予小子雨露新霑。宜急流而勇退。言之有理。意可無疑。〔邁〕

〔玉芙蓉〕青雲帝寵長。白雪親懷悵。喜芝蘭叶夢。棣萼聯芳。御杯共醉龍頭榜。春雪同含雞舌香。〔合〕長江上。泛清波半航。東風裏雙仙新着錦衣裳。〔過〕

〔前腔〕蘭蓀正吐芳。萱草頻凝望。且重尋故里。笑訪高堂。殷花細翦黃金帳。美液輕浮白玉觴。〔合前邁〕自從束髮。輒爾傷心。奈有事于驅馳。竟不遑于定省。今日幸登一第。足

繼書香。當時備歷千辛。莫看衫淚。

〔雁來紅〕馳千里。滯一鄉。走風塵。名利韁。今朝喜奮層霄上。玉壘重歸訪。翠袖猶凝舊日霜。〔合〕頻頻望。飛鴉夕陽。問征途。還惆悵。〔過〕自生塵世。未覩家鄉。雖嗟久

滯于遐荒。猶幸親聆乎詩禮。今日曲江沈醉。共着宮袍。何時錦水榮歸。同娛萊綵。

〔前腔〕黃岡遠。瓊海長。幸趨庭有義方。今朝得意長安上。往事堪悲愴。正馬猶憐舊日忙。〔合前邁〕嚴尊庶母。卽欲戒行。官舫客囊。先須打點。〔過〕蘭橈桂棹。昨已遙停。椿樹萱花。

明當早發。須同去稟知。

〔邁〕銅龍曉閣問安迴。

〔過〕忽覩雲間數雁來。

〔邁〕共沐恩波池上客。

〔過〕緣知獨有子雲才。

第二十六齣 書錦

〔菊花新〕〔穎上〕春深自喜舞朝衣。林下輕風蘸翠微。恍惚夜川裏。蹉跎朝鏡前。紅

顏與壯志。太息此流年。下官承恩出鎮。便道歸家。定省晨昏。少竭高堂之力。遷延歲月。更懸魏闕之心。正是丹衷酬聖主。白首答衰親。〔衆稟〕大老爺已到。〔坡雲邁過上〕

〔金菊對芙蓉〕故國鶯啼。鄉園花媚。堪悲歸路雲迷。夢魂尙愧烏衣。〔相見介穎〕

且喜哥哥榮歸故里。快請爹媽嫂嫂上堂則個。〔老程王同上〕

〔菊花新〕斑袖賦歸來。白髮生歡喜。〔坡拜見老程介〕久違甘旨。備歷辛酸。夢繞雲山。酷似

搥心之鹿。養疎菽水。有慚哺食之鳥。今方返國而省親。又欲入山而訪道。萬惟恕罪。千乞垂恩。〔老程〕受萬里之風波。方嗟賜玦。沾九天之雨露。又擬投簪。既薄宦情。旋修佛果。〔坡穎同拜介坡〕重聯荆樹。喜成鴻雁之羣。載訪曇花。欲問象獅之座。〔穎〕漂流海外。何期一笑相逢。參悟生前。堪了三人同夢。〔坡王同拜介坡〕桃花有約。劉晨喜得重來。貝葉多緣。支遁又將遠邁。〔王〕一枝綠柳。歡娛試驗長條。九品青蓮。修證何妨並蒂。〔坡〕

〔剔銀燈〕自當日黃岡留滯。更相遭丹崖顛沛。金環幸得皇朝賜。喜今日再完

蓮諦。〔合〕榮歸喜。春風彩衣。消舊怨。花香酒卮。〔雲拜見老程介〕堂前初拜。二親久缺

于趨承。〔老程〕海外言旋。孤客實勞于陪侍。〔王雲相拜介雲〕專房寵擅。讓人不如蛾眉。〔王〕側室賢明。訓子喜成麟趾。〔雲〕

〔前腔〕雲烟外青煤還細。波濤裏紅妝頓翳。高堂未罄承歡志。喜今日雙鸞重聚。〔合前邁過拜見老程介〕故國睽違。慚繩祖武。〔老程〕少年昂聳。足見孫謀。〔邁過拜見穎介〕飲酒

賦詩。幸承阮籍。〔穎〕賭棋折屐。喜見謝玄。〔邁過合〕

〔前腔〕窮荒去慚違桑梓。晨昏隔未供菽水。從離膝下長無寐。喜今日鷓鴣聯翅。〔合前邁過拜見王介〕久違慈訓。未展孝思。春暉每墮于縫衣。晝日喜歸乎著錦。〔王〕膝下久離。徒

切倚門之望。榜中雙占。忝成畫荻之功。〔邁過合〕

〔前腔〕兒年少髮痕驚翠。皇恩重衣紋染紫。慈幃遠隔頻揮涕。喜今日牽衣相會。〔合前內云〕聖旨下。〔秦上〕聖旨已到。跪聽宣讀。奉天承運皇帝詔曰。風霜節勁。恆遭按劍之誅。日

月光明。用照覆盆之泣。爾禮部尙書蘇軾。文字凌雲。忠誠貫日。金蓮歸院。先王嘆賞奇才。彩管題詞。國士頓遭讒口。棲遲狂獄。奔走鯨波。白叟黃童。盡知爲枉。紫宸丹陛。洞察其冤。須進新銜。少償舊德。特進太師兼資政殿大學士。爾父光祿丞蘇洵。丹心靖國。白首歸田。封太子太師。母程氏。闡教多謨。義方有則。封成國太夫人。爾弟兵部尙書蘇轍。功效省樞。忠鳴閭闔。特進太傅兼端明殿大學士。爾妻王氏。嗣育蘭蓀。孝全蘋藻。封通義郡夫人。妾王氏。相夫益堅晚節。誕兒早掇賢科。封同安縣君。爾長男觀政進士蘇邁。能讀父書。允稱國器。授駕部員外郎。次男觀政進士蘇過。學能製錦。才可運斤。

授穎昌府鄆城縣知縣。工部侍郎秦觀補袞有資于安攘。飛章克辨乎賢奸。進本部尙書。嗚呼。承前啓後。萃忠孝于一門。崇德報功。錫寵光于奕世。欽哉朕命。沃矣汝心。望闕謝恩。〔各謝恩介秦見老程拜介秦〕一官淹滯。有慚玉潔冰清。萬里重逢。可喜絲纏蘿附。〔老程〕班聯鳩鷄。堪稱北署之英。臺築鳳凰。不愧東牀之選。〔秦與衆相揖介秦〕弓裘在望。雅稱奕世忠良。袍笏相傳。共羨一門榮貴。〔衆〕昔官諫議。已勞殿陛鳴冤。茲列司空。復喜門楣生色。

〔大環着〕喜青鸞飛至。喜青鸞飛至。漢珥增輝。五彩繽紛。三紋華麗。可是一時榮貴。念區區怎酬恩惠。惟願乾坤□位。指黃圖不見山童海沸。修三事。歌川主。玉檢時。封珠星長綴。

〔喬合笙〕想浮生朦昧。想浮生朦昧。誰辨雄雌。問前生難解紅蓮真諦。舊花香休猜露水枝。禪關總玄偈。嘆人間流沛。這題詩豈意遭狐尾。因緣果報。這其間永劫難逃避。南天莫滯。西方可歸。蝸名蠅利千秋戲。休□紅塵縈繫。共向青山去。何異鄩鄩寤。

〔越恁好〕鼎綸仙吏。鼎綸仙吏。譜梨園吐鬢絲。看瑞芝香滿。幽蘭調飛行雲駐。
檀板催清霜。句落梁州妓。坡仙靈爽。應道神交心契。

〔煞尾〕函三館裏呈餘技。解向詞林遊戲。曾有太乙真人照杖藜。

〔合〕春還淑氣滿長安。

世上浮名好是閒。

聞道仙郎歌白雪。

陽春一曲和皆難。

金蓮記終

四

喜

目錄

第一齣 家門始終

第二齣 大宋畢姻

第三齣 詩禮趨庭

第四齣 瓊英入宮

第五齣 花亭佳偶

第六齣 風月青樓

第七齣 久旱祈神

第八齣 喜逢甘雨

第九齣 竹橋渡蟻

第十齣 天佑陰功

第十一齣 鸞儔賞夏

第十二齣 椿庭慶壽

第十三齣 巧夕宮筵

第十四齣 赴試秋闈

第十五齣 月桂同攀

第十六齣 □薦榮歡

第十七齣 親憶瓊英

第十八齣 瓊英閨悶

第十九齣 催赴春闈

第二十齣 怡情旅邸

第二十一齣 紅樓遣思

第二十二齣 紫禁明揚

第二十三齣 雙桂聯芳

第二十四齣 冰壺重會

第二十五齣 遐憶青娃

第二十六齣 堅持白操

第二十七齣 泥金報捷

第二十八齣 禁苑奇逢

第二十九齣 詞傾宸聽

第三十齣 詩詠花魚

第三十一齣 仁主賜婚

第三十二齣 翠閣耽思

第三十三齣 思憶雙親

第三十四齣 夢後傷懷

第三十五齣 奔告強婚

第三十六齣 佳期重會

第三十七齣 禍禳左道

第三十八齣 平妖奏績

第三十九齣 帝闕辭榮

第四十齣 他鄉遇故

第四十一齣 尋樂江村

第四十二齣 衣錦團圓

四喜記

明謝 謙 箸

第一齣 家門始終

〔西江月〕〔末上〕人世難逢四喜。浮生不滿百年。有花有酒卽神仙。雲鬢等閒霜變。主敬固能作聖。風流亦可稱賢。調宮弄羽樂吾天。軒冕崢嶸何羨。

〔漢宮春〕乾坤豪傑。只古丘大宋。無人並列。曾編竹橋。渡蟻陰功赫奕。天賜三元。兄和弟狀元。榜迭。晝錦處。救取孤僧。不負當年鑑別。小宋風情奇絕。向花朝。禁苑。聞呼情熱。何期戲詠私成。宸聰遽徹。蓬山不遠。奉綸音。洞房姻結。更青樓舊愛重懽。千古傳揚不滅。

宋公編竹橋渡蟻。

宋子京花燭奇緣。

慧雲僧他鄉遇故。

一門宋兄弟狀元。

第二齣 大宋畢姻

相公爲媒。定孫口員外小姐爲妻。女貌郎才。兩相正妙。今日口口只愁沒口兒吃的。擺設許多筵席。行了許多口帛。又一件。小相公生得又俊。未曾說親。必定也要央媒。我且放文雅些。再圖下次。宋老爹萬福。〔外〕媒婆免禮。〔丑〕稟上老爹。新人已到門首。孫親家小事在身。不得自送。着我媒婆送親。

〔金瓏璫〕〔旦〕二星光在戶。鵲橋喜駕雲端。〔生〕欣此夕配嬋娟。〔行禮介〕永昌將酒過來。待我奉媒人一盃。

〔錦堂月〕天結良緣。花凝瑞靄。佳期正當冰泮。歌動迎仙。聲嫋鳳簫鸞管。幸藍橋玉杵先投。信月書赤繩難換。〔合〕鸞盃滿。喜花燭良宵。洞房春煥。

〔前腔〕〔生〕欣看射雀屏寬。乘龍褥軟。于飛願效雙鴛。窈窕河洲。不信羨鵲橋期遠。伉儷處可詠桃夭。警戒時何妨機斷。〔合前〕

〔前腔〕〔旦〕繾綣合巹情歡。同心帶綰。難禁喜溢眉端。燕爾綢繆。自愧德容疎短。鴛蘿附千歲喬枝。琴瑟遂百年深願。〔合前〕

〔前腔〕〔丑〕堪觀金蕊仙冠。霞帔文鳳襖。華堂翠繞珠攢。香裊金爐。繡幌暗風輕卷。更須誇蘭玉祥開。何必慮熊羆占綬。〔合前〕

〔醉翁子〕〔生〕仙伴乍邂逅。交輸愛款笑。莫雨陽臺暗成姻眷。〔旦〕不玩共舉案齊眉。孟耀梁鴻德兩完。〔合〕相慶處。看高燭紅妝。漏傳宵半。

〔前腔〕〔丑〕聽勸戀鳳綢。豈爲美算。向螢閣研究。蠹篇殘卷。〔外〕惟願早離卻樊籠。奮翮層霄。筵羽鶴。〔合前〕

〔僥僥令〕〔生〕絲紅牽玉腕。帳果撒金盤。〔旦〕惟願小登科後。勤書史。及早大登科。作狀元。

〔前腔〕〔丑〕儀容真婉孌。閨闈永團圓。〔外〕但願你百歲夫妻長好。比翼共連枝。無異般。

〔尾聲〕洞房此夜春光滿。熒熒燭尖花燠。總不如浪喜閒懽。

洞房春色勝仙窩。

花燭良宵喜氣多。

衾浪不如桃浪煥。

小登科後大登科。

第三齣 詩禮趨庭

〔菊花新〕〔小生上〕學通經術性非愚。九萬扶搖翮未舒。□□惜居諸。春到忽索幽緒。笑殺多情空馳想。巫□□六。奈裴航分淺。藍橋路鞠。寂寞嫌聞更漏永。朦朧獨抱寒衾宿。醒來時強起撥琵琶。相思曲。□斑斑。花滿目。韻交交。鶯囀竹。這繁華媚景。越添情欲。姓字有時標虎榜。洞房今夜燃花燭。料佳人端的在書中。顏如玉。自家姓宋。名祁。字子京。父親宋杞。大哥宋郊。中才之養。有年。科第之登無日。正是未酬扳桂志。早動惜花心。如今春光明媚。想百花亭中。紅紫十分可愛。欲約朋友張子野同去一遊。未知他意下若何。呀。道猶未了。子野早到。

〔前腔〕〔淨〕幾年蹤跡嘆江湖。瀟灑風流人怎如。花錦爛春衢。惹動心猿不住。

〔小生〕先生拜揖。〔淨〕尊兄拜揖。〔小生〕子野兄。柳風扇煥。花日弄晴。不覺青春搖動。欲與老兄郊

亭之樂。未知尊意如何。〔淨〕甚好甚好。聞得今日。令兄請老先生講課程。且待講畢。我與你再商量。

〔小生〕果然父親同家兄來了。〔外〕久爲解組人。暫課讀書史。〔小生〕戲彩樂晨昏。庭趨問詩禮。

〔相見介外〕多謝子野。勸勉小兒。〔淨〕深蒙老先生指教。二位賢契提攜。感之不盡。〔外〕孩兒白日漸飛。青春拋擲。不加苦功。怎慰老懷。過來聽我道。

〔別銀燈〕喜兒曹聰明天賦。莫把青春虛度。潛心靜閉。孫生戶。更須學懸梁刺股。〔合〕詩書端不負儒。讀得到方成丈夫。

〔前腔〕〔生〕守芸窗勞形典故。嘆難留飛鳥馳兔。惜陰肯縱窺園步。向三餘加辛添苦。〔合前〕

〔前腔〕〔小生〕道多岐先由心悟。恥空言力行當務。靈臺莫使纖塵污。希賢聖光昭千古。〔合前〕

〔前腔〕〔淨〕論功名雖由成數。早難道身終韋布。一朝直上青雲路。錦衣還眉揚氣吐。〔合前〕宋兄。還同老先生且開懷再坐片時。不知意下何如。

〔浪淘沙〕〔末〕飛錫起金池。潦倒沙彌。六通五蘊見□迷。身是菩提心不染。道習希夷。自家慧雲和尚是也。妙決神機。兼通相法。聞得許真君觀裏分外清淨。意欲借住一兩個月。

不免徑入則個。〔衆〕長老何來。〔末〕列位先生稽首。貧僧自西竺雲遊到此。欲借觀中暫歇。〔衆〕看書之所。恐長老不便。〔末〕如此告退。〔衆〕請了。〔末〕方纔右邊站的。是一個大貴人。若不說破。怎顯得我的手段。〔衆〕長老如何又轉來。〔末〕貧僧頗知風鑑。適見諸公。俱有貴相。故此奉報一言。〔淨〕你既會相。先相我一相。〔末〕好相好相。文章得第。朝野聞名。〔淨指外介〕此位老先生如何。〔末〕見羣龍而身宜受爵。臥蠶起而子必登朝。〔外〕好相好相。這二位何如。你與他細講一講。〔末相小生介〕

〔玉芙蓉〕先生三停既等齊。五岳相朝起。學堂明承漿。日角眞希。龍睛膽鼻垂珠耳。口若啣丹新月眉。詳鑒察神奇骨奇。實言告。決今科虎榜占高魁。〔淨〕講得妙。講得妙。〔末相生介〕

〔前腔〕天庭忒恁低。地閣那曾偉。準頭偏蘭臺。廷尉俱虧。印堂不滿山根陷。耳反無輪口似吹。詳鑒察頭奇面奇。恐今生虎榜姓難題。〔淨〕胡說胡說。天下豈有如

此文學而不登科者。請出去。請出去。〔末〕今朝從汝怒。他日信吾言。〔下外〕孩兒。相雖如此。但相書

亦有骨法旋生。形容忽變之說。不可拘于一定。失修人事。〔生〕謹尊教言。不敢違命。

相法從來不可信。

重瞳項羽重瞳舜。

書生若要掇高科。

只消功夫窗下盡。

第四齣 瓊英入宮

〔丑上〕〔如夢令〕睡起幽閨寒悄。送到流鶯聲巧。閒倚畫闌干。忽見海棠開了。春曉。春曉。點點春愁不少。自家乃是鄭參政家侍兒絲鬟是也。俺老爹與夫人雖則十分和順。不曾有子。止生小姐。喚名瓊英。儀容美豔。真個芙蓉如面。柳如眉。體度幽閒。果然秋水爲神。玉爲骨。分明天上神仙。壓盡人間窈窕。今日夫人着我攜酒到後花園賞玩。酒已完備。不免先去等候則個。

〔唐多令〕〔末淨〕花柳愛初濃。相攜入綺叢。〔占〕小鶯雙轉綠楊風。喚醒幽窗獨夢。〔合〕當媚景。樂無窮。〔淨〕春花如繡。春鳥如簧。不飲春酒。辜負春光。只喜一家無事。同到後花園中賞玩片時。卻不是好。〔末〕我意正欲如此。可將酒過來。

〔畫眉籠錦堂〕春染萬林紅。春鳥嚶嚶隔花弄。看遊絲千縷。裊裊春空。金勒馬

春陌交馳。玉樓人春盃頻送。〔合〕春光湧。但花下高歌。賞春懽哄。

〔錦堂觀畫序〕〔淨〕畫永。春日融融。春風冉冉。春香遍滿房櫳。望裏春山。一點
髻螺青擁。濯錦愛水。暎春塘。拾翠喜芳鋪春隴。〔合〕大家莫惜春筵醉。世事短
如春夢。

〔黃鶯穿皂袍〕〔占〕春困釧金鬆。試春衣步檻東。春愁暗壓雙眉重。春牽意慵。
春薰臉濃。春枝髻觸。搖金鳳。〔合〕娟娟戲蝶。春蘭幾叢。茫茫歸雁。春雲幾重。桃
花爛熳迷春洞。

〔皂袍罩黃鶯〕〔丑〕慢道春憂無。被春工醞釀。生滿胸中。傷春倦吐繡窗絨。尋
春轉覺芳心動。〔合〕對春風。春園暢飲。和氣盎春容。〔外〕稟老爹與夫人知道。新皇帝

卽位。詔取民間女子。十五歲以上者。入宮爲妃。里老將小姐報在本縣。縣官催督赴京。今日就要起
程。如何是好。〔末〕我老年無子。止有此女。指望靠養終身。誰知遭此大變。卻不苦殺我也。〔淨〕天那。
我這一塊肉。進宮去了。此生怎能勾再見他。如何捨得。卻不痛殺我也。〔占〕爹爹母親撫養孩兒一

十六歲。昊天恩德。未能報答。況又上無兄。下無弟。老年誰倚。孩兒寧死。不忍去也。〔外〕說那裏話。朝廷詔旨。誰敢故違。請小姐就此起程。

〔尾犯序〕〔占〕聞詔入深宮。不覺魂驚。怎當心恐。粗醜形骸。枉教奉事飛龍。傷痛。最苦是椿庭影隻。最苦是萱闈命窮。生離別。肝腸刺斷。血淚灑珠紅。

〔前腔〕〔末〕誰知天降這災凶。萬計難成。千謀難用。我兩口孤單。況衰年近終。煢煢誰與我承懽。曉莫誰與我溫存。夏冬思量起。衣襟淚滿。哭響遶蒼穹。

〔前腔〕〔淨〕痛刀割衰衷。欲見汝身。除是宵夢。萬里天門。那更音信難通。悲痛。再不見燈前喚語。再不見花邊笑哄。傷情處。區區隻女。一旦兩西東。

〔前腔〕〔丑〕天然飛燕容。早離塵閨。竟入仙洞。我□□蒙恩。恨分別匆匆。珍重。定知你龍幃賜寢。定知你椒房得寵。登程去。情難回首。分付與東風。〔外〕官夫轎馬。在外伺候多時了。請小姐即便登程。

〔鷓鴣天〕〔合〕骨肉團團樂正濃。一封丹詔實相從。恩承淑女榮非願。愛割雙

親恨怎窮。〔占下末淨丑〕何日裏再相逢。淚痕遍染杜鵑紅。歸家枉自高聲。那得聞到九重。〔並下〕

第五齣 花亭佳偶

〔粉蝶兒〕〔小旦上〕繡閣晴春。林啼動人幽鳥。見遊車正滿東郊。趁芳辰。偕女伴。緩尋芳草。看無邊光景。真如瑤島。奴家董氏。喚名青霞。籍係教坊。住居熙寧巷。如今春色暄妍。遊人如蟻。欲偕鶴仙姐姐同往郊外踏青。未知他意下若何。姐姐有請。〔旦〕妬容嫌豔蕊。喚夢惱流鶯。妹子。你請我出來做甚。〔小旦〕花柳爭春。芳心忽動。意欲踏青一回。望姐姐攜帶則個。〔旦〕正合我意。就請同行。〔小旦〕春鴻快備酒尊食壘。隨我郊外去。〔內應介〕來了來了。

〔駐雲飛〕〔旦〕堪賞花朝。花滿園林春色饒。人惜花□耀。花愛人年少。嚙。花出畫牆高。賣花聲叫。聊整花鈿。拾翠花間道。香逐花衫幾陣飄。香逐花衫幾陣飄。〔丑〕綺羅叢裏奔趨。面無媿色。花月場中應接。身有餘香。酒尊食壘在此。請二位姐姐以草爲茵。坐飲幾盃。〔小旦〕將酒過來。

〔前腔〕燕語花梢。花底黃鸝聲更嬌。蜂引花顏笑。蝶蹴花心倒。花覆苑東橋。花溪晴照。紫幔花亭。人擁花驄到。風煖花村酒旆招。〔丑〕前面賣酒家。遊人濟濟。不要去。且到百花亭中歌舞一回。再飲幾盃。卻不是好。〔二旦〕說得是。

〔前腔〕花萼輕搖。一曲花歌百悶消。花簇銀臺巧。花映金樽好。花下舞纖腰。花香縹緲。花徑塵芳。淺印花鞋小。斜插花枝鬢欲燒。〔丑〕二位姐姐請坐。待春鴻也遞一盃。

〔前腔〕花檻紅雕。花倚嬋娟畫怎描。花外遊絲嫋。花際輕烟繞。花事正妖嬈。看花須早。轉眼花殘。花貌隨春老。鎮日尋花莫憚勞。呀。你看前面有二位秀才來了。都像光棍兒。若還撞着他。一定做出事來。不如回去了罷。〔並下〕

〔忒忒令〕〔淨〕遲日照江山錦膩。花柳壓歌臺舞地。芳草踏寶馬並嘶。金勒轉香堤。遙望見杏花村青青酒旗。自家張子野是也。風月襟懷。江湖蹤跡。得蒙宋子京兄弟十分青目。昨日子京約我到百花亭中賞玩。不免先去候他則個。

〔園林好〕〔小生〕看殘紅流出小溪。聽柳外笙歌鼎沸。攘攘蜂遊蝶戲。〔旦丑占〕細數落花因坐久。緩尋芳草得歸遲。〔丑〕姐姐。回去罷了。〔小生〕紅紫樹映羅衣。俊多嬌何處。俊多嬌何處。昨日相約子野遊春。迤邐行來。不見子野。見此甚妙。〔淨〕子京來何莫也。小生料昨日老兄之約不爽。今日之興必高。〔撞見二旦介〕

〔前腔〕紛雜地豈免忸怩。〔丑〕你既然害羞。怎不迴避。〔旦〕窄徑裏相逢。怎避。只索將小扇輕羅遮蔽。〔淨〕顧盼處自猜疑。卻元來是錦花叢雙豔。錦花叢雙豔。子京。你道是誰。〔小生〕是誰。〔淨〕這是熙寧巷妓者董鶴仙董青霞。〔小生〕老兄如何認得。〔淨〕我與鶴仙薄交。青霞就是鶴仙的妹子。〔小生〕既如此。近前相見。〔旦〕呀。張相公。因何久不下顧。〔淨〕我被大宋拘管看書。故此少拜。〔占〕張姐夫。不敢動問。此位相公上姓。〔淨〕此位姓宋。字子京便是。〔占〕久聞久聞。〔小生〕老兄令翠固佳。青霞更覺可愛。〔淨〕愛他則甚。

〔皂羅袍〕〔小生〕堪愛月眉雲鬢。儘婷婷嫋嫋。整整齊齊。溫香軟玉。世應稀。柔枝嫩葉。誰能比。〔淨〕你還不知他能歌能舞。我曾見他。纖腰柳舞。翠裙影低。嬌喉鶯轉。

陽春調低。謾誇西子多嬌麗。〔末〕酒後看花情不厭。花前酌酒興無涯。小相公着我整備壺觴。到百花亭上。此間正是稟相公。酒殺已完備在此。〔小生〕來得恰好。老兄。我欲屈留令翠。同樂片時何如。〔淨〕使得使得。〔占〕轉身介。我心下十分愛他。他既相留。怎不應允。〔對介〕多感相公厚意。只恐雀隨鳳隊。多謝多謝。〔小生〕世上有這般女子。真天香國色也。但可惜落在烟花。無計與之配耳。〔淨〕作配不可。暫配不難。今夜包你與青霞歡會一宵。〔小生〕如此可喜。

〔江兒水〕〔小生〕邂逅花前飲。忙成月下期。傳盃未了先留意。〔淨〕子京。你歡喜極矣。〔小生〕郊玩淑景。歡已十分。途遇佳人。喜當百倍。歡喜冤家添歡喜。〔淨〕好似魚得了水一般。〔小生〕如魚得水猶難擬。〔淨〕燕爾新婚。如兄如弟。〔小生〕謾說如兄如弟。正是有緣千里能相會。夙世緣深相會那拘千里。〔旦〕妹子。我問你。宋相公有何奇美。一見留情。

〔皂羅袍〕〔占〕最喜劉郎風味。況身呈文彩。口吐珠璣。登雲會上廣寒梯。攀龍定陟承明陛。輝輝靈鳳。儀容鬪奇。煌煌雲錦。文章耀奇。除非是題橋司馬才堪

儷〔小生醉介丑〕相公可放尊重些。

〔川撥棹〕〔小生〕俏一似薛瓊英輕豔體。不由人羨風情一霎起。〔淨〕又何須待月西廂。又何須待月西廂。玉樹交鸞一任栖。〔小生〕花柳之地。君子不遊。〔淨〕那有此說。人生適意花爲最。萬物怡情酒是魁。醉青樓日已西。好良宵樂正宜。你兩人今夜呵。

〔嘉慶子〕一刻千金應不抵。鳳幃中恩重情迷。〔小生〕覷着他千般旖旎。撇卻韋編甘不理。莫說我宋子京。便是鐵樣人心神必移。石樣人心魂暗飛。

〔尾聲〕烟花幸託青雲器。願作百年深計。只恐飛騰嘆別離。

烟花莫例看。

棘逕有芳草。

不畏人見譏。

只恐天易曉。

第六齣 風月青樓

〔出隊子〕〔小生上〕風情萬種。一宿鴛幃愛已濃。〔占〕蒹葭倚玉喜濃濃。從此青樓價不同。〔合〕惟願雙心有始有終。〔小生〕青霞。你知道我鍾情于你麼。決然要與你爲配。

〔占〕相公間世奇才。奴家污泥賤質。安敢望此。〔小生〕不必過謙。我若負心。有如此日。〔占〕多蒙相公不棄。情願倚以終身。若再他權。有如此日。〔丑〕姐姐。你嫁得宋相公成。希帶春鴻做個丫鬟。早晚沾些風月。〔笑介占〕休得胡說。將酒過來。

〔排歌〕〔小生〕麗曲瑤箏。春纖玉鍾。嫣然一朵芙蓉。紫綃蕩漾錦花叢。一種天香度暗風。眉分翠。臉暈紅。笑深微汗溼酥胸。輕盈態。窈窕容。恍疑仙子下瑤空。〔占〕我想夜來呵。

〔前腔〕鳳臂輕翻。雲鬢半鬆。紗廚月色朦朧。有緣千里喜相逢。春滿陽臺一夢中。歡初合。話未終。惱情偏是五更鐘。交恩厚。設誓重。天長地久此心同。〔淨〕酒不醉人人自醉。色不迷人人自迷。宋子京貪戀青霞。頓忘學業。早間請我花前同酌。此間已是門首。不免進去則個。〔見介淨〕子京賀喜。〔小生〕休得取笑。〔淨〕不是取笑。古人遇絕色則喜。我看你表子青霞。

〔前腔〕柳暗雕闌。花明綺櫺。嬋娟共鬪纖濃。玉階低露鳳鞋弓。妙舞霓裳小院

東環鉤玉帶。綰絨時。平歌扇撲遊蜂。心非蕩。性更聰。秋波回處惹情濃。〔小生〕老兄說之不差。青霞之美。真個不亞西施。〔淨〕可比那一個古人。

〔前腔〕賈女香芬。崔娘韻工。王嬙獨抱奇衷。綠珠金谷夜溶溶。洛浦神妃露淺蹤。脂輕抹。粉薄籠。梅妝不減壽陽宮。波沈鯉。漢落鴻。當壚空羨卓臨邛。〔末〕快心時忙下手。得意處早回頭。俺小相公昨日到熙寧巷去。不見回來。大相公已知道了。心裏不喜。不免將大相公的言語。勸他回去讀書。省得後患。此間已是他家門首。不免徑入則個。〔小生〕永昌。你來做甚麼。〔末〕大相公請你回去。〔小生〕大相公怎麼說。〔末〕大相公說道。

〔洞仙歌〕乘春好用功。學飽身定榮。繼晷及焚膏。莫教一刻慵。〔合〕休把欲心縱。須將黃卷攻。流連花錦叢。識者必不重。〔小生〕永昌回去。我與張相公就來了。〔末〕謹奉主言。速離妓館。〔下占〕相公當真去了。

〔前腔〕相離不可從。言苦鬱在胸。從此泣空閨。甚日爲悅已容。〔合前旦上〕相逢忽相別。歡處又成悲。二位相公。何不再耍一兩日去。

〔前腔〕人生若夢中。浙景駒隙同。少壯不舒懷。等閒成皓翁。〔合前小生〕就此告別。

〔占〕相公須尋便再來走遭。休忘盟誓。〔小生〕不須多囑。

鴛情繾綣恨相離。

泪灑東風溼舞衣。

自恨劉郎仙分薄。

武陵深處不須歸。

〔貼旦弔場〕姐姐。妹子有句話兒。要對你說。〔旦〕但說不妨。〔占〕相公再三設盟。定要娶我爲妻。

〔旦〕你好癡呵。

〔桂枝香〕鴛盟空訂。鸞期難定。妹子。你休怪我說。生成陌路姻緣。養就烟花心性。

況青樓望卑。況青樓望卑。良家難聘。〔占〕宋相公說娶我。〔旦〕好不知事。酒中之言。一時

戲謔之語。怎麼認真。謔辭休聽。細評論。不如風月生涯好。只怕從良福分輕。

〔前腔〕〔占〕佳緣堪慶。多才可敬。生來一種真誠。事有十分僥倖。記慇懃誓言。

記慇懃誓言。教我脫逃陷穽。超離邪境。喜難勝。定歸金屋偕婚媾。不向平康管

送迎。

〔大趺鼓〕〔旦〕伊家見不明。金籠怎養野鷺山鶯。空房猿鎖心猶競。棍中景復亂宣平。縱不如此。也只做得個玉簫。要嫁韋皋直等再生。

〔前腔〕〔占〕何須抵死爭。錦營花陣斷不留情。雲蹤早散陽臺境。喬妝甘謝效釵荆。那宋相公決然娶我。休論王魁不娶桂英。

且了烟花債。

慵登歌舞樓。

偶多真可樂。

心異不相謀。

第七齣 久旱祈神

〔鳳皇閣〕〔外上〕千尋海殿熟睡蛟龍難喚。積薪剪爪踵前賢。爭奈甕兒頻見。白檀焚獻怪舉首青天湛然。下官乃雍丘令是也。天旱日久。百姓憂愁。欲率概縣里老。前去

城隍廟祈雨。昨日已出告示。這時父老不見到。〔淨〕父老見。〔外〕父老聽我道。多時不雨。皆我不職之過。詩云。旱既太甚。如炎如焚。今日乃遭此毒。聞得城隍廟與許真君觀裏十分靈應。你們在此祈禱。倘得甘霖大降。庶使秋成有望。衆意何如。〔衆〕小的意下正欲如此。父母老爺爲國爲民。敢不順

命。此間是城隍廟。那壁廂是許真君廟。

〔駐馬聽〕〔外〕陽夏驕愆。四野佳禾若火燃。岩除瀑布。陌起黃埃。澗絕流泉。湖心魚鱉總枯連。民生狼顧歌雲漢。〔合〕拜告神天。願早施霖雨。使我三農懼怯。〔前腔〕〔衆〕亢旱經年。雩祭桑林意總虔。純犧濯濯。文壁煌煌。屢舞仙仙。槐齋蓬麩命難延。霓壇玄寺祈應遍。〔合前衆贊曰〕衛文零雨于星車。裴寬消旱于入境。老爺這樣虔誠。上蒼必然感應。〔外〕父老每且回。明日還用祈禱之術。再向禱告。務要虔誠。不許怠慢。〔衆〕領鈞旨。

烈焰當天怨祝融。

幾回翹首望雲從。

臣民徒有桑林禱。

萬物焦枯四野空。

第八齣 喜逢甘雨

〔牽地錦襠〕〔末上〕苦逢炎日禍嘉苗。有滄垂祥德所招。黎元此際笑聲高。喜雨亭中醉玉醪。下官雍丘二尹是也。昨日堂尊祈雨。十分虔誠感應。今得一番霖雨。百姓每喜不

自勝。下官忝爲同僚。逢此勝事。不免整備酒禮。前去慶賀則個。〔外上〕

〔前腔〕爲民祈雨。怎辭勞。幸得甘霖沛九霄。不須術用土龍妖。竟夕滂沱喜自

饒。〔末〕堂尊祈雨有感。賀喜賀喜。〔外〕天降時雨。乃聖主之德。亦生民之福也。長官之賀。決不敢當。

〔末〕說那裏話。久旱逢甘雨。此是人間第一喜事。爲此備酌。望堂尊少坐片時。〔外〕旣蒙厚意。敢不

趨命。〔生上〕芹水生涯淡。鬢宮道味長。不才難盡職。時雨降禎祥。雍丘儒學教官是也。中堂祈雨有

感。同僚置酒稱賀。特請下官陪宴。不免竟入則個。〔外〕有勞光降。〔生〕夜來一雨。泮沼汪波。禮當拜

賀。〔外〕天雨適然。慚愧慚愧。〔末〕將酒過來。

〔山花子〕香車聲破江門曉。雲端一瀉天瓢。沛人間。盆傾下浚。八荒洗盡。燄燄敲

〔合〕望長空。燭龍燄消。長驅旱魃。師碧濤。黎元踴躍歌歲饒。不負桑林拜禱

勤勞。

〔前腔〕〔外〕田禾頓覺回枯槁。綠痕漸滿南郊。喜三農功閒桔槔。絕勝汪玉瓊

瑤。〔合前〕大人再勸一盃喜酒。今日開懷一樂。〔生〕

〔前腔〕蛟龍勢豪。一躍天池表。涼生閭闔。輕颺羨蘇亭佳香。你須知傅相才高。
〔合前〕

〔前腔〕〔淨丑〕芙蓉翠嬌。細浪翻魚沼。仙娃欲泛蘭橈。最堪誇吞赤坎。還符萍
實童謠。〔合前〕

〔紅繡鞋〕〔衆〕碧波湧出仙橋。仙橋滄江蕩漾魚舫。魚舫溪沒渡。海添潮。鷗競
浴。鯉爭拋。人藹藹樂陶陶。

〔尾聲〕玄冥已報豐年兆。對酒且開懷抱。醉聽前村喜雨謠。

久旱逢甘雨。

人心喜不勝。

絃歌喧萬戶。

偃室有□□。

第九齣 竹橋渡蟻

〔生上〕久旱逢甘雨。歡聲四野同。深期歌盛事。擲管句難工。宋郊忝充雍丘縣庠生。俺縣主至誠格
感。祈雨有功。通學生員皆去躬賀。俺欲撰喜雨詩一章以頌之。奈無佳思。不免到碧玉臺上散步。以

啓吟興。多少是好。

〔鎖南枝〕一雨霽。萬象奇。山青水明如畫裏。拋卷覓新詩。窺園適幽意。苔紫短。屐緩移。碧霞臺。少人至。臺上人跡杳然。轉敗吾興。不如那亭西竹邊。儘有幽趣。

〔前腔〕叢竹畔。曲檻西。呀。一陣陣水上浮來的。是甚麼東西。〔看介〕咳。原來是螻蟻。驚看溜渠浮亂蟻。笑穴已無依。隨流竟何止。心不忍。計怎施。手援之。豈能濟。這許多螻蟻落在水中。如何得活。可傷可傷。惻隱之心。仁之端也。其事雖微。性命則一。不免將那壁廂枯竹數根。着永昌破開。編成小橋。渡過他去。庶得全生。永昌那裏。〔末〕命犯奴星照。身憑主令行。相公有何分付。〔生〕永昌。你看這數十萬螻蟻爲水所漂。你可將枯竹破開。造橋渡他。亦是你的陰隲。

〔前腔〕編竹第。架水涯。〔末〕相公。這許多螻蟻都渡過去了。〔生〕可喜可喜。慈渡一成爭渡起。〔末〕大丈夫當濟天下溺。救了這些螻蟻。非是兒戲的。觸物動天機。從權豈兒戲。〔末〕

相公。他一向安身在那裏。如今還到得舊處去麼。〔生〕南柯郡。舊事非。覓檀蘿。亦無地。〔末〕相公。天地間蟲兒千千萬萬。遭陷害者不知多少。都要這般救他。沒有許多氣力。〔生〕你不曉

得聽我道來。

〔前腔〕蟲非少。蟻最多。君臣凜然明大禮。遭溺已頻危。全生實堪喜。大塊內。道不私。物皆春。此心慰。

活蟻功雖細。

真能種福田。

世間陰隲事。

救命最爲先。

第十齣 天佑陰功

〔點絳脣〕〔外上〕羽蓋遙飛。琅函淨啓。叢霞裏。香籠玉几。侍衛玄虛璽。小道許真君是也。自幸一門之積德。盡超八極以登天。常跨鶴而乘虬。暫化牛而斬蜃。玉帝有旨。今日糾察人間善惡。不免着判官小鬼查考的實。奏請報應。判官小鬼何在。〔判官上外〕聽吾分付。今日玉帝有旨。糾察人間善惡。可會雍丘縣城隍。并各土地竈神。將邑內善惡。一一核實奏報請旨。〔鬼上〕正是人間私語。天聞若雷。稟上聖。何爲善。何爲不善。〔外〕但見盡忠報國。孝親敬兄。放生救命。皆是善人。但有貪賊壞法官吏。忤逆兒男。害人利己。好殺傷生。皆是惡人。〔鬼〕有等職官貪賊誣陷賢能者。當

得何報。〔外〕此輩合赴湯池。令毒蛇吞噬。以罰其身。眼前之報。男盜女娼。滅門絕戶。日後之報。〔鬼〕有等殺猪宰牛。大秤小斗。欺瞞害人者。當以何報。〔外〕此輩合赴刀山劍樹。托生駒狗之類。以顯冥司地府。神聖昭彰。〔衆念〕九天應元雷聲普化天尊。〔鬼〕吾口不是別神。雍丘縣日巡鬼使是也。奉城隍靈牌。在此伺候。遠遠望見聖駕前來。不免且自退後。

〔點絳脣〕〔城隍上〕位冠千祇。符分百里。尊天紀。陰靈無比。應感皆真理。〔相見介〕萬聖森羅。飛鸞遙唱。想是玉帝降臨。不免向前迎接則個。〔玉帝上〕

〔神仗兒〕祥雲旖旎。祥雲旖旎。衆真朝禮。稟上聖。小臣迎接來遲。望乞恕罪。〔玉〕起去。遍三千界裏。較察中生臧否。吉士加禎。惡人降毀。〔城隍〕遵勅命。敢輕違。臣等有事奏上。

〔滴溜子〕宋郊的。宋郊的。竹橋渡蟻。人世上。人世上。慈祥怎比。如此陰功有幾。神霄乞鑒知。特令受祉。〔玉〕宋郊有此陰功。合當榮顯。連中三元。顯榮數紀。

〔神仗兒〕〔陣〕微臣奏啓。微臣奏啓。先承玄祉。道宋郊當餓死。不許餐甘服綺。

因此生成骨相甚鄙。今注福。怎生移。〔玉〕宋郊命分該貧寒。既有陰功。今夜三更時分。製取真魂。將他的形骸骨格盡皆換了。以享福壽康寧則個。〔外〕

〔滴溜子〕臣欽奉。臣欽奉。玄元勅委。顯神通。顯神通。回形變體。頃刻天庭高起。兼令衆相齊。福基盡美。〔隲〕臣奏上聖。今科狀元。該是宋祁。如何是宋郊。又中狀元。〔玉〕宋祁正數該中狀元。待他先上榜了。后待陰隲星換榜。宋郊升作狀元。以報陰隲。〔隲〕謹尊上命。迭中狀元。兄弟竝喜。

上帝從來鑒察。

世人切莫心欺。

善惡到頭定報。

只爭來早來遲。

第十一齣 鸞儔賞夏

〔絳都春〕〔生上〕池荷展葉聽高枝。午蟬奏風聲咽。石竹花香。白玉欄干絲樹遮。新篁漸長。琅玕節。更樓畔海榴醉纈。數聲漁笛。木蘭船上。採蓮歌接。人皆惜春豔。我愛夏日長。倚風引壺酌。勝對桃李芳。宋郊連日遍身疼痛。不知何故。況容貌比前不同。未知是

禍是福。正是順理行將去。從天降付來。俺父親往玄真觀裏燒香去了。兄弟在外讀書未回。止我夫妻二人。并一家老小在舍。當此炎景。不免備酒池亭。玩賞則個。紅香翠豔何在。〔紅翠上〕紅香香莫比。翠豔豔無雙。豔舞花前軟。香偷月下忙。相公叫我二人到池亭上。有何分付。〔生〕今日清閒。欲與大娘在此玩賞。可整酒肴。聽候歌舞。就請大娘出來。〔紅翠〕理會得。

〔出隊子〕〔旦〕朱明時節。覽物令人心意說。薰風翻動翠裙褶。嬌面斜遮紈扇。潔。〔紅翠〕扯落庭花嫩紅一捻。〔生〕娘子。晝長無事。共賞荷亭。卻不是好。〔旦〕敢不從命。〔生〕將酒過來。

〔女冠子〕階除簇簇錦葵列。亂採遊蜂。鬪飛輕蝶。蕉樹抽長鬣。微朵綻紅頰。看前湖兩閒鷗隨畫楫。翠巍巍柳陰中老黃鶯弄舌。

〔滴金子〕〔旦〕情偕鳳侶相和切。看取同心新帶結。相攜共賞歡意奢。謾收了針線帖。〔生〕白雲精舍裏。景致還好。同去那邊一賞則個。〔旦〕細鈿穩貼。步忙移。忽驚環珮。跌。薜蘿徑斜。短蔓擗衣似拽。〔紅翠〕此間就是白雲精舍。

〔畫眉序〕〔生〕幽尋到精舍。雲母屏間水簾設。愛如年長日。笑霏玉屑。引狂興。酒罈頻斟。消渴吻一盃交啜。更誇那畫堂中滿品題筆走龍蛇。〔紅翠〕難得大娘出來。這幾處亭閣。請都過一過。〔生〕甚好。

〔啄木兒〕歷風亭。臨水榭。向冰山盡觀遍閱。既然有琴在此。試彈一曲到好。細撫瑤琴將心事寫。難得個兩情恰。比翼鸚鵡不爭些。連理芳枝相似者。到底團圓不差別。願地久天長。懽永協。

〔三段子〕〔旦〕嵐橫靄疊。天色已晚。回去了罷。〔生〕興猶未盡。向斜陽歸未決。〔旦〕歌殘舞怯。〔紅翠〕收拾回去則個。對芳辰情怎捨。移到小樓上。對月再酌。湘簾半揭。柳梢新上一鉤月。〔旦〕見流鶯亂飛郊野。一點雙明星亮晰。

〔鬪雙雞〕〔紅翠〕水沈香。水沈香金猊添爇。玉簫聲。玉簫聲彩鸞吹徹。薄袂露珠沾惹。翹首看玉繩低越。悄不覺金井上轆轤聲滅。〔旦〕夜闌人靜。回去了罷。〔生〕再

飲幾盃。

〔上小樓〕〔旦〕差迭青春易謝。案頭書難暫撇。韋編宣聖也曾絕。自□三餘當足直。恁放意遊野。

〔鮑老催〕〔生〕文章萬卷俱玩涉。莫辜負好良夜。望銀漢廣寒闕。桂枝高料應折。情深伉儷歡未歇。莫管更籌徹。〔合〕思之歎嗟。百年身如電掣。涼冷變炎熱。熱去又寒冽。光陰迅休計拙。一日鬢堆雪。懊恨對誰說。

〔尾聲〕得高歌處歌休歇。喜盃中玉漿不竭。娘子這等懽樂呵。拚得今朝沉醉也。

夫婦情和合。

開尊夏賞荷。

人生貴行樂。

對酒且高歌。

第十一齣 椿庭慶壽

〔齊天樂〕〔生上〕碧山院落紅塵迴。萬竹琅玕翠吟。滿院荷香壓葵影。信是人間佳景。〔小生〕極星耿耿。共酌酒娛親。戲彩趨庭。〔合〕默禱蒼穹。願年年此日慶長生。〔生〕兄弟。今日是爹爹壽誕。酒已完備。請爹爹上堂稱慶。也是人子至情。〔小生〕正是。待嫂嫂

出來。一齊拜祝。

〔花心動〕〔旦〕瑞應誕辰。出妝臺早喜壽筵開整。香護鮫綃。翠點花鈿。堂前敬捧霞觥。〔紅翠上〕玉喉嘹唳。冰肌靚。歌舞處不減雙成。〔合〕這歡樂萬兩黃金難並。〔紅翠〕稟相公。酒肴絃管都齊備了。〔生〕爹爹有請。

〔寶鼎兒〕〔外〕幾年雲臥。不覺鏡裏霜痕滿頂。期鶴算謾吞石髓。保童顏何煩丹鼎。最喜森森雙桂。雲路翱翔可等。〔合〕看綺席羅衣。恍疑身在瑤池仙境。〔生〕

爹爹壽登八旬。誕當三伏。孩兒備下一盃酒。與爹媽慶壽則個。〔外〕如此將酒過來。

〔畫眉序〕槐夏壽筵清。瀲灩金尊紫霞冷。看星輝南極。地接蓬瀛。輕風送十里荷香。舞鶴亂半簾松影。〔合〕滿門齊赴蟠桃宴。人人共祝長生。

〔前腔〕〔旦〕纖手細調冰。棗列安期玉漿冷。看麟脂案疊。鳳髓盤盈。謾誇他九轉丹成。爭看恁雙飛鳥影。〔合前〕

〔前腔〕〔生〕絃管奏新聲。金縷輕歌玉喉冷。看衣翻雲翠。篆裊烟青。波深處蓮

結龜巢。書傳後。竹留鸞影。〔合前〕

〔前腔〕〔外〕金軸映花明。絳炬高燃畫屏冷。看碧筒浮蟻。蒼塵揮蠅。喜庭前桂樹芳陰。愛樓畔棣華繁影。〔合前〕

〔鮑老催〕〔紅翠〕捧觴再慶。懸弧喜當三伏景。翩翩朱履來門徑。聽短簫吹。細管咽。清笳競。爭誇壽域多齊勝。小堂碧映湖千頃。更化列青松嶺。

〔雙聲子〕〔合唱〕盃須罄。盃須罄。論富貴皆前定。懽須競。懽須競。論壽考皆前定。全福盛。全福盛。祝非佞。祝非佞。看雙雙鳳翥。繼沾恩命。

〔尾聲〕魯陽戈何須整。百歲椿枝長秀挺。須信丹臺舊有名。〔外〕外面甚麼喧嚷。想賀客來也。女眷且迴避。〔旦紅翠〕含懽陳俎豆。奉命入房闈。〔並下生〕外面的客是張子野。慧雲長老。〔外〕好客好客。待我出去迎迓。先生請了。

〔掛真兒〕〔淨末〕山斗聲華爭引領。〔外〕請裏面相見則個。〔淨末〕蒙不鄙倒屣懽迎。〔外〕幸遇佳賓。孩兒重開壽席。〔合〕拚取今朝酩酊。〔淨末〕聞知老先生華誕。我二人

特來拜賀。〔外〕多謝多謝。〔末〕好奇怪。好奇怪。這幾日不見公子。如何形容都變了。〔淨〕果然比前不同。還是變得好。變得不好。〔末〕舊時見他骨相欠佳。難許登第。如今天庭高啓。骨格頓異。今科必定中大魁。〔生〕這是胡說了。我得榜上有名也罷了。〔末〕細看來有陰隲紋上面。必然幹些陰德事情在那裏。〔生〕沒有什麼救人活命之事。〔末〕凡天地之間。何必人命爲大。蠕動之物皆是。〔生〕我記得了。數日之前。曾到那碧玉臺西竹邊散步。見有數萬螻蛄。爲暴雨所侵。吾乃戲編竹橋以渡之。〔末〕是了是了。有此陰德。故有此相。〔末〕又看令弟尊相。今科也必登大魁。〔生〕一發胡說了。一科那有兩個狀元。況又在一門。〔末〕吾所言之事。決無差謬。〔淨〕記着。後日不應。將礮石搯你光頭。〔外〕將酒過來。〔生〕有累你。今來賀我老爹壽。你相他還有多少壽。〔外〕先奉了酒。然後看相。

〔賞宮花〕欣逢壽朋。感殷勲祝壽情。壽鹿脚花至。壽鶴向人鳴。〔合〕喜逢壽域樂昇平。滿斟壽酒祝遐齡。〔末〕老先生壽數極高。希夷之數。一百有零。〔淨〕你怎見得。

〔前腔〕〔末〕詳觀壽徵。炯雙瞳壽眼清。壽顏多浮垢。兩耳壽毫生。〔合前〕

〔前腔〕〔淨〕淡淡壽星。壽筵前分外明。人世難逢壽。五福壽先稱。〔合前〕

〔前腔〕〔生〕重斟壽觥。紫金盤壽菓盈。壽燭留長耀。滿眼壽香騰。〔合前〕

五柳堂前啓壽筵。

白頭嚴父散神仙。

天中特厚閒中客。

八十春秋福壽綿。

第十二齣 巧夕宮筵

〔丑上〕星渡銀河月到臺。輕風暗送好香來。龍輿此夜應遊樂。慢把宮門次第開。自家乃是朝中一個小內臣是也。俺奉大宋皇帝聖旨。守把昭陽宮。宮中鄭娘娘。乃是鄭參政之女。數月前選入宮中。仙姿玉色。世上無雙。聖主幼冲。未經巡幸。雖長門之怨。不買賦于相如。而團扇之嗟。更多情于班婕。今日乃七夕良夜。相約劉娘娘乞巧。五鳳樓前預備巧筵。伺候兩位娘娘賞玩則個。

〔秋蕊香〕〔占〕堪愛今宵佳景。雲斷絳河耿耿。〔旦〕七襄聲歇。懽重整。綺席偏妳忻併。鄭娘娘萬福。〔占〕劉娘娘少禮。〔旦〕金盤瓜果御樓前。乞巧無心笑貌妍。〔占〕組織迴文成片錦。何曾得近帝王前。〔旦〕時當七夕。鵲渡銀河。天上人間。良宵第一。〔占〕久虛望幸之恩。聊爲七巧之會。內侍每將酒過來。〔丑〕娘娘。酒斟在此。〔占〕

〔針線箱〕剪西風墜梧金井。見碧天月痕分鏡。跨銀河烏鵲橋填整。信織女牛郎懽慶。幾多少乞巧高樓上。把七孔針穿線色分明。〔合〕真佳景。滿庭瓜果儘。今宵痛飲銀瓶。

〔前腔〕〔旦〕銀燭照畫屏秋冷。羅扇撲流螢不定。愛夜光如水天街淨。金合內蛛絲誰勝。不須向百子池邊去。怎得細說長生殿裏情。〔合前〕

〔解二醒〕〔占〕晚妝殘蘭湯浴暝。麝烟濃翠籠寶鼎。闌杆露溼人猶凭。愁絕處嫩涼生。且黃流鳳翠消良夜。管甚麼絳幘雞人報斷更。〔合〕祈恩幸。縱一年一度。願比雙星。

〔前腔〕〔旦〕芳沼中藕殘香剩。玉砌畔鳴蛩相應。室中記得神光映。如今呵。空腸斷紫鸞笙。浪傳王母青禽至。欲借緱山白鶴乘。〔合前〕

〔尾聲〕笑天孫存凡性。人生凡界怎忘情。爭奈鸞凰幾萬程。

靈匹渡銀河。

人間醉綺羅。

紗廚閒鳳枕。

如此良夜何。

第十四齣 赴試秋闈

〔薄倖〕〔小生上〕涼透筠亭。香殘蓮沼。怕入秋多恨。秋偏到早。有誰知我柔腸斷了。秦樓杳。怎能殼鸞親鳳綰。幾度向蒼天暗禱。自家爲愛青霞之極。百計求權。纔得一宵相聚。別時春莫。今又秋矣。前日見子野說。他要嫁我。不想鴛兒怕他做出事來。移到別處去了。蹤跡茫茫。何時得會。好悶殺人。也。

〔金衣公子〕獨坐悶無聊。淚紛紛溼素袍。冤家鎮日縈懷抱。人如薛濤。情如玉簫。眞誠怎比閒花草。〔合〕好心焦。朱絃已斷。無計續鸞膠。

〔前腔〕雲散楚峯高。望陽臺萬里遙。臨風不覺心如搗。綢繆幾宵。追隨幾朝。情深豈料分離早。〔合前〕

〔琥珀貓兒墜〕星前月下。罰願幾多遭。一旦風波沒下梢。從今空有夢來邀。〔合〕相拋。縱地老天荒。此恨難消。我想青霞此去。老鴛兒決不放他從良了。這也是烟花

業債。不會了得。

〔前腔〕宿冤前業。今世料難逃。準擬來生結鳳交。想應曾把斷香燒。〔合前淨〕槐花黃。舉子忙。宋老先生着我與大宋小宋前去應鄉舉。如今試期已逼。昨日已辭過老先生。約定早間起程。大宋與我先到十里長亭。小宋不知何事未來。想在書館中收拾。不免轉去催促則個。〔小生〕子野請坐。〔淨〕子京。你怎麼如癡如醉。做出這個嘴臉。想是青霞事又發作了。如今去進場。若中得時。任他鸞姿鳳質。自來求配。這樣烟花下賤。一連取他十七八個。也不爲難。想他做甚。我勸你休帶憐香惜玉心。頓忘步月登雲志。〔小生〕子野兄。你不知我心上事。

〔解三醒〕再不見高髻新妝宮樣巧。再不見芍藥庭前笑語嬌。再不見六么細舞紅翻雙袖巧。再不見玉笋銀箏倚醉調。再不見笑奪香囊流汗滿。再不見半揭流酥歌扇搖。〔合〕傷懷抱。恨蒼天何苦。斷我鸞交。〔淨〕須幹大事。莫戀閒情。況令兄等久。作速起程前去。〔小生〕子野兄。我還有一句話兒與你說。

〔前腔〕我爲他罷寢紗廚愁到曉。我爲他懶赴華筵飲玉醪。我爲他焚香暗禱

幾被傍人笑。我爲他兩鬢添絲瘦。沈腰。我爲他雙鴛畫上詩難就。我爲他連理枝頭魂暗消。〔合前淨〕快去快去。天色已晚。前途好尋投宿。

〔香柳娘〕〔小生〕走西風正馬。走西風正馬。夕陽西下。寒鴉古木飛歸絕。且停鞭問也。且停鞭問也。烟暝酒旗斜。行蹤何處歇。〔合〕宿荒村旅舍。宿荒村旅舍。四壁蛩鳴。寒燈半滅。〔小生〕

〔前腔〕聽敲窗敗葉。聽敲窗敗葉。離心如割。夢魂驚動簷前鐵。〔淨〕我壯懷激烈。我壯懷激烈。直上廣寒闕。高將桂枝折。〔合〕漸更籌數徹。漸更籌數徹。起點行裝。忙隨去轍。

莫厭途中味。

成名在此科。

棘闈鏖戰罷。

同聽鹿鳴歌。

第十五齣 月桂同攀

〔水底魚〕〔丑上〕筆戰秋闈。文章官樣奇。朱衣頭點。姓名虎榜題。自家姓李名淑。

開封府儒學生員。今科幸得文章十分稱意。解元穩穩是我了。昨日聞得雍丘二宋。文章甚佳。恐被他奪了我的解元。且到他下處會他一會。宋兄在這裏麼。

〔前腔〕〔生〕心下憂疑功名事。怎期好分筭。瑟得和失總未知。李兄拜揖。〔丑〕列位兄長拜揖。〔淨〕李兄曾有佳兆麼。〔丑〕吉兆頗多。未知可否。明日揭曉。今晚幾更來報。我們今夜怎生睡得着。且點起燭來坐坐罷。天明好喫鹿鳴宴。開榜便見。〔淨〕先生念與我聽。〔丑〕還是老兄先念來。〔生〕斗膽。題目是顏淵。〔衆〕願聞。

〔玉胞肚〕博文約禮。美天姿。一聞十知。心中樂不改。簞瓢猛爲仁。功深克己。仰鑽瞻。忽見何奇。禮樂爲邦萬古依。〔丑〕妙哉妙哉。解元必定是你的。〔生〕疎才淺學。僅免曳白而已。〔丑〕不必太謙。子京兄請念念。〔小生〕小弟題目是曾參。〔衆〕請念念。

〔前腔〕〔小生〕事親養志。孝名兒乾坤永垂。一日裏三省吾身。論爲仁識先弘毅道傳。一貫唯無違。忠恕諄諄解衆疑。〔丑〕妙哉妙哉。不低似令兄佳作。〔淨〕我的題目

是子思。子思作中庸。待我就把中庸來敷衍。

〔前腔〕知幾爲己。致中和位育可期。早須是三近加功。因此上九經敷治。無聲無臭。德淵微。魚躍鳶飛。問化機。〔丑〕主意不差。〔淨〕李兄佳作也。請念一念。〔丑〕小弟題目是孟軻。

〔前腔〕知言養氣。淑諸人願學仲尼。怪當年戰伐縱橫。把王道魏齊交說。巖巖氣象太山齊。性善初開百世迷。〔生〕高中高中。解元無疑。〔外〕天地平如水。龍門日日開。家

無讀書子。官從何處來。小人報喜的便是。雍丘縣宋家兄弟二人都中了。我且到他家報報去。開門開門。〔淨〕想是中了。報喜的來了。〔外〕二位宋相公都中了。第一名解元宋郊。第六名亞魁宋祁。〔衆〕可喜可喜。〔生〕可有一個李相公麼。〔末〕從頭看到尾。並無姓李的。有有有。第三名姓李。叫着李淑。中中了。〔衆〕同喜同喜。〔淨〕快將銀子多多賞他。〔末〕報報報。中了一個張相公。第八名。〔淨〕莫不是張子野。〔末〕是。〔淨〕同年同年。〔外〕請換衣巾。赴鹿鳴宴去。

名聯虎榜樂如仙。

始信姮娥愛少年。

寄與讀書人苦學。

管教平步上青天。

第十六齣 薦榮歡

〔步蟾宮〕〔外上〕膝下雙兒新貴顯。正今日歸來庭院。銀缸華焰鵲聲傳。兆送全家懽忭。

〔前腔〕〔旦〕涼襲羅衣眉黛淺。聞捷後喜添妝面。〔紅翠〕麻衣卻換錦衣旋。早向華堂開宴。〔旦〕公公萬福。〔外〕媳婦。且喜你丈夫與叔都中了。今日榮歸。恐有人來賀。備下些酒席。

〔旦〕酒席已備下了。〔外〕酒席完備。打掃廳前潔淨。

〔玉井蓮〕〔生〕同氣同年。贏得人人忻羨。〔生見父介外〕老夫不求身外事。登科幸有佳兒。

蟾宮扳桂折高枝。書香還有繼。天道豈無知。〔生小生〕十載螢窗今脫迹。爭誇雙鳳聯飛。〔旦〕人生得第未爲奇。要個忠與孝。千古令名垂。〔外〕宋郊聽道。天下許多飽學秀才不得中。你今忝中解元。須當勉脩德業。無負科名。〔生〕謹領命。〔外〕宋祁你過來。舉人進士。非待等閒。立功立德。以垂不朽。纔是吾兒。〔小生〕謹領父教。〔外〕將酒過來。〔末〕酒在此。

〔好事近〕〔生〕一戰勝羣賢。獨占鰲頭高選。金鞍白馬。人人擁道爭看。燈窗幾

年喜今朝得遂男兒願。多因是累代陰功。天贈我一門榮顯。

〔前腔〕〔小生〕滔滔文思湧如泉。更兼學有淵源。風簷寸晷。縱橫禮樂三千身。

遊廣寒。感姮娥親把金盃勸。等閒問丹桂高扳。又還期首登金殿。

〔前腔〕〔外〕爭誇平步上青天。同胞又喜同年。荷衣掛體。何如彩袖翩翩。書香已傳。與燕山並列靈椿傳。分明是平地雙仙。儘贏得舉家懽懽。

〔前腔〕〔旦〕須知麟鳳產中原。扶搖萬里鵬搏。奎光千丈。熒熒直透白垣。歡開玳筵。沸笙歌不忝瑤池宴。看連翩車馬盈門。總不比舊時庭院。〔外〕門首諠譁。想

是賀客來也。小孩兒與媳婦每快去催整筵席。〔生〕設宴非供笑。迎門賀客多。

〔字字雙〕〔丑〕媒婆生得舌頭便。會辨裙紅襖綠忒新鮮。好看。走來走去脚如船。窮健。花紅羊酒眼望穿。罕見。自家喚做高媒婆。幾年前曾與大宋做媒。且喜他兄弟二人

都中了舉。小宋還不會有親。我如今一則去賀喜。二則替小宋做媒。卻不是好。

〔前腔〕〔淨上〕媒婆本是十分全。能幹蓬頭花面嘴搽胭。鬼現。有人請我去登

筵。盛饌。未曾舉筋口流涎。先燕。〔丑〕你做媒婆何這般饞嘴。〔淨〕我爲饞嘴。特特學做媒婆。

〔丑〕我且問你。到此何幹。〔淨〕聞得新科舉人小宋相公。不會有親。特來做媒。〔丑〕這是我的主顧。誰許你搶我的。我與你去見宋老爹去。〔見科〕你兩人到此。有何話說。〔丑〕東鄉季樞密有女。年方一十六歲。聞得小宋相公高中。特着我來說媒。〔淨〕老爹。西鄉金員外有一女。年方一十七歲。未曾婚配。聞得小相公高中。着我來說媒。〔小生〕稟爹爹知道。待孩兒會試後回來。從容議親未晚也。〔外〕也說得是。

這段姻緣真不俗。

赤繩繫定夫婦足。

不勞二嫗來爲媒。

書中有女顏如玉。

第十七齣 親憶瓊英

〔新水令〕〔淨上〕小窗低坐悶無言。掌上珠幾時能見。憶分離花正鮮。到如今雪飛亂。光景頻遷。不由人不傷感。老身鄭參政之妻是也。自從女孩兒入宮之後。朝思暮想。去時春半。今又冬殘。雪飛梅吐。觸物思人。教我好難消遣也。〔丑〕稟夫人知道。早間蒙分付安排酒。

席如今已完備了。〔淨〕既完備。候老爹賞梅回來。一同宴飲慶賞則個。

〔步步嬌〕〔末〕鶴擎溪橋。尋梅遊玩。寒玉枝頭綻。芳姿雪襯妍。瘦影清香。牽引吟情遠。踏雪莫歸來。正紅爐煖閣開佳宴。〔淨〕相公。去年冬賞雪觀梅。與女孩兒同懽同樂。同暢同飲。幾時再能彀一同懽樂。今日景物依然。但不見我瓊英一面。〔末〕夫人。我心更切。但事勢至此。徒悲無益。〔丑〕梅雪爭春可愛。料小姐深居帝宮。自有福慶。不須掛念。且開懷暢飲則個。

〔折桂令〕滿長安柳絮風顛。密灑歌樓。飄溼茶烟。偷閒過三友。前寒枝封遍。一段香傳。飲羊羔金。嬋娟費吟哦。惹動逋仙。地白風寒。休要觸物思人。總不如醉倒芳筵。〔末〕觴未舉。痛淚先流。我孩兒怎曉得這般苦楚呵。〔丑〕你看那人踏雪尋梅。人寒江獨釣。何等逍遙自在。老爹何獨這般苦怨。

〔江兒水〕〔末〕謾說道觀梅屐釣雪船。他胸中不染分離怨。我經年不覩嬌兒面。幾回望斷昭陽殿。杳杳雀釵桂襪。垂老何依。白首蕭條庭院。〔淨〕瓊英我兒。

〔雁兒落〕我爲你痛心腸常挂牽。我爲你惡懷抱難消遣。我爲你夢殘更接舊容。我爲你逢好景添長嘆。我爲你厭喫了珍饈味。我爲你晨夕裏枉熬煎。我爲你害得龐兒瘦。我爲你淚眼幾曾乾。天好與人行方便。若得天也麼憐。放回歸拜謝天。

〔僥僥令〕〔末〕骨肉東西意慘然。知甚日再團圓。莫道寒江深千丈。比我意中悲尤自淺。

〔收江南〕〔淨〕呀。早知道這般隔絕呵。到不如嫁民間。三朝半月見何難。往來會聚定多番。說甚麼榮諧帝嬪。端的是佳人薄命斷親緣。

〔園林好〕〔末〕只愁他長門憤冤。又愁他柔軀病纏。種種思量都遍。杳沒個信音傳。〔淨〕綠鬟。你看外面甚麼人嚷。你去看看。〔丑〕無緣住金屋。馬扁作生涯。自家早爲內官。不想

時乖命蹇。忤犯章獻太娘娘。逐出在外多年。衣食不敷。只得各處設騙。昨日聞得此間有鄭參政一女。喚名瓊英。春間選入宮中。一向杳無消息。夫妻二人日夜悲怨。不免假作宮中出來寄信。騙他一

頓酒食喫。或者有些謝禮。權且將就收下。此間就是他門首。不免徑入。丫鬟煩你通報一聲。〔丑見介末〕內相到舍。有何見諭。〔丑〕鄭娘娘差我來報喜信。〔末〕何喜來報。〔丑〕娘娘德貌雙全。萬歲爺。寵愛之極。十月前册爲美人。特差我來報知。〔末淨〕如此謝天謝地。〔末〕此人面貌張惶。必是假說。只怕沒有此事。〔丑〕此事實的。聽我說娘娘的受用。

〔沽美酒〕芙蓉臺熊夢□牙爲簾臂供眠。翠繞珠圍錦繡聯。鎮日醉百花筵。吹玉笛。奏冰絃。鳳皇樓通宵懽。六宮中人人爭羨。我呵眼見他愛專寵□□仙。呀。且開懷把玉觴頻勸。〔末〕有勞貴客冒雪而來。丫鬟你去整備筵席。〔小旦〕筵席排在煖閣之中。就在□□傳盃弄盞。到有些景趣。如今大雪飄飄。吟詩作賦。何等快樂。稟老爹。酒在此了。

〔丑〕

〔清江引〕乍相逢客主兩交歡。世事休閒管。風裁雪又滿。春透梅花煖。把香醪急釀來休緩。告回了。〔末〕乏物相款。屈留相住數日。〔丑〕娘娘專等回覆。限期緊急。不敢稽遲。

〔末〕去意已決。難以曲留。夫人可取金段二端。銀花一對。奉作謝儀。再將白金二十兩。以爲謝意。

〔淨〕禮物俱在此。〔丑〕不敢受。若是娘娘知道。奴婢該死。〔末〕理之當然。收下收下。

天上元無路。

書傳抵萬金。

承恩自今始。

深慰白頭心。

〔丑弔場〕好笑好笑。正是一日不識羞。三日不忍餓。我只將幾句謊話。說了這樁空頭事體。騙了他許多東西。今日就驟然發跡了也。只怕機關敗露受刑罰。到底方知騙不安。〔下〕

第十八齣 瓊英閨悶

〔霜天曉角〕〔占上〕雙親衰老。夢越關河渺。別久渾無音耗。令人幾度魂消。瑤

花碎舞簷前雪。玉盆脂水紅冰結。寒重嬾梳妝。妝成愁更長。重瞳難見面。枉落梅花片。寂寞苦何勝。

思親雙淚零。瓊英自別雙親。時常懷念。侍奉無由。痛腸如割。〔丑〕無數宮中。年少女。一般花貌不同。

看。稟娘娘知道。今早皇上拜娘娘爲妃。想不久輪到娘娘了。〔占〕休得閒說。〔丑〕各宮娘娘都懂懂。

喜喜。隨時歌動管絃。娘娘獨自悶悶昏昏。逐日淚沾襟溼。不知爲着甚來。〔占〕我心中之事。你怎曉。

得。〔丑〕奴婢也略曉得一二。〔占〕你既曉得。說一番我聽。

〔劉潑帽〕〔丑〕六宮誰比如花貌。冷淒淒苦楚難熬。塵埋玉輦何時到。〔合〕都是五行招。也不用多煩惱。〔占〕你說差了。我心事全不在此。〔丑〕我今番定要說着。

〔前腔〕白雲萬里高堂杳。想晨昏甘旨誰調。風中燭焰應難保。〔合前占〕說得是。言及至此。使我不覺淒然泪下。〔丑〕且免愁煩。奴婢整酒與娘娘解悶則個。〔占〕不必如此。但燒二炷香來。待我告天祈禱雙親壽考。〔丑〕香案已排。奴婢告退。〔占〕上蒼。願我爹娘壽福康寧。遐齡永久。爹娘怎知我在此保佑也。不免把一年受過淒涼。訴與上蒼知道。

〔六犯清音〕長門春靜。昭陽天杳。愁見玉林晴曉。萬紫千紅。教人怎不心焦。眼望羊車過。空傳鳳吹調。拋珠淚。溼鮫綃。鏤金香帶褪。纖腰。怎如得黃鸝對語。絲條上。怎如得粉蝶雙栖。錦樹梢。鸞翹慵整。蛾眉倦描。羞顏卻惹桃花笑。悶無聊。聲調鸚鵡。誤聽是宣朝。

〔前腔〕景當清暑。芙蓉香杳。簾展琅玕青小。齊紈風動。藍烟寶篆輕飄。寂莫悲長晝。炎蒸恨獨宵。情難遣。景自饒。驪珠蕖滿綻。葡萄幾時得。水晶簾畔聽金縷。

幾時得玳瑁筵前賜玉醪。孤辰應犯。愁煩怎逃。五星不遇紅鸞照。六龍遙。薰風殿閣。長日五絃操。

〔前腔〕金鷗輕透。銀蟾光皎。玉宇纖塵凝掃。天街涼夜。冷人不覺魂消。獨坐看牛女。含嬌渡鵲橋。人還隔。意轉寥。謾隨玉女學吹簫。怕聽着嘹嘹。隻雁雲邊淚。怕說着兩兩文鴛沼。內交。黃花初綻。碧梧漸凋。御溝流葉空來到。最難熬。瀟瀟疎雨。隔夜響芭蕉。

〔前腔〕彤雲低罩。嚴天施巧。六出紛飛林杪。玉梅香吐。閒看轉覺情搖。夢短欹孤枕。憂多問六爻。冰衾重。玉漏迢。叮嚀鐵馬鬧風敲。誰憐我心寒。不覺薰籠煖。誰憐我院冷。空將獸炭燒。冤深撮合。佳期望勞。從來不拜承恩詔。幸難僥。新妝飛燕。何處逞妖嬈。

〔尾聲〕芳姿二八幽宮俏。四景盡傷懷抱。唱斷清音天聽高。

第十九齣

催赴春闈

〔謁金門〕〔生上〕疎雨淨。簾外好花開並。骨肉無緣長合併。頓成愁萬頃。〔旦〕淡掃眉妝不整。可嘆鸞鏡分影。此去龍頭獨領。斷腸鴛帳冷。解元准定去了。閨闈之情。誰人不戀。正是成名爲俊傑。割愛是男兒。切莫牽挂奴家。〔生〕娘子言之有理。但情之所鍾。不能自遣耳。不知娘子有何囑付。〔旦〕

〔瑣窗寒〕辦行裝急早趨程。萬里風霜豈慣經。怕難調水土。攝養須精。加餐強飲。時衣煖冷。若成名便還鄉井。〔合〕老天端的不管我離情。枉然雙淚盈盈。

〔前腔〕〔生〕悵青春芳草烟凝。陌上驪駒作意鳴。正鸞儔愛密。一旦遐征。釵分鏡剖。中心耿耿。望看承高堂衰景。〔合前旦〕解元莫恟惶。公公叔叔來了。

〔遶地遊〕〔外〕期催南省。膝下斑衣冷。人未別先成悲哽。〔小生〕春雲厭嶺。行色含愁整。酒欲醒離愁不醒。〔外〕孩兒。春闈催赴。行不宜遲。今日大吉之辰。起程最利。不知行李

收拾完備未曾。〔二生〕行李已收拾完備了。爹爹在堂。孩兒怎生拋捨。〔外〕孩兒。你曉得事君盡忠。卽事親盡孝一般。養體不如養志麼。〔二生〕謹依嚴命。就此拜別。〔外〕看酒。〔末〕消愁惟有酒。逢興

便吟詩。老爹酒在此了。

〔三學士〕〔外〕滿飲金卮送遠行。願汝等早早成名。親闈莫戀斑衣舞。帝里須誇綵仗迎。〔合〕會看天衢雙驥騁。名和姓海內稱。

〔前腔〕〔旦〕辛苦休辭此日行。攜書劍早赴神京。雄才定占春闈選。故里還期書錦榮。〔合前〕

〔前腔〕〔生〕只爲功名勉強行。免不得冷落椿庭。飛騰欲顯趨庭教。定省難違愛日誠。〔合前〕

〔前腔〕〔二生〕千里鶯花得意行。遠迢迢驟馬長征。歡生杏苑春風酒。債了芸窗夜雨燈。〔合前〕

親在遊何遠。

還愁行路難。

更盡一盃酒。

離別何足嘆。

第二十齣 怡情旅邸

〔滿庭芳〕〔生上〕雲斷青山。烟消綠野。離人最怕芳時。鳥啼花落。偏惹客心悲。總有遊絲萬丈。恨無由。絆住遐思。高堂香鸞。閨寂莫。淚向暗風垂。〔小生〕行程何日盡。五雲天闕猶迷。〔淨〕望杏花深處。風蕩酒旗。〔末〕試且開懷一醉。垂柳下暫繫羣驪。〔合〕還期望宴瓊林。胥衣錦。〔相見科淨〕動問尊兄高姓甚表。〔末〕姓孫名奭。〔淨〕久聞。〔末〕二位尊兄高姓甚表。〔生〕姓宋名郊。〔小生〕姓宋名祁。〔末〕二位莫非就是夏安州席上賦落花詩的麼。〔小生〕正是。〔末〕好一句金谷危樓到地香。〔生〕一時杜撰。何足稱誦。〔末〕好一聯將飛更作迴風舞。已落猶成半面妝。〔小生〕亂道。〔淨〕你休要班門弄斧。還有頭號詩人在這裏。〔末〕失問尊兄高姓甚表。〔淨〕姓張名子野。〔末〕三中先生。〔淨〕何故叫我做三中。〔末〕尊兄詞有眼中泪。心中事。意中人之句。以此號爲三中先生。〔小生〕既是就詞取號。何不喚做三影。〔末〕願聞其說。〔小生〕張兄詞最得意是雲破月來花弄影。浮萍斷處見山影。隔牆送過鞦韆影。這三句。所以當喚作三影。〔淨〕三影也不好。我曾有詩云。不須行酒令。任意倒芳樽。你每喚我做令尊。卻不是好。〔末〕我曾記得詩有云。四郊無盜賊。賣劍買耕牛。若依底字得號。該喚做賊牛。〔淨〕正是善戲謔。

兮。如今天色已晚。大家不免躡行幾步。〔生〕既如此。請了。

〔甘州歌〕〔生〕青雲萬里。信英雄足下。自有階梯。春闈催赴。早登程。逐伴奔馳。殘紅遠道家何在。垂白高堂夢不違。〔合〕圖名利。嘆別離。韶華空滿楚江湄。經風臥帶月炊。何時醉賦杏園詩。

〔前腔〕〔小生〕寒窗十載餘。論男兒壯志。豈肯卑栖。門閥須換。幸文章際遇昌期。題名共列黃金榜。獻策同登白玉墀。〔合〕蛟髯奮鳳翅。齊桃花春浪錦鱗飛。龍爲馬。錦作衣。六街爭看狀元歸。

〔前腔〕〔末〕融和日正遲。見園林多少。紫絕紅奇。春光如海。颺晴空落絮沾泥。烟中畫縵衝蘭渚。花外流鶯喚竹枝。〔合〕山連水。路遶溪。馬蹄香印落花泥。莎村杳。野店稀。輕風捲起酒家旗。

〔前腔〕〔淨〕長亭傍水西。見鞦韆紅粉。笑語聲低。遊人如蟻。轉朱輪驀過香堤。陽春不散窮途恨。麗景翻牽故國思。〔合〕魂將斷。心更悲。惱人杜宇隔花啼。催

征旆。瞻帝畿。五雲深處鳳樓迷。

〔尾聲〕行勞倦日暝時。停鞭沽酒不須疑。共醉前村燈下盃。

千里鶯花春正妍。

客懷何事轉淒然。

南宮多士如雲集。

莫讓先生先着鞭。

〔末小生弔場〕熟察尊兄。必妙于風情者。適間家兄在上。不敢細談。途中無以爲樂。同到前樓。紅裙一醉何如。〔末〕正合吾意。〔淨〕你兩人瞞得我好。令兄行路勞倦。後樓上歇息去了。我每且自取樂則個。〔小生〕此間妓女。必無可意者。〔淨〕若要可意。除非是董青霞。〔末〕青霞想是宋兄貴倅。〔淨〕不是甚倅。卻是心肝。店主人安排酒過來。我每唱飲一盃。〔丑〕酒在此。〔旦上〕動人紅一點。醉客酒千鍾。列位相公萬福。〔衆〕姑娘免禮。〔旦〕只是奴家一人來奉酒。〔末〕便是你也罷。〔衆飲酒介旦唱〕

〔對玉環〕花下雙成。妖嬈何足稱。月下崔鶯。娉婷何足稱。百媚自天生。千嬌許誰並。妙舞春風。香裊薄羅輕。醉唱春風。音調金縷清。

〔清江引〕身材十分生得俊。蘊藉風流性。千金買笑難。二八春方盛。倘才郎一見。渾如命。〔衆〕好唱好唱。再唱一個相思曲兒我們聽。〔旦又唱〕

〔對玉環〕密約難成。凝妝空待等。暗卜難逢。焚香空待等。漸漸到三更。才郎不志誠。淚滿鮫綃。難當今夜情。獨抱衾裯。中宵等到明。

〔清江引〕才郎果然多薄倖。害得我懨懨病。若還得見他。定不饒他醒。又只恐罰酒時心不硬。〔末〕越唱越妙。明日奉謝。

夜深香冷燈殘。

曲罷酒闌人散。

第二十一齣 紅樓遣思

〔西地錦〕〔占上〕何事愁侵眉黛。燕來人未歸來。夢魂不怕雲山礙。一春長繞天涯。〔卜算子〕頓覺帶圍兒。不似前番緊。夢裏成雙醒又單。真個情難忍。過約不歸來。欲倩東風引。

日日簷前噪鵲聲。全沒些兒准。奴家想宋子京。幾番生病。前日有人說他曉得我在這裏。要來探望。使我終日懸懸。玉人不到。好難消遣也。難消遣也。

〔黃鶯兒〕妝鏡曉慵開。捲珠簾燕子來。冤家去後知何在。高車未迴。風流願乖。孤眠羞把鴛衾蓋。〔合〕想多才。雙流粉淚。頓覺減香腮。

〔前腔〕對景越傷懷。並頭花空滿臺。今番受盡相思害。敲斷寶釵。誰憐病骸。告蒼天只願相逢再。〔合前〕

〔六么令〕犯憶多嬌。佳期枉猜。知他甚日歸來。前春共賞海棠開。忽見花衰。依舊教我愁滿懷。〔合〕好景難捱。好景難捱。踏遍花前綠綺階。

〔前腔〕憂來怎捱。玉醪空泛鸞盃。可憐心焰已成灰。怎得蒼天默佑。使我情永偕。〔合前〕憔悴多因萬里人。百花亭上又經春。愁來無計。惟耽睡。夢裏相逢也是真。沒情沒緒。不免進去假寐則個。

〔雙勸酒〕〔丑〕才高貌奇。青春年紀。風流運低。難逢美妓。紅樓一女。俏容儀。今日裏穩是佳期。自家喚作范銀團。如山如海勢如官。一生只見紅和翠。柳陌花階着意鑽。昨日聞得有個妓女。喚名青霞。生得十分嬌俊。只是不肯接客。想沒有中他意的姑老。若是我去。定然接我。

此間是他門首。不免徑入則個。〔旦〕慣擺迷魂陣。忙開接客門。相公尙姓。〔丑〕我是范銀團。〔旦〕久聞久聞。〔丑〕賢姐就是青霞麼。〔旦笑云〕正是正是。〔丑〕春山眉。秋波眼。楊柳腰。櫻桃口。果然名不虛傳。〔旦〕實不相瞞。青霞是奴家妹子。奴家喚名鶴仙。〔丑〕我道你有年紀了。你妹子怎不出來相見。〔旦〕他與宋子京兩情相好。從別後一年不接客了。〔丑〕雖然如此。想是沒有中他意的姑老。請他出來。我自有的話說。〔旦〕妹子有請。〔占〕春來人不來。夢醒愁難忍。相公萬福。〔丑〕一見嬌姿。令人魂飛魄散。我有三十兩白銀在此。煩做一東道。我每樂一樂。在你妹子房裏去。〔占〕房兒窄小。難以排酒。〔丑〕不妨不妨。房小心寬。酒薄情濃。〔占〕姐姐。你且相陪。我身子有些不快。進去睡也。〔丑〕青霞見棄我小弟麼。〔占〕不敢。〔旦〕妹子。范相公在此。你且勉強陪奉則個。〔丑〕二位賢姐請酒了。

〔羅帳裏坐〕春花正吐。春鶯正啼。當此不樂。豈爲得計。千金肯惜。偎紅倚翠。

〔合〕嬌歌妙舞。鬱金盃。盡打破愁城萬疊。

〔前腔〕〔旦〕五花寶馬。千金美衣。風流灑落。如君有幾。多蒙光顧。不勝之喜。〔合

前丑〕青霞。你陪我一盃。〔占不肯介丑怒科〕小娘我見了千千萬萬。怎的棄嫌我。可惡可惡。叫小

斷。你與我打。〔旦〕相公息怒。

〔前腔〕〔丑〕我將這黃金似土。白玉如泥。回天轉日。從來權勢。如今不順。終遺後悔。〔合前〕

〔前腔〕〔占〕山盟已定。鸞情怎移。倚強逞富。難違道理。要成配偶。江枯岳圯。〔合前丑〕罷罷。禮下于人。必有所求。只得行一跪禮。你順我一順何如。〔占〕好不識羞。誰來睬你。閉門不管窗前月。一任梅花自主張。〔下丑〕賤人。我有金銀沒俵子。稀罕你。〔旦〕妹子年小。不知世事。望乞恕罪。望乞恕罪。

第二十二齣 紫禁明揚

〔海棠春〕〔外上〕桃李滿枝花。盡在門牆下。盛時選士。貞闈開。海宇聞風。獻藝來。心效權衡。求實效。豈聞蓬華有奇才。自家考試官是也。昨日開榜。中式舉人例。該今日參謁。左右。但有舉子到來。即便通報。

〔前腔〕〔小生〕兄弟並鬼科。聲譽喧朝野。〔相見科生〕宋郊與宋祁。荷蒙高舉。無任感激。特

先謁謝。〔外〕場中所試。惟汝之詩得西崑正體。故取爲第一。〔生〕多蒙大人擢薦。〔外〕宋祁。汝口候詩最擅場。其色映棚雲爛。聲迎羽月馳。一聯可上追唐人。故取爲第二。傳我衣鉢。〔小生〕末學何幸。承此盛恩。〔外〕老夫無私。你兄弟才華可愛。可愛。自是罕及。

〔馬蹄花〕英儁無加。八斗才名四海誇。我品題不謬。校閱惟精。藻鑑何差。崑山雙玉美無瑕。明庭投獻應高價。諒平生尙友阿衡。喜于今熙載重華。

〔前腔〕〔小生〕多謝褒嘉。我兄弟二人呵。淺陋真如井底蛙。詩慚曹建。學歉楊雲。德愧姜牙。一朝薦拔德無涯。姓名幸免居人下。感相傳衣鉢宗工。敢自負梁棟皇家。〔外〕明日該廷試。你兄弟兩人可預養精神。以充大對。〔生〕多謝先生指教。

戰捷南宮羨二難。

明朝挾藝上金鸞。

董生莫負天人策。

學行還期百世刊。

第二十二齣 雙桂聯芳

〔末上〕聖主臨軒策治安。近臣如雨侍金鑾。爭誇文氣連奎壁。共羨威儀陋漢官。下官乃宋朝中一

個黃門是也。今日聖主臨軒策士。不免在此伺候則個。〔生淨小生丑上〕

〔上林春〕香霧青霏。祥雲紅繞。千官擁金鑾殿曉。鳴鞘隱隱聲傳。仰見龍鱗日耀。〔末〕聖駕已升殿了。廷試諸士不得近前。就此敷對。皇帝制曰。朕聞治本于道。道修于學。帝王致治之術。及爲學術之要。爾當詳悉以對。〔生〕

〔閱金令〕臣宋郊。臣聞繼天出治。代有哲君。獨贊重華。紹放勳。功齊乾與坤。唐虞逝。陵夷不可論。〔小生〕

〔前腔〕臣宋祁。臣聞帝王治法。載在典墳。要務須還成性存真。爲衆妙門。且住。我將這三墳五典。八索九丘。講起來呵。成功太煥。乎其有文。〔丑〕

〔前腔〕臣李淑。臣聞聖賢所學。不在飽溫。正業惟將德性尊。知行豈必分。狗謬誤。多由識見昏。〔淨〕

〔前腔〕臣張先。臣聞股肱元首。明良喜聞。虎有風從。龍有雲。渭莘多隱淪。勤徵聘。先明蕝與薰。〔末〕諸士試策已盡。御覽去了。少刻就有玉音到來。〔衆〕且等候。

〔六么令〕〔末〕策陳晁董草茆言深動宸衷。臚傳金殿響流鴻。齊拜賜帽花紅。綠袍着處君恩重。〔占〕聖旨到來。宋祁文理精通。第一甲進士。宋郊文理明順。第二甲進士。張先李淑。俱第三甲進士。謝恩。〔謝恩科衆〕風流黃榜客。濟楚綠衣仙。〔衆〕列位賀喜。殿下朱簾垂上。想是皇太后陞殿。

〔前腔〕〔衆〕坤宮馭統。助飛龍尙在年冲。垂簾親理萬幾叢。寰宇內樂時雍。詔宣綸綍人欽奉。奉皇太后旨。宋郊兄也。宋祁弟也。弟不可以先兄。依序而坐。該衙門用鼓樂送新進士歸第。〔衆謝恩科〕列位。明日早赴瓊林大宴。正是一色杏花紅十里。狀元歸去馬如飛。〔下內叫〕奉聖旨。着黃門給事陪宴。〔末〕奉聖旨着我瓊林陪宴。不免先到杏園之中。催辦酒席則個。〔宰地錦襠〕少年三策獻重瞳。柳色新袍賜九重。男兒到此是豪雄。濟濟瀛洲步同。〔衆鼓樂上〕

〔前腔〕均承霄漢渥恩濃。宴設瓊林羅綺叢。天街十里杏花紅。人似神仙馬似龍。〔末〕此間正是杏園。請狀元下馬。〔衆相見介〕瓊林華宴。勝似登仙。人生至此。不亦樂乎。〔生〕仰荷

聖恩實慚僥倖。〔末把酒介〕

〔畫眉序〕天馬步瀛洲。恩賜黃封杏花酒。喜難兄難弟。並占鰲頭。覽對策雖可。祁前論雁序。何當郊後。〔合〕自今莫負登庸寵。赤心共扶元首。

〔前腔〕〔生〕龍袞受雙球。儀鳳祥麟在廷藪。喜風雲際會。懋著嘉猷。金闕靜西顧。憂紓。玉堂閒東封書就。〔合前〕

〔前腔〕〔淨丑〕清世足文儔。萬丈奎光燭台斗。喜皇家密網。一旦都收。四海慶雙桂聯芳。千年羨三元擢秀。〔合前〕

〔前腔〕〔小生〕華宴列奇饅。翠釜駝峯世罕有。喜名榮燒尾。綾餅紅綢。冠蓋擁柳障青圍。絃管應鸚簧春奏。〔合前〕

〔撲燈蛾〕〔衆〕金樽頻勸酬。金樽頻勸酬。歸馬天街驟。轉過垂楊路。不覺夕陽時候也。感深厚。待賢禮數遇成周。今朝不負。十年窗下。黃卷苦埋頭。

〔意不盡〕一章奏表還摛就。醉夢后遙聽鐘漏。齊具衣冠拜冕旒。

風喚杏花天

人醉瓊林酒

一科兩狀元

亙古何曾有

第二十四齣 冰壺重會

〔番卜算〕〔生上〕春晝日遲遲。朝罷身無事。流鶯百轉度高枝。不覺添詩思。下
官退食自公。喜無俗事。且到花前吟詩數首。左右。但有客來。即便通報。〔淨〕好鳥枝頭亦朋友。〔丑〕
落花水面皆文章。〔丑〕子野同往。〔淨〕李年兄何往。〔丑〕去訪公序。〔淨〕如此同行。〔丑〕子野兄我
與你閒論一論。你有雲破月來花弄影之句。信是奇才。子京有紅杏枝頭春色鬧之句。亦是作家。公
序詩全無奇特。爲何連中三元。〔淨〕他有陰隲。〔丑〕有何陰隲。〔淨〕他曾編竹橋渡蟻。〔丑〕說那裏
話。編竹橋渡蟻。就中了三元。若是造石橋渡了牛。倒中十元。〔淨〕不要閒說。此間是公序署所。不免
徑入則個。〔生〕閉門吟正苦。客來且解圍。〔見介丑〕會元天下才。狀元天下福。公序連中三元。可謂
才福俱全矣。〔生〕君子論才不論福。〔丑怒科〕若論真才。儘有強似你的。呀。怎的有一個和尚進來。
道不同不相爲謀。請別了。〔淨丑先下末〕相識滿天下。知心能幾人。小僧與二宋情好甚密。且喜他

兄弟迭中狀元。今日雲遊到此。不免進去一賀。〔見科生〕遠勞下顧。薄酒排塵。

〔好姐姐〕〔末〕玉堂重瞻令儀。百朋錫懽情難擬。〔生〕別後曾擬我否。〔末〕江雲渭樹。常縈別後思。〔生〕思前事。一科兩首言如戲。今日知君術甚奇。

〔前腔〕〔末〕莫辭香風玉卮。人生世青春能幾。笙歌酬勸。從教照底。〔生〕逢知己。酣情不飲。盃中醴。洞口桃花也笑癡。〔末〕小僧明日就要別了。〔生〕到處爲家。何不寬

住幾日。

纔得相逢又相別。

陽關三唱不勝情。

第二十五齣 遐憶青蛙

〔生查子〕〔小生上〕相思病漸成。繞夢陽臺下。春色又凋零。心事和誰話。小生與青霞別後。朝夕縈思。如今花落春歸。好傷感也。

〔二犯傍妝臺〕終日自嗟吁。玉人庭院。何事隔天涯。聽啼鳥腸欲斷。對明月恨愈加。記得鴛幃私語切。好處成愁。只爲他。〔合〕又逢春盡。蕙蘭吐花。幾時得見。

俏冤家。

〔前腔〕空思那日醉流霞。一從別後。忘卻飯和茶。禁不得身如病。止不住淚如麻。豈料相思成瘦損。追悔當初設誓差。〔合前〕

〔生查子〕〔末〕乘春訪故人。特過茶蘼榭。〔小生〕誰個駐高軒。倒屣忙迎迓。〔見科

小生〕有勞下顧。深感厚情。〔末〕曠別許久。特茲趨候。目今好鳥嬌歌。落花香舞。時光正佳。何故鬱

鬱。〔小生〕弟之遇青霞。兄所知也。有懷難遣。徒恨春歸。無人可親。徒悲人遠。〔末〕尊體宜調。佳人易得。青霞有何美處。子京愛戀若此。

〔普天樂〕〔小生〕爭誇一笑千金價。花容嬌麗還瀟灑。美名兒不枉青霞。分明是閬苑仙娃。側耳聽歌音雅。似好鳥調聲在芳叢下。舞霓裳風捲輕紗。可意處難描難畫。恨悠悠楚館。怎當縈挂。〔末〕雖然如此。吾聞上士不迷花。達人能割愛。願我兄自重。〔小生〕謹領教誨。

第二十六齣 堅持白操

〔小旦上〕野鳥交交野草濃。無言常日怨東風。也知不忘當時約。爭奈雲山百萬重。奴家青霞是也。自與宋子京別後。不覺一年餘矣。儀容久曠。音書杳無。昨日聞得他高中後。染病在京。是因我之故。咳。質陋牆花。情縈霄鳳。可慚可幸。迹雖疎而愛實殷。不免翦些頭髮。托人寄去。也表我一點真心。卻不是好。

〔步步嬌〕一別仙郎心無主。淚眼拋紅雨。綠雲嬾去梳。薰地焚香。慢把金刀舉。翦付俏相如。寄與愁千縷。

〔集賢賓〕宮妝舊樣難再覩。香盤翠綰都虛。一任蓬鬆如亂蕪。嘆昔日鸞篋何所。心中自苦。割不斷相思情緒。知幾許。還更比髮莖難數。

〔江兒水〕記得香消後。燭滅餘。鴛鴦枕上情交吐。好事從來多間阻。風流枉自思前度。誓不從人懽聚。結髮相隨。怎比荆釵淑女。

〔香柳娘〕把胸酥暗撫。把胸酥暗撫。白頭空賦。雲翹冷落眉羞嫵。掩菱花自語。掩菱花自語。膏沐爲誰疎。飛蓬豈須顧。恨佳期已誤。恨佳期已誤。同穴盟言。君

須記取。

〔餘文〕花前月下添淒楚。恨不能身生翼羽。飛到瑤臺諧鳳侶。

仙郎一別又經春。

萬里青雲喜致身。

欲見無由鴛閣冷。

含愁翦髮寄江鱗。

第二十七齣 泥金報捷

〔丹鳳吟〕〔外上〕鬢入衰年。素添蒼變。那堪遊子天涯遠。鴻斷鯉沈。鬱懷怎遣。

老邁無他樂。庭趨有俊兒。不圖班袖舞。專望錦衣還。自兩個孩兒上京赴選。今揭曉已過了。還不見報捷的人到。

〔行香子〕〔旦〕蕊燭頻妍。喜鵲虛傳。憶仙郎夢繞長安。春闈筆戰。未審誰先。對

妝臺。羞鸞鏡。冷花鈿。公公萬福。〔外〕媳婦。你丈夫與叔叔杳無音信。不知功名之事若何。〔旦〕

事皆前定。公公不必挂懷。〔紅〕稟老爹知道。紅香夜來得一夢。夢見小相公頭被大相公割了。〔外〕

癡人說夢。何足信哉。

〔石榴花〕文場高選。膝下慶雙賢。詞勝景。筆如椽。英雄誰比綠衣仙。騁春風寶馬長安。只憂讓祖鞭。取靈尸卜筮還多遍。定應是虎榜高標。怎不見雁錦遙傳。

〔前腔〕〔旦〕畫眉人遠。無奈意懸懸。香篆冷。瑣窗寒。綢繆空想別時言。眇天涯。玉筋闌干。何時得錦旋。恐蒼天不遂心中願。且殷勤甘旨躬調。望輝光冠帔恩宣。

〔不是路〕〔丑〕涉盡雲山。早到雍丘下錦箋。〔外〕想是報捷的到了。忙相見。〔丑〕且喜二位相公都高中了。春風得意聽臚傳。〔外〕宋郊宋祁榜上俱有的麼。〔丑〕宋祁前。宋郊第二俱俊選。〔外〕莫不是誤看了。榜上分明豈誤看。〔合〕天從願。聯芳雙桂真堪羨。不勝懽懽。不勝懽懽。

〔前腔〕〔淨〕月轡霜鞍。千里馳驅匹馬寒。心如箭。泥金報喜敢遲延。〔見科〕且喜二位相公都高中了。〔外〕方纔有人來報。我知道了。〔淨〕天殺的。又搶我的頭報去了。他敢是不實的。〔外〕他道宋祁中了狀元。宋郊就中了榜眼。是榜上看來的。〔淨〕我道他不實。宋郊前。宋祁

第二俱優選。〔外〕莫非是你誤看了。〔淨〕榜上分明豈誤看。〔丑〕我是榜上看來的。顛倒不

實。偏你是實的。〔淨〕我不與你爭。見有試錄在此作證。〔旦〕兩下言語不同。莫非都是騙子。〔外〕事

有可疑。休相騙。兩辭不合如何辨。轉令心亂。轉令心亂。〔末〕一舉首登龍虎榜。十年

身到鳳皇池。大相公小相公都中了。〔外〕兩個報捷的在此相爭求賞。你且說個端的。

〔掉角兒〕〔末〕榜初懸弟爲狀元。兄並列亦登高選。弟先兄倫理非宜。因此上

把名更變。〔外〕既然如此。你兩個都是實的。二難名俱首占。兩人言皆不謬。合賞金錢。

每人送他白銀二兩。〔淨〕多謝多謝。〔合唱〕宮花帽偏。春風杏苑。弟和兄躍馬雙雙勝

似登仙。

〔前腔〕〔衆〕喜孜孜焚香謝天。笑盈盈滿門懽怍。換門閭榮親顯妻。佇看他達

能兼善。際明時。逢聖主。顯嘉猷。成懋烈。且爽齊肩。〔合前〕

〔餘文〕喜今朝佳音轉。玉堂金馬兩神仙。會看黃金腰下懸。

三報佳音抵萬金。

萬金難買此懽心。

世間喜事應無限。

惟有登科喜最深。

第二十八齣 禁苑奇逢

〔一翦梅〕〔旦小旦丑上〕御苑春花照眼明。喚起遊情。共暢遊情。呀。鄭娘娘來了。〔占〕羣仙鳴佩過瑤亭。含笑相迎。整袂相迎。〔相見介旦〕鄭娘娘。且喜月朗花嬌。宜共一賞。〔丑〕我每見鄭娘娘倚闌長嘆。有憂愁不足之意。故與列位娘娘相約遊春。消遣悶懷則個。〔占〕多謝厚愛。

〔素帶兒〕〔旦〕穿芳徑。楊柳風吹素帶輕。雕闌畔。一□海棠嬌逞。相應雙小鶯。向何處飛來枝上鳴。聲□聽。我愛他啾啾嚦嚦。皖皖嚶嚶。

〔昇平樂〕〔占〕多情。二八娉婷。自春來愁隨芳草叢生。香寒絨吐。繡窗幾度停針。熒熒臂痕長帶守宮明。鎮日裏枉思恩幸。自傷薄命。尋花恨重。折柳憂增。

〔素帶兒〕〔丑〕山青日正晴。無邊麗景。鞦韆笑。忍將好夢兒驚醒。行行渡錦屏。遙見翩躚雙蝶迴。添遊興。是何人低吹玉管。暢飲銀觥。

〔昇平樂〕〔占〕還驚殘絮飛零。問東君爲何便整歸旌。流光似箭。誰有繫日長繩。清清。一春空過喜難成。盧扁藥怎消憂病。不堪孤另。龍輿目斷。鳳輦魂縈。

〔小生〕經筵散。禁苑行。驀相逢。內輦經。幾迴欲避無岐徑。奉乾宮亦合輸恭敬。急趨迎。鞠躬待罪。臣無任戰兢兢。

〔前腔〕〔占〕宮袍綠。玉貌清。逞風流。一俊英。呀。原來是小宋。〔叫科〕緣何默默脣緘定。料他心欲應知難應。謾留停。東風回首。無情惱多情。〔衆〕請各回宮。

洪恩暫似芳春樂

薄命仍禁獨夜愁

〔小生弔場〕適間第四位。他與下官不會相認。何故叫此一聲。使人不能不動情也。獨步無聊。不免撰一小詞。遣懷則個。〔想介〕嫋嫋東風御苑通。鸞車齊度百花中。風情獨數飛瓊最。猛聽鶯聲出繡叢。金菡萏。玉芙蓉。水沈香護蕊珠宮。劉郎已恨巫山遠。況隔蓬山幾萬重。〔丑〕爐烟添柳重。宮漏出花遲。李淑忝居翰苑。朝回無事。且向禁苑中觀紅玩綠。一會呀。子京爲何在此躊躕。〔小生〕適間在此遇一奇事。細告與年兄知道。〔丑〕願聞願聞。

〔懶畫眉〕朝回紫禁步東風。馥郁香生萬錦叢。仙娥羣輦偶相逢。一聲小宋低低喚。惱亂春心不自容。〔丑〕他喚你時節。你見他人物如何。

〔前腔〕遙瞻玉臉綻芙蓉。高髻雲鬟粉黛濃。妖嬈端的冠椒宮。我想起玉堂金馬。錦繡文章。端的是英雄俊傑。總然欲染高唐夢。隔斷巫山十二峯。〔丑〕子京。你詞賦甚高。有此奇事。何不作一詞以記之。〔小生〕方纔作過小詞了。〔丑〕試說一遍何如。〔小生念詞介丑〕妙哉妙哉。不但有筆力。且有風情。承教了。

玉兔豈嘗離月窟。

竹狸空想喫天鵝。

〔丑弔場〕好了好了。宋家兄弟平日能會矜誇。十分欺我。如今小宋犯此罪過。決在不赦。不免把此鷓鴣天教樂人習學。傳至禁中。查出何人所作。那時定有發落。他罷斥也。消我平日之恨。正是天作孽猶可違。自作孽不可活。〔下〕

第二十九齣 詞傾宸聽

〔丑上〕〔玉樓春〕煖香薰透桃花頰。春殿嬪娥魚貫列。宸宮方得萬幾閒。鳳旆龍輿遊興切。風和花

苑數輕蝶。芍藥叢深宮漏徹。笙簫吹斷錦雲開。齊唱太平歌幾曲。自家乃是宋朝一個掌宮太監是也。今日俺萬歲爺爺出遊禁苑。勅後宮隨駕。不免叫承應的在此伺候則個。〔衆〕承應的已到了。
〔丑〕且伺候着。你看祥雲團鳳輦。御柳拂旌旗。想是朝廷來也。〔扮宋仁宗皇帝上〕

〔祝英臺〕世雍熙。春富貴。朝政已紛解。〔占〕花比嬌容。纖柳鬪眉黛。〔仁〕喜看舞蝶迎幢。飛英逐輦。〔合〕幸春光難再。〔占〕〔憶秦娥〕香馥郁。御前無數人如玉。翠翹金鳳。十分妝束。〔仁〕繁華簇絳垂楊綠。風光恍似華胥國。民安物阜。太平歌曲。〔衆進酒介〕

〔〕禁苑中春芳滿眼。端的賽蓬萊。柳惹亂鶯。花引遊蜂。偏稱綺席重開。
瑤臺萬紫千紅相偎。沈醉東風何礙。不爲樂。只恐朱顏催改。〔衆作樂科〕

〔〕時泰。慶歷年雨順風調。人似在無懷。庭角鳳鳴。囿內麟遊。不忝堯年舜代。交快。八方不動征旗。坐享四夷朝拜。古今事惟有清平難買。〔衆舞科〕

〔前腔〕〔占〕堪愛。繞翠華玉珮瓊琚。十二耀金釵。花拂翠翹。草映紅裳。春色煖添桃腮。開懷。鳳簫鸞管交吹。聲徹梨花雲外。且高歌莫負春光如海。〔衆唱鷓鴣天〕

科仁」此詞清麗。朕尙未聞。不知何人所作。〔衆〕翰林官宋祁作的。〔仁〕宋祁何爲作此。〔衆〕一面傳說后宮出遊時。有人見他。呼了一聲小宋。因此卽編此曲。〔仁〕此乃何人。〔丑〕鄭瓊英。〔仁〕瓊英何在。〔丑〕爺不召。不敢來。〔仁〕可速召來見朕。〔丑〕得旨。〔占〕倉忙離禁閣。匍匐赴皇宣。陛下萬歲萬歲萬萬歲。〔仁〕瓊英。你向日出遊。爲何叫一聲小宋。從實說來。〔占〕臣該萬死。那日出遊呵。

〔前腔〕剛在綠楊邊。一蹇帷。驀地見喬才。不合謬呼。豈爲多情。真個似癡如呆。罪大自知萬死難饒。只望洪恩天蓋。〔仁〕赦汝無罪。〔占〕謝恩科。願天保聖壽綿延萬載。〔仁〕你爲何認得宋祁。〔占〕狀元傳臚之日。臣侍皇太后。因此認得。〔仁〕汝嫌宮中之冷落。動此懷春之情乎。〔占〕臣有此心。天必不容。

鶯花三月景。

一刻值千金。

樂意同春闊。

君恩似海深。

第三十齣

詩詠花魚

〔丑上〕宮殿峨峨出綠槐。鬱蔥佳氣接蓬萊。蟬聯步武雲臺上。願奉君王萬壽盃。自家叨爲內使。得

蒙主上眷愛。今日駕遊紫苑。詔近臣呂蒙正文彥博等扈從。不免等待衆官到來。一齊候駕則個。遠
遠望見聖駕來了。

〔高陽臺〕〔末外〕罷舞龍墀。催遊鳳苑。臣隣齊過雙闕。香散氤氳。望中烟紫猶
結。輕風綠樹宸遊稱。看鳥外寶幢飄揚。擁金輿。紅雲一朵。翠珠羅列。

〔前腔〕〔仁〕金甌幸保無缺。且遣懷仙液。荷放小錢如撒。嫩綠成陰。雛鶯乳燕
飛聒。閒情莫負芳時賞。聽鳳韶一派聲徹。樂盈盈。如魚如水。君臣相悅。〔仁〕女冠

退班。〔衆應科〕暫奉宸遊樂。難逃宮禁嚴。〔下仁〕卿等平身。幸喜太平無事。與卿等遊樂片時。且免
拘君臣之禮。〔末外〕蒙陛下深恩。臣等不勝幸甚。〔衆進酒科〕

〔高陽臺序〕〔仁〕四海安康。邊疆安靜。文修武偃堪悅。錦繡江山。正逢太平時
節。不劣祥麟瑞鳳來庭。醴泉迸赤芝森列。滿金盤滾滾甘露。瑤雲盤結。〔丑〕

碧闌干外。葵榴盛開。請移席賞花一回。〔仁〕朕心正欲如此。

〔前腔〕〔末〕爭閱豔蕊凝脂。繁枝簇錦。香引亂蜂狂蝶。西子楊妃。醉顏笑靨無

別。聲聒。鸞笙鳳管交盈耳。轉輕颺。翠盤舞絕。趁芳辰。明良共賞。綺筵重設。〔丑〕
請往太液池頭釣魚一回。〔仁〕正合朕心。

〔前腔〕〔外〕活潑。在藻□□。喋萍戲藻。可愛素鱗拋雪。香餌潛勾。卻把一竿輕
掇。波闊。天機觸處呈魚鳥。傍龍舫。綵鴛飛頡。奉宸遊。風光無限。詠歌交發。〔仁〕

俺君臣賞花釣魚。可謂樂矣。卿等可賦一詩。以紀勝遊。〔末〕聖藻先攜。臣等奉賀。〔仁〕灼灼花鋪錦。

雙雙鯉上鉤。詩詠天保什。酒泛鎬京甌。〔末外〕輝煌聖藻。上繼典謨。臣等莊誦不暇。安能嗣響。〔仁〕
毋譽毋謙。〔末〕駐輦蓮花畔。投竿蓮葉東。新紅深映袞。羣鯉競朝龍。〔外〕玩物心非正。觀魚事已非。

茲因不可續。有道只垂衣。〔仁〕卿等作詩並佳。朝臣中還有能詩者乎。〔末〕能詩者固有。蛙聲蟬噪
而已。〔仁〕宋祁何如。〔末〕頗有詩才。〔仁〕宋祁春遊禁苑。遇朕宮人。宮人叫他一聲。他作一鷓鴣天
詞。卿等聞之乎。〔末外〕臣等不聞。〔仁〕前日李淑有本。劾他詞荒意悖。無人臣禮。朕看來自是詞人
丰韻。何足罪哉。〔末外〕陛下如此寬恩。宋祁無任感激。〔仁〕卿可令宋祁來回話。〔末〕奉旨。〔下仁〕
朕與卿再賞花一回何如。〔外〕臣有一事奏上。〔仁〕說來。

〔前腔〕〔外〕聽說戒切苞桑憂先陰雨永保藝皇□□逆耳言忠漢廷彤檻曾折諄切丹書敬怠垂訓也願深徵色荒覆轍喜朝中臣多骨鯁詔諛風滅〔末〕

〔小生〕臣一言既悖萬死何辭〔仁〕赦卿無罪卿曾娶妻否〔小生〕臣年方十九未曾娶妻〔仁〕蓬山不遠朕以此女賜卿〔丑〕謝恩〔小生〕萬歲萬歲萬萬歲

朕推心置人腹

臣刻骨感皇恩

君臣合昌國運

夫婦配盡人倫

第二十一齣 仁主賜婚

〔末上〕瑞香遍滿玉樓春慶賀新郎催拍頻燭影搖紅雙勸酒稱人心處感皇恩將宮女賜爲夫人今宵合卺喜氣盈門遠遠望見華燈燦爛綵轎崢嶸想是新人來也不免叫贊禮人伺候成親則個呀贊禮人已到了〔淨〕

〔金錢花〕畫堂風景難描難描銀屏彩燭光搖光搖九重恩詔鳳鸞交男俊俏女嬌嬈懽喜慶笑聲高大叔拜揖〔末〕宮娥下嫁非同小可你贊禮須要仔細〔淨〕仔細仔細

只要多些利市。若無利市。口殺不濟。〔小生上〕

〔□□□□〕連理枝榮。並頭花好。天喜吉星高照。花燭喜承恩詔。跨鳳瑤臺。占盡古今榮耀。〔淨〕新人將出。請迎接。〔占上〕

〔生姜芽〕天街□馥飄。轉輕颺。雙燈燦爛輿前導。錦纏頭。碧玉簫。風光好。〔衆〕仙娥含笑離蓬島。喜當良夜結良姻。奇逢不負花前叫。〔衆〕花正芳菲月正圓。瑤天

仙子降雲端。若教聖代掄嬌豔。定作人間色狀元。〔丑〕奉聖旨。將宮嬪鄭瓊英賜宋祁。行夫婦禮。秀女一人太監一人從嫁。望闕謝恩。〔謝恩科淨〕請新人行禮。〔行禮科淨〕送新人請後堂筵宴。〔淨〕花燭影中看玉貌。玉簫聲裏送金盃。〔淨〕行禮已畢。請新人歸洞房成親則個。

〔憶奴嬌〕〔小生〕花燭紅搖。感君恩似海。特賜鸞交。牽紅處自慶福緣非小。懽笑春滿房櫳。雙雙盃勸。風光正好。今宵一似俏雲英。會合玉京瑤島。

〔鬪寶蟾〕〔占〕□朝玩賞花郊。偶香堤邂逅。一聲輕叫。奈風傳中禁。頓生煩惱。誰料赤繩曾繫定。紅葉不須勞。美才高。一曲鷓鴣新唱。勝求月老。

〔錦衣香〕〔小生〕寶篆香。銀屏皎。繡幌翻。金釵巧。急管繁絃。珠圍翠繞。團花宮
襖映宮袍。內家舊樣。鳳髻鸞翹。〔占〕嘆長門靜悄。再經春變輿不到。自分今生
裏孤眠盡老。不期禍變番成佳兆。

〔漿水令〕喜孜孜鸞顛鳳倒。美津津露溼花嬌。猩紅一點染鮫綃。笑陽臺雨散
雲消。心交愛。情真妙。流酥帳護人年少。譙樓上。譙樓上。漏催天曉。同獻表。同獻
表。拜謝天朝。

〔尾聲〕謝天朝齊祝禱。御體茂膺天保。慶衍螽斯聖壽高。

一曲鷓鴣天。

博就鴛鴦侶。

此事古來稀。

萬世頌明主。

第二十二齣 翠閣耽思

〔哭岐婆〕〔紅翠上紅〕筠亭風細。荷花香遞。湘簾捲起。塵空髻几。偷閒聊此坐。敲
棋。西飛白日繩難繫。

〔前腔〕〔翠〕蘭襟蕙體。輕裙颺綺。逍遙畫宇。神仙難比。時時挈伴恣閒嬉。人生莫負芳年紀。紅香姐萬福。〔紅〕翠豔姐萬福。姐姐。我與你被大娘拘束得緊。一向不會得耍一耍。今日他午睡未起。我和你到池亭上下一局棋何如。〔翠〕到好。只怕撞見時。喫一頓好打。〔下棋科〕

〔旦〕成人不自在。自在不成人。你每在此何幹。〔紅〕日長無事。下一局圍棋耍子。〔旦〕針指不做。幹此無益之事。好打。〔紅〕丫頭每知罪了。〔翠〕大娘且喜。〔旦〕有甚麼喜。〔翠〕添了妯娌。聞得聖上把一宮人賜與小相公爲夫人了。〔旦〕此事未知的否何如。〔紅〕大相公中了狀元。大娘子正該懽懽喜喜。爲何柳眉攢翠。桃頰銷紅。〔旦〕你每卻不知道。

〔繡帶兒〕春歸後雲鬟倦理。仙郎杳無歸期。總不□憔悴紅顏。也難忍冷落班衣。我想起我這等花容月貌。比往常間更不同了。怎禁得這樣愁懷萬種。因此消瘦。

〔宜春令〕病體困沈沈。鎮日如癡。豈學人雨尤雲殢。禁不得沒情沒緒。曲闌頻倚。

〔降黃龍〕把當時送別臨岐。執手叮嚀把糟糠棄。如今呵。相拋萬里。想合受淒

涼。是我運蹇時低。

〔醉太平〕淋漓。幾迴雙淚暗偷垂。怎知我這般滋味。總然帶黃衣紫。到不若廝守少年鴛幃。

〔浣溪沙〕風弄竹。月在機。誰共泛紫霞金卮。連宵飛夢到天涯。城樓畫角吹覺起。

〔啄木兒〕觸景添悲。無人處花綻鳥啼。芙蓉絳簇波心綺。幽香暗透紗窗裏。離繡牀羅襪臨池。瘦形骸庭花怎比。

〔鮑老催〕寂寥自知。林鶯嬾拔連理枝。鸞箋謾寫離恨詩。思懽聚。枉設策。空施計。怎得蕭郎心轉意回。

〔上小樓〕咱這裏形孤心碎。他懽生錦繡圍。翠樓又恐戀嬌姿。欲待迴文織錦。怎織得幾許相思。

〔雙聲子〕雲鴻至。江鱗逝。怎不把音書寄。鶯啼序。金錢問。全無些三靈意。又怎憑

燈鵲龜尸。諸般可疑。望錦衣歸春未審何時。

〔尾聲〕深情免使傍人議。嗟我懷人天際。專一須看卷耳書。

仰望惟君子。

無邪不害思。

甘爲望夫石。

何日是歸期。

第二十三齣 思憶雙親

〔二郎神〕〔占上〕心悒快。念白髮雙親各一方。菽水自晨昏誰倚仗。斷鴻沈鯉。杳沒音書來往。天際孤雲牽恨長。嘆何日高堂侍養。空妄想。怎得身生兩翅。飛到親傍。瓊英荷蒙聖恩。得遂夫婦之樂。奈雙親別久。杳無音信。年老身孤。怎不傷痛我心也。天那。正是無窮愁緒也。

〔轉林鶯〕〔小生〕朝回無事堪舉觴。綠陰清晝偏長。夫人爲何悶坐在此。怎生心中不樂。爲甚麼也。我和你琴瑟和諧多好況。且乘暇開罇。傍水雲臺。線兒丫鬢。整酒涼亭上來。看鴛鴦兩兩相隨。戲浴在綠波池上。〔線〕酒在此了。〔小生〕夫人爲何落淚。〔占〕

扇無涼。猛可的香腮微汗沾裳。〔小生〕夫人。得非以蘭房不若椒宮耶。〔占〕枉了。哀哀父母。生我劬勞。久別多時。豈得不傷懷抱。〔小生〕原來如此。不說不知。於十日前。蔡州人便。我已寄書與你父母去了。早晚間有人來也。〔線〕夫人請酒。

〔啼鶯兒〕緜紋翠簾金獸香。浮瓜沈李新釀。〔占〕我不飲了。〔小生〕夫人可再飲一盃。幸沐天恩離宮禁。開懷同我懽賞。看玉渠蓮開並頭。更竹下薰風添爽。〔合〕美雙雙。花前飲不羨鳳和凰。

〔憶鶯兒〕〔末淨〕離舊邦。入異鄉。山路崎嶇水路長。宿水餐風勞怎當。老爹。你看前面山頭上。霜葉紅于二月花。真個好秋景也。鴉歸夕陽。峯橫斷岡。長安近闕朱門敞。呀。此間就是宋家門首。怎的沒有人在此。不免咳嗽一聲。〔小生〕線兒。外面是甚麼人來。你去看一看。〔線〕□□何來。〔末〕你報與夫人知道。鄭參政和夫人來在此。〔線〕我夫人正在此思想。酒也不肯飲。來得卻好。就請進去。〔占〕原來是爹媽來也。〔相見介合拜〕

〔玉嬌鶯兒〕〔占〕容兒謾備陳。痛當時分離慘傷。苦不得一見君王。長門裏冷

侵鴛帳。看花豔陽。出言太狂。幸天顏有喜成姻黨。〔合〕謝穹蒼。謝音皇厚德。福壽永無疆。〔小生〕今日幸喜岳翁岳母遠來。聊此薄酒拂塵。〔末〕何勞盛設。〔占〕線兒。你把鷓鴣天

曲唱與太老爹太老夫人聽一聽。〔淨〕這一曲鷓鴣天。就是我孩兒的冰人月老。

〔御林鶯〕歌新曲。按舊腔。兢吹笙。再鼓簧。鷓鴣聲裏愁顏放。〔末〕賢婿。你蜚聲玉堂。孩兒。你褒封鳳妝。我夫妻鬱抱從今暢。〔合〕喜難量。相輝冰玉。天賜這美東牀。

〔淨〕孩兒。我家下無人。數日後就要回了。〔占〕母親跋涉辛苦。且寬住數月何如。

雙親重會喜難禁。

玉漏迢迢月未沈。

准擬明朝重設宴。

開懷痛飲碧筒深。

第二十四齣 夢後傷懷

〔鵲橋仙〕〔小生上〕我思病染。他思病染。兩下相思病染。楚天雲慘斷來鴻。空倚遍畫闌繡檻。一更三點。二更三點。又早三更三點。銀燈剔盡不成眠。看明月容消色減。下官蒙聖恩賜宮娥匹配。無任欣幸。人苦不知足。得隴復望蜀。青霞尙未同衾。積懷猶在。如何是了。

〔雲華怨〕小窗更靜。滿絺襟都淚痕。玉人何在無由近。連宵落得夢頻仍。長溪
日夜滔滔。流不盡萬愁千恨。

〔前腔〕佳期天靳。總□多難與親。九霄更絕飛鴻信。悔前不合認真恨。陽臺雲
雨茫茫。空坐看落盡燈燼。不覺神思困倦。且隱几一臥。〔小旦〕奴家青霞是也。思憶子京。只得
背了鴛母。私自到京。與他一會。此間瓊樓朱戶。想是他的住處。不免徑入則個。〔小生〕呀。青霞如何
得到這裏。

〔羅江怨〕〔青〕慊慊病。一春難逢可人。淚紅遍染羅袖痕。金樽不解兩眉顰也。
紅拂宵征。膽怯金蓮緊。〔小生〕紗廚鳳枕新。紗廚鳳枕新。和你今夜懽娛准。〔內鳴

鑼科小旦下小生醒科占上〕相公爲何驚嘆。〔小生〕我自有事。

〔□□□□〕〔占〕你爲何困騰騰晝不醒。悶懨懨宵廢眠。轉流鶯爲何聽了番成
嘆。海棠開爲何見了轉淚漣。我和你伉儷情天地遠。合懽意鸞鳳聯。你爲何不
肯全拋心上言。〔小生〕夫人。實不瞞你說。

〔前腔〕少年心風絮顛。偶遇着絕世姿烟花賤。急煎煎許結了同衾願。美孜孜成就了共枕懽。怎知道惡風波猛折冤家散。到如今害相思離恨天。怎能殼花再芳菲月再圓。〔占〕相公。我只道你別有甚事。只爲此。你休怪我說。〔小生〕但說不妨。

〔江頭金桂〕〔占〕可笑你情疎意淺。既相投忍棄捐。試問嬌娃何在。幾載不見。

〔小生〕與他相別歲餘。不知所在。〔占〕此女心性何如。若是不好的。娶將來愁不便。但願處事周全。立心和善。只怕倩風情不改。花性仍堅。復落猖狂話傳。況佳人易得。況佳人易得。何須專戀。〔小生〕佳人雖有。難得這般情愛的。〔占〕既然如此。何不就去請來。莫遲延。不妨鳳閣諧重侶。管取鸞膠續斷絃。

〔前腔〕〔小生〕自愧當年乖舛。感伊家特見憐。若得相容重取。美意不變。你賢聲傳播遠。與他話別秦樓。歲華遷換。好似銀瓶墜井。斷綆無援。重重悶懷難自遣。若魚沈雁杳。魚沈雁杳。尋蹤空遍。〔占〕只怕他又屬豪家去了。〔小生〕我也慮此。意常牽。長條定折他人手。麗曲知調若個筵。〔占〕相公。你不必遲疑。可作急差人去尋訪。娶了

他罷。〔小生〕多謝夫人厚意。

語知柳有鷓。

飛見雪藏鷺。

妻賢容娶妾。

妾寵莫忘妻。

第二十五齣 奔告強婚

〔胡搗練〕〔末上〕如馬駿似琴清。黃茅從事膺新命。奸黠聞風咸自靜。謾誇蘇
呂擢名卿。職任節推。五刑是理。如得其情。哀矜勿喜。下官姓孫名奭。忝中宋郊榜進士。除授開封府
推官。雖不能片言折獄。亦可喜縣獄空圜。今日乃放告日期。但有告狀的。放他進來。〔小旦〕老爹告
狀。〔末〕你那婦人告甚麼狀。〔小旦〕

〔一封書〕青霞妓訴情。欲語衷腸先淚零。〔末〕有何冤枉情。詳細說來。〔小旦〕豪強法
外行。披霧公堂乞斷明。〔末〕甚麼人用強。〔小旦〕范銀團帶領羣僕。強奪奴家爲妻。強逼身
爲鸞鳳友。〔末〕何不從了他。〔小旦〕奴家先許了人了。許嫁他人。怎肯背盟。〔末〕曾許甚麼人。有
何媒證。〔小旦〕張子野爲媒。玉釵爲證。事先成理。難更肯負多才宋子京。〔末〕原來是子

京先聘的。叫皂隸。快寫牌拿范銀團來。青霞。你家還有個鶴仙可在嗎。〔小旦〕從良去了。〔淨〕甕中捉鼈。手到拿住。范銀團在此了。〔末〕那婦人告你強占他爲妻。從實招來。

〔前腔〕〔丑〕銀團范有名花柳叢中過。此生青霞貌可憎。鎮日求權計已傾。豈料緣慳難作偶。空惹狂心烈火騰。到公庭甘受刑。〔末〕雖然有財。如何強占妓女。〔丑〕不但小的如此。就是老爺也好妓者。〔末〕這廝胡說。你會見何人好妓來。〔丑〕老爺等我就說來。曾聞君王覓愛卿。〔末〕本該問你一個罪名。姑且從輕發落。〔丑〕望老爺作主。小的情願納銀二百兩。斷與小的罷。〔末〕這廝好打。聖上也愛宋子京。將嬪妃賜他。況是原聘。皂隸快打出去。〔丑〕滿拚窈窕諸情事。誰想風流剝面皮。〔下末〕青霞。我明日同張先生去望子京去。就講這段事情。叫他來娶你。你意下如何。〔小旦〕若得老爹高言。奴家沒齒不忘。

雀角何難辨。

鸞情斷不移。

得他心肯日。

是你運通時。

第三十六齣

佳期重會

〔一江風〕〔小旦上〕月圓時。萬里清光滿。誰在瓊樓醉。冷清清翠減紅銷。受盡淒涼味。玉露滴高枝。玉露滴高枝。金風透薄衣。風和露都做了愁人淚。奴家蒙孫老爺恩判。得脫銀團之累。那日曾說與張老爹去訪子京。講此一事。來取奴家。今經數日。杳無音耗。不知去也未會。好悶人也。

〔月兒高〕妝嬾鬆雲髻。愁多瘦香臂。可怪清秋月。偏照孤幃內。絃斷樽空。難禁這憔悴。何時定結。定結鴛鴦對。想他燕爾新婚。不思舊人意。喜燈蕊十分奇。倘然搥碎青樓。燕明香謝天地。

〔玩仙燈〕〔末淨〕華屋夜涼微。隔簾櫳玉簫聲起。〔淨〕孫年兄。今夜子京招飲。青霞之事。定有下落。何不喚他出來。先分付一番。〔小旦上〕仙燈近步入。瑤階夜月明如水。〔見淨科〕這幾日公事冗冗。不曾去訪子京。幸今夜請我二人賞月。席間說起。事必諧矣。〔末〕此事還仗子野與他成始成終爲妙。〔小旦〕此恩此德。啣結難酬。〔淨〕只是一件。他眼熱官高。恐嫌淡薄。汝必盛容相見。方可成事。〔小旦〕謹依指教。〔丑〕香尊邀月飲。華月可人憐。俺老爹請二位老爹早付月

筵。〔末〕曉得。你可在〔小旦〕此等候。我每就此同行。〔小旦〕眼望旌捷旗。耳聽好消息。〔下〕

〔金雞叫〕〔小生〕涼月澄新霽。閒邀故人小筵。懽會。〔末淨〕冰輪玉宇無纖翳。光

漾銀舟。香飄金桂。〔見小生科〕〔醉太平〕清秋景奇。高明興齊。一天明月揚輝。且懽傳玉盃。〔淨〕

流光若飛。人生易衰。〔末〕自嗟勛業難期。對良宵更悲。〔小生〕左右。一壁廂取酒來。一壁廂喚幾個

樂妓來勸酒。〔丑〕領鈞旨。樂妓何在。〔衆妓上〕紅裙不自得。錦繡必須邀。〔丑〕稟老爹。樂妓俱到了。

〔小生〕過來叩頭。〔衆妓〕樂妓磕頭。

〔梁州序〕〔末〕閒雲飛盡。清蟾光滿。玉笛風聲遞遠。知音相遇。何妨此夜遲眠。

忽見殘螢照袖。獨鶴停階。庭院天香遍。興來翹首處。更嬋娟。一曲霓裳酒亂傳。

〔合〕愁頓解。涼消汗。恍疑身在清虛殿。塵世裏幾華筵。

〔前腔〕〔小生〕斜拖絲綰。輕搖紈扇。何處玉樓仙眷。湘簾高捲。遙看寶鑑空懸。

暗想當年奇遇。美景依然。眼底人俱換。水晶幽閣裏。象牀閒。欲把幽懷寄素絃。

〔合前〕

〔前腔〕〔淨〕碧澄澄水浸闌干。翠崑崑梧桐影轉。更金風細細。暗推歡面。莫教漏催銀箭。香冷金猊。且自耽佳宴。光陰容易減。豈長員。酩酊須教似謫仙。〔合前〕

〔前腔〕〔旦占〕畫堂深。鼉鼓音闐。碧空遙紫簫聲婉。怪丁東何處。搗衣砧亂。謾道光陰易度。勛業難期。終遂男兒願。玉壺傾盡後。意無邊。欲駕蘭橈弄碧漣。

〔合前〕

〔節節高〕〔衆〕姮娥永獨眠。可人憐。爭如牛女年年見。銀河淺。烏鵲翩。蒼山遠。灑灑玉露荷盤濺。綵鴛夢裏驚相換。〔合〕更取瓊漿共酣歌。清涼世界更長戀。

〔前腔〕冰輪乍皎然。正中天。懽娛不覺宵光半。綸巾岸。絺袖偏。棕鞋便。婆婆醉舞人爭羨。東方只恐陽烏換。〔合前〕

〔餘文〕月團圓。人康健。酒盃莫放此時乾。明夜還應結醉緣。

月下一尊酒。

高歌兩情暢。

豈無失意人。

對月空惆悵。

〔小生〕子野兄。你道豈無失意人。對月空惆悵。我輩暢飲酣歌。如何念彼失意人。〔淨〕失意豈得不念。只怕難得見耳。〔小生〕子野兄此話蹊蹺。想是青霞有甚消息。〔淨〕一猜就猜着了。先拜孫年兄一拜。我纔說與你知道。〔小生〕青霞若在。莫說一拜。百拜也不敢辭。〔淨〕青霞原來移住在永春坊。被一個富豪范銀團強逼成親。再三不肯。投告在孫年兄處。〔小生〕發落不會。〔淨〕孫年兄恐那富豪懷恨。從輕發落他去了。青霞依舊斷還與子京。若不是孫年兄主張。幾乎青霞與銀團摟在一處了。〔小生〕如此多感。待小生拜謝。〔末〕子京不須如此。一面着人迎取青霞回來就是了。

〔金菊對芙蓉〕〔小旦〕慾海收航。烟樓消障。玉釵新整鸞妝。〔小生〕頻勞夢想。今夜裏方解愁腸。〔合〕相逢喜劇。渾如夢寐。勝照銀缸。〔小生〕相別已久。虧殺你此心不變。〔小旦〕無限苦情。一言難盡。〔末〕東方已白。我輩告回。〔小生〕容日奉謝。〔末〕夫人處須要小心調護。〔小生〕我自有處。〔末〕青霞善事夫人。切莫爭寵。〔小旦〕多謝指教。〔末淨〕綺筵酣白日。金屋貯青霞。〔下小生〕你別後曾想我否。

〔玉山頽〕〔小旦〕從伊別後。罷濃妝慵登翠樓。鎮日裏珠淚交流。恨茫茫幾能

成就天長地久一點丹心依舊。如今虧了孫老爹。〔合〕感謝恩深厚萬倍難酬。願他名姓覆金甌。〔小旦〕不知相公會想奴家否。

〔前腔〕〔小生〕爲伊消瘦對鶯花無時不愁。幸今朝續配鸞儔。海誓山盟如何能負。懽容笑口喜過初逢時候。〔合前小生〕線兒請夫人出來。〔旦〕繡幌迎新日。金屏裊瑞煙。〔見科旦〕此是何人。〔小生〕正是我挂念的董青霞。〔旦〕從何而來。〔小生〕孫年兄與張子野送來在此。〔旦〕相公賀喜了。青霞我見汝猶憐。況小宋乎。〔小旦〕奴家不才自墮烟花得蒙大人拂拭。所謂生死骨肉。〔旦〕往事休論。謹修婦道。聽我說來。

〔玉交枝〕相逢不偶。愛卿卿言和義柔。從今一洗烟花垢。兩情更喜綢繆。相公離鸞別鳳應解憂。青霞雲鄉雨徑休回首。〔合〕把從前風月盡勾。早斷絕鶯侶若燕友。

〔前腔〕〔小旦〕清規願守。侍蘭房抱衾與裯。調脂弄粉誰還又。玉箏檀板都收。多謝夫人收留了。良緣已遂君子逌。相公長條免折他人手。〔合前〕

〔餘文〕十二時重鸞疊鳳人間有。這和氣春風。方信仙郎福分隆。

合浦還珠喜不勝。

小星恰合古人情。

今番占盡風流福。

絲竹青樓月自明。

第三十七齣 禍禳左道

〔小旦上〕芳閨誇豔色。四海譽神兵。自家胡永兒自也。因賣泥蠟燭。賺誘貝州王則。去見聖姑姑。成其大事。如今三十六州。俱以歸順矣。帳下張鸞卜吉。他二人變化無方。癘師左黜。神通不測。以致宋將明鎬。望風奔潰。真個天下無敵。豈不樂哉。今日兵閒無事。召諸將宴賞一回。卻不是好道猶未了。諸將到來。〔衆上〕將相本無種。男兒當自強。〔衆將官拜介〕后皇萬歲。〔小旦〕卿等平身。〔衆〕皇上來也。

〔賀聖朝〕〔丑〕天福神皇神后。桓桓羣將多籌。等閒握璽御龍樓。玉食錦衣消受。大丈夫不能流芳百世。亦當遺臭萬年。寡人王則是也。法受五龍位。登萬乘。可謂富貴之極矣。今日宴勞諸將。不知筵席完備未曾。〔淨〕完備多時。〔丑〕

〔宜春令〕流光迅。菊已秋。嘆人生誰長黑頭。鳳簫鸞管。風流肯落誰人後。庭院深翠繞珠圍。琴瑟好天長地久。〔合〕且流連花前。玉斝鬱金芳酒。

〔前腔〕〔衆〕參帷幄。出異謀。謝深恩榮封列侯。月弓星劍。千回不弱蛟龍鬪。指顧間霧罩雲籠。呼吸處風飛電走。〔合前丑〕酒闌矣。諸將班師回營去也。

〔包子令〕〔衆〕持世當今彌勒尊。彌勒尊。五龍滴淚演經文。演經文。福背分明。天數定。管教一戰定乾坤。定乾坤。〔合〕須知韜略屬釵裙。須知韜略屬釵裙。

〔前腔〕鶴化獅驚猛虎尊。猛虎尊。豆兵草馬陣排雲。陣排雲。計就貝州登寶位。笑他明鑄望風奔。望風奔。〔合前淨〕左黜奏事。昨日拿得一個和尚。喚名慧雲。善能風鑑。早知

過去未來。〔末〕和尚稽首。〔丑〕說你會相。仔細相寡人一相。〔末背〕此人即日亡矣。正是在人矮簷下。怎敢不低頭。目今說他好。庶免刑戮。〔轉云〕萬歲天日之表。龍鳳之姿。乃真命天子也。〔丑〕皇后何如。〔末〕皇后玉容月貌。乃太陰星化身。福壽必遠。〔小旦〕相得好。相得好。除他禮部員外郎。〔末〕小和尚出家人。不願官職。〔小旦〕既不願官職。賞他黃金十兩。放他出去。〔丑〕不要放他。留在軍中。

看些氣色最便。〔淨〕報事報事。宋朝差文彥博來代明鎬行兵。明日交戰了。〔丑〕不怕他不怕他。諸將用心去與他交戰。不要慌張了。〔衆〕得令得令。

不怕文元帥。

精心出銳兵。

血流東海赤。

刀削泰山平。

第二十八齣 平妖奏績

〔點絳脣〕〔外上〕誓復中原九重特遣持夫鉞。兵強謀決。國恥須臾雪。下官文彥博是也。粗有文才。兼精武事。雖不及戰國廉頗。頗稱當日唐朝裴度。如今王則作寇。明鎬喪師。只得自請于朝。出師至貝。蒙多日神祕語。得三遂可以平妖。不料果遇三遂。大事可賀矣。昨日已下戰書。不免分付衆將。一回。尅定今午交戰。〔衆〕庶士羅妖網。乾坤發殺機。想應天帝醉。一任賊奴爲。元帥有何號令。〔外〕妖法難防。賊勢甚盛。不可玩寇。諸將務要運奇設策。頭一陣用諸葛遂入陣。第二陣馬遂出戰。第三陣李遂出戰。毋得紊亂。〔衆〕得令。

〔四邊靜〕貔貅百萬肝如鐵。堂堂陣排列。妙算過穰苴。神機並諸葛。〔合〕天威

赫烈。潢池震遏。一劍靖妖氛。功成拜金闕。

〔前腔〕千妖萬怪那能滅。須先搗巢穴。法按六韜書。呪用九天訣。〔合前外〕妖兵來緊了。上前斫殺。〔衆下丑淨小旦上〕

〔水底魚兒〕聖術玄靈。騰空百萬兵。任他衆勇。殺盡莫容情。〔丑〕你看宋兵行伍整肅。旗號精明。比前明鎬時大不同了。務要用心對敵。張鸞守城。皇后作呪。往前斫殺則個。〔小旦〕宋兵來的緊。好上前斫殺。〔並下〕

〔前腔〕〔外末小生〕戰鼓雷轟。旌旗隊隊明。心齊力併。攻破貝州城。〔丑淨左〕任他衆勇。殺盡莫容情。〔丑〕頭一陣那宋兵彼俺殺過一半。兵驕易敗。汝等務要用心對敵。〔外〕心齊力併。攻破貝州城。妖法變詐。實是難破。但見口中念念作聲。喝聲道疾風迅雷電雨即時交作。如何設計。抵得他過。〔小生〕這個不難。只把猪狗之血。望空潑去。其法卽破矣。〔交戰潑血科丑淨〕罷罷。時乖靈法破。兵敗將心墮。〔並下外〕追上前去。〔小生〕妖兵俱已進城去了。他若閉門不戰。怎奈他何。莫若掘地而入。出其不意。庶可勦滅。〔外〕此計甚妙。併力爲之。〔下淨丑〕攻城無妙策。

掘地是良謀。我每不是別的。李遂部下小校是也。將軍着俺夜深掘地。務要秘密。莫使賊人知覺。
〔掘地科丑〕好了好了。地洞掘穿了。快趨進去。〔衆吶喊介〕

〔縷縷金〕〔小旦〕魂忽忽。淚漣漣。逃身無處所。苦難言。〔淨〕拿住了。〔外〕帶那胡永兒過來。王則那裏去了。〔小旦〕王則被亂軍殺了。乞饒奴家一命。萬望恕罪。代代公侯。篡逆非吾願。乞行方便。〔外〕你把生靈糜爛罪滔天。嚴刑怎生免。〔丑〕又拿得一個和尚來了。

〔末〕和尚喚名慧雲。不曾從反。〔小旦〕果然不從。〔外〕你實實的訴來。

〔憶多嬌〕〔末〕衣與鉢。窮過活。托身蕭寺。甘寂寞。爲風鑑。逢妖難離脫。〔外〕此情哀切。非罪如何妄殺。胡永兒罪極情真。梟首示衆。慧雲情有可矜。姑留再鞫。

六師奏凱千邦靜。

三遂平妖萬古傳。

第三十九齣 帝闕辭榮

〔夜遊朝〕〔小生生上〕黼黻皇猷。才力壯。登鳳閣。日觀清光。〔淨〕滿月浮雲。平衢湧浪。可恨無端魔障。〔見科淨〕你兄弟二人被李淑奏劾。知也不知。〔生〕這奸人把甚麼事來。

劾我兄弟。〔淨〕他本內說道。宋乃我朝受命之號。郊者交也。合姓名而言之。以爲不祥之兆。宋祁娶妓爲妾。行不端謹。皆宜罷黜。以懲不軌。以警人臣。〔生小生〕旨意如何說。〔淨〕旨意道。宋郊之名。必由父命。況無他意。便可改名祥。以杜讒口。宋祁娶妓爲妾。亦是細事。姑免究。着各用心供職。〔生小生〕萬歲萬歲萬萬歲。〔淨〕二位須作急上本謝恩。〔小生〕這奸人千般謀孽。難與同朝。況爹爹年老。無人侍養。哥哥。我和你。不若上表辭官。歸家省親。卻不是好。〔生〕說得有理。我如今與你上請乞恩。

〔催拍〕感天恩。榮登廟廊。一心望功。銘旂常。嘆世事難量。貝錦青蠅。讒口交張。腹劍心刀。直性難防。〔合〕明日共奏君王。辭印綬。返柴桑。

〔前腔〕〔小生〕誰不願衣紫腰黃。還須慮同袍中傷。況白髮高堂。寂莫晨昏。菽水誰將。陟愴空思。怎解愁腸。〔合前〕

〔嫌〕〔淨〕你兄弟呵。德重珪璋。黽勉從王。分所當。〔生小生〕非不欲立功報主。奈此奸人當道。〔淨〕從人謗。豈應解組便還鄉。細端詳。青年未合投草莽。聖主恩深。意怎

忘〔生小生〕忠孝不能兩全。我兄弟二人斷然要歸去了。情非強。此行定得親終養。免罹
讒網。免罹讒網。〔小生〕哥哥。你與子野兄先入朝去。我略整行裝。就同上表。〔生淨〕急上辭官疏。
遙傳法禁鐘。〔並下占小旦小生〕奸人李淑劾我兄弟二人。我如今上表辭官。收拾行李起程。

〔前腔〕〔占小旦〕聽說心忙。解翠收珠促去裝。〔小生〕我入朝去也。晨鐘響。急趨金
闕上封章。〔下占〕他兄弟雖去上表。未知吉凶何如。事難量。重瞳眷注那輕放。〔占〕濟世

良才惜早藏。〔小生〕封章已上。想必就有玉音到來。〔占〕朝廷有何虧你處。只管要回家去。你閒
想。玉堂金馬人欽仰。此生不枉。〔生相見科〕兄弟。讒口難調。歸心已決。不必遲疑了。〔小生〕

未知聖上旨意若何。〔外〕奉聖旨。宋郊宋祁朕方倚用。不准辭官。既親老在堂。着馳駟歸省。以盡人
子之情。限五個月以內復任管事。望闕謝恩。〔生小生謝恩科〕天使大人請坐。〔外〕別有公幹。不
及坐了。〔生〕永昌。快去駟中催趲船夫。就此起程。〔末〕理會得。〔丑〕駟承稟事。船夫俱已齊備了。

〔小生〕挂冠□帝闕。鳴珮上仙舟。〔並下生上〕

〔長拍〕露冷蘋江。風銛鷁舫。望楚天浩然長往。亂飛木葉。一片片醉着青霜。孤

驚逐雲翔。更斷鴻嘹唳。處盡成惆悵。回首楓宸空自戀。何日鳴珂夜未央。只恐人哆侈萬千狀。且自慶高堂春不老。畫錦歸雙。〔下小生旦小旦〕

〔短拍〕渺渺銀帆。滔滔玉浪。暮秋天滿眼淒涼。何處是家鄉。眇盡愁雲慘霧。還隔斷萬峯千嶂。日晚行行且止。聊繫纜古駟殘陽。

〔尾聲〕麋林外楓江上。數聲殘角送昏黃。歸夢應隨歸路長。

一封朝奏九重天。

夕泊歸舟古駟邊。

浪盡月沈人睡熟。

不須待漏五更寒。

第四十齣 他鄉遇故

〔風入松〕〔生上〕

蕭條驛路客愁增。更江天雪冷。永昌。我聞知文老爹在此。他得勝回

朝。禮當拜賀。請小相公出來商議。〔末〕小相公有請。〔小生〕哥哥。喚兄弟來。有何話說。〔生〕座主在

此。我和你該去拜賀。〔拜科〕貂裘虎帳寒威淨。忝門下途逢有慶。〔小生〕用甚麼禮。

〔生〕取四疋綵段去。無由獻區區下情。將綵幣表微誠。哥哥。座主爲何駐兵在此。

〔前腔〕〔生〕聞知北伐武功成。喜軍容肅整。〔小生〕借問何如霍去病。〔生〕其功不小。料此日重華欣慶。寒雪擁貔貅暫停。須奏凱返神京。〔末〕此間是轅門了。起煩通報。〔丑〕來者何官。〔末〕末狀元兄弟乃是老爺門下。〔通報介〕

〔念奴嬌〕〔外〕功高血戰。喜捷書飛奏。鼓笳聲競。從此潢池無竊警。力勝何如謀勝。飲馬窟寒。射鵰風勁。滕六施嚴令。瑤花瓊樹。幻成無限佳景。〔木蘭花〕乾坤

凜冽。滅寇營前飛瑞雪。獨立凝眸。可笑青山也白頭。盃行到手。只因爛醉梅花酒。聖德無涯。裘帽遙從鳳闕來。〔相見介生小生〕老師文修武備。彈壓天下。今喜妖氛盡掃。助望益隆。賤兄弟特來奉賀。

〔外〕妖寇已平。朝廷之福也。老夫焉敢受賀。〔生小生〕門下之情。望勿堅卻。〔外〕左右收了。〔生〕老師成此大功。國家之柱石也。〔外〕寇賊百萬。一戰即平。中間有一僧。情雖有可矜。難遽釋放。〔生〕既在賊黨。難從寬宥。〔外〕那和尚訴稱善能風鑑。名喚慧雲。〔生〕若是那相面的慧雲。我就保他。〔外〕想賢契與他有舊。〔生〕門下與舍弟宋祁。曾喚他相過。相俺二人同中狀元。今有此驗。已是難得。況此僧極有戒行。豈有爲寇之理。〔外〕賢契。你不說我怎知。我自有處。〔生小生跪科〕望老師饒他性

命〔外〕我有主張。必然不妄殺他。取慧雲過來。〔外見科〕果妙人也。可敬可敬。左右解了綁。換了衣服。〔末〕宋相公。你爲何在此。〔外〕那和尚。你不知活命之恩乎。辨你冤情。皆二公之力也。〔末〕恩當重報。〔外〕和尚說你相術甚高。勞你相我一相。〔末〕老爺貴相。燕頤龍睛。踞虎形。封侯拜相。冠羣公。〔本〕生來自有神仙骨。〔喜〕不老還同松柏春。〔外〕言之過矣。喜二位賢契光顧。又喜高僧相術甚佳。眞所謂他鄉遇故知。左右整酒來。乘此大雪之時。同玩賞一回。多少是好。

〔本序〕〔生〕彤雲萬里。見天花攪亂。渾如柳絮飄零。四顧遙村。盡處是玉樹瓊樓相映。你看漫天大雪。乃是國家豐年之兆也。那更斷澗銀填。長橋壁跨。四時爭見此佳景。〔合〕須備取肥羔美醞。同醉閒庭。

〔前腔〕〔末〕千頃寒江正冷。見漁翁獨釣。玉笠銀簑。孤艇萬徑千山。何處有飛鳥行人蹤影。還應山意衝寒。梅花將放。謾勞逋叟動吟情。〔合前〕

〔前腔〕〔小生〕明瑩色奪瑤屏。光搖銀海。案頭何用讀書燈。風味美。最是細擘龍團來烹。偏稱翠閣嬋娟。銷金帳裏。淺斟低唱笑盈盈。〔合前〕

〔前腔〕〔外〕堪慶。三白呈祥。萬象稱瑞。笑占南畝。絕蝗螟。融液處。疑是玉馬東瀛。愁聽黃竹哀歌。來思悲詠。陽春誰和。郢中聲。〔合前〕

〔古輪臺〕〔衆〕玉龍爭殘鱗。敗甲散滄溟。青山老盡銀尖並。園林絕勝。看翠竹蒼松。翻做三春梨杏。鶴舞鸞翔。隨風未見。飢鳥凍雀繞簷楹。低飛不兢。亂紛紛斜撲窗楞。乾桑蠶食。平沙蟹走。細聲堪聽。六出巧誰能。銀河淨。馮夷翦練。技偏精。

〔前腔〕閒評。蕭蕭沙漠。嘆蘇卿。相室有萬乘。來臨。恩光忒盛。匹馬藍關。撲足銀盃難騁。也有策蹇騷人。灞橋獨詠。也有朱門謁遍。甌生冰。遭時不幸。山陰孤棹。興堪乘。梁園遊賦。何如僵臥。茅齋寂靜。夜半破吳城。鵝池溟。更誇百戰不持兵。〔尾聲〕東風轉麗日升。料此際寒容消盡。只恐飛來鬢上生。

沈醉金樽且放懷。

雪飛江上臘梅開。

紅爐煖閣還嫌冷。

尙有樵人跣足來。

第四十一齣 尋樂江村

〔漁樵牧農同外上漁樵答話科〕好好好。扮一回漁樵答話。且慢慢的來呵。〔漁上〕過橋搔背船非小。〔樵上〕山裏斫柴似剃頭。你看農夫與牧童也來了。〔農牧答話科〕好好好。扮一回農夫與牧童答話。且慢慢的說來。〔農上〕犁倒地皮方是好。〔牧上〕倒騎牛背唱回歌。〔衆唱歌〕哩噠哩囉哩哩囉。〔漁〕自家喚作漁翁。一身弄得精窮。有人問我緣故。只是飲酒三鍾。〔樵〕自家喚作樵人。一身斫得筋疼。有人問我緣故。只是痛飲三句。〔農〕自家喚作農人。栽秧打麥辛勤。有人問我緣故。村中受樂無窮。〔牧〕自家喚作牧童。短笛橫吹幾聲。有人問我緣故。倒騎牛背長吟。〔衆〕我每快樂似神仙。今日談論許多好處。不免大家且唱一回。消消悶懷何如。

〔割豎兒〕〔漁〕滄江烟水憑誰占。得魚便望岸頭帘。沾多面如茜。笑掀短髻。〔合〕閒中味甜。世途忒險。青笠綠簑。紅塵不染。

〔前腔〕〔樵〕丁丁翠袖松風撼。一挑時度白雲巖。爛柯被仙賺。頭顱雪添。〔合前〕〔前腔〕〔農〕鹿門龐老吾何忝。一犁耕破隴烟藍。雞豚早秋斂。盆醪自酣。〔合前〕

〔前腔〕〔牧〕斜陽犢背鴉光閃。隨羣弄笛野橋南。莎村雨痕淡。擁書角尖。〔合前

衆〕我每四人有如此之樂。請問老先生心事如何。

〔新水令〕〔外〕春風寶馬醉長安。喜歸來疎髯霜淺。滄洲三畝宅。青野數坵田。斷送流年。有數點白鷗伴。〔衆〕老先生正好做官。如何就回來了。有甚事幹。

〔北慶宣和〕〔外〕薄命蛾眉枉自妍。嫉妬滔天。蕙苴將軍豈非冤。誰辨誰辨。〔衆〕老先生在家有何事幹。

〔北折桂令〕〔外〕學陶潛。五柳栽烟。屈子騷經。杜老詩編。醉後閒臨書義。獻帖。兔管鸞箋。〔衆〕老先生怎麼不講些道學。也好哄動縉紳。〔外〕那肯向譎儒講道。〔衆〕煉些

金丹也好。〔外〕也休提敗事修玄。我只是玉管冰絃。雲髻花鈿。兄弟樓中。兒女燈前。〔衆〕老先生也愛我四人之樂麼。

〔雁兒落〕愛殺他閒雲淡蓼渚。竟愛殺他倦臥松雲煖。愛殺你犁雲拂草衣。愛殺你騎犢吹蘆管。我樂不比你四人。

〔得勝令〕春時節慢騰騰策杖綠楊川。喜飄飄紅裙海棠筵。夏時節嫩盈盈玉液荷筒勸。睡齁齁琅玕小簟眠。秋時節紫蟹鬪鱸鮮。密層層種黃花三徑遍。冬時節含笑野梅邊。碧澄澄鳳團茶掃雪煎。〔衆〕老先生還想去做官麼。

〔北鴛鴦煞〕〔外〕翠圍眠夢斷麒麟殿。鶴汀遊影絕豺狼苑。狐媚途忙。鼠奔空健。說甚鷺翹雲盤。驄蹄霜踐。鹿豕山幽。畢竟鳳皇天遠。鳧履脫。鸚冠便。鸚鵡文章罷敷演。〔衆〕老先生這般快活。

〔北絡絲娘煞犯〕又何稱風流晉賢。真不忝逍遙閬苑。〔末〕錦衣歸故里。端的是男兒。二位相公榮歸。將到家了。〔外〕我正與四人講得親切。又不免相別了。

簫鼓喧聲震綵船。

膝前雙鳳錦衣旋。

漁樵耕牧相談笑。

又得浮生半日間。

第四十二齣 衣錦團圓

〔破陣子〕〔生上〕芳樹光浮玉障。晴雲影落金泓。狀元門第雄。歸田畫錦。庭幃

瑞氣濃。鼓簫喧綺叢。

〔河西七娘子〕〔小生旦占〕危船歷盡江程永。喜歸來繡楹華棟。彩映金鋪。香霏瑤洞。輝煌珠翠冠瞻聳。

〔稱人心〕〔外〕山林疎聳。丹心尙抱餘忠。〔旦紅翠〕燈宵焰鸞心暗融。喜見盈衢騶從。〔合〕歡深喜重。爭歆羨氏族輝光。還感戴聖朝恩寵。〔相見介生小生〕〔菩薩

蠻〕魁名幸顯趨庭教。九天丹鳳乘新詔。〔外〕兄弟錦衣旋。桑榆樂萬千。〔旦上〕仙羣諧伉儷。秀氣兼和氣。天道定無私。祥鍾積善第。〔外〕將酒過來。〔末〕老爺酒在此了。〔外〕

〔海山歌〕自古文章有用。荷清朝不負英雄。難兄難弟共享祿千鍾。乾坤瑞見雙雛鳳。狀元迭中。喜氣滿胸。佳兒美婦喜事又重。〔合〕皇恩厚。家慶隆。人生須是積陰功。

〔前腔〕〔小生旦占〕那日鷓鴣戲詠。句猖狂誤入椒宮。誰知天幸。威霽轉懽悰。洞房雙炬金蓮送。仙娥賜偶。喜氣滿胸。興奴樊素。喜事又重。〔合前〕

〔前腔〕玉罍金盃高捧。勸酬間金紫光榮。筵開羅綺。寶篆瑞烟濃。當門棹楔山川重。一門榮貴。喜氣滿胸。錦衣歸晝。喜事又重。〔合前〕

〔越恁好〕〔衆〕滿門懽縱。滿門懽縱。喜相逢疑是夢。三牲五鼎勉供奉。綵衣翻動。〔合〕重重喜慶人傳誦。聲華出衆。□家添取雙梁棟。多才多藝扶皇宋。

〔前腔〕畫堂晝永。畫堂晝永。看輝煌珠翠擁。歌聲滿耳懽聲共。管絃交弄。〔合前〕

〔尾聲〕文編四喜成何用。但梨園新添一種。付與知音一笑中。

父能教子子揚名。

兄弟情怡友難拯。

道合君臣夫婦樂。

綱常風月兩堪稱。

四喜記終

